

EXERCITATIONES

AD

PRINCIPIORUM
PHILOSOPHIÆ


RÉNATI DESCARTES

Partem primam,

AUTHORE

JOHANNE SCHULERO,


Philosophiæ Doctore & Professore.



ULTRAJECTI,

Ex Officinâ JOHANNIS ab HULSHUYSEN,


Bibliopolæ. cId Id c LXVII.



Amplissimo, Clarissimoque VIRO

D. J U S T O T U R C Q,
MEDICINÆ DOCTORI PERITISSIMO, CON-
SULI CIVITATIS BERGOZOMÆ PRIMARIO,
ILLUSTRISSIMÆ MARCHIONISSÆ à CONSI-
LIIS, CURIÆ FEUDALIS PRÆSIDI VIGILAN-
TISSIMO, REDITUUMQUE ECCLESIASTICO-
RUM ADMINISTRATORI, &c.

S. P. D.

 Nnus jam abiit, Vir Amplissime,
& amplius, ex quo Specimen quod-
dam Examinis Philosophi-
sianæ conscripsi, quod perspicue
satis atque breviter primaria istius
fundamenta *Lib. 11, Phil. Cart.* posita, subvertisse
existimo. Cumque interea, dum illud pælo sub-
esset, etiam hasce meas ad *Lib. 1.* annotationes ab-
solvissem, in publicum tamen protrudere easdem
ad tempus nolui; quia primò aliorum quorun-
dam ad dictum Specimen responsionem expecta-
bam vel iudicium, quò, sicubi errasse me istic
deprehenderem, faciliùs hinc corrigèrem;
vel saltem, ne latius proserperet error, diligenter
caverem. Verùm enimverò, cum ex Cartesii
Discipulis, nemo comparuerit hactenus, qui di-

D E D I C A T I O.

Etatorum ipsius se præstet patronum, meumve Specimen refutare conatus sit, diutius easdem publico, variis id rogantibus, denegare vix potui. Addidi quoque Exercitationem, qua argumenta Aristotelis, Procli, Averrois, aliorumque pro æternitate Mundi breviter discussi. Cum enim Mundum immensum statuunt Cartesiani, vix fieri posse existimabam, quin tandem ipsum quoque æternum esse sint asserturi. Scopus meus in hisce omnibus qui fuerit, ex Speciminis mei præfatione, quam & hic præfixam volo, sufficienter apparet.

Cæterum, Cl. Vir, Exercitationes hæc meas Philosophicas Amplissimo tuo Nomini consecra-
 vit animus, non tantum ea ratione, quod liberioris Philosophiæ Te studiosissimum semper fuerim expertus, & ab iis, qui sese aliorum mancipant opinionibus alieniorem; verum etiam quod publicum tandem qualecunque affectus mei erga Te, & sincerioris inter nos amicitiae jam ab ipsis incunabulis in Urbe patria natæ, & hucusque continuatæ, in Mundo testimonium extaret. Accipe ergo, Vir Cl. chartaceum hoc munusculum, perpetuum officiosi animi signum atque *μνημόσυλον* ab eo, qui ex animo Deum precatur, ut Te Civitatis patriæ columnen atque ornamē-

DEDICATIO.

namentum, ejusdem Politicæ simul & Ecclesiæ
bono incolumem diutissimè superesse dignetur,
Spiritu suo regere pergat, sensumque immorta-
litis æternæque gloriæ magis magisque in Te
obsignet. Dabam Bredæ eo die, quo, ipso Mar-
te frequentibus assiduisque trophæis quasi ex-
pleto exhaustoque, atrox & immane bellum cum
jucundæ pacis sereno commutatum Europa vidit.
c l o 10 c LXVII.

*Amplissimo tuo Nomini
deditissimus*

JOH. SCHULER,

IN ERUDITAS

Reverendi Theologi, & Philosophi

D. JOHANNIS SCHULERI,

Exercitationes Cartesianas.



*N*cipis in cathedris nimis imperiosa tacere
 Nec resonant vetus hoc, muta Stagira, sophôs:
 Regnatum satis est, nescis servile tueri
 Imperium, & fasces puluerulenta tuos:
 Gallus, adoratum caput, & sublimia nuper
 Qui dedit, inflixit Vulnera prima tibi:
 Dimidius fuit ille labor: Vix migrat adultus
 Error, & ostentas debilis usque caput;
 Sed nova cum nostri & doctissima pagina civis
 Prodiit, ab superest, quin moriari, nihil!
 Cum nimis ille sua, qui tantum læsit, amaret,
 Proximus est barathro, jam jugulata, tuo:
 Non fuit unius totam absorbere Minervam,
 Diversos voluit semper habere Lares:
 Si tamen ulla sibi sapiens tentoria fixit,
 Hic illic peregre est, tota sed hic habitat:
 Cum sit tanta hujus Majestas incola mentis,
 Qui volet alternis scribere, viclus erit.

J. TURCQ.

INDEX

I N D E X Q U Æ S T I O N U M,

Quæ hiscé Exercitationibus continentur
& explicantur.

QUÆST.	pag.
I. <i>An veritatem inquirenti de omnibus dubitandum sit?</i>	1
I I. <i>An dubia pro falsis habenda?</i>	2
II I. <i>An dubitandum sit Philosopho, an ulla res sensibiles, aut imaginabiles existant?</i>	3
I V. <i>An de demonstrationibus mathematicis dubitari queat?</i>	5
V. <i>An semper in potestate nostra sit cavere, ne unquam erremus?</i>	6
V I. <i>An cognitio, (ego cogito ergò sum) sit omnium prinia & certissima, qua cuilibet ordine Philosophanti occurrat?</i>	7
V I I. <i>Unde cognoscatur differentia inter corpus & animam?</i>	8
VIII. <i>Utrum ex sola cogitatione existentia nostra certò concludi queat?</i>	9
I X. <i>An Logica definitiones semper sint necessaria?</i>	11
X. <i>An Mens notior sit quam corpus?</i>	12
X I. <i>An à cognitione Dei omnium aliarum rerum cognitio dependeat?</i>	14
XII. <i>An existentia necessario in Idea Dei contineatur?</i>	16
XIII. <i>An rerù, qua nusquã sunt aut fuerunt, idea à mente formati queant?</i>	18
XIV. <i>An & quomodo Idea una altera sit perfectior?</i>	19
XV. <i>An Idea Dei in nobis à Deo sit producta?</i>	21
XVI. <i>Qualis sit nostra de Deo cognitio?</i>	22
XVII. <i>An argumentum ab Idea Dei desumptum, ad existentiam Dei demonstrandam, novum sit, & jam tandem inventum?</i>	23
XVIII. <i>An naturali lumine demonstrari possit, nos à Deo esse conditos?</i>	24
XIX. <i>An ex duratione nostri existentia Dei demonstrari possit?</i>	26
X X. <i>Utrum ex Idea Dei præter existentiam alia quoque ejusdem perfectiones demonstrari queant?</i>	27
X X I. <i>An Deus sit corporeus; item, an sensu præditus?</i>	ibid.
X X II. <i>An Deus non velit malitiam peccati?</i>	29
XXIII. <i>De ordine Scientiarum, sive qua Methodo sit Philosophandum?</i>	30
XXIV. <i>An credenda quacunquæ à Deo sunt revelata, etsi non clarè intelligantur?</i>	31
X X V. <i>An infinitum & indefinitum differant?</i>	32
XXVI. <i>Utrum in Philosophia non sit agendum de Fine?</i>	34
	XXVII.

I N D E X.

XXVII. <i>Utrum Deus possit esse causa erroris?</i>	ibid.
XXVIII. <i>An facultas cognoscendi homini data non possit falsum pro vero apprehendere?</i>	36
XXIX. <i>Quanam sit causa erroris?</i>	38
XXX. <i>Quando erret Intellectus?</i>	39
XXXI. <i>An ad judicandum requiratur actio voluntatis?</i>	40
XXXII. <i>An voluntas dici queat infinita?</i>	41
XXXIII. <i>An Deo errores mentis nostra imputari queant?</i>	42
XXXIV. <i>An summa perfectio hominis sit, quod agat liberè?</i>	43
XXXV. <i>An errare defectum arguat in actione tantum, & non in natura nostra?</i>	46
XXXVI. <i>An Deo, cum potuerit dare mentem erroris expertem, errores imputari nequeant?</i>	ibid.
XXXVII. <i>An Libertas assentiendi vel dissentendi nobis innata sit?</i>	48
XXXVIII. <i>An omnia à Deo praordinata sint?</i>	49
XXXIX. <i>An & quomodo aeterna Dei praordinatio cum arbitrii nostri libertate concilietur?</i>	50
XL. <i>An falli & assentiri falsis differant?</i>	52
XLI. <i>Quando fallatur intellectus?</i>	53
XLII. <i>Quid sit perceptio clara & distincta?</i>	55
XLIII. <i>De summis rerum generibus.</i>	57
XLIV. <i>Utrum in Anima dentur species innatae?</i>	58
XLV. <i>Utrum Anima seu Mentes inter se sint aequales?</i>	59
XLVI. <i>Quid sit Substantia?</i>	61
XLVII. <i>An Entis nomen Deo & Creaturis univocè conveniat?</i>	62
XLVIII. <i>Unde Ens cognoscatur?</i>	64
XLIX. <i>An cujusque Entis unum sit principium attributum, quod ipse naturam seu essentiam constituat?</i>	65
L. <i>An in extensione Corporis, in cogitatione verò Anima essentia consistat?</i>	66
LI. <i>An Idea Entis tum corporei tum incorporei, sive creati sive increati Dei, clara & distincta esse possit?</i>	67
LII. <i>De: Duratione, Ordine, & Numero.</i>	69
LIII. <i>Quid sint Modi, qualitates, attributa, predicata, affectiones?</i>	70
LIV. <i>Quid sit Tempus?</i>	71
LV. <i>Quid & quot sint Universalia?</i>	72
LVI. <i>De variis distinctionum generibus.</i>	73
Exercitatio Philosophica, qua refutantur argumenta Aristotelis, Procli, item & Averrhois, aliorumque, quibus aeternitatem Mundi probare conati sunt.	

EXERCITATIONES,

A. D.

PRINCIPIORUM PHILOSOPHIÆ

RENATI DES CARTES

PARTEM PRIMAM.

QUESTIO I.

An veritatem inquirenti de omnibus dubitandum sit?



Renatus des Cartes de Principiis humanæ cognitionis exorsus imprimis hoc Philosopho agendum existimat, ut omnia in dubium vocet, nihilque pro vero admittat, in quo vel levissima incertitudinis suspicio reperiatur. Verba ipsius sic sonant §. 1. *Quoniam, inquit, infantes nati sumus, & varia de rebus sensibilibus iudicia prius tulimus, quam integrum nostra rationis usum haberemus, multis præjudiciis à veri cognitione avertimur; quibus non aliter videmur posse liberari, quam si semel in vita de iis omnibus studeamus dubitare, in quibus vel minimam incertitudinis suspensionem reperiemus.* Nihil equidem certius unquam aut verius dici existimo, quam præjudiciis, quibus ante rationis usum imbuti sumus, à veri cognitione sæpissimè nos averti. Usque enim adedò homines præjudiciis suis sive præconceptis animi opinionibus adhærere plerumque videmus; ut nullas ob rationes utut evidentissimas ab iis se dimoveri vel minimum patiantur. Ità ut præjudicia magno veritatem indaganti sunt impedimento. Hisce ergò Philosophum immunem esse oportet, & pure ac libera ad Philosophandum se accingat necesse est. At verò, utrum universalis illa de omnibus dubitatio, in quibus vel minima incertitudinis suspicio occurrat, vel cogitando effingatur, aptissimum sit medium, quo liberari iis mens nostra queat, meritò in dubium vocari posset. Ecquis enim dubitet de iis, quæ jam per se aut primò vera esse, præjudicio nullo occupatus, existimat: Quis utrum infans natus sit, quod ipsum Cartesium hic supponere videmus, in dubium trahat? Nam & hic fortè à Cartesio incertitudinis scrupuli moveri possent. Mco itaque

que iudicio, quod & expertus dico, optimè præiudicii mens liberabitur, si ad rationes, quibus opiniones præconceptæ fundatæ sunt, diligenter attendat, easque omni partium studio seposito accuratè examinet, insuper & rationes, quibus contraria sententia demonstretur, seriò advertat. Concludo igitur veritatis studio non de omnibus temerè dubitandum, cuncta verò diligenter esse examinanda, rationesque singulas pro & contra, quæcunque fuerint, antequam quid verum aut falsum sit à mente definiatur, accuratè ponderandas. Quibus peractis. Mentem usque ad eò ab veritatis radiis collustratum iri existimo, ut continuò, nisi prorsus cæca sit, veritatem ipsam sit perceptura.

Q U Æ S T I O I I.

An dubia pro falsis habenda?

De hac re ita progreditur Cartesius §. 11. *Quin & illa etiam, de quibus dubitabimus, utile erit habere pro falsis, ut tanto clarius, quidnam certissimum & cognitum facillimum sit, inveniamus.* Meo autem iudicio, sicut ille peccat Philosophus, qui certa & vera habet pro dubiis aut falsis, ita non minus illum peccaturum existimo, qui dubia habet pro falsis. Cum enim veritas consistat in conformitate mentis cùm re, & dubitatio sit quasi cessatio mentis, aut iudicii suspensio, propterea quod rationum veritas aut evidentia nondum apparet, utique non minus periculosum videtur dubia pro veris, quam pro falsis assumere, quia, utrum veræ an falsæ sint, non constat. Quomodò ergò falsas dicimus rationes, quas nondum falsas esse intelligimus? Profectò, sicut falsum non possumus iudicare, quod ut verum apprehendimus, ita neque falsum affirmare valemus, quod nobis falsum esse non apparet. Cum igitur dubia non appareant falsa, utique eadem dum sic apparent, falsa dicere aut negare haud possumus.

Deinde, si dubia, eave de quibus aliquo modo dubitare possumus, pro falsis habenda sint, utique quamplurima fidei mysteria & Sacra Scripturæ dicta pro falsis habenda erunt, quia de eorum plurimis sapissimè vel doctissimos dubitare constat. Quot etiam Scripturæ Loca occurrunt, quæ diversimodè à diversis explicari solent, singulorumque explanationes rationibus fulciri satis speciosis? Nunquid diversas hæc explanationes & sæpè contradictorias simul falsas iudicabimus? Cum enim alterum contradictoriorum semper verum sit, alterum falsum, certè duas ejusmodi explanationes, Licet utram præferas dubites, falsas iudicare non potes.

Neque

Neque obstat, quod Cartesius subjicit, §. 3. *Hanc dubitationem ad solam veritatis contemplationem esse restringendam.* Nam, inquit, quantum ad usum vita, quia persapere rerum agendarum occasio prateriret, antequam nos dubiis nostris exsolvere possimus; non raro quod tantum est verisimile cogimur amplecti; vel etiam interdum, etsi de duobus unum altero verisimilius non appareat, alterutrem tamen eligere. Nam & ea, quæ jam suprà à nobis dicta sunt, solam veritatis contemplationem spectant, ut consideranti manifestum arbitror. Ex. gr. Utrum sceptrum tempore nativitatis Messia à Judæis planè fuerit ablatum, nec ne; vel quis sit sensus Loci. Gen. XLIX. 10. Affirmant quidam, negant alii. Rationes ab utraque parte proferuntur. Quid hic faciendum? Anne propter minimam dubitatiunculam, quæ alicui fortè occurrere possit, utramque sententiam falsam dicemus? Quid absurdius? Et ne quis Cartesium de rebus & quæstionibus Philosophicis duntaxat loqui excipiat, aliud esto exemplum: Affirmant quidam quatuor dari elementa, ignem, aërem, aquam, & terram ex quibus corpora quævis naturaliam componantur & generentur; Alii verò, & quidem nostro judicio longè probabilius, negant. Tu dubitas fortè, quæ sententia verior sit. Num propterea utramque sententiam falsam dixeris, donec omnis tibi sit ablatas Scrupulus? Neutrum ergò tuo judicio erit verum, corpus componi ex quatuor elementis, & non componi: id est, duo contradictoria tuo judicio simul erunt falsa, donec evidenter alterutrius veritatem percipias, quod fortè nunquam continget. Adde & aliud; sit, qui astrorum numerum parem, alius verò imparem asserat, certè cum numerus par sit aut impar, impossibile est utramque sententiam esse falsam, quomodo ergo utramque ego pro falsa habiturus sum, licet nec hujus nec illius veritas mihi evidenter appareat? Constat ergò dubia pro falsus non esse habenda.

QUÆSTIO III.

An dubitandum sit Philosopho, an nullæ res sensibiles, aut imaginabiles existant?

Affirmativam tenet Cartesius, eamque sic explicat, §. 4. *Nunc itaque cum tantum veritati querendæ incumbamus, dubitabimus in primis, an nullæ res sensibiles aut imaginabiles existant: Primo, quia deprehendimus, interdum sensus errare; ac prudentis est, nunquam nimis fidere iis, qui nos vel semel deceperunt: Deinde, quia quotidie in somnis innumera videmur sentire aut imaginari, quæ nusquam sunt; nullaque sic dubitanti signa apparent, qui-*

bus somnum à vigilia certò cognoscat. Ego verò & hanc assertionem ut veram amplecti nequeo; Ecquis enim dubitet, utrum ipse, aut corpus ipsius existat, nec ne? Et quis sic dubitantem Philosophum audiat? Quis dubitantein, utrum hic albus sit paries an ater, hic ignis calidus, hæc aqua frigida, ferat, aut sanum putet? Dubitari quidem posset, utrum corpora talia sint, talibusve prædita qualitatibus, quales in ipsis esse arbitramur; Utrum verò simpliciter existant, dubitari nulla ratione potest ab eo, cui modò sanum est cerebrum, aut mens sana in corpore sano. Neque rationes, quibus suam conatur astruere dubitationem Cartesius, contrarium evincunt. Nam primò, utrum error sensibus attribui queat, meritò dubitari potest. Ego non sensus, sed mentem potius errare dixerim, quod res tales judicet, quales externis nonnunquam sensibus apparent. Si ergò nunquam ei fidendum judices, à quo vel semel es deceptus, utique tuo ipsius iudicio nunquam credas oportet, quia sæpius ab eo es deceptus, quotiescunque nempe malè de objecto iudicavit. Nunquam proinde te verè iudicare tibi erit credendum, & semper decipere; Quo quid ineptius fingi aut dici queat non video. Equidem si Cartesii quispiam discipulus ità sentiat, per me ipse suo sibi fruatur iudicio licet; adeoque si me errare iudicet, facili ipsi negotio reponam, ipsum vel suo ipsius iudicio hallucinari, adcoque me neutiquam errasse. Sic enim ipsis Cartesii verbis argumentor: Prudentià est nunquam fidere ei, à quo vel semel es deceptus; Atqui, mi Cartesiane, haud semel à iudicio tuo es deceptus; Prudenter itaque feceris, si iudicio tuo, me errare affirmanti, fidem nunquam adhibeas. Altera quoque ratio nullius prorsus est momenti. Nos enim sentire aut imaginari aliquando, nedum quotidie, vel semel, nedum innumera in somnis, quæ nusquam sunt, mihi à Cartesio probari velim. Certum mihi hoc atque indubitatum videtur, omne sensibile, imaginabile, aut cogitabile esse aliquid, prout latius in Philosophiæ nostro Lib. I. Exerc. III. ostendimus. Verum quidem est nos sæpius cogitare aut imaginari varia sive in somno sive in vigilia posse entia composita, quæ composita sunt, ut mons aureus, chimæra &c. at horum compositorum simplicia aut partes Entia non esse vel nihil prorsus negamus. Si ergò quid illud sit, quod somniando nobis imaginamur, quæras; respondeo esse species phantasæ impressas, quas prorsus nihil esse aut nusquam, cum sint in cerebro, nemo dixerit. Sunt enim verum objectarum imagines, ab iisdemque causatæ, quas somniando confundi quidem inter se posse concedo, nihil tamen esse omninò aut nusquam, nunquam effeceris.

Qui-

Quibus autem signis somnus à vigilia dignoscatur alia quaestio est; Ego quidem à vigilante, modò imperturbato sit cerebro, per se evidenter id cognosci, & non nisi à somniantè Philosopho in dubium vocari posse, existimo.

Q U Æ S T I O I V.

An de Demonstrationibus mathematicis dubitari queat?

Affirmativam & hic tenet Cartesius, §. 5. *Dubitamus etiam, inquit, de reliquis, quæ antea pro maximè certis habuimus; etiam de Mathematicis demonstrationibus, etiam de iis Principiis, quæ hæcenus putavimus esse per se nota; tum quia vidimus, aliquando nonnullos errasse in talibus, & quadam pro certissimis, & per se notis admisisse, quæ nobis falsa videbantur; tum maximè quia audivimus, esse Deum, qui potest omnia, & à quo sumus creati. Ego quidem sic judico, hypotheses quasdam Mathematicorum in dubium vocari posse, quinimò varias physicè esse falsas me demonstrasse arbitror Exerc. Philos. Lib. 7. Exerc. 5. Ex. gr. Non omnem lineam in partes aequale posse dividi; A quolibet puncto ad quodlibet non semper duci rectam lineam &c. At verò hoc non obstat, quo minus Mathematicorum demonstrationes certæ & evidentes sint ratione consequentiæ. Adeoque in Mathesi dubitari nequit de Demonstrationibus, utrum evidentes sint percipienti; licet interim de hypothesebus, quibus ejusmodi demonstrationes nituntur, scrupuli nonnulli moveri queant, ut ex dictis apparet. Deinde & hoc notandum, ea quæ evidentia nobis sunt, non continuò omnibus evidentia esse; quin imò multa nunc mihi evidentia facta ingenuè fateor, quæ antehac mihi obscura, imò & falsa videbantur. Haud ergò mirum, quod nonnulli errent, etiam circa ea, quæ evidentissima aliis videntur & per se nota. Evidentia lumen aliquod in mente supponit, quo dum alii destituantur, haud mirum veritatem in ipsis ut minus evidentem aut perspicuam apparere. Charta hæc evidenter mihi alba apparet, at verò icterico forte vel alteri oculis laboranti alio colore imbuta videbitur. Non ergò dubitandum de iis, quæ nobis evidentia sunt, quinimò de evidentibus hoc ipso quod evidentia sint dubitari nequit, quia evidentia omnem scrupulum, adeoque & dubitationem tollit.*

Quod autem subjungit Cartesius, Deum omnia posse; Ignorare autem nos, *an forte nostros creata voluerit ut semper fallamur, etiam in iis, quæ nobis quam notissima apparent; quia non minus hoc videtur fieri potuisse*

quam ut interdum fallamur, quod contingere ante advertimus. At verò se parum hic Theologum, qui potentiam Dei rectè parciat, ostendit Cartesius. Neque enim hæc ad impossibilia extendit, aut ea, quæ contradictionem implicant. Jam verò Deum creare homines sive creaturas ratione præditas, quæ ut tales semper fallantur, meram esse contradictionem ex parte Dei haud difficulter probari potest. Quod enim nunc erroribus & fallaciis obnoxii sint homines, id non naturæ à Deo conditæ, sed corruptæ attribuendum censeo. Deus, cum natura sua & essentia absolute bonus sit, creaturam non nisi bonam & ratione sui perfectam condere potuit: Unde & post omnium rerum creationem. legitur Gen. 1. 31. *Tum inspexit deus quicquid fecerat, ecce autem bonum erat valde.* Cum ergo creatura rationalis exigit bonitatem rationalem, sive quæ rationi sit conformis, utique hominem non nisi moraliter sive rationaliter bonum condere potuit Deus. At verò ut peccatum, ita & errorem menti sive rationi sanæ quam maximè adversari ecquis neget, siquidem in veritatis cognitione & amore omnem mentis perfectionem sive bonitatem consistere dubium esse nequit. Non ergo ignoramus, ut ait Cartesius, an Deus nos tales creare voluerit, ut semper fallamur, cum hoc ipsum sanctissimæ ipsius naturæ quam maximè repugnet, ut jam probatum est. Fieri quidem potest ut peccet homo, ut verò peccatorem qua talem creet Deus impossibile asserimus, & non minus rationi, quam Theologiæ, adversari.

Q U Æ S T I O V.

An semper in potestate nostra sit cavere, ne unquam erremus?

Affirmativam tenet Cartesius. §. 6. *Sed, inquit, à quocunque tandem sumus, & quantumvis ille sit potens, quantumvis fallax; hanc nihilominus in nobis libertatem esse experimur, ut semper ab iis credendis, qua non planè certa sunt & explorata, posimus abstinere; atque ita cavere ne unquam erremus.* Ab hisce sanè verbis, quotiescunque ea perlegi, mentem meam abhoruisse fateor. Adrem autem nunc dico, actiones quæ à mentis nostræ arbitrio dependent, non ad intellectum, sed ad voluntatem pertinere. Cum itaque credere, errare, judicare, assentire, dissentire &c. propriè actiones voluntatis non sint, sed intellectus, easdem utique mentis arbitrio nequaquam subjectas esse existimo. Neque enim à mentis nostræ libertate dependet, judicare Solem Terra esse majorem vel minorem, postquam rationes, quibus alter utrum doceatur, considera-

te

ta sunt. Necessitatur certè mens nostra ad assensum vel dissensum, sive certum sive probabilem, prout rationes, quibus ad assensum movetur vel dissensum, vel ut certæ, vel ut probabiles ab ea percipiuntur. Quod si quoque rationes falsæ fuerint, quas tamen ut veras, sive probabiles mens percepit, equidem ad errandum similiter quasi necessitari arbitror. Quo ergò ab errore absteineamus, & ne unquam fallamur, caveamus, tutissimum judico rationes pro utraque sententia productas diligenter examinare, animoque puro perpendere; sic enim vel ipso naturæ lumine futurum censo mentem veritatem ipsam amplexuram. Rationes enim, quas apprehendit mens, vel veræ sunt vel falsæ; si falsæ, utique non nisi errorem exinde gigni posse vel opinionem falsam certissimum est. Si verò rationes veræ fuerint, easdem mens apprehendit vel ut veras & certas, vel ut probabiles tantum: si prius, oritur in mente scientia certa & evidens; si posterius, opinio tantum, ut notum; Adeoque arbitrio hic nullus locus est, ut consideranti planum. Si tamen quæstio procedat de actionibus imperatis & externis, scilicet de affirmatione, negatione, assensu, dissensu, iudicio, errore, &c. quatenus in externa oris enunciatione, vel etiam in scriptione consistit, istoc sanè sensu in libero nostro arbitrio positum esse fateor aliquid affirmare vel negare; ac proinde eatenus Cartesio concedi posset, nos posse cavere ne unquam erremus. Si nempe nihil unquam enunciamus vel scribamus esse verum vel falsum, nisi quod verum vel falsum esse clarè distincteque jam percepimus. Et hoc sensu quoque alibi tantisper mentis nostræ assensum cohibendum esse me scripsisse memini, donec clarè distincteque illud verum esse percepimus.

QUÆSTIO VI.

An cognitio, (Ego cogito, ergò sum) sit omnium prima & certissima, quæ cuilibet ordine Philosophanti occurrat?

Ità sentit Cartesius. §. 7. Sic autem rejicientes illa omnia, de quibus aliquo modo possumus dubitare, ac etiam falsa esse fingentes; faciliè quidem supponimus, nullum esse Deum, nullum cælum, nulla corpora; Nosque etiam ipsos non habere manus, nec pedes, nec denique ullum corpus; non autem ideo nos qui talia cogitamus nihil esse: repugnat enim, ut putemus, id quod cogitat, eo ipso tempore quo cogitat, non existere. Ac proinde hac cognitio, ego cogito, ergò sum, est omnium prima & certissima, quæ cuilibet ordine Philosophanti occurrat. Nec rejicienda, nec falsa fingenda esse, quæ jam vera

vera scimus ut, esse Deum, cœlum, sydera, corpora extra nos, nosque habere corpus, manus, pedes, oculos, &c. ex dictis apparet; quin iund hoc impossibile arbitramur ei, cui modo sanum est cerebrum. Interim & hoc verum censemus, si quispiam mentis adeò impos fuerit, ut ista omnia vel rejiciat vel falsa cogitet, rectè tamen ex eo colligi posse, talia cogitantem existere, siquidem qui stultus est, vel insanus vel atheus, non est omnino nihil. Repugnat namque ut putemus cum, qui stultus est aut insanus, eo tempore, quo insanit aut stultitiam suam exercet, non existere? At verò, qua demum hinc consequentia quispiam deduxerit, hanc cognitionem, *Ego cogito, ergo sum*, esse omnium primam & certissimam; quæ cuilibet ordine Philosophanti occurrat, quod vult Cartesius. Nonne enim primò oportet scire, quid sit cogitare, esse, existere? Et nonne ista illativa; *ego cogito; ergò sum*, præsupponit omnem actionem præsupponere agentem, ejusque existentiam? Quo jure ergò hæc cognitio, *ego cogito ergò sum*, omnium prima dicatur, & certissima, cum & aliæ non minus certæ dentur, hæcenus saltem ego evidenter percipere non potui. Certè cum omnis conclusio eliciatur ex præmissis, earum notitia conclusionis cognitionem antecedit necesse est.

QUÆSTIO VII.

Unde cognoscatur differentia inter corpus & animam?

Existimat Cartesius omnia prorsus dubia rejiciendo, & falsa fingendo optimè ad cognitionem Mentis perveniri posse, ejusque à corpore distinctionis; Sic enim progreditur §. 8. *Hæcque optima via est ad mentis naturam, ejusque à corpore distinctionem agnoscendam: Examinantes enim quinam simus nos, qui omnia quæ à nobis diversa sunt supponimus falsa esse, perspicuè videmus, nullam extensionem, nec figuram, nec motum localem, nec quid simile, quod corpori sit tribuendum, ad naturam nostram pertinere, sed cogitationem solam; quæ proinde prius & certius quam ulla res corporea cognoscitur; hanc enim jam percepimus, de aliis autem adhuc dubitamus. Certè sicuti peccando aut malè agendo ad virtutem perveniri nequit, ità nec errando aut vera pro falsis habendo ad veritatem aut scientiam propriè perveniri arbitror. Cumque extensum esse idem sit Cartesio, quod esse extra punctum indivisibile, eoque nequaquam includi aut terminatum esse, quæ utique ratione omnem prorsus extensionem à mente removeat, haud benè capio. Sed & motum localem ipsi adimit. Nunquid ergò*

ergo mentem immobilem, eidemque semper spatio præsentem & quasi fixam existimat? Hoc si statuatur, quomodo mentis immortalitatem, ejusve à corpore separabilitatem defendat Cartesius, ipsi videant.

Meo quidem iudicio, haud rectius aut certius, ut existentia ita & naturam agnoscitur, quam à posteriori, ut loquuntur, id est, ex illius operatione immateriali. Quod ut intelligatur, notandum est operationes nos in nobismet ipsis advertere varias, cogitamus, dubitamus, judicamus, loquimur, videmus, audimus, ambulamus, edimus, &c. Hæc inter operationes magnam advertimus differentiam. Earum enim quædam ita comparatæ sunt, ut absque instrumento corporeo peragi haud queant, ut loqui, videre, audire, ambulare, edere, &c. quas propterea materiales seu corporeas appellare soleo. Quædam vero ita sunt comparatæ, ut corporis instrumento aut organo non indigeant, ut, cogitare, dubitare, judicare, &c. Quas propterea immateriales actiones appello, & à corpore independentes. Cum igitur ex operationibus animæ seu mentis existentiam & naturam cognosci dico, non materiales actiones, (cujusmodi etiam in brutis conspiciuntur) sed immateriales intelligo; siquidem certissimum & evidentissimum mihi videtur, id omne, quod absque aliquo operari potest, id quoque absque coesse & existeret posse. Latius de hoc negotio differui, Philos. Lib. 1. Exerc. 1. Et Lib. 4. Quest. 1.

QUESTIO VIII.

Utrum ex sola cogitatione existentia nostra certo concludi queat?

Affirmat Cartesius; Cogitationis autem nomine se intelligere dicit §. 9. illa omnia, quæ nobis consciis in nobis sunt, quatenus eorum in nobis conscientia est. Atque ita, inquit, non modo intelligere, velle, imaginari, sed etiam sentire, idem est hic quod cogitare. Nam si dicam, ego video, vel ego ambulo, ergo sum, & hoc intelligam de visione, aut ambulatione, quæ corpore peragitur, conclusio non est absolute certa; quia, ut scire sit in somnis, possum putare me videre, vel ambulare, quamvis oculos non aperiā, & loco non movear, atque etiam fortè, quamvis nullum habeam corpus; sed si intelligam de ipso sensu, sive conscientia videndi aut ambulandi, quia tunc refertur ad mentem, quæ sola sentit, sive cogitat, se videre aut ambulare, est plane certa. Confundit hoc loco Cartesius actiones intellectus & voluntatis, cum tamen magna inter ipsas sit differentia. Licet enim In-

tellektum & Voluntatem facultates, nec inter se, nec ab ipsa anima, distinctas realiter esse concedam, actiones tamen ipsas diversissimas esse existimo. Aliud enim est velle, aliud cogitare, percipere, &c. Intelligimus, cogitamus peccata, mala, adversa, quæ tamen nemo propterea se velle dixerit. Si tamen cogitandi vocabulum tanquam genericum ad quasvis mentis seu animæ actiones elicitas quispiam accommodare velit, quæstio magis de nomine quam de re esse videtur. Latissimo tamen hoc significatu uspiam reperiri non puto. Sed esto, quælibet mentis actio vocetur cogitatio; Num ergo ex sola cogitatione me existere colligam? Profecto, cum omnis actio sit agentis seu agentem præsupponat, qua ratione ex visione aut ambulatione, quæ corpore peragitur, existentia nostra haud rectè aut certò concludi queat, non video.

Neque obstat, quod ait Cartesius, *sape in somnis possum putare me videre vel ambulare, &c.* Longè enim aliud est putare me videre, aut ambulare, aliud videre ipsum, aut ambulare. Putare actio mentis est, videre & ambulare ad corpus pertinent, quamvis & animam videndi potentia præditam esse alibi à me ostensum est. *Phil. Lib. 4. Quæst. 10.* Quicquid sit, ea quæ in somnis videntur, species sunt materiales phantasie impressæ, quæ proinde & corporis existentiam satis evidenter arguunt; Adcoque, quod aliquis absque corpore possit *fortè* putare se ambulare pedibus nempe, per *fortè* negari posset. Neque enim ulla ratione sit verisimile, mentem vel animam à corpore separatam huiusmodi somniorum ludibriis hallucinari.

Denique & hoc notandum hic occurrit, quod Cartesius cogitationem sive perceptionem mentis, qua se videre aut ambulare putat, ad Conscientiam referat, cum usus, quo solo verba valent, obtineat, ut Conscientia vocetur illa mentis facultas, qua quid egimus vel non egimus, vel etiam agendum, omittendumve nobis sit, conscii sumus, ut & alibi docuimus. *Philos. Lib. 6. Exerc. 11.* Quænam ergo hæc est licentia, verbis pro arbitrio alium, quam longus usus constituit, sensum, aut significationem affingere alienam? Philosophorum est, non verba ad alienam significationem detorquere, sed clavis, perspicuis, usitatique verbis veritatem proponere atque explicare.

QUÆSTIO IX.

An Logicæ definitiones semper sint necessariae?

De hoc negotio ita differit Cartesius §. 10. Non hic explicata multa nomina, quibus jam usus sum, vel utar in sequentibus, quia per se satis nota mihi videntur. Et sæpè adverti, Philosophos in hoc errare, quod ea quæ simplicissima erant ac per se nota, Logicis definitionibus explicare conarentur; ita enim ipsa obscuriora reddebant. Atque ubi dixi, hanc propositionem, Ego cogito, ergo sum, esse omnium primam & certissimam, quæ cuilibet ordine Philosophanti occurrat, non idè negari, quin ante ipsam scire oporteat, quid sit cogitatio, quid existentia, quid certitudo; item quod fieri non possit, ut id quod cogites non existat, & talia; sed quia hæc sunt simplicissima notiones, & quæ sola nullius rei notitiam præbent, idcirco non censui esse numerandas. Equidem, si per Logicas definitiones intelligat Cartesius vulgares illas, quæ apud Aristotelicos passim occurrunt, res istis plerumque non explicari fateor, sed intricare magis atque obscuriores reddi. Exemplo sit vulgò recepta illa apud omnes ferè Hominis definitio, quæ omnium perfectissima habetur. *Homo est animal rationale.* Ecquis enim hac definitione rectius aut clarius naturam hominis percipiat, quam si simpliciter notionem Hominis effertur audiat? Jam enim quid sit *Animal*, & quid *rationale* definiendum erit. Merito igitur, meo quidem judicio, notavit hoc loco Cartesius hunc in Philosophis errorem, quod etiam res simplicissimas & per se notas logicis suis Definitionibus, (quæ genere consentent & differentia, qualem fortè nuspiam reperiās, siquidem omnia à quibus differant, haud cognoscis) explicare conentur. Non possum, quin addam hic verba Gassendi Philosophi disertissimi de hoc negotio differentis, Exercit. Parad. Lib. 11. Exerc. 5. Nunc quod magis est res præsentis quasierim solum ex te quomodo putes rustico ac Philosophia tua ignaro planam fieri hominis naturam, ubi paucis verbis illi dixeris *Animal rationale*? Ut enim taceam quot explicanda occurrerent illi circa *Animal*, cum non magis foret *Animalis*, quam *Hominis cognita natura*, in quamnam caliginem putas deducendus esset, cum iniquirenti quid per rationale intelligeres, tot verba essent multiplicanda, & de singulis tot essent interroganda, ut dies illum & te lux omnino deficiat. Neque enim dixeris Definitione semel assignata nihil esse amplius querendum, siquidem cum tu vel gratis, vel juxta præoccupationem dare mihi verba possis, quæ ego possim non intelligere, quorsum mihi ulterius te rogare non liceat, ut illud ipsum tandem quod tu intelligis, intelli-

gam? Et præsertim in hac materia, cum adeò difficile sit vel uno, vel paucis verbis abstrusam adeò rem explicare, cujusmodi est essentia, quæ eadem sit, & cognosci debeat radix & causa tot proprietatum cum ratione; quæ illas fundit vel adiungas habet, &c.

Verùm enim verò hæc ut ita sint, & ineptæ plerumque in Peripato rerum tradantur Definitiones, hæud tamen propterea negandum, rerum etiam simplicium, ut cogitationis, existentia, certitudinis, &c. explicationes tradi posse, quibus etiam ea, quæ simplicissima sunt, facilius & clarius à mente percipiantur. Neque enim ea, quæ per se & sua luce nota dicuntur, omnibus nota esse putandum est. Definitiones itaque sive explicationes eo sine adhibendas censeo, ut ea, quæ ratione hujus aut illius intellectus obscuriora sunt, licet aliis clara, etiam ipsi clariora & perspicua evadant. Quod enim per se notum est, non continud omnibus æquè notum est. Multa jam me intelligere & percipere vel absque definitione & explicatione ulteriori existimo, quæ tamen olim non adeò clarè me intellexisse aut percepisse memini. Ità ut etiam rerum notissimarum definitiones sive explicationes necessaria, non absolutè, vel ratione intelligentium, Dei, Angelorum, vel etiam hominum doctiorum; sed relativè ad eos, qui ad illum cognitionis aut Luminis gradum nondum perenerunt. Et hinc est, quod Cogitationem definimus actionem mentis rem quandam considerantis; Existentiam esse ipsam essentiam Entis, quatenus ut actualiter præsens à mente concipitur; Certitudinem esse mentis persuasionem, quæ omnem dubitationem excludit; & ita de cæteris.

QUÆSTIO X.

An Mens notior sit quam corpus?

Præsuppono quæstionem hanc institui ratione scientiæ humanæ, siquidem ratione Dei omnia æquè nota sunt & conspicua. Sensus ergò quæstionis propositæ est, utrum nobis notius sit, Mens nostra, an Corpus? De hac re ita Cartesius. §. 11. Jam verò ut sciatur, mentem nostram non modò prius & certius, sed etiam evidentius quam corpus cognosci, notandum est Lumine naturali esse notissimum, nihil nullas esse affectiones sive qualitates, atque idèò ubicunque aliquas deprehendimus, ibi rem sive substantiam, cujus illæ sunt, necessariò inveniri; Et quò plures in eadem re sive substantia deprehendimus, tanto clarius nos illam cognoscere. Plura verò in mente nostra, quam in ulla alia re à nobis deprehendi, ex hoc manifestum est, quod
nihil

nihil planè efficiat, ut aliquid aliud cognoscamus, quàm idem etiam multò certius in mentis nostræ cognitionem nos adducat. Ut si terram judico existere, ex eo quod illam tangam vel videam, certè ex hoc ipso adhuc magis mihi judicandum est mentem meam existere; fieri enim forsàn potest, ut judicem me terram tangere, quamvis terra nulla existat; Non autem, ut id judicem, & mea mens quæ id judicet nihil sit; atque ità de cæteris. Equidem si vel minima dubitatio sufficiat, ut res dubia pro falsâ habeatur vel rejiciatur, & verò jam suprà demonstrationes Mathematicæ vel eo nomine in dubium vocatæ sint à Cartesio, quod nonnulli in talibus errarint, ut supra §. 5. assertum; nescio qua ratione mens nostra notior, quàm corpus ab ipso statuatur, cum tot jam olim & etiam num reperiantur, qui mentis existentiam, tanquam Entis à corpore realiter distincti, in dubium vocarunt, verum etiam apertè eandem negarunt, idque variis argumentis demonstrare conati sunt. Ad rem verò quod attinet, ego non minus corporis, quàm animæ sive mentis existentiam à nobis cognoscibilem existimo; Si verò quæstio instituatur de natura, proprietatibus sive attributis eam explicantibus, nihil equidem verius à Cartesio dictum arbitror, quàm quo plures in eadem re proprietatis sive qualitatesprehendimus, tantò quoque clarius & perfectius eam nos cognoscere. Utrumque verò plures in mente nostra qualitates à nobisprehendantur, quàm in ulla alia re, non ità clarum est. Nequeratio Cartesii hoc ipsum evincit, siquidem ex eaconcludi tantum potest, nihil à nobis percipi aut intelligi absque anima aut mente, quæ percipiat & intelligat; adeoque omnium rerum cognitionem mentem præsupponere. At non sequitur, de existentia mentis certus sum antequam de aliarum rerum existentia certus sim; Ergò plura de mente mea percipio, quàm de rebus cæteris. Similiter ex eo, quod videam oculis multa objecta, concludi quidem potest objectorum perceptionem oculos præsupponere; at non sequitur exinde à me plura in oculis videri, quàm in objectis, ut notum. Denique & hoc ad Cartesii argumentum notandum occurrit, ex eo colligi quidem posse mentem existere, licet vel falso judicet; at verò ex eo haud probari mentem esse Ens quoddam à corpore distinctum. Dixerit enim fortè quispiam, se non existentiam animæ negare, seu mentis, quæ judicet; at verò se negare animam esse Ens quoddam à temperamento aut cerebro nostro distinctum, quod est probandum.

Quamvis autem admodum infirma sit hæc Cartesii illatio, fatendum tamen mihi videtur, mentem sive animam humanam, quæ natura sua

intelligendi facultate prædita est, longè facilius diligenti studio & meditatione adhibitis, ad sui ipsius quam corporum aut rerum materialium cognitionem pervenire posse. Et ratio hæc est. quia longè major est proportio mentem inter ipsiusque facultatem, quam inter mentem & corpus. Sicuti ergò corpora pellucida, ut vitrum cristallum; aqua, glacies, &c. magis conspicua sunt oculis corporeis, quam corpora opaca, ità ut etiam partes interiores appareant; ità quoque naturas spirituales & materiæ expertes oculo mentis sive intellectui magis conspicuas esse & intelligibiles judico, ità ut etiam intimæ actiones earum ab eo cognoscantur. Quò etiam referri haud ineptè fortè posset illud Apostoli, 1 Cor. 11. 11. *Quis enim hominum novit ea, quæ sunt hominis, nisi spiritus hominis, qui est in eo?*

Q U Æ S T I O . X I .

An à cognitione Dei omnium aliarum rerum cognitio dependeat?

Quia hætenus Cartesius, dubitationibus suis quasi sopore quodam oppressus atque involutus, ignorat, utrum talis fortè ipsius sit natura, ut fallatur etiam in iis, quæ ipsi evidentissima apparent, nullam quoque certam se habere Scientiam asserit, donec primò Authorem suæ originis, id est, Deum agnoscat; Nempe talem à quo non nisi talis creatus sit aut creari poterit, ut falli nequeat, saltem in iis, quæ sibi clara & evidentia apparent. Et hinc tandem omnium rerum scientiam sive cognitionem à cognitione Dei dependere concludit, Sed, ipsum differenter audiamus, §. 13. *Cum autem, inquit, mens, quæ seipsam novit, & de aliis omnibus rebus adhuc dubitat, undique circumspicit, ut cognitionem suam ulterius extendat; primò quidem invenit apud se multarum rerum ideas, quas quandiu tantum contempletur, nihilque ipsis simile extra se esse affirmat nec negat, falli non potest. Invenit etiam communes quasdam notiones, & ex his varias demonstrationes componit, ad quas quandiu attendit, omnino sibi persuadet esse veras. Sic; Exempli causa, numerorum & figurarum ideas in se habet, habetque etiam inter communes notiones, quod si æqualibus æqualia addas, quæ inde exsurgunt erunt æqualia, & similes; ex quibus facillè demonstratur tres angulos trianguli æquales esse duobus rectis, &c. ac promde hæc & talia sibi persuadet vera esse, quandiu ad præmissas, ex quibus ea deduxit, attendit. Sed quia non potest semper ad illas attendere, cum postea recordatur, se nondum scire, an fortè talis natura creata sit, ut fallatur etiam in iis, quæ ipsi evidentissima apparent, videt, se merito de talibus dubitare, nec*

ul-

illam habere posse certam scientiam, priusquam sua auctorem originis agno-
 verit. Quæ Cartesii sententia, utut satis pia videtur, quatenus cogni-
 tionem Dei omnium rerum scientiæ præferendam statuit, Philosophi-
 catamen aut vera non est; quin imò diligentius perpenſa omnium re-
 rum cognitionem, ne dicam ipsius Dei, reipsa evertit. Quamvis enim
 Deum talem hominem creasse ponamus, qui in istoc statu falli nequa-
 quam potuerit, ecquis etiamnum talem esse hominis naturam exinde
 exicerit? Cum enim hominis natura peccato & primorum parentum
 lapsu admodum sit corrupta, usque adeo ut in iis, quæ ad æternam ip-
 sius spectant beatitudinem planè cæcutiat, nihilque eorum intelligat,
 teste Apostolo. 1 Cor. 11. 14. Nonne in promptu est suspicari etiam
 falli hominem posse in iis, quæ naturalem hujus vitæ perfectionem con-
 cernunt? Si enim haud repugnet naturæ mentis humanæ errare in iis,
 quæ ad æternam ipsius beatitudinem requiruntur, num repugnabit ean-
 dem hallucinari in iis, quæ ad temporalem ipsius perfectionem sunt ne-
 cessaria? Quamvis ergo Deum statuamus esse αὐτοαληθὴς & summè
 veracem; à quo creati sumus, (si hujusmodi dubitationibus indulgea-
 mus) semper remanebit scrupulus, utrum non semper fallamur, post-
 quam corrupti sumus, & integritate concreta destituti. Quid ergo
 proderit scire Deum Creatorem tuum esse veracem & minimè falla-
 cem, eumque te integrum & vera intelligendi facultate præditum con-
 didisse, cum te integritatem istam aut intelligendi virtutem etiamnum
 possidere nescias, quin verò jam dudum te eam amisisse suspicari liceat?
 Constat ergo ex cognitione Dei reliquarum rerum cognitionem nequa-
 quam dependere. Et reverà, etiamsi quis cogitare Deum non esse, vel
 ipsius existentiam in dubium vocaret, vel ignoraret, non tamen pro-
 pterea, si modò rationis esset compos, ignorare posset duo & tria esse
 quinque; Totum esse majus sua parte; æqualibus, si addas æqualia vel
 demas, reliqua fore æqualia, &c. Et ratio est, quia hujusmodi præ-
 dicata reipsa & intimè suis subjectis includuntur; qui enim duo & tria
 dicit, idem dicit quod quinque, aliis solummodò verbis idem enunci-
 ans. Similiter qui Totum nominat, partes, quæ totum constituent, in-
 telligit, quæ proinde singulæ toti æquales esse nequeunt, & sic de cæ-
 teris. Neque alia videtur esse ratio earum veritatum, quæ ex hisce in
 Mathesi deducuntur. Ex. gr. Trianguli tres angulos duobus rectis esse
 æquales, &c. siquidem hic reverà nihil aliud dicitur, quam unum esse
 idem seu æquale alteri, Exempli gratia, Numerum duodenarium esse
 æqualem tribus quaternariis; vel quatuor ternariis: vel ternario, qua-
 ter-

ternario, & quinario; vel duobus senariis, &c. quæ omnia in re prorsus idem sunt, ut consideranti patebit. Sicuti ergo falli nequit, qui aurum dicit esse aurum, Totum continere suas partes, numerum quinarium binarium & ternarium, &c. perinde quoque eum falli prorsus impossibile arbitror, qui huiusmodi veritates absolute veras iudicat; etiamsi eum cognitione Dei haud imbutum esse tingamus. Harum ergo veritatum cognitio à cognitione Dei non dependet. Adde denique quamplurimos repertos esse, & etiamnum reperiri saltem practice atheos, quos tamen nihil de Deo cogitantès plurimarum rerum cognitione imbutos esse constat. •

Si excipias, eorum cognitionem haud esse certam, quia utrum tales creati sint, qui semper fallantur ignorant, ad id jam satis supra responsum est. Nam primò eundem nunc in hoc corruptionis naturæ humanæ statu scrupulum Cartesio movere possem, ipsum, jam omninò cognitione Dei imbutum, tamen scire non posse, utrum non usque adeò mens ipsius occæcata sit, ut jam nusquam veritatem invenire queat. Nam si ratione rerum spiritualium homo cæcus sit, per quarum cognitionem absolutam perfectionem consequi posset; quidni & cæcus esse queat ratione eorum, quæ ad naturam pertinent? Deinde, absolute impossibile esse diximus, & apertam putamus involvere contradictionem, hominem falli sive errare in iis, quæ sua natura nota sunt, ipsique evidentiâ, cujusmodi imprimis sunt veritates jam dictæ & similes, quas vulgò Notiones communes appellant, & in re ab ipsâ ratione haud differunt; & consequenter etiâ quæcunque ex iis evidenti consequentia deducuntur, iisque proinde inclusæ continentur, quæque proinde à nemine sanæ mentis & ratione utenti negari unquam vel in dubium vocari possunt. Quodcunque enim quis clarè distincteque percipit esse verum, id etiâ verum esse necesse est; Neque alia majoris certitudinis regula tradi vel excogitari potest; quam proinde & sibi perpetuò observandam proposuit ipse Cartesius, *Dissertatione de Methodo*. §. II.

• Q U Æ S T I O XII.

• *An existentia necessariò in Idea Dei contineatur?* •

Meo quidem iudicio, cum Deus sit Ens perfectissimum, *πᾶσιτις*, quod omnes vel cogitabiles essentia suâ perfectiones continet, utique Dei conceptu omnes omninò perfectiones objectivè contineri certissimum videtur. Cum itaque in *τῇ* non existere nulla perfectio contineatur,

tur, sitque omnium perfectionum quali negatio, utique & conceptu Dei existentiam ejusdem includi manifestum est; atque adeò Deum absque existentia concipi repugnat. Præterea, si Deus esse aut concipi queat absque existentia, utique & concipi posset tanquam Ens possibile, sicut creatura; quod si concesseris, poterit & concipi Deus tanquam Ens producibile & ab alio dependens, nempe à quo ex statu possibilitatis in statum actualitatis reduci posset. Verum enim verò, cum conceptu sive idea Dei etiam independentia contineatur, utique Deum absque existentia concipi, aut ideam Dei non existentis dari, repugnat. Verissimè ergò hoc loco concludit Cartesius, §. 14. ut ex eo, quod mens percipiat in idea trianguli necessariò contineri, tres ejus angulos aequales esse duobus rectis, planè sibi persuadet triangulum tres angulos habere aequales duobus rectis; ità ex eo solo, quod percipiat, existentiam necessariam & æternam in entis summè perfecti idea contineri, planè concludere debet, ens summè perfectum existere.

Confirmatur hæc quoque sententia ex sequentibus, quod nempe nullius alterius ideam ejusmodi necessariam existentiam in se continere advertat mens nostra; quod similiter rectè docet Cartesius, §. 15. Magisque hoc credit, si attendat, nullius alterius rei ideam apud se inveniri, in qua eodem modo necessariam existentiam contineri animadvertat. Ex hoc enim intelliget, istam ideam entis summè perfecti non esse à se effictam, nec exhibere chimericam quandam, sed veram & immutabilem naturam, quaque non potest non existere, cum necessaria existentia in ea contineatur. Hæc satis rectè procedunt. Quæ ut intelligas, notandum, creaturas, earumque ideas ità comparatas, ut necessariam existentiam non involvant. Potest enim, exempli gratia, Idea rosæ in me existere, licet re ipsa rosa extra mentem meam non existat; pro arbitrio enim eam mente quolibet tempore concipere possum: & facilè adverto eam etiam non existere posse. At verò longè aliter se habet idea Dei sive entis perfecti; ab eo enim, quod summè perfectum esse intelligo, existentia ne à mente quidem potest separari. Et si ne mente quidem existentia ab essentia Dei separabilis est, utique multò minus extra mentem meam eam separabilem esse manifestum videtur.

Dices: Atqui omne ens existit, seu existentiam habet: quod enim non existit, nusquam est, adeoque nec ens. Cùm ergò varia entia à me concipi queant, licet non existant, utique neque ex conceptu Dei ejusdem existentia colligi posse videtur. Respondeo, me libenter concedere, omne Ens existere, adeoque entia possibilia, ut vocant, nul-

la esse & non nisi æquivocè sic dicta. Concedo insuper ex conceptu entis cujuslibet haud rectè existentiam eiusdem concludi posse. At verò notandū hic est, me facile intelligere magnā esse differentiam inter conceptum Dei & creaturæ. Conceptus sive idea Dei mihi repræsentat existentiam necessariam & independentem; conceptus verò creaturæ sive idea entis creati mihi repræsentat existentiam non necessariam, dependentem, & arbitrariam; adeoque licet ex conceptu illius creaturam existere concludere nequeam, certè tamen ex conceptu Dei sive entis summè perfecti evidentissimè concludere posse videor Deum existere, quia illius idea necessariam existentiam includit. Præterea, & hoc notari velim, licet ex idea rosæ haud rectè concludi queat rosam existere, concludi tamen & hoc posse rosæ ideam nunquam in me existere naturaliter potuisse, si nunquam rosæ in rerum natura fuisset, quæ istius in me ideæ fuisset causa. Nisi ergo esset Ens perfectissimum in rerum natura, nunquam illius idea in mente mea esse potuisset; unde enim illa potuisset esse producta? Certè, sicuti species in speculo apparens terminata, non nisi à corpore finito & terminato causari potuit, ita neque idea entis infiniti in mente mea unquam esse potuisset, nisi ab ipso Deo in illa producta seu causata fuisset.

Q U Æ S T I O X I I I.

An rerum, quæ nusquam sunt aut fuerunt, ideæ à mente formari queant?

Nec est, quod quispiam contra præcedentia objiciat, essentiam communiter ab existentia à nobis solere distingui, variasque proinde rerum ideas etiam nusquam existentium, adeoque & ipsius Dei pro arbitrio à nobis effingi posse; siquidem jam omnino dictum est, nullius rei ideam apud nos inveniri, in qua existentiam usque adeò necessariam contineri mens nostra advertat. Hanc quoque sibi objectionem proponit Cartesius, §. xv. *Hoc, inquit, facile credit mens nostra, si se prius omnino præjudiciis liberarit. Sed quia sumus assueti, reliquis omnibus in rebus essentiam ab existentia distinguere; atque etiam varias ideas rerum, quæ nusquam sunt, aut fuerunt, ad arbitrium effingere, facile contingit, cum in Ens summè perfecti contemplatione non sumus planè defixi, ut dubitemus, an forte ejus idea una sit ex iis, quas ad arbitrium effinximus, aut saltem, ad quarum essentiam existentia non pertinet. Ubi tamen notari velim primò, non adèò certum esse varias rerum ideas, quæ nusquam sunt aut fuerunt ad arbitrium à nobis effingi*

effingi posse; quamvis enim id de compositis ideis facile concedam, de simplicibus tamen falsissimum assero, neque ullam unquam à mente nostra contingi posse arbitror ideam, quæ non ab esse aliquo reali extra mentem causetur. Montis quidem aurei vel argentei nusquam terrarum existentis ideam formare possum, attamen istam à me compositionem factam fuisse nunquam, aut fieri potuisse, nisi jam antè montis, auri, & argenti ideas habuissem, certum est. Et tales omnes esse ideas chimericas satis cuivis attendenti manifestum arbitror. Præterea, cum id quod nusquam est aut fuit, omnino nihil sit, quî, quæso, illius, quæ aut qualis oriri in mente nostra idea posset? Num ulla nihili similitudo excogitari potest? Quin potius hoc ipso, quod idea alicui, putà ideato sive exemplari suo, similis esse debeat, quatenus illud representat, rei quæ nusquam est aut fuit, id est, nihili ideam esse non posse evidentissimum videtur. Deinde & hoc notandum, licet existentiam in creaturis aliquo modo & ratione ab illarum essentia distingui posse concedam, nunquam tamen essentiam absque existentia in rerum natura inveniri aut esse posse. Et reverà, si existentia ad essentiam creaturæ non pertineat, ut Cartesius hic sentire videtur, utique & esse creatura absque eo, quod ad eam non pertinet, aut eandem non constituit? Corpus non pertinet ad essentiam mentis, rectè ergò absque corpore mentem existere posse colligitur. Si tamen putet Cartesius, essentiam creaturæ à nobis concipi posse, licet actu non existat in rerum natura, ut Rosa Hyeme, siquidem necessariam existentiam creatura non habet, haud repugno; ubi tamen hoc addiderim, creaturam non existentem, ut rosam hyeme, ne quidem creaturam dici philosophicè posse.

QUÆSTIO XIV.

An & quomodo idea una alterâ sit perfectior.

De hac re ita porro differit Cartesius. §. XVII. *Uterius verò considerantes ideas, quas in nobis habemus, videmus quidem, illas, quatenus sunt quidam modi cogitandi, non multùm à se mutuo differre, sed quatenus una aliam rem, alia aliam representat, esse valde diversas; & quod plus perfectionis objectiva in se continent, eò perfectiorem ipsarum causam esse debere. Nam quemadmodùm, si quis in se habet ideam alicujus machinæ valde artificiosæ, merito quæri potest, quanam sit causa à qua illam habet; an nempe viderit alicubi talem machinam ab alio factam; an mechanicas scientias tam accuratè didicerit, anve tanta in eo sit ingenii vis, ut ipsam nullibi unquam*

*visam per se excogitare potuerit? Totum enim artificium quod in idea illa objectivè tantum, sive tanquam in imagine continetur, debet in ejus causa, qualiscunque tandem sit, non tantum objectivè sive repræsentativè, saltem in prima & præcipua, sed reipsa & formaliter aut eminenter contineri. Ubi primum notandum occurrit, quod ideas modos cogitandi appellat Cartesius; Cùm tamen, si accuratè philophari velimus, ideæ non modi sint cogitandi, sed vel cogitationes ipsæ, vel species in mente cogitando productæ, eique impressæ atque inhærentes. Quod ut intelligas, nota solummodò species sive imagines in speculo, quæ ibidem à corporibus objectis causantur, ut notum. Ut enim imago se habet ad illius corpus, ità se habet idea ad objectum quod repræsentat, aut cujus idea esse in mente dicitur. Præterea, quemadmodum omnis actio suum habet terminum, ut, calefactio calorem, & illuminatio lumen, &c. perinde & intellectionem sive cogitationem terminum suum in mente habere certum est. Hic autem terminus vocatur *Conceptus formalis, Verbum mentis, idea, species impressa* vel etiam *expressa, imago*, &c. Interim & *modos cogitandi* varios lubens admiserim, veluti si quis celeriter vel tardius rem percipiat, benè vel malè, &c. *Cogitare* ergò, *percipere, judicare*, &c. actiones sunt; at *benè vel malè cogitare, celeriter vel tardè judicare, percipere*, modi sunt.*

Quod verò deinceps magnam inter Ideas diversitatem advertit Cartesius, unamque plus perfectionis objectivæ quam alteram continere, verissimum est, & diligenter notandum. Quemadmodum enim una species alià nobilior dicitur in speculo, quatenus nobilius objectum repræsentat; ità quoque negari haud potest, quin una mentis idea sit objectivè perfectior alterà, quatenus perfectius objectum eà mihi repræsentatur. Similiter & Scientiam nobilioris objecti alià de ignobiliore præstantiorem dicimus. Hoc ergò posito, de illa perfectione meritis quæri posse docet Cartesius, à qua causa sit profecta. Fatendum namque eam proficisci vel à mente ipsa cogitante, vel ab objecto quod cogitatur. Non prius, quia eadem est mens, quæ diversas rerum diversissimarum habet cogitationes, ideasque illas in se recipit; sequitur ergo perfectionem hanc ob objectorum perfectione proficisci. Quemadmodum etiam quod una imago in speculo alià præstantior sit, non speculo, sed objectis attribuendum esse apparet. Cum igitur nullum Ens perfectius Deo cogitari queat, quia est Ens infinitum & omnimodò perfectum, evidens sit Ideam quoque ipsius perfectissimam esse, cum eà Ens infinitum repræsentetur, sive tale, quod omnem perfectionem
cogi-

cogitabilem perfectissimo modo contineat. Hæc autem perfectio, quatenus in objecto continetur *realis* sive *formalis* Cartesio dicitur, quatenus verò est in illius idea, haud inale *objectiva* appellatur.

QUÆSTIO XV.

An Idea Dei in nobis à Deo sit producta?

Affirmativam cum Cartesio verissimam, satisque ex dictis patere arbitror: Sic autem de hac re ipse progreditur. §. XVII. *Sic, quia Dei, sive Entis summi ideam habemus in nobis, jure possumus examinare, à quâ nam causa illam habeamus; tantâque in ea immensitatem inveniemus, ut planè ex eo simus certi, non posse nobis illam fuisse inditam, nisi à re, in quâ sit revera omnium perfectionum complementum, hoc est, nisi à Deo realiter existente. Est enim lumine naturali notissimum, non modò à nihilo nihil fieri; nec id quod est perfectius ab eo, quod est minus perfectum, ut à causa efficiente & totali produci; sed neque etiam in nobis ideam sive imaginem ullius rei esse posse, cujus non alicubi, sive in nobis ipsis, sive extra nos, Archetypus aliquis, omnes ejus perfectiones re ipsa continens, existat. Et quia summas illas perfectiones, quorum ideam habemus, nullo modo in nobis reperimus, ex hoc ipso rectè concludimus, eas in aliquo à nobis diverso, nempe in Deo, esse; vel certe aliquando fuisse; ex quo evidentissimè sequitur, ipsas adhuc esse. Quæ profectò satis philosophicè procedunt. Sicut enim nullus in speculo puro apparere potest color, qui non sit in corpore ipsi objecto, ità nec ullà in Idea Dei perfectio objectivè esse potest, quæ non formaliter sit in Deo illius exemplari sive Archetypo. Neque præter Deum alia causa excogitari potest, quæ hujusmodi perfectionem formaliter contineat; Omnis enim creatura finita est & perfectionis limitatæ. Cum igitur perfectio objectiva à perfectione formali causetur, nullâque in creatura sit perfectio formaliter infinita, eam in solo Deo esse evidenter consequitur, adeoque & ab eo solo in mente nostra perfectionem infinitam objectivè, id est, Ideam Dei, causari potuisse. Unicum tamen & hic notandum occurrit, quod hic fatetur Cartesius, nullius rei imaginem sive ideam in nobis esse posse, cujus non alicubi, sive in nobis ipsis, sive extra nos, Archetypus aliquis, omnes ejus perfectiones re ipsa continens existat; Cum tamen paulò antè §. XVI. dixisset, nos assuetos esse etiam varias rerum ideas, quæ nusquam sunt, aut fuerunt, ad arbitrium effingere. Quæ, quomodò inter se conveniant, ipsi Cartesiani viderint. Nos sententiam nostram supra ad eum locum explicuimus, quæst. XIII.*

QUÆSTIO XVI.

Qualis sit nostra de Deo cognitio?

Sententiam suam explicat Cartesius §. XIX. his verbis: *Quamvis enim illas (summas Dei perfectiones) non comprehendamus, quia scilicet est de natura infiniti, ut a nobis, qui sumus finiti, non comprehendatur; nihilominus tamen ipsas clarius & distinctius quam ulla res corporeas intelligere possumus, quia cogitationem nostram magis implent, suntque simpliciores, nec limitationibus ullis obscurantur.* Ad hujus quæstionis intelligentiam notandum est, cognitionem naturalem de Deo veram esse, siquidem per illam non falsus aliquis Deus, sed verus cognoscitur. Quæcunque enim de Deo argumenta ex natura deducuntur, de vero Deo concludunt. Omnis ergo naturalis Dei cognitio vera sit necesse est, cum alioquin non cognitio, sed error esset. Jam verò de hac nostra Dei cognitione insuper quærendum venit, qualis illa sit? Hoc ut intelligatur, nota cognitionem aliam esse comprehensivam, perfectam, & adæquatam, aliam apprehensivam, imperfectam seu inadæquatam. Cognitio perfecta, adæquata seu comprehensiva mihi dicitur, qua tota rei essentia perfectè & adæquatè cognoscitur, ita ut nihil ejus lateat cognoscentem. Cognitio verò imperfecta vocatur, qua non tota (ut ita loquar) essentia perfectè & adæquatè cognoscitur, sed imperfectè, & quasi pars illius tantum. Cognitio comprehensiva & adæquata, utrum in hac vita detur extra mentem divinam prorsus incertum est; Licet enim multas veritates de re aliqua percipiam, (Ex. gr. Solem habere vim calefaciendi, & illuminandi) semper tamen dubitari potest, utrum non plures de eo sint scibiles. Omnis proinde nostra de Deo cognitio est apprehensiva tantum, adeoque imperfecta & inadæquata, vera tamen & bona. Sicut enim ad veram cognitionem de re aliqua, puta Triangulo, sufficit percipere aliquam de ea veritatem, veluti quod sit figura tribus lineis comprehensa; etsi aliæ veritates, quæ de ipso haberi possunt, ignorentur, veluti quod habeat tres angulos æquales duobus rectis, &c. ita etiam vera potest esse de Deo cognitio, si modò aliqua veritas ipsi essentiali percipiatur. Quamvis autem omnis nostra de Deo cognitio sit apprehensiva tantum & imperfecta, ausim tamen affirmare cum Cartesio perfectiones Dei nos clarius & distinctius intelligere, quam ulla res corporeas. Perfectiones enim Dei simpliciores sunt & puriores, nec ullis limitationibus involutæ; at verò creatura-

rum

rum & corporum qualitates admodum sunt intricatæ, & vel prorsus ignorantur, vel quæcunque cognoscuntur ferè relativæ sunt, adeoque absolutam veritatem vix habere, ut alibi fusius à me probatum est.

QUÆSTIO XVII.

An argumentum ab Idea Dei desumptum, ad existentiam Dei demonstrandam novum sit, & jam tandem inventum?

Ità quidem sibi imaginari videntur Cartesiani; At verò non ita esse, facile cuivis constare poterit, si modò consideret argumentum, quo vulgò Theologi uti solent ad existentiam Dei probandam ab hominum conscientiis deductum, vel etiam à testimonio omnium gentium, quibus, ut vel maximè barbaræ sint, hæc communis persuasio infideat, esse aliquem Deum. Quæ enim hæc conscientia, aut omnibus impressa mentis persuasio esse potest, quam Lumen illud rationis, quo Deum esse percipimus; vel etiam ipsa illa mentis Idea, quæ nobis Deum esse repræsentet? Cùm enim Theologia naturalis, quam omnes saltem Orthodoxi concedunt, alia sit immediata sive congenita, alia mediata sive acquisita, certè congenitam illam sive immediatam nihil aliud esse manifestum mihi videtur, quam ipsam hanc, de qua nunc agimus, Dei Ideam omnium hominum mentibus divinitus jam inde ab earum origine impressam? Quin imò à λέγει naturali hanc ideam in re non differre arbitramur. Alii vocant *Lumen naturale, dictamen natura, impressas notiones, noivus ἱστοίαι*, &c. In hunc quoque sensum rectè olim Damascenus lib. 1. Orthodox. fid. cap. 1. *ὡς αὖτε ὁ θεὸς ἡμετέροις τῷ ἔννοι ὁδῷ ἀδύναμις φανεῖται ἐν ἡμετέροις*, id est, omnibus enim notitia, quod Deus sit, ab ipso naturaliter insita est. Non possum, quin hic adscribam, quæ hac de reluculenter tradit Clar. Voetius, disp. 11. de Atheismo, Thes. 1v. *An datur cognitio Dei naturalis congenita?* Resp. Sunt qui omnem Theologiam naturalem negant tam congenitam, quam acquisitam; Et sic hodie Sociniani. Nostri communiter ex Rom. 1. 18. cum 11. 15. & Job. 1. 9. esse Theologiam innatam, hoc est, statunt *noivus ἱστοίαι* seu notiones innatas, latens sc. rationis & religionis semen naturale, quod se habeat ad modum habitus principiorum: qui in adultis in actum educitur, & unde actus Theologiae elicitur absque demonstratione, percepta modò terminorum apprehensione: haud aliter ac primorum principiorum veritas suo lumine radiat, & in mentem nostram se effundit, simulac enunciationis termini percipiuntur: aded ut nullius hominis adulti mens ab actuali istius veritatis coruscatione & sensu ad explicat-

plicationem & perceptionem terminorum omnino possit esse libera. Et paulò inferiùs : Consistit autem hac facultas, seu vis, seu aptitudo facultatum rationalium, seu lumen naturale in eo, quod intellectus veritatem principiorum potest sine ullo labore, prævio studio, aut ratiocinatione comprehendere; & positis ponendis (Cognitione sc. terminorum) de facto sic comprehendit, ex naturali quadam necessitate & insito sibi pondere in hunc veritatis sensum atque assensum delatus & inclinans: haud aliter ac voluntas, ex naturali quadam necessitate, sine electione pravia appetit bonum; ut sic, aut ultimum finem; Et ut oculus sanus & apertus Lumen aut visibile quodcumque ingestum aut objectum, non potest non videre; Et certè requirit hoc natura primorum principiorum, ut non probentur sed sumantur. Præterea ibid. : quod si quem infantem in solitudine educari contingat, nec unquam terminos istius Axiomatis, Est Deus, illi ab alio exponi, eum tamen insitâ sibi *à xxviii*, sed non absque pravia, quamvis non tam operosa, observatione, inductione, & ratiocinatione, actualem illam cognitionem (quod sit Deus) eliciturum putamus. Constat ergò hoc argumenti genus ad existentiam Dei demonstrandam non esse novum, aut recens à Cartesio excogitatum, sed antiquum & vulgare, quamvis interpolatum, aliisve terminis propositum nunc videatur. Tota enim hujus argumenti vis in eo duntaxat consistit, quod ejusmodi idea sive percipiendi vis & facultas in mente esse neutiquam posset, nisi esset Deus, qui eam tanquam notam sui menti imprefferit; siquidem tantum ad minimum perfectionis in exemplari sive archetypo secundum esse formale esse debet, quantum in ipsius imagine sive idea repræsentatur, id est, quantum objectivè mens ipsa continet. A quo enim mens nostra, quæ finita est, & perfectionis admodum limitatæ, facultatem percipiendi Ens infinitum habere posset, nisi à tali causa, quæ infinitatem in se, sive perfectionem infinitam formaliter contineret, id est, quæ sit Deus?

Q U Æ S T I O X V I I I.

An naturali lumine demonstrari possit, nos à Deo esse conditos?

Sententiam suam explicat Cartesius, §. III. his verbis : *Quærendum adhuc est, à quonam finis nos ipsi, qui summarum Dei perfectionum ideam in nobis habemus. Nam certè est Lumine naturali notissimum, eam rem quæ novit aliquid se perfectius, à se non esse : dedisset enim ipsa sibi omnes perfectiones, quarum ideam in se habet; nec proinde etiam posse ab ullo esse, qui non habeat in se omnes illas perfectiones, hoc est, qui non sit Deus. Nempe ex eo, quod*
Entis

Entis perfectissimi in nobis ideam advertimus, concludit, nos à nobis ipsis haud factos esse, sed ab alio, siquidem, si nos nostri ipsorum auctores seu factores fuisset, nobismet ipsis eam non denegassetus perfectionem, quam jam mente nostra percipimus. Et hinc porro infert, nos ab ullo alio factos esse haud posse, nisi ab eo, qui in sese omnes illas perfectiones formaliter contineat, quique proinde sit ipse Deus. Quæ sanè argumentatio satis est ingeniosa, quæ tamen ut clarior evadat, notandum, lumine naturæ sive per se notum esse, nihil dare alteri posse, quod ipsum non habet. Deinde, sibi unumquemque esse proximum, tantumque proinde daturum, quantum potest; Jam verò, si homo esset à seipso, & ab alio independens, utique & illimitatus esset atque infinitus, adeoque ipse Deus. Cum igitur admodum limitatus sit homo & finitus, utique & ipsum ab alio esse intelligitur. Cumque porro homo in mente sua, tanquam in speculo quodam contemplatur perfectiones infinitas objective idque modo simplicissimo, utique dari aliquod Ens necesse est, in quo istæ perfectiones formaliter reperiantur, id est, quod sit ipse Deus. Si in speculo imaginem quandam artificiose constructam variisque coloribus contextam contemplatus fueris, nonne in promptu erit colligere, corpus aliquod extra speculum existere, in quo formaliter omnes istæ perfectiones & colores existant, quæque objectivæ istius perfectionis sive imaginis in speculo sit causa? Eadem ergò ratione ex Idea Dei in nobis existente formalis ejusdem extra mentem existentia percipitur, ab eoque nos perfectionem istam objectivam accepisse, cum ab alio objectiva ejusmodi perfectio causari non queat.

Dices fortè, sequi hinc quidem perfectissimi Entis ideam à Deo mihi esse impressam, non verò me ab ipso esse productum; sicuti imago quidem in speculo à corpore ipsi opposito causatur, non verò ipsum speculum. Verum enim verò jam ante probatum est, Mentem à se ipsa esse non posse, idque ex imperfectione illius & limitatione evidenter percipi. Cum igitur à se-ipsa mens mea non sit, alia extra ipsam querenda est causa; quæ præter Deum cogitari non potest. Quia enim Mens spiritus est indivisibilis & Ens simplicissimum, utique ex nihilo eam productam esse intelligitur. Potentia autem, qua ex nihilo producatur Ens, infinita est, adeoque in solo Deo esse potest; ità ut vel ex eo admodum sit verisimile, Deum mentem creando imaginem sui ipsi indidisse; quemadmodum artifex ingeniosus operi suo signum quoddam sive sigillum imprimit, quo à tali artifice opus hoc productum esse co-

D

gnoscatur;

gnoscat; Et, si Theologicè loqui velimus, ut homo mente suâ ad Deum ascenderet, ejusque naturam quodammodò in terris exprimeret, virtutesque imitari conaretur. Quemadmodùm & Scriptura, hominem ad similitudinem Dei esse conditum, ipsiusque imagine donatum, docet.

Q U Æ S T I O X I X.

An ex duratione nostri existentia Dei demonstrari possit?

Affirmativam cum Cartesio veram judico. Eam autem ita explicat §. XXI. Nihilque hujus demonstrationis evidensiam potest obscurare; modò attendamus ad temporis, sive rerum durationis naturam, qua talis est, ut ejus partes à se mutuo non pendeant, nec unquam simul existant, atque idèd ex hoc, quod jam sumus, non sequitur nos in tempore proximè sequenti etiam futuros, nisi aliqua causa, nempe eadem illa, qua nos primùm produxit, continuò veluti reproducat, hoc est, conservet. Facile enim intelligimus, nullam vim esse in nobis, per quam nos ipsos conservemus, illumque in quo tanta est vis, ut nos à se diversos conservet, tantò magis etiam se-ipsum conservare, vel potius nulla ullius conservatione indigere, ac denique Deum esse. Partes, vel quasi partes temporis, ex quibus quasi componi tempus intelligimus, Momenta vocare solemus, quæ si præterierint. Præteritum, si sequantur, Futurum tempus, nuncupantur. Est autem Momentum, quod præsens dicitur, illa durationis particula, qua terminatur præteritum & incipit futurum. Cùm igitur momentum futurum non pendeat à præsentì, ut nec præsens à præterito; rectè hinc colligitur, ex eo, quod jam in præsentì existo, non sequi me existitum in futuro; quemadmodùm nec quod jam existo, ab eo quod olim existiti. Quia ergò facile advertimus in nobis potentiam non esse, qua nos in futurum conservemus, (tunc enim semper permaneremus) manifestum evadit etiam in præsentì nos causa aliqua, quæ nos in esse conservet, indigere. Cùmque non minor ad conservandum, quam ad producendum, Ens potentia requiratur (Est enim conservatio continua quasi reproductio) utique Deum esse, qui nos continuò conservet, clarissimè evincitur. Constat proinde ex duratione nostri Existentiam quoque Dei haud malè à Cartesio demonstratam esse.

QUÆSTIO XX.

Utrum ex Idea Dei præter existentiam aliæ quoque ejusdem perfectiones demonstrari queant?

Affirmativam similiter cum Cartesio tenemus. Sic autem ipse de hoc negotio, §. xxii. *Magna autem, in hoc existentiam Dei probandi modo, per ejus scilicet ideam, est prerogativa, quod simul, quisnam sit, quantum natura nostra fert infirmitas, agnoscamus: Nempe ad ejus Ideam nobis ingentiam respicientes, videmus illam esse æternam, omnisciam, omnipotentem, omnis bonitatis veritatisque fontem, rerum omnium creatorem, ac denique illa omnia in se habentem, in quibus aliquam perfectionem infinitam, sive nulla imperfectione terminatam, clarè possumus advertere. Diversas multorum idearum à nobis pro arbitrio fingi posse re ipsa experimur, Ideam verò Dei talem in nobis advertimus, quæ mutari nequeat. Hominem concipere possum magnum vel parvum, doctum vel indoctum, sapientem vel stultum, vivum vel mortuum &c. at verò, Deum absque perfectione aliqua vel minima, seu cum imperfectione aliqua concipi non posse, clarè intelligo. Cum ergò Idea Dei omnes necessariò perfectiones objectivè contineat, utique & æternitatem, seu infinitam durationem, infinitam scientiam seu omniscientiam, immensitatem, infinitam potentiam sive omnipotentiam, bonitatem, veritatem justitiam, omniaque talia attributa, quæ de formali suo aliquam bonitatem sive perfectionem involvunt. eà contineri manifestum evadit. Cum igitur nihil in imagine esse possit aut in idea objectivè, quod non longè perfectius & formaliter sit in suo exemplari, utique, omnia ista attributa perfectissimo modo Deo convenire, evidenter apparet.*

QUÆSTIO XXI.

An Deus sit corporeus; item, an sensu præditus?

Ex dictis nihil in Deo imperfectionis concipi posse apparet, jam verò corpus aut corporeum esse aliquam imperfectionem seu limitationem involvere facile probatur, adeoque Deo attribui absolute nequit. Corpus enim illud esset vel simplicissimum seu indivisibile, vel compositum sive divisibile. Corpuscula indivisibilia sive atomos omnium corporum naturalium imperfectissima esse vel ex eo constat, quod ex iis tanquam partibus omnia componantur. Corpora verò composita sive divisibilia

esse imperfecta ex eo patet, quia suam habent terminationem; cumque composita sint ex partibus finitis, utique non nisi finitam & limitatam perfectionem ea habere manifestum est. Præterea, cum compositum ab alio compositum sit, utique ab eodem & resolvi in partes, atque dividi posse sequitur: hæc autem imperfectio magna est & impotentia, adeoque Deo nequaquam attribuenda. Corpus ergo Deo tribui non potest. Verè ergo & hic Cartesius, §. xxiii. *Nam sanè multa sunt, in quibus etsi nonnihil perfectionis agnoscamus; aliquid tamen etiam imperfectionis sive limitationis deprehendimus; ac proinde competere Deo non possunt. Ità in natura corporea, quia simul cum locali extensione divisibilitas includitur, ostique imperfectio esse divisibilem, certum est, Deum non esse corpus.* Ubi rectè quidem Deum corpus non esse Cartesius docet, prout jam suprà quoque probatum est. At verò, in natura corporea simul cum locali extensione etiam divisibilitatem includi, non adeò perspicuum. Extensionem enim esse, in propria significatione, non omnibus corporibus competere, adeoque nec ex natura corporis fluere, alibi à me notatum; in sensu verò Cartesiano, prout significat non esse in spatio minimo aut indivisibili, Deo aut spiritibus negari non potest, ut alibi quoque ostensum. Neque enim quispiam Deum spatio minimo aut indivisibili inclusum esse somniaverit unquam. Divisibilitatem similiter non fluere ex natura corporis, sed compositionis certum est. Simplissima corpuscula indivisibilia sunt, ut sua luce notum; siquidem corpora divisibilia, hoc ipso quod divisibilia sunt, composita esse necesse est.

De sensu verò distinguendum arbitror. Si enim *sentire* sumatur pro perceptione vel receptione organica, quæ fit mediante organo aliquo corporeo, oculis, auribus, manibus, &c. manifestum est ex dictis ejusmodi sensationes Deo non competere, adeoque & istoc sensu Deum nequaquam sentire. Si verò *sentire* simpliciter sumatur pro simplici objecti corporei perceptione seu cognitione, sic nullam sentiendi vocabulo imperfectionem includi manifestum est, adeoque & verissimè Deo competere. Et hoc sensu etiam Deus videre, & audire passim, in Sacris literis dicitur, Psal. xxxiii. 13. *Ex cælis intuetur Jehova, videt omnes filios hominis*, &c. & xciv. 9. *An Plantator auris non audiat? aut formator oculi an non intueatur?* Jes. lxiv. 1. *Intuere è cælis, & vide ex habitaculo sanctitatis tuæ*, &c. Et hinc jam quoque patet, quid de sequentibus Cartesii verbis judicandum. *Et quamvis*, inquit, *in nobis & perfectio quadam sit, quod sentiamus, quia tamen in omni sensu passio est, & pati est ab aliquo pendere, nullo modo Deum sentire putandum est, sed tantummodò*

tummodo intelligere & velle: Neque hoc ipsum ut nos, per operationes quodammodo distinctas, sed ita, ut per unicam, semperque eandem simplicissimam actionem, omnia simul intelligat, veli & operetur. Quod in omni sensu passio fit, dicitur quidem à Cartesio, non probatur. Et si simplex rei perceptio passio, utique & ipsa intellectio passio dicenda, quo sensu & alibi Aristoteles dixit, *Intelligere esse pati quoddam*. Lib. 111. de anima, cap. IV. Nos quando sentiendi facultates cum Scriptura Deo attribuimus, nihil aliud per eas intelligimus quam ipsam illam essentiam divinæ perfectionem sive actionem simplicissimam, qua objecta materialia ipsum percipere aut cognoscere apprehendimus. Ità ut sentiendi vocabulum hic non passivè aut receptivè, sed activè duntaxat sumendum sit, quo sensu etià in suprà ipsemet Cartesius solam mentem sentire asseruit §. IX. Et hoc quoque sensu Angelos, Mentisque humanas, sentiendi virtute præditas esse alibi ostensum. Quamvis & hic magna notari possit differentia, quod Angeli, mentesque humanæ possint esse in potentia; ut loquuntur, ad intelligendum: speciesque ab objectis recipiant; Deus verò natura sua omniscius omnia actu cognoscat, nullasque aliunde species recipiat, ut in Psychologia mea, sive Exerc. Phil. Lib. IV. quæst. XVII. notatum est.

QUÆSTIO XXII.

An Deus non velit malitiam peccati?

Huic quæstioni tractandæ occasionem exhibent postrema §. XXIII. verba, ubi sic loquitur Cartesius: *Omnia* (inquit, sc. intelligit, vult, & operatur Deus) *hoc est, res omnes: neque enim vult malitiam peccati, quia non est res*. Si per Rem intelligat Cartesius quodcumque non est omnino nihil, sed aliquid, utique peccatum etià formaliter sumptum, sive malitiam & improbitatem esse rem, id est, aliquid, & non merum nihil, faciliè probari potest, tum quia maximè inter sese peccata differunt, tum etià quia gravissima habent effecta, iram Dei accendunt, poenas commerentur, &c. variaque habent prædicata, quæ profecto de nihilo dici non possunt. Ac proinde si omnis res, sive quodcumque non est merum nihil, sed aliquid, sit voluntatis divinæ objectum, jam nulla amplius apparet ratio, ob quam ab eo peccatum ejusve malitia secludatur. Si verò per Rem intelligat Cartesius Ens, quod veram & positivam habet essentiam, utique quamplurima Deum velle manifestum est, quæ Entia non sunt, ut Accidentia, modi, actiones,

privationes, &c. Quia tamen quæstio de Voluntate Dei circa peccatum est gravissima, sententiam nostram conclusionibus aliquot hoc loco determinare statutum est.

Dico igitur primò, *Deus non vult peccatum voluntate*, ut loquuntur, *complacentia ac delectationis*, prout docetur Psal. v. 5. 6. & xlv. 8. 11. *Deus non vult peccatum voluntate præcepti*, id est, non præcipit, quia vetat peccata, & prohibet, ut notum. 111. *Deus non vult peccatum formaliter sumptum efficere*, adeoque nec vitiositatis aut malitiæ author ullo modo dici potest. 1v. *Deus non vult peccatum sub ratione peccati*, seu, ut alii loquuntur, *propter se & ultimè*; sensus est, Malitiam non esse rationem formalem, ob quam Deus peccatum fieri velit, sed aliud quid, nempe bonum, putà illustrationem suæ gloriæ. v. *Deus tamen vult peccatum fieri, ipso se. permittente*, non quidem sub ratione mali, ut iam dictum est, sed sub ratione boni, quatenus nempe peccatum misericordiæ aut iustitiæ divinæ illustrandæ inservit. Si enim peccatum fieri nolleret Deus, aut permittere, impediret; cùm ergò nec impediat, nec impedire velit, signum est quod permittere, adeoque & fieri positivè velit. Præterea, Scit ab æterno Deus peccatum in tempore futurum esse; ergò ut fieret decrevit, & vult, quia antecedenter ad decretum futurum nihil dici potest. Manifestum ergò est, etiam peccatum formaliter sumptum verissimè objectum divinæ voluntatis dici posse.

Q U Æ S T I O X X I I I.

De Ordine scientiarum; sive qua Methodo sit Philosophandum?

Cartesius à Deo in Philosophia incipiendum esse docet his verbis, §. xxiv. Jam verò, quia Deus solus omnium quæ sunt aut esse possunt, vera est causa; perspicuum est optimam philosophandi viam nos sequuturos, si ex ipsis Dei cognitione rerum ab eo creatarum explicationem deducere conemur, ut in scientiam perfectissimam, quæ est effectuum per causas, acquiramus. Quod ut satis tutò & sine errandi periculo aggrediamur, ea nobis cautela est utendum, ut semper quam maximè recordemur, & Deum autorem rerum esse infinitum, & nos omninò finitos. Equidem, cum Deus nobilitate & præstantia omnes creaturas longo post se relinquat intervallo, quia infinitus est, creaturæ verò omnes finitæ, utique istac ratione primum Deo, Enti primò & supremo, locum competere manifestum est. At verò cum Methodus naturalis exigat, ut à simplicioribus & maximè universaliibus incipiamus iisque principiis sine quibus alia explicari non possunt;

possunt; Et cognitio Dei ejusque perfectionum multorum aliorum magis generalium intelligentiam requirat, utique de iisdem prius agendum esse ordo naturæ postulare videtur. Haud ergo præter operæ pretium me hoc loco facturum arbitror, si methodum philosophandi, seu generalem scientiarum distributionem, alibi à me propositam, hoc loco proposuero. Ea autem sic habet.

Cùm Scientia sit alicujus objecti scientia, utique pro objectorum ratione Scientiam dividi posse apparet. Cùm ergò nihil in rerum natura excogitari queat, quod non sit vel Ens, vel aliquid Entis. live ad Ens pertinens; hinc primam vel maximè abstractam omnium Scientiam *ἐπιστήμην* sive *ἐπιστήμην* vocari posse constat, vulgo *Metaphysica* appellatur. Cùm vero Ens optimè dividatur in *immateriale* sive *spirituale*, & *materiale* sive *corporeum*; hinc abstractissimam & summam omnium Scientiam dividi posse existimo in *Pneumaticam* & *Somaticam*, ut illa *spiritualium*, hæc verò *corporum* naturam explicet. Ens immateriale sive *Spiritus* est vel *Deus*, vel *Angelus*, vel *Anima rationalis*. *Pneumatica* igitur rectè distribuitur in *Theologiam*, *Angelographiam*, & *Psychologiam*. *Theologia* Dei, *Angelographia* Angelorum, *Psychologia* animæ notitiam exhibet. Quia verò in Anima rationali duæ imprimis facultates reperiuntur, *Intellectus* & *Voluntas*, utique illius operationes in *Logica*, hujus verò in *Ethica* convenienti methodo explicandas judico. Atque ità tandem *Pneumatica* absolutà ad *Somaticam* progrediendum, quæ corporis notitiam tradit. Cùm verò Corpus considerari possit vel ut naturale, vel ut artificiale, vel ut externa delineatione figuratum, vel ut morbis obnoxium & sanabile; hic iterum *Somatica* dividi posset in *Physicam*, *Mechanicam*, *Mathematicam*, & *Medicinam*. *Physica* enim internam corporis naturam explicat, *Mechanica* externam & artificiosam corporis constructionem docet; *Mathematica* externa solummodò lineamenta & figuras contemplatur; *Medicina* denique sanitati corporis prospicit, & morbos tollit.

Q U Æ S T I O XXIV.

An credenda quæcunque à Deo sunt revelata, etsi non clarè intelligantur?

Affirmativa verissima est, adeoque & verè hic Cartesius §. xxx. Ità si forte nobis Deus de seipso, vel aliis aliquid revelat, quod naturales ingenii nostri vires excedat, qualia jam sunt *Mysteria incarnationis & Trinitatis*, non

non recusabimus illa credere, quamvis non clare intelligamus; Nec ullo modo mirabimur, multa esse, tum in immensa illius natura, tum etiam in rebus ab eo creatis, quæ captum nostrum excedant. Hæc omnia satis rectè. Cum enim Deum infinitum agnoscamus, ejusque potentiam immensam, & potestatem illimitatam atque absolutam, multa certè in eo esse, fierique ab eo posse, manifestum est, quæ ingenii nostri vires longissimè excedant. Et hinc dicere non ausim, quod quibusdam in usu est, Deum hoc vel illud non posse; à cuiusmodi me semper locutionibus abhoruisse & maximè alienum fuisse, ingenuè fateor. Cum enim plura possit Deus, quam mens nostra concipere, utique haud ausim vix aliquid Deo impossibile statuere. Licet enim ego, pro ingenii mei tenuitate, id non percipiam, quia tamen cum plura posse intelligo, qua ratione id eum non posse dici iam? Ità ut mirari subeat quod sequenti Libro asserere Cartesius non dubitarit §. xxii. *Mundos, quod si omnino infiniti essent, ex alia tamen materia constare non posse; Neque plures, sed hunc unum tantum esse posse.* Si enim alia materia, aut plures nequeant esse Mundi, utique nihil aliud è Deo fieri aut creari potuit, quam jam ab ipso factum aut creatum est. Mirum, quod homo cætera acutissimus non adverterit hac ratione quam maximè limitari potentiam Dei, cum non nisi materiam conditam per eam condi potuisse asserat. Cum enim, ut ipsius Cartesii verbis utar mox sequentibus, §. xxvi. *simus finiti, absurdum esset nos aliquid de ipso determinare, atque sic illud quasi finire ac comprehendere conari.* Hæc, quomodo cum supra dictis conveniant, ipsi viderint Cartesii discipuli.

QUESTIO XXV.

An infinitum & Indefinitum differant?

Infinitatem ab intellectu creato & finito comprehendendi non posse ex dictis constat. Cartesius, quia reverà infinitatem rebus conditis attribui non posse advertebat, neque tamen earum aliquot ullos fines percipit, distinctionem quandam infinitum inter & indefinitum fabricatus est, easque non quidem infinitas, ut indefinitas tamen spectandas esse existimat. Hæc autem ipsius de hoc negotio sunt verba, §. xxvi. *Nos autem illa omnia, in quibus sub aliqua consideratione nullum finem poterimus invenire, non quidem affirmabimus, esse infinita, sed ut indefinita spectabimus.* Ita quia non possumus imaginari extensionem tam magnam, quam intelligamus adhuc majorem esse posse, dicemus, magnitudinem rerum possibilem esse

esse indefinitam. Et quia non potest dividi aliquod corpus in tot partes, quin singula adhuc ex his partibus divisibiles intelligantur, putabimus, quantitatē esse indefinite divisibilem. Et quia non potest fingi tantus stellarum numerus, quin plures adhuc à Deo creari potuisse credamus, illarum etiam numerum indefinitum supponemus; atque ita à ceteris reliquis. Itane errare nos doceat Cartesius, dum quomodo ab errandi periculo nos eximat, edocere conatur. Qui enim ut indefinita spectabimus aut supponemus, quæ indefinita non sunt? Dico ergo nullas res creatas à nobis fingi posse, quas non finitas esse & limitatas evidenter percipimus. Quicquid enim infinitum ens non est, illud finitum esse necesse est; Medium non datur, sicut neque inter Creatorem & creaturam. Illud enim, quod indefinitum dicitur Ens, vel creatum erit, vel increatum; posterius non concedet ipse Cartesius: si verò prius dixerit, utique & limitatum atque finitum esse consequitur.

Verum quidem est, nullam magnitudinem tam esse magnam, quin adhuc major esse vel cogitari queat; at inde non sequitur magnitudinem possibilem esse indefinitam. Magnitudo namque possibilis non datur in rerum natura; sicut nec ullum Ens possibile, estque mera mentis fictio: quod enim possibile dicitur, hoc ipso non esse quid actu asseritur; quod autem actu non est, quomodo aut quo jure indefinitum Ens appellabitur? Nonne absortum foret hominem indefinitè divitem asserere, quia nemo usque adeo dives est, quin adhuc ditior fieri posset? Aut indefinitè doctum, quod nemo adeo doctus, quin doctior evadere queat, & ita de plurimis? Et reverà, si propterea stellarum numerum indefinitum supponere liceat, ut vult Cartesius, quia tantus stellarum numerus fingi non potest, quin plures adhuc à Deo creari potuisse credamus; tandem utique ob rationem omnium eorum quæ sunt hominum, animalium, piscium, avium plantarum, arborum, herbarum, metallorum, apidum, &c. numerum indefinitum supponere poterimus, atque adeo de indefinitorum quidem numerorum numerus definiri poterit, ipseque roinde indefinitus dicendus erit. Quæ porro hic attingit Cartesius de indefinita indivisibilitatē corporis in partes, ita ut nullæ in corpore partes reperiantur, quæ non ulterius divisibiles sint, falsissimum est; siquidem nihil unquam in philosophia aut certius aut verius doceri existimo, quam dari particulas minimas, & divisionibus crebrò repetitis tantum necessario ad ultimam divisionem perveniendum esse, adeoque & eas particulas, quæ ulterius dividi nequeant; ex quarum conjunctione & unionē omnia corpora naturalia originem habeant, ut alibi à me lapsus ostensum est.

E

QUÆ

QUÆSTIO XXVI.

Utrum in Philosophia non sit agendum de Fine?

Finem haud rectè inter causas referri alibi à me demonstratum est; Si enim consideretur, prout dicitur in executione effectum potius seu causatum, quam causa dicendus; Si verò consideretur, prout est in intentione, ut ajunt, quid aliud quam ipsa efficientis seu agentis intentio dici potest? Cùm ergò quid intendat Deus aut decernat, nemo unquam mortalium scire absque revelatione possit, utique de fine Dei aut naturæ in naturalibus haud multum laborandum videtur. Siquidem non docet Philosophia, quid agere intendat, aut quem sibi in agendo finem proponat Deus, sed quomodò aut quibus causis opera naturæ ordinariò peragantur. Haud ergò malè hoc loco Cartesius, nullas unquam in Philosophia rationes circa res naturales à fine desumendas esse docet hisce verbis: §. XXVII. Ità denique nullas unquam rationes circa res naturales, à fine, quem Deus aut natura in iis faciendis sibi proposuit desumemus, quia non tantum nobis debemus arrogare, ut ejus consiliorum participes esse putemus. Quod tamen non tam strictè sumi velim, quasi nunquam de fine conjecturam facere liceret Philosopho, aut etiam rationes proferre. Quare vis enim non scientificam ex ejusmodi rationibus comparemus cognitionem, probabilem tamen (in quâ sæpe acquiescendum philosopho) ex iis fortè haurire haud erit difficile. Quinimò cum finis organi in usu illius & operatione consistat, non video quò minus Philosopho asserere liceat, oculos homini datos ad videndum, aures ad audiendum, linguam ad loquendum, pedes ad ambulandum, &c. quemadmodum & medici singularum ferè corporis partium usus luculenter ostendere solent.

QUÆSTIO XXVII.

Utrum Deus causa possit esse erroris?

Cum Deus Ens sit absolutè perfectum, utique & veracitatem, quæ Voluntatis perfectio est, eminentissimo modo in ipso contineri, manifestum est; Et hoc sensu veteres olim Deum *Ἀπαλῆκτος* dixere. Quemadmodum igitur tenebrarum causa Sol esse nequit, quia natura sua lucidus est, ità neque erroris, mendacii, aut falsitatis causa Deus esse potest, quia natura sua verax est, ut dictum. Præterea, cùm mendacium

um procedat vel ex ignorantia, vel ex errore iudicii, vel ex malitia ali, quorum nihil in Deo esse potest, cum sit omniscius, summè ens, & infinitè bonus, utique erroris, falsitatis, aut mendacii capsum esse non posse colligitur. Verissimè ergò hoc loco Cartesius um summè veracem esse asserit, omnisque luminis datorem; Undè pugnat ait, §. xxix. *ut nos fallat, sive ut propriè ac positivè sit causa tum, quibus nos obnoxios esse experimur.* Nos haud veremur affirmare, um absolutè & nullo prorsus modo esse, aut posse esse, errorum causam; proindeque particula illa *propriè* non erat opus; cùm nec impro- queat, ut causa per accidens (ut nonnulli loquuntur) erroris aut peccati queat, ut etiam alibi *Disput. 11. de divisione causa §. xx. xxi. à me tum est.*

Cartesius ex eo, quod fallendi potentia nonnullum ingenii argu- tum apud homines esse videatur, inferri posse advertens, ejusmo- ioque in Deo potentiam admittendam esse, hanc difficultatem ità t, ut haud obscure fallendi potentiam Deo attribuat, licet volun- n fallendi in ipsum cadere non posse asserat. Sed verba ipsius audia- , §. xxix. *Nam, inquit, quampis fortè posse fallere nonnullum inge- gumentum apud nos homines esse, videatur, nunquam certè fallendi vo- nisi ex malitia vel metu & imbecillitate procedit, nec proinde in Deum re potest.* Nos verò nec voluntatem nec potentiam fallendi in Deo posse constanter asserimus. Et reverà, si Deum fallere posse conce- r, non video quo minus & velle queat, cùm omne ipsi possibile sit im? & voluntatis divinæ objectum.

loc ergò jam agamus, ut etiam fallendi potentiam à Deo procul re- eamus, eamque perfectioni divinæ repugnare paulò accuratiùs de- stremus. Notandum igitur fallendi potentiam magnæ imperfe- nis esse signum; nam, qui fallit alium, mentitur, eique pro ipsa ve- e speciem duntaxat illius seu apparentiam obtrudere conatur. Qui- titur aliud internè sentit, & aliud externè sive vocè sive signo enun- t, adeoque à se-ipso dissentit, & quasi duplex est; Cùm autem icitas & dissensio in Deum non cadant; quia summè unus & sim- est, utique nec mentiendi aut fallendi in ipso potentiam esse posse, ens evadit.

leque refert, quòd aliquandò in Sacris Litteris dicatur Deus homi- lecipere, tradere in reprobum sensum, errorem, &c. *Jes. lxiii. Jer. iv. 10. Rom. i. 26. &c.* Qui enim paulò profundius Theo- e sacraria salutarunt, faciliè intelligunt hujusmodi loquutiones esse

improprias, adeoque sano sensu & juxta fidei analogiam explicandas. Nempe Deus homines decipere dicitur, quotiescunque ipsos per Pseudopphetas, quos ex justissimo suo judicio ad eos mittit, seduci & falli permittit, non aperiendo ipsis oculos mentis, quibus veritatem intueri valeant. In reprobum verò sensum, erroresque tradere dicitur, quando in vanis suis & impiis cogitationibus progredi eos sinit, & nequaquam ab iis avertit; Quin imò, cum impias ipsorum mentes ad omne malum proclives, ad cogitandum aut agendum efficaciter & actu præmoveret, eò ferè modò, quo equum læsum & claudicantem ad movendum sese impellit & adigit eques. Ubi diligenter notandum est, non equitem moventem equum, sed equum ipsum ab equite motum, ex insito vitio aut infirmitate, propriæ claudicationis causam esse, ut in Theologia naturali, sive Philosophiæ meæ Lib. 11. Exerc. xxi, à me ostensum est. Perinde etiam non Deus, sed homo vitiosus & corruptus hallucinationis suæ & erroris causa propriè & formaliter existit.

• Q U Æ S T I O X X V I I I.

An facultas cognoscendi homini data non possit falsum pro vero apprehendere?

Ex dictis colligit Cartesius, §. xxx. *Lumen natura sive cognoscendi facultatem à Deo nobis datam, nullum unquam objectum posse attingere, quod non sit verum, quatenus ab ipsa attingitur, hoc est, quatenus clarè & distinctè percipitur.* Hæc satis obscura sunt; Quid enim hoc est, *facultatem cognoscendi nullum unquam objectum attingere posse, quod non sit verum, quatenus ab ipsa attingitur?* Hoc est, inquit, *quatenus clarè & distinctè percipitur.* An non ergò etiam à mente attinguntur ea, quæ falsa sunt? Ecquid enim aliud attingi à mente dici potest, quam quatenus mens de rebus objectis judicium fert? At verò luce clarius est, sæpissimè etiam illa, quæ falsissima sunt, haberi pro veris. Constat ergò mentem homini à Deo datam sæpissimè falli, & falsum pro vero apprehendere. Hoc autem ex mentis nostræ imperfectione proficisci, ejusdemque ex peccato corruptione, lubens fateor. At verò aliud est causam illius mentis nostræ fallibilitatis explicare, aliud verò, an talis nobis miseris homunculis intellectus in hoc statu datus sit, rimari, ut notum.

Sed, inquit Cartesius, *merito deceptor esset dicendus Deus, si perver-
sam illam ac falsum pro vero sumentem nobis dedisset.* Horrenda mihi hæc sunt? Ecquis enim Deum, absolutum omnium Dominum, constin-

gat,

ut perfectam mentem, aut intellectum falli nescium, nobis con-
 it? *Nonne enim Deus est, qui mutum creavit, aut surdum, aut sensu-*
valentem, aut cecum? Exod. 1v. 11. Nonne fatendum nobis, men-
 nostram ad errandum perquam esse proclivem, nosque animam
 idere ab origine occaecatam, & tenebris plus quam cimeliis na-
 involutam? Et, nunquid propterea Deum deceptorem faciemus,
 quem veracissimum esse, omnisque veritatis fontem jam ante de-
 monstratum fuit? Viderint jam Cartesiani, quomodo non decepto-
 faciant Deum, cum animam ab origine imperfectam obtenebratam
 cecam quasi inditam nobis esse, tum ex Theologia, tum ex vera
 losophia, certum sit. Non ergo hinc tollitur, quod putat Cartesius,
ma illa dubitatio, quæ ex eo petebatur, quod nesciremus, an forte talis
uns natura, ut falleremur etiam in iis, quæ nobis evidentissima esse vi-
ur. Quotiescunque enim contingit, ut fallantur homines etiam in
 quæ ipsis verissima & evidentissima videbantur? Putarunt Aristo-
 ci se evidentissimis demonstrasse rationibus formas substantiales,
 ocant, quas tamen nullas esse, & nusquam in rerum natura suo lo-
 videtissimè demonstravimus. Sunt, quibus nihil ferè evidetius
 tur, quam quatuor dari ex quibus omnia componantur, elementa,
 fieri ex nihilo, solem omniaque astra circulariter circa terram mo-
 , &c. Quæ tamen aliis videntur falsa. Fateor quidem ista, quæ
 tati repugnant, nequaquam evidentia, nedum vera fuisse, talia ta-
 visa ipsis fuisse existimo. Quin & ipsi rogati de iis nullo modo dubi-
 : se strenuè sunt affirmaturi. Hoc tamen evidens non videri solum,
 & esse censeo, Deum nequaquam istius fallaciæ aut erroris esse cau-
 , ut suprâ ostensum; eam proinde in nobis, seu in mentis
 ræ imperfectione querendam esse, ex dictis apparet. Sicuti enim
 nia iæterico corpora evidenter flava apparent, quæ flava non sunt,
 pter humorem biliosum, quo ipsius oculus suffusus est; perinde et-
 haud mirum quod homini mente vitiosa & corrupta prædito non
 nia ita appareant, ut revera sunt: sive quod falsa aliquando pro ve-
 b ipso apprehendantur.

i quæras, quæ ergo ratione dubitatio jam dicta tollatur, erransque
 liberare queat; respondeo, nec tolli dubitationem nec posse, nec
 ri, cum nulla sit ipsi, qui sibi evidentia esse, quæ vera judicat, et-
 si falsa sint persuadet. Neque alia via cum ejusmodi hominibus agi
 existimo, quam ut, quantum fieri potest, evidentissimis argumentis
 sa veritate rei convincantur; ipsisque infirmitas rationum, quibus

ipforum opinio subnixa est, ostendatur. Hinc enim, modò rationis sint compotes & veritatis studiosi, facilè futurum arbitror, ut præjudicia sua agnoscentes, primò quidem de re, quàm antea sibi certam & perspicuam persuadebant, dubitaturi, deinceps verò veritatem ipsam, errore sublato clarius percepturi sint. Ardentissimis quoque ad Deum precibus hic opus esse, ut oculos mentis aperiat, tenebrasque dispellat, haud est negandum. Ut enim in operibus gratiæ, ità & in naturæ cognoscendis spiritum illuminantem necessarium esse, extra omne dubium est. Quod enim in gratiæ operibus gratiæ, id in naturæ operibus naturæ lumen appellatur. Quemadmodum igitur absque lumine gratiæ supernaturalia Dei opera, ità absque lumine naturæ naturalia intelligere nequimus. Tantum igitur abest, ut hoc principio Cartesii omnes, quod ne unica quidem dubitandi causa antea ab ipso recensita tollatur. Ecquis unquam dubitabit Mathematicus quin omnes lineæ in duas æquales partes sint divisibiles, quin in circulo nulla recta sit lineola, quin globus tangat planum in puncto indivisibili, &c. Quæ tamen ipforum postulata à nobis non modo in dubium vocata sunt, sed & accuratè loquendo falsissima esse ostensum, ut patet ex Disputatione nostra de quadratura Circuli, habita in illustri Atheneo nostro Bredano, xxviii. Febr. cis 15 CLXIII. Et Appendicis loco inserta *Phil. Lib. VII. post Exercit. v.*

QUESTIO XXIX.

Quanam sit erroris causa?

Erroris causam me jam satis accuratè explicasse, eamque non in voluntate, ut vult Cartesius, sed in sola intellectus nostri imperfectione quærendam, existimo. Sed jam ipsum Cartesium super hoc negotio differentem audiamus; §. xxxi. *Quia verò, inquit, etsi Deus non sit deceptor, nihilominus tamen sæpè contingit nos falli; ut errorum nostrorum originem & causam investigemus, ipsoque præcavere discamus, advertendum est, non tam illos ab intellectu, quam à voluntate pendere; nec esse res, ad quarum productionem realis Dei concursus requiratur: sed cum ad ipsum referuntur, esse tantum negationes; & cum ad nos, privationes.* Nempe vult Cartesius errare esse actionem liberi arbitrii, quæ à voluntate potius, quam ab intellectu dependeat. At verò, ecquis ignoret errare mentis opus esse, & actionem iudicii, quæ verum esse judicamus, quod falsum est, seu falsum, quod verum? quod vel ex eo constare potest, quia nemo

mo

mo volens errat, aut errare vult. Præterea, quoties intellectum nostrum ad assensum alicujus propositionis necessitari sentimus, quando pro una parte putà affirmativa rationes speciosæ, & veræ apparentes adferuntur, & contrariæ supprimuntur? Ità quoque seductorum dogmatis argumentisque multos ad errores gravissimos, hæresesque satis perniciosas quasi trahi videmus; quis verò ipsos ex libero voluntatis arbitrio istiusmodi errores hæresesve amplecti sanus arbitretur?

Quod subjicit Cartesius errores ratione Dei esse negationes, ratione nostri verò privationes: quâ autoritate aut ratione nitatur, proflus nescio. Nonne qui errat, falsum habet pro vero, aut verum pro falso; proindeque actu & positivè judicat, licet falsò? Qualiscunque ergò ad quamlibet positivam actionem requiritur Dei concursus, (quem ego potius præcursum, præmotionem aut prædeterminationem dixerim) talem & hic requiri manifestum est. Et huc referri possent omnia ista Scripturæ dicta, quibus Deum se positivè circa hujusmodi actus mentis erroneos habere asseritur, vocabulisque activis efficitur; vult uti quando ab ipso falli Prophetæ dicuntur *pellici & seduci*, *Ezech. xiv. 9. immitti efficaciam erroris, ut credatur mendacio*, 2 *Thess. ii. 11. Deum misere spiritum erroris*, *Jes. xlii. 14. indidisse Spiritum mendacii*, 2 *Reg. xxii. 23*. Quibus phrasibus non tantum permissivè aut negativè, sed reverà positivè Deum circa hujusmodi actus se habere nimis manifestum est.

Ex dictis quoque patet, falsum esse, quod Cartesius commate sequenti, §. xxxii. *affirmare, negare, & dubitare* ad voluntatem referat, ut & suprâ ad quæst. v. & viii. notatum; Sicut & illud, quod diversas tum intelligendi, tum volendi actiones, modos appellat; alia enim actio mentis est affirmare, alia negare, alia dubitare, &c. divetse quidem affirmandi, negandi, & dubitandi sunt modi; at ipsum affirmare, aut negare, actiones sunt, non modi; ut ad *Quæst. xiv.* diximus.

QUÆSTIO XXX.

Quando erret Intellectus?

Non Voluntatem, sed Intellectum proximam & formalem errandi esse causam, & subjectum erroris receptivum, (alii causam immanentem appellant) ex præcedentibus patet; Jam verò, quando nos errare contingat, videndum. De hoc autem ità loquitur Cartesius; §. xxxiii. *Cum autem aliquid percipimus, modò tantum nihil planè de ipso affirmemus vel negemus, manifestum est, nos non falli.* Certum hoc est, & notissimum

num. Cùm enim falli vel errare sit falsò judicare, quod nihil aliud est, quam affirmare quod falsum, aut negare quod verum est; Et verò simpliciter apprehendendo nihil affirmetur aut negetur, utique in prima mentis operatione, quæ in simplici perceptione aut apprehensione rei consistit, non reperiri falsitatem aut errorem, manifestum est.

Quod autem porro dicit Cartesius, nos non falli, cum id tantum affirmamus, aut negamus, quod clarè & distinctè percipimus esse sic affirmandum aut negandum; sed tantummodò, cum (ut sit) etsi aliquid non rectè percipiamus, ac eo nihilominus judicamus. Ad id jam suprà responsum. Distinguendum enim inter evidentiam veram & apparentem. Si affirmemus, quod evidenter verum esse percipimus, certum est nos nunquam posse falli aut errare; at verò, si affirmemus aliquid esse verum, quod nobis solummodò evidens apparet seu videtur, in ejusmodi judicio errorem aut falsitatem haud rarò esse posse, jam plus satis ostensum est. Erramus igitur, quotiescunque falsum pro vero, aut verum pro falso amplectimur, quamvis falsum haud rarò veri, aut verum falsi speciem in mente habere contingat; seu, quod idem est, licet falsum aliquando percipiamus ut verum, & verum falsum esse putemus.

Q U Æ S T I O X X X I.

An ad judicandum requiratur actio voluntatis?

Ut erroris causam in voluntate esse ostendat Cartesius, adeoque in potestate nostra esse non errare, sic progreditur, §. xxxiv. Atque ad judicandum requiritur quidem intellectus; quia de re, quam nullo modo percipimus, nihil possumus judicare: sed requiritur etiam voluntas, ut rei aliquo modo percepta assensio praebeatur: Non autem requiritur, (saltem ad quomodocunque judicandum) integra & omnimoda rei perceptio; multis enim possumus assentiri, quæ non nisi per obscurè & confuse cognoscimus. Nempe ad judicandum intellectum quidem requiri, cum sit illius actio, probè advertens Cartesius, voluntatem tamen quoque requiri existimat ut rei aliquo modo id est, minus evidenter aut clarè perceptæ assensio præbeatur. Sed assensio, si pro interna mentis actione, quam elicitam vocant, sumatur, quid aliud, quam affirmatio; affirmatio verò, quid aliud quam intellectus actio judicantis aliquid esse verum? Ad externam assensionem aut affirmationem, quæ ore profertur & in externa duntaxat enunciatione consistit, voluntatem concurrere fateor, quia est actio corporis imperata; at verò, si pro interna & elicita mentis actione suma-

sumatur, voluntatem requiri planè falsum est, idque unusquisque illi in se negotio experiri potest, Exempli gratia, Esto homicidium minimum in urbe aliqua, cujus author inquiritur; Si quempiam tunc nitoris ex urbe fugientem, aliave signa seu indicia facti in ipso adversus, nonne te quasi necessitari percipis ad suspicandum, quod iste homicidii istius sit autor: Et tamen hoc ipsum non clarè aut evidentè abs cognosci certum est. Ad assensum ergò quemlibet incertum vel proibilem voluntatem minimè requiri patet, velis enim nolis, abs tequam impetraveris, quin homicidii fugientem reum esse suspicis.

QUÆSTIO XXXII.

An voluntas dici queat infinita?

Putat Cartesius voluntatem se latius extendere, quàm intellectum; in enim hic se ad pauca duntaxat extendat objecta, voluntatem se exdere ait ad omne, quod alicujus voluntatis alterius, etiam immensæ: Dei objectum esse possit; Et hinc fieri, ut, voluntatem extendentes ultra ea, quæ clarè percipimus esse vera, hallucinemur & erres. Hæc autem illius sunt verba. §. xxxv. *Et quidem intellectus perio non nisi ad ea pauca, quæ illi offeruntur, se extendit, estque semper te finita. Voluntas verò infra quodammodò dici potest: quia nihil unum advertimus, quod alicujus alterius voluntatis, vel immensa illius quæeo est, objectum esse possit, ad quod etiam nostra se non extendat: adeò acile illam, ultra ea quæ clarè percipimus, extendamus; hocquè cum fasus, baud mirum est, quod contingat nos falli. Intellectus noster & intas cum sint facultates animæ in re ab illius essentia nequaquam dictæ, sed ratione tantum (ut alibi probatum est, Exerc. Phil. Lib. quæst. ix.) utique, cum anima finita sit, ipsas quoque facultates nasuâ finitas esse, palam est. Si verò infinitam quodammodò voluntam dici velit Cartesius ratione objecti; quod nihil excogitari queat, uod non sese ipsa extendat; respondeo eadem ratione & intellectum nitum quodammodo fore, quin & visum corporeum, seu oculos; ut omne appetibile voluntatis, sic & omne intelligibile intellectus, mne visibile visus & oculorum objectum est. Quin imò, si volunex recepta Peripateticorum Sententia, non nisi in bonum ferri pos(quod tamen falsum esse ostendimus Philos. Lib. vi. Exercit. 111. l. 111.) Utique longè latius intellectum sese quam voluntatem ex-*

F

tendere

tendere consequitur; quia non bonum tantum, sed & malum formaliter ab intellectu percipi potest. Quo ergo jure intellectum valde finitum, voluntatem verò infinitam faciat hic Cartesius ipse Discipuli viderint. Ignori certè nulla cupido; Omnis ergo volitio intellectus actionem seu apprehensionem præsupponit, eamque sequitur. De causa erroris jam supra actum est, neque eam formaliter in voluntate, sed in intellectu sitam esse, ejusque ab imperfectione ac cæcitate dependere, ostensum est. Errores tamen quosdam voluntarios dici, & culpabiles, proinde in sensu morali voluntati posse attribui haud nego, & constat ex iis quæ *Philos. Lib. vi. Exerc. ix. de Ignorantia* disserimus. Verum hæc consideratio hujus non est loci, ut patet; quia non de causa morali, sed proxima, vera, & formali erroris causa, quæstio est; hanc autem non voluntatem, sed intellectum, ejusque imperfectionem esse jam sæpius dictum. Quemadmodum enim ab intellectu perfectio & sano visio perfecta & clara, ità contrà, perceptio imperfecta & falsa ab intellectu imperfecto & corrupto proficiscitur, quemadmodum & ab oculo vitioso visio vitiosa & imperfecta, ut notum.

Q U Æ S T I O XXXIII.

An Deo errores mentis nostræ imputari queant?

Mentem nos à Deo accepisse, animamque immortalem non ex trahere, ut loquuntur, sed ab ipso immediatè in corpore humano esse productam, ostensum est *Phil. Lib. iv. quæst. v.* Hanc verò ex lapsu & culpâ primorum nostrorum parentum integritate sua originali justissimè esse orbatam ex Theologia similiter hoc loco supponimus. Difficultas ergo est, talem cum à Deo acceperimus animam, quæ usque adèd est imperfecta, ut erroribus gravissimis sit obnoxia, & facillimè hallucinetur, utrum non Deo ejusmodi errores aut hallucinationes mentis attribui debeant? Rectè hoc loco docet Cartesius, id nequaquam fingi posse; rationem tamen haud satis accuratè attigisse videtur. Sed verba ipsius audiamus, §. xxxvi. *Neque tamen ullo modo Deus errorum nostrorum author fingi potest. propterea quod nobis intellectum non dedit omniscium. Est enim de ratione intellectus creati, ut sit finitus; ac de ratione intellectus finiti, ut non ad omnia se extendat.* Neminem sanè usque adèd stupidum existimo, qui ex eò Deum errorum causam esse deduxerit, quod non dederit homini intellectum omniscium sive infinitum; sed quod creaverit imperfectum non solum negativè, sed etiam privativè, seu absque perfectione

fectione & cognitione sibi ex natura prima convenienti, in qua primaria imaginis divinæ pars à Theologis constituitur. Neque enim ex finitate formaliter procedit, quod intellectus noster erret, & tam sæpè hallucinetur, (quia tunc semper erraret, quia semper finitus,) sed ex corruptione & imperfectione nativa, ut dictum. Quemadmodum nec ex finitate oculi est quod objectum non rectè videat, sed ex vitio aliquo ipsi insito, ut patet. Nos ergò paulò aliter difficultatem istam tollendam arbitramur, nempe propterea Deum errorum nostrorum & hallucinationum causam esse non posse, quia ipse omniperfectus, prima veritas, & purissima lux, sicut nec propterea malitiæ author esse potest quia infinita & summa bonitas. Plurquam stramineum nobis videtur hoc argumentum, Deus creavit animam imperfectam; Ergò author est & causa imperfectarum aut vitiosarum ejus Actionum. Perinde enim arguere possem: Pater generavit filium imperfectum aut vitiosum, ergò causa est omnium actionum imperfectarum aut vitiosarum, quæ à filio proficiuntur: Vel, generavit filium cæcum, ergò causa est, quod incidere in foveam, quam ob cæcitatem videre non poterat. Ecquis fabro ferrario aut machæropœo imputandum putet homicidium, quod gladio ab ipso confecto perpetratum est?

Q U Æ S T I O XXXIV.

An summa perfectio hominis sit, quod agat liberè?

Hominem omnibus in Terra creaturis præstantiorem & perfectionem esse certum est: hanc quoque præstantiam aut perfectionem non in corpore duntaxat ipsius, aut externa facie, in qua tamen insignis majestas, sed in anima rationali aut mente immortalis imprimis quærendam esse, manifestum arbitror. Et hinc actiones animæ rationales aut mentales præstantissimas esse colligitur. Utrum verò actiones quæ propriè Intellectus dicuntur & theoreticæ, an verò voluntatis practicæ perfectiores dicendæ sint, explicatum vide in *Phil. Lib. IV. quæst. xxxi.* Ego quidem sic sentio, in actione mentis summam hominis perfectionem sitam esse, ea nempe quæ circa Deum, summum creaturæ bonum, versatur, prout ostensum *Philos. Lib. VI. Exercit. xx. quæst. viii.* Cartesius, ut errores mentis ab arbitrio nostro pendere doceat, summam hominis perfectionem in eo constituendam ait, quod liberè & per voluntatem agat, quodque sit suarum actionum author, & ob eas laudetur. Verba ipsius hæc sunt. §. xxxvii, *Quod verò latissimè pateat voluntas,*

hoc etiam ipsius natura convenit : ac summa quadam in homine perfectio est, quod agat per voluntatem, hoc est liberè ; atque ità peculiari quodam modo sit author suarum actionum, & ob ipsas laudem mereatur. Non enim laudantur automata, quod motus omnes ad quos instituta sunt, accuratè exhibeant, quia necessariò illos sic exhibent ; laudatur autem eorum artifex, quod tam accurata fabricavit, quia non necessariò, sed liberè ipsa fabricavit. Eademque ratione magis profectò nobis tribuendum est, quod verum amplectamur, cum amplectimur, quia voluntariè id agimus, quam si non possemus non amplecti. Non minùs amplum intellectus, quam voluntatis esse objectum jam modò notatum fuit ; Magnam quoque in homine esse perfectionem agere per voluntatem, quæ tamen præviu[m] habeat intellectus iudiciu[m], concedo ; ut & illud, quod homo suarum actionum author nuncupari possit, quodque ob eas vel laude vel vituperio dignus censeatur. Interim & hoc notare licet, laudem & vituperiu[m] etiam rebus inanimatis & brutis attribui utcunque posse. Quotiescunque enim sit, ut automata laudentur, quæ accuratè motus suos exhibeant, ejusque authores ; neque spectemus utrum ex libero ipsorum arbitrio, an verò necessitate quadam adaçti illa fabricaverint ? Et si vel omninò sciremus artificem vel pictorem usque ad eò in arte sua peritum esse, ut errare in opere suo non queat, nunquid propterea cum ejusve artificiu[m] minori laude dignum censeremus ? Nonne laudantur bruta, elephantes, equi, canes, boves, aves, pisces ; item, arbores, herbæ, metalla, lapides, &c. ob perfectionem aliquam naturalem, quam in ipsis experimur ? Ecquis dubitet, quin laudetur oculus, qui perfectè & clarè objectu[m] suu[m] percipit coloresque omnes & lineamenta acutissimè discernit ? quomodo ergò hinc ostendi queat, perceptionem veri esse actionem arbitrii aut libertatis, quod Cartesius intendit, equidem non capio. Certè, si hoc argumentu[m] procederet, non obscuriores illi mentis assensus, sed evidentissimæ imprimis & clarissimæ veritatis perceptiones, quæ & scientificæ dicuntur, voluntati attribuenda forent : Si enim ob aliquas, ob perfectissimas præsertim mentis actiones homo laudem meretur. Si verò clara & distincta mentis perceptio à voluntate non dependeat, quomodo in libera hominis actione summa ipsius perfectio consistat, non intelligo. Sed & hoc notari velim, percipere veritatem, cum percipimus, non minus nobis attribui, si necessariò, quam si liberè percipiamus, & possemus non percipere. Quàmvis enim automata motus suos necessariò exhibeant, nihilominus automatoru[m] motus esse non desunt. Similiter & beatoru[m] in cœlis visio necessaria est, & non possunt

sunt non videre & amplecti summum bonum; Ecquis inde ejusmodi actiones ipsis attribui non posse arguat? Oculis apertus necessariò obiectum suum percipit, auris audit sonos, & stomachus cibos concoquit, & tamen nemo est, qui non oculis visionem, auribus auditionem, & stomacho concoctionem attribuat. Perinde & perfectissima hominis actio, quæ in intellectione seu apprehensione, nec non volitione & amore summi boni sita est, sive necessariò sive liberè ab ipso peragatur, ad rem non facit; Quin imò, quò magis *indifferètia* & indifferentia ab hujusmodi actionibus remota est, eò perfectum magis beatumque hominem censeo; quemadmodum & ab Angelorum beatorumque actionibus indifferentiam omnem ablatam esse Theologi docent, ità ut necessariò Deum & videant & ament, cumque eo tam arctè uniti sint, ut nulla prorsus ratione ab eo separari queant. Hallucinatur ergò Cartesius, dum ità amplecti verum in nostra potestate esse vult, ut etiam possimus non amplecti; Ex in eo perfectionem nostram consistere: cùm contra ex dictis eo minus perfectum hominem fore pateat, si verum etiam posset non percipere seu amplecti. Ego certè istum perfectissimum judico intellectum, qui usque adèdè est illuminatus, ut quodlibet verum sine ullà prorsus mora protinus clarissimè, evidenter, & necessariò percipiat & amplectatur; quemadmodum & experientia docet paulisper intellectum nostrum magis magisque illuminari, dubitationes tolli, & tandem eò ascendere, ut non amplius de veritate sibi proposita dubitare queat. Ità ut *indifferètia* ista, sive indifferentia intelligendi vel non intelligendi, (si quæ in mente fingatur) magnum imperfectionis signum sit: tantum abest ut in ista summam hominis perfectionem consistere arbitremur.

Si denique hic paulò magis theologicè agere vellemus, nonne Deum eiusve Spiritum perfectissimarum actionum nostrarum rectius authorem vel causam, quam nos ipsos dicemus, juxta Scripturæ dicta, Phil. 1. 13. *Deus enim est, qui efficit in vobis & ipsum velle, & ipsum agere, pro gratuita sua benevolentia.* Hebr. xii. 20. 21. *Deus verò pacis compingat vos ad omne opus bonum, ad præstandam ipsius voluntatem, efficiens in vobis quod gratum est in conspectu suo per Jesum Christum.* Phil. 1. 6. *Persuasum habens hoc ipsum, fore ut qui incepit in vobis opus bonum, perficiat usque ad diem Jesu Christi.* Idque imprimis ratione actionum intellectualium & fidei considerari velim; quia fides est mentis qualitas, lumenque ipsi inditum, quò de veritate evangelica & gratia Dei in Christo plenissimè persuadetur; quod certè non nisi à Deo, ejusque spiritu il-

luminante esse potest; Unde & fides expresse *donum Dei* nuncupatur, Eph. 11. 8. Et *cor Lydia adaperuisse* Legitur Dominus, ut *attenderet eis, qua dicebantur à Paulo.* Act. xvi. 14. Falsum ergò est, quod hic putat Cartesius, summam hominis perfectionem esse, quòd agat liberè, si-
ve, quod hic idem ipsi, quod ad agendum vel non agendum sit *ad hoc*, ità ut etiam non agere possit.

Q U Æ S T I O X X X V.

An errare defectum arguat in actione tantum, & non in natura nostra?

De hoc negotio ità porrò differt Cartesius §. xxxviii. *Quod autem in errores incidamus, defectus quidem est in nostra actione sive in usu libertatis, sed non in nostra natura; utpote qua eadem est, cum non rectè, quam cum rectè judicamus.* Hoc perinde mihi videtur, ac si quis diceret, claudicationem esse in incessu claudicantis aut usui ipsius locomotivæ, non verò in homine claudicante, cum idem sit homo, qui rectè & non rectè incedit. Vel, peccatum sive vitiositatem esse in actione vitiosa, non verò in homine eam committente; atque adèd non homo, sed actio peccare dicitur. Nùm ergò existimat Cartesius noster, naturam hominis aut mentis prorsus integram esse atque incorruptam, qualem eam à principio ante lapsum à Deo conditam fuisse docent Orthodoxi? Quantò ergò nos verius hominem agendo deficere, ejusque naturam corruptam atque deformatam peccato contendimus, mentemque ipsius admodum occæcatam esse, & insigni lumine orbatam. Et hinc esse jam ex dictis satis superque patet, quod in errores & vitia usque adèd sumus proclives, tamquè facilè agendo deficiamus, aut judicando erremus. Eandem quidem esse mentem fateimur, sive verè sive falsò judicet, nempe essentia sive entitate, non verò qualitate aut perfectione; quemadmodum idem erat homo ante peccatum integer, qui post peccatum corruptus atque deformatus evasit.

Q U Æ S T I O X X X V I.

An Deo, cum potueris dare mentem erroris expertem, errores imputari nequeant?

Negativa verissima est, eamque proinde rectissimè tradit Cartesius sequentibus hisce verbis; *Et quamvis tantam Deus perspicacitatem intel-*
lectui

lectui nostro dare potuisset, ut nunquam falleremur, nullo tamen jure hoc ab ipso possumus exigere. Nec quemadmodum inter nos homines, si quis habeat potestatem aliquid malum impediendi, nec tamen impediat, ipsum dicimus esse ejus causam; ita etiam quia Deus potuisset efficere, ut nunquam falleremur, ideò errorum nostrorum causa est putandus. Potestas enim, quam homines habent uni in alios, ad hoc est instituta, ut ipsa utantur, ad illos à malis revocandos; ea autem, quam Deus habet in omnes, est quam maxime absoluta & libera, idicòque summas quidem ipsi debemus gratias pro bonis, quæ nobis largitus est; sed nullo jure queri possumus, quod non omnia largitus sit, quæ agnoscimus largiri potuisse. Cùm Deus absolutus sit omnium creaturarum Dominus, ejusque autoritas infinita, & potestas liberrima; nullisque limitibus aut legibus circumscripta, æquis taminiqus rerum sit æstimator, qui hoc vel illud sibi à Deo deberi vel somnando cogitet; quique proinde, si minus fecerit, injustitiz ipsum aut injuriæ accuset? Præclare Jobus Cap. 1x. 12. Ecce, rapuerit, quis cogat eum restituere? Quis dicat ei, quid facis? Et Dan. 1v. 35. Omnes verò habitatores terra ut nihili reputantur, & pro voluntate sua facit in exercitu cæli, & habitatoribus terra; neque est qui prohibeat manum ejus, aut dicat ei, quid facis? Dei est, creaturis suis pro liberissima sua voluntate & potestate absoluta limites & leges præscribere, non verò ab iisdem accipere. Adeoque vel hoc ipso hoc illudvè justum asserimus quod à Deo factum vel statutum. Quod ergo peccata non impediat Deus, nosque sæpissimè deficere atque errare permittat, justum est, quia sic ipsi visum, qui injustus esse nequit. Sed nec illud usque ad eò absolute verum est, quod putat Cartesius, apud homines obtinere, si quis malum aliquod impediendi potestatem habeat, nec impediat tamen, ejus ipsum causam aut authorem dicendum esse. Quotiescunque enim sit, ut pauperes à sceleratore pecuniam sub scelerore reddendam petant, nec tamen peccent qui pecuniam accipiunt, cum tamen non petendo pecuniam impedirent peccatum sceleratoris. Similiter, nec divites pauperibus bona sua largiri tenentur, quæ si possiderent à furto abstinuissent; Nunquid propterea divites fuiti reos dicemus? Oenopolæ homini ebrioso vinum vendere licet, quo sic careret, non se eo ingurgitaret, neque tamen propterea ebrietatis illius causa Oenopola putandum est. Quot falsæ in Rep. nostræ religiones permittuntur à Magistratu politico, quas impedire possent: quis tamen a leo infans sit, ut cum Cartesio concludat, Magistratum istarum religionum esse causam? Interim Christianos omnes charitatis lege teneri lubens fateor, alios-

aliosque ab erroribus & peccatis revocare pro viribus singulis incumbere. Huic tamen legi pro liberrima sua & absoluta potestate minimè obstrictum esse Deum rectè à Cartesio notatum; summas proinde, ob ea, quæ nobis bona largitus est, nos ipsi debere gratias, nulloquæ nos jure queri posse, quod plura largitus non sit. Sed quorsum hæc spectent, quidve sibi ex moralibus hisce hoc loco concludendum velit Cartesius, prorsus ignoro.

Q U Æ S T I O X X X V I I .

An Libertas assentiendi vel dissentiendi nobis innata sit?

Suppono quæstionem non esse de actu quodam voluntatis, qui idem nos cum aliis velle significamus, qui & Consensus voluntatis dici solet; sed de actu mentis sive judicii, quo propositionem aliquam veram esse internè judicamus aut falsam. Ex. gr. sit quæstio, utrum omnia corpora ex quatuor componantur elementis, igni, aëre, aqua, terra? Proferuntur rationes pro utraque parte, affirmativa & negativa? Quæritur ergò, utrum mens auditis & perceptis hisce rationibus pro negativa, eaquæ multò magis probabilia intelligens, pro arbitrio suo possit tamen assentiri affirmativæ, & judicare vel suspicari illam esse veriolem? Ego certè id impossibile judico, & apertam involvere contradictionem; Quid enim est percipere aliquam rationem esse probabilem vel probabiliorem, quam assentiri seu mente dicere illam sententiam esse veriolem. Cartesius tamen contrariam sententiam amplectitur, eamquæ usque adeò veram & evidentem putat, ut inter primas & maximè communes notiones nobis innatas referat. §. xxxix. *Quod autem, inquit, sit in nostra voluntate libertas, & multis ad arbitrium vel assentiri vel non assentiri possimus, adeò manifestum est, ut inter primas & maximè communes notiones, qua nobis sunt innata, sit recensendum.* Mirandum sanè Cartesium, qui omnia tam clarè tamquæ evidenter distinxerit percipi debere docet, antequam assensum nostrum præbeamus, hoc suum assertum adeò manifestum putare, ut inter primas & maximè communes notiones sit recensendum; cùm tamen nihil falsius ab ipso fingi unquam potuerit, ut patet ex dictis. Neque ad hoc probandum longo discurfu opus est. cùm unusquisque facilè apud se experiri valeat, utrum, rationibus pro utraque sententia allatis & perceptis, non necessitetur ad credendum illam esse veriolem, pro qua rationes maximè probabiles allatas fuisse percipit.

Sed

Sed quomodo hoc suum assertum probet Cartesius audiamus. *Paturque*, inquit, *hoc maxime paulo ante, cum de omnibus dubitare studentes, eo usque sumus progressi, ut fingeremus, aliquem potentissimum nostra originis autorem modis omnibus nos fallere conari; nihilominus enim hanc in nobis libertatem esse experiebamur, ut possemus ab iis credendis abstinere, qua non planè certa erant & explorata: Nec ulla magis per se nota & perspecta esse possunt, quam qua tunc temporis non dubia videbantur.* Quo usque hic noster Cartesius in dubitationibus suis fuerit progressus, non refert, & de eo plus satis nobis actum; ad *Quaest. I. II. III. & IV.* Fateor nonnunquam tales injici alicui posse scrupulos quibus ad maximas dubitationes redigatur, etiam de ejusmodi veritatibus, quæ nobis prius evidentissimæ videbantur; at verò tales dubitationes injici nobis posse, ut vel negemus vel dubitemus de rebus sua luce evidentissimis & per se notis, veluti; *duo & tria esse quinque, Totum esse majus sua parte, Idem posse esse & non esse simul, Nihil posse esse causam & aliquid, &c.* planè falsum arbitror; neque quempiam sanæ unquam mentis extitisse puto, qui tantam in se libertatem aut potestatem expertus sit, ut ejusmodi propositiones mente negare potuerit, aut earum veritatem in dubium revocare. Ego quidem me nunquam circa res intelligibiles assentiendi vel dissentientiendi mente potestatem expertum ingenuè fateor. Nempe prout ratio, qua sententia aliqua adstruitur, vel evidens, vel certa, vel probabilis, vel falsa apparebat menti, eatenus sententiam istam vel evidenter & certò veram vel probabiliter tantum, vel etiam falsam judicabam, neque aliter potui.

QUÆSTIO XXXVIII.

An omnia à Deo præordinata sint?

Cùm solus Deus sit Ens necessariò existens, utique res omnes præter Deum haud necessariam habere existentiam manifestum est. Possunt ergò illæ considerari vel quatenus sunt in statu meræ possibilitatis, vel quatenus sunt in statu futurationis, vel quatenus sunt in statu actualis existentiae: status existentiae actualis sequitur statum futurationis, sicut & hic ordine statum possibilitatis. Quod enim hodie existere incipit, id ipsum antequam existeret, erat futurum, & antequam esset futurum, erat possibile. Jam verò, cum res ex se & naturâ suâ futuræ non sint, causa aliqua inquirenda venit, qua è statu possibilitatis translatae sint in statum futurationis. Cùm enim res merè possibiles indifferenter sese

G

habeant

habeant tam ad non-futuritionem, quam ad futuritionem, eausa aliqua sit oportet, quæ istam differentiam determinet, easque ex merè possibilibus reddat futuras. Huiusmodi itaque causa quærenda est vel extra Deum, vel in Deo. Extra Deum nihil occurrit, quod istius futuritionis causa esse possit; ratio est, quia transitus iste factus est ab æterno; ab æterno enim res fuerunt futuræ, alioquin enim eas Deus tanquam futuras cognoscere non potuisset. At ab æterno extra Deum nihil fuit; consequens ergo est, causam istius transitus esse in Deo. At verò intellectus Dei causa esse nequit, quia intellectus obiectum suum præsupponit, ut enim res est, ita à Deo cognoscitur. Superest ergo, ut Voluntas divina transitus istius sit causa, qua res ex statu possibilitatis traducta est in statum futuritionis. Unde jam conficitur, quæcunque futura sunt ex Dei voluntate habere, quod futura sint, quia scilicet Deus decrevit, ut fiant. Si enim non decrevisset Deus, ut fierent, non fierent; & si in tempore non fierent, nunquam futura dici potuissent. Constat ergo ex hoc discursu, omnia quæ sunt in tempore jam ab æterno à Deo decreto suo fuisse definita atque præordinata, ut fierent, eo nempe modo, quo eadem actu fiunt. Agnovit quoque hanc veritatem Cartesius, §. XL. Sed, inquit, quia jam Deum agnoscimus, tam immensam in eo potentiam esse percipimus, ut nefas esse putemus existimare, aliquid unquam à nobis fieri posse, quod non ante ab ipso fuerit præordinatum.

QUÆSTIO XXXIX.

An & quomodo æterna Dei præordinatio cum arbitrii nostri libertate concilietur?

Difficillimam hanc & gravissimam quæstionem attingit Cartesius verbis proximè sequentibus: Facile, inquit, possumus nos ipsos magnis difficultatibus intricare, si hanc Dei præordinationem cum arbitrii nostri libertate conciliare, atque utramque simul comprehendere conemur. Magnas hic esse & moveri posse difficultates, quibus sese multi expediendo non sint, certum est. Quod si verò attentè ea, quæ jam à nobis dicta sunt velimus considerare, etiam hæc difficultates non aded magnas fore patebit, quin facile superari queant. Sed audiamus qua ratione aut via se hinc expediat Cartesius. §. XLI. Illis verò, inquit, nos expediemus, si recordemur, mentem nostram esse finitam; Dei autem potentiam, per quam non tantum omnia, quæ sunt aut esse possunt, ab æterno præscivit, sed etiam voluit ac præordinavit, esse infinitam; ideòque hanc quidem à nobis satis attingi,

ut

ut clarè & distinctè percipiamus, ipsam in Deo esse; non autem satis comprehendendi ut videamus quo pacto liberas hominum actiones indeterminatas relinquat; libertatis autem & indifferentia qua in nobis est, nos ità conscios esse, ut nihil sit quod evidentius & perfectius comprehendamus. Absurdum enim esset, propterea quod non comprehendimus unam rem, quam scimus ex natura sua nobis esse debere incomprehensibilem, de alia dubitare, quam intimè comprehendimus, atque apud nosmet ipsos experimur. Quibus profectò se ità expedire videtur Cartesius, ut contrà, quomodò se iis expediat, ignorare fateatur. Nam, ut nunc præteream, quod Dei potentiam constituat tanquam principium formale, per quod ab æternò omnia sciverit Deus, & præordinaverit, mox subjicit haud satis à nobis comprehendendi posse, quo pacto liberas hominum actiones indeterminatas relinquat. At verò hoc non extricare est, aut explicare, sed difficultatem usque adedò magnam facere, ut nemo se inde extricare queat, quia comprehendendi non potest. Agè ergò nunquid alia ratione nosmet hinc expedire possimus, attendamus.

Notandum igitur est de Decreto, seu præordinatione Dei, quod sit efficax, ità ut certò & infallibiliter eveniant, quæcunque ab ipso decreta sive præordinata sunt. Cùm verò & illud certum sit, decrevisse Deum non tantùm, ut hoc vel illud determinatè fieret, verùm etiam modum, quo fieret, sive liberè sive necessariò sive contingenter: (Neque enim decrevit tantùm Deus, ut Pilatus crucifigeret Christum, verùm etiam, ut id faceret liberè seu ex libertate arbitrii & prævia deliberatione,) utique satis clare constare arbitror ex vi istius Decreti factum, quod Pilatus liberè Christum cruci suffixerit. Ità ut per immutabilitatem & efficaciam decreti non evertatur, sed potius quam maxime stabilietur contingentia eventuum, & libertas actionum humanarum. Posito enim decreto; (Pilatus liberè in crucem aget Christum, per istos milites, in istoc loco, tempore, &c.) nisi Pilatus id liberè præstitisset, per istos milites, isto loco, tempore, &c. Decretum efficax non fuisset nec impletum, quia non præstitisset eo, quo decretum erat modo, loco, tempore, &c. Et hinc jam patet, decretum & præordinationem Dei optimè cum libertate actionum humanarum & contingentia rerum conciliari posse, & nullam esse inter ea repugnantiam; Cùm contrà, ex immutabilitate decreti, & efficacia præordinationis divinæ optimè probetur tum libertas arbitrii in agendo, tum contingentia eorum, quæ fiunt, quia non tantùm hoc vel illud materialiter futurum esse Deus scivit & præordinavit; verùm etiam formaliter, quomodò illud futurum

rum sit, necessarione, an contingenter, certò & infallibiliter, decrevit. Sicuti enim actio libera, aut eventus contingens dicitur in presenti, ità etiam ab æterno eadem actio dicebatur libera, aut eventus contingens in futuro, quemadmodum & postea dicitur libera aut contingens in præterito, quod explicatur per *Est, erit, & fuit*. Quod enim hodie fit liberè & contingenter in præsentì; idipsum heri & in omni duratione præterita, erat liberè & contingenter futurum; Et cras, & in omni duratione secutura in æternum, dicitur liberè aut contingenter fuisse factum in præterito. Sicuti igitur, quod hodiè liberè & contingenter fit, Deo notum est; ità etiam ab æterno illud liberè & futurum esse certò & infallibiliter prænovit, & consequenter etiam decrevit. Ità ut nulla amplius repugnantiz inter præordinationem Dei & libertatem arbitrii vel species superesse mihi videatur, sed quam maxima conformitas, & concordia manifesta.

QUESTIO XL.

An falli & assentiri falsis differant?

Cartesius cum errores libero voluntatis arbitrio attribuendas docuerit, & tamen neminem falli velle probè adverteret, (nisi fortè in sensu quodam improprio & morali,) difficultatem hanc ut tolleret, distinctionem commentus est inter velle falli, & velle assentiri iis, in quibus contingit errorem reperiri. Sic autem ipse loquitur, §. XLII. *Jam verò, cum sciamus, errores omnes nostros à voluntate pendere, mirum videri potest, quod unquam fallamur, quia nemo est qui velit falli.* Equidem si errores nostri omnes à voluntate pendeant, & verò nemo sit, qui errare directè velit, cum omnes naturaliter cognitionem veri appetant, meritò mirum cuiquam videri posset, quod unquam falleremur; quia falli ratione intellectus nostri, nihil aliud est, quam putare verum esse, quod falsum est. Dico, *ratione intellectus nostri*, quia falli ratione causæ fallentis malitiam ac fallendi voluntatem arguere potest; quod tamen ad præsens negotium non facit; quia non refert à quo intellectus in errorem inducatur sive à se sive ab alio; semper enim verum manet sive fallatur mens ab alio sive à se-ipsa, quod à vero in judicando aberret, adeoque falso assensum præbeat, proindeque ipsius ratione falli & falsis assentiri non differunt. Sic igitur contrà Cartesium argumentor: qui non vult falli, non vult errare, hæc enim æquipollentia sunt; at nemo est, qui velit falli, ut ipse Cartesius fatetur; Ergo nemo vult errare;

errare; proindeque error à voluntate non proficiscitur, ut jam sæpius ostensum est.

Sed pergit Cartesius: *sed longè aliud est velle falli, quam velle assentiri iis, in quibus contingit errorem reperiri.* Ego quidem nullam hic ratione intellectus nostri, ut inodò dictum, differentiam percipere possum. Cum enim falli nihil aliud sit quam in errorem induci, hoc verò nihil aliud quam assentiri seu credere falsis, patet differentiam hanc nullius prorsus esse momenti, & gratis à Cartesio excogitatam. Repugnant ergò & illa, quæ mox subjicit: *Quamvis: revera nullus sit, qui expresse velit falli, vix tamen ullus est, qui non sæpè velit assentiri iis, in quibus error ipso infcio continetur.* Siquidem velle falli, & velle assentiri falsis prorsus idem sunt, & verò nemo velit expresse falli, ut fatetur Cartesius, neminem quoque expresse velle patet iis assentiri, in quibus error continetur. Et quis intelligat illa, quæ in margine hic notavit Cartesius: *Quomodo quamvis nolimus falli, fallamur tamen per nostram voluntatem.* Nonne hæc contradictoria sunt: *Nolle falli, & falli per voluntatem?*

Quod denique subjicit Cartesius: *Quin & ipsa veritatis asequenda cupiditas persæpè efficit, ut ii qui non rectè sciunt quæ ratione sit asequenda, de iis quæ non percipiunt iudicium ferant, atque idcirco ut errant,* Hoc, inquam, parùm Philosophicè dictum videtur. Ecquis enim Philosophiam, quæ veritatis & sapientiæ studium est, causam errorum dixerit? Quod philosophi errant, aut hallucinantur sæpius, non Philosophiæ impetandum aut veritatis studio, sed mentis imperfectioni, ut patet ex dictis, nec non pertinaciæ, superbiæ, invidiæ, ut alibi à me notatum est. Præjudicium quoque & servitutem acerrimos veritatis hostes esse ibidem fuit notatum.

QUESTIO XLI.

Quando fallatur Intellectus?

De hac re ità Cartesius, §. XLIII. *Certum autem est, nihil nos unquam falsum pro vero admitturos, si tantum iis assensum præbeamus, quæ clarè & distinctè percipiemus.* Hoc enim idem est, ac si dicerem nos nunquam falli, quando ea vera esse judicamus, quæ vera sunt; siquidem quæ clarè & distinctè percipiuntur esse vera, falsa esse non possunt. Et quis de eo dubitet? Quid autem hoc pro libertate arbitrii, quam ad judicandum requiri Cartesius existimat? Sive enim ad judicandum arbitrium concurrat, sive non concurrat, iudicium tamen erit verum,

si falsum non admittat. Sed pergamus: *Certum*, inquit, *quia cum Deus non sit fallax, facultas percipiendi, quam nobis dedit, non potest tendere in falsum, ut neque etiam facultas assentiendi, cum tantum ad ea, quae clarè percipiuntur, se extendit.* Quid autem hoc est, *facultas percipiendi non potest tendere in falsum?* Certè, quamvis Deus minime fallax sit, & summè verax, experientia docet tamen intellectum sæpius in falsum pro vero amplecti, cujus quidem rei rationem in mentis nostræ corruptione quaerendam, non verò in Deo, jam suprà notatum fuit. Quod porro addit facultatem assentiendi non posse tendere in falsum, cum tantum ad ea, quae clarè percipiuntur, se extendit, idem est ac si dixisset, Intellectum non posse falsis assentiri, quando assentitur iis, quae vera sunt. Nonne hoc egregiè philosophari est, & bis terve uno commate *ὁμοιοπαγῆς*? Addit Cartesius: *Et quamvis hoc nulla ratione probaretur, ita omnium animis à natura impressum est, ut quoties aliquid clarè percipimus, ei spontè assentiamur, & nullo modo possimus dubitare, quin sit verum.* Præclarè profectò? Quid enim ratione opus, ut probentur identica? At verò falsum est, quod ait Cartesius, omnium animis à natura impressum esse, ut iis, quae clarè percipimus, spontè assentiamur, seu ex libero arbitrio, cum planè ad huiusmodi assensum necessitari intellectum jam sæpius notatum sit; Quemadmodum & ipse Cartesius, vi veritatis convictus, eadem periodo continuò subjicit, *nullo modo nos posse dubitare, quin sit verum.* Si nullo modo possumus dubitare, quomodo nos spontè ei assentiri asserit? Et quomodo suprà §. xxxix. in voluntate nostra libertatem assentiendi vel dissentienti constituit, usque adeò ut id ipsum primas inter maximèque communes notiones recensendum putarit? Concilient ista Cartesiani.

Veriora sunt, quae sequuntur, §. xliiv. *Certum*, inquit, *etiam est, assentimur alicui rationi, quam percipimus, vel nos falli, vel casu tantum incidere in veritatem; atque ita nescire nos non falli. Sed sanè rarò contingit, ut assentiamur iis, quae advertimus à nobis non esse percepta; quia Lumen naturae nobis dicitur, nunquam nisi de re cognita esse judicandum.* In hoc autem frequentissimè erramus, quod multa putemus à nobis olim fuisse percepta, iisque memoriae mandatis tanquam omninò perceptis, assentiamur; quae tamen reverà nunquam percipimus. At verò, quid hinc sibi exculpat Cartesius, non video; Neque enim ulla vel specie consequentiæ hinc quispiam deduxerit, errores voluntati ejusve arbitrio attribuendos esse. Præjudicia hæc sunt, quotiescunque putamus quædam à nobis olim percepta fuisse, iisque tanquam omninò perceptis assentimur, quae tamen reverà

nun-

namquam percepinus: hæc verò veritati quam maximè adversari, & detrimentum adferre certissimum est; adeoque ab iis, quantum fieri potest, cavendum Philosophiæ studioso.

QUÆSTIO XLII.

Quid sit perceptio clara & distincta?

Ad perceptionis perfectionem requiri fateor, ut clara sit atque distincta, quemadmodum & clara ac distincta objecti perceptio perfecta visio appellatur. Per multos quoque reperiri homines facilè concesserim, qui nihil unquam in tota vita perfectè percipiant, atque adeò rectè, id est, perfectè de rebus judicare queant. Distinctio tamen, quam hic fabricat Cartesius inter perceptionem claram & distinctam, mihi saltem non adeò clara & distincta apparet. Sed ipsum audiamus, §. XLV. *Claram inquit, voco illam, qua menti attendenti præsens & aperta est, sicuti ea clarè à nobis videri dicimus, qua oculo intuenti præsentia, satis fortiter & apertè illum movent. Distinctam autem illam, qua, cum clara sit, ab omnibus aliis ita sejuncta est & præcisa, ut nihil planè aliud, quam quod clarum est, in se contineat.* Meo quidem judicio hac definitione perceptionis claræ, eadem non clarior, sed obscurior facta est. Et profectò si sit aliquid, quod explicatione aut definitione non indigeat, est id quod clarum dicimus. Ecquid enim clarius perceptione clara excogitari potest? Suprà §. x. dixerat Cartesius, non se explicare multa nomina, quia per se satis nota sibi videbantur, sèquæ sæpiùs advertisse philosophos logicis suis definitionibus ea, quæ simplicissima erant ac per se nota obscuriora reddidisse; quod venissimum est. At turpe est Doctòri, cum culpa redarguit ipsum.

Et reverà, si alicubi, quid clara sit aut distincta perceptio, explicandi locus esset, utique in harum meditationum principio id factum oportebat. Verùm enim verò, ut dictum, quid clara sit perceptio definitione aut explicatione ulteriori in Physica non indiget. Et majori nunc cum ratione ulterius à Cartesio quærere possem, quid sit *Mens attendens*, quid illud *quod ipsi præsens & apertum*; item, quid *perceptio ab omnibus aliis sejuncta & præcisa, ut nihil aliud, quam id quod clarum est in se contineat*, & id genus alia. Hæc profectò non minus explicatione indigent, quam id quod clarum est. Dum ergò claram explicare conatur Cartesius, obscurum reddere deprehenditur. De motu quoque illo satis forti & aperto, quo ab objecto oculus moveri indicat, aliàs agn-

agendum. Et quid hic multis opus est, siquidem ea clarè à nobis videri dicuntur, quæ ab oculo sano per medium non impeditum in debita distantia percipiuntur, cum perfectior visio non detur. Sic clarè video hanc Scripturam, has literas, hanc chartam, hos libros, &c. Sed nonne & hæc omnia distinctè à me videntur? Pleiades clarè oculis meis in cælo sereno conspicio, & distinctè, utrum verò sex sint stellæ vel septem non ità clarè video, nec distinctè; ità ut clarè & distinctè objectum videre seu percipere prorsus idem esse videantur.

Probare tamen suam distinctionem conatur Cartesius, §. XLVI. *Ità dum quis magnum aliquem sentit dolorem, clarissima quidem in eo est ista perceptio doloris, sed non semper est distincta; vulgò enim homines illam confundunt cum obscuro suo judicio de natura ejus, quod putant esse in parte dolente, simile sensui doloris, quem solùm clarè percipiunt. Atque ita potest esse clara perceptio, quæ non sit distincta; non autem, ulla distincta, nisi sit clara.* Verum est, qui sentit dolorem, satis clarè percipit eum, scilicet esse in corpore suo, licet distinctè in qua sit corporis parte aut particula non percipiat. At verò, inquam ego, qui dolorem sentit ne clarè quidem semper percipit in qua sit parte aut particula corporis. Dolorem esse in corpore clarè & distinctè percipitur, in qua verò parte aut particula nec clarè, nec distinctè. Concedi tamen posset, ne de vocabulis litem cuiquam movere videamur, distinctam perceptionem referri ad illam sive corporis visionem sive mentis perceptionem, quæ de distinctis sive diversis partibus, vel quasi partibus, sive speciebus, adjunctis, qualitatibus, modis, actionibus, &c. Ità ut clara perceptio sit, qua rem simplicem clarè & evidenter percipimus; distincta verò qua in vel de re aliqua diversos, claros tamen habemus conceptus. Sic de Deo Ente simplicissimo, distinctos formamus conceptus, omnipotentia, scientia, æternitatis, justitiæ, misericordiæ, &c. unde & easdem perfectiones ratione distingui dicere solemus. Et hinc jam quoque patet, claram & distinctam perceptionem ratione ejusdem objecti non differre, cum id, quod clarè percipimus, etiam percipiamus distinctè, & quod distinctè non percipimus, ne quidem clarè percipiamus.

Falsum ergò & illud, quod continuò subjicit Cartesius, §. XLVII. *Et quidem in prima ætate mens ita corpori suis immersa, ut quamvis multa clarè, nihil tamen unquam distinctè perceperit;* siquidem claros de re quapiam conceptus etiam distinctos esse necesse est; cum, qui distincti non sunt, confusos, adeoque & obscuros esse ac minimè claros, oporteat.

teat. Neque proinde vera & genuina præjudiciorum, quibus mens nostra sæpissimè in veritatis indagazione impeditur, causa sita est in conceptibus claris, ut vult Cartesius; sed in obscuris & minimè claris. Nempe quod mens nostra vel ex relatione aliorum, vel ex rationibus quibusdam probabilibus & incertis, saltem nimis præcipitanter ante debitum rationum examen, de rebus ipsis judicavit.

QUESTIO XLIII.

De summis rerum generibus.

Quæ Prædicamenta sive Categorias vocant Peripatetici, nos summa rerum genera rectiùs dici arbitramur. Horum autem absolutè summum in Metaphysica nostra diximus esse *Aliquid*, *Exerc. 111.* Quia nihil in rerum natura fingi vel cogitari potest, de quo *Aliquid* non prædicetur. Omne autem Aliquid vel Ens est, vel aliquid Entis, quod propterea etiam *Non-Ens* appellare consuevimus, vel etiam Medium inter Ens & nihil; ut latius in Metaphysica ostensum est. Non-entium genera quoque varia ibidem recensita sunt, Accidens, Modus, Relatio, Actio, privatio, &c. Si tamen de Entium generibus quaestio sit, sciendum utique eorum duo tantùm genera summa enumerari posse; immateriale, & materiale, quorum illud Spiritus appellatur, hoc verò Corpus. Sed jam Cartesium de hoc negotio differentem audire operæ pretium esse videtur. Sic autem ille. §. XLVIII. *Quæcumque sub perceptionem nostram cadunt, vel tanquam res, rerumve affectiones quasdam consideramus; vel tanquam æternas veritates, nullam existentiam extra cogitationem nostram habentes. Ex iis quæ tanquam res consideramus, maxime generalia sunt substantia, duratio, ordo, numerus, & si quæ alia sunt hujusmodi, quæ ad omniâ genera rerum se extendunt. Non autem plura quam duo summa genera rerum agnosco; unum est rerum intellectualium sive cogitativarum, hoc est, ad mentem sive ad substantiam cogitantem pertinentium; aliud rerum materialium, sive quæ pertinent ad substantiam extensam, hoc est, ad corpus. Perceptio, volitio, omnesque modi tam percipiendi quam volendi, ad Substantiam cogitantem referuntur; ad extensam autem magnitudo, sive ipsamet extensio in longum, latum & profundum, figura, motus, situs, partium ipsarum divisibilitas, & talia. Sed & alia quadam in nobis experimur, quæ nec ad solam mentem, nec etiam ad solum corpus referri debent, quæque, ut infra suo loco ostendetur, ab anima & intima mentis nostra cum corpore unionem proficiuntur; nempe appetitus famis, sitis,*

Ec. Itemque commotiones, sive animi pathemata, quæ non in sola cogitatione consistunt, ut commotio ad iram, ad hilaritatem, ad tristitiam, ad amorem, &c. Ac denique sensus omnes ut doloris, titillationis, lucis & colorum, sonorum, odorum, saporum, caloris, duritiei, aliarumque tactilium qualitatum. Varia hic notanda veniunt. Nam quod primò dicit Cartesius, quæcumque sub perceptionem nostram cadunt, id est, quæ à nobis vel mente nostra percipiuntur esse vel res earumve affectiones, vel veritates æternas, falsum est. Nam & Negationes, denominationes externæ, entia apparentia, possibilia, à mente percipiuntur, quæ tamen nec res sunt, nec earum affectiones, si propriè loqui velimus. Deinde & hoc falsum est, quod duratio, ordo, & numerus, tanquam res distinctæ seu Entia à nobis considerentur, aut ut talia verè percipiuntur. Quod porro duo Entium genera intellectualium sive immaterialium, & materialium videatur agnoscere, accipimus, idemque & nos amplectimur, ut patet ex dictis. Quod verò Substantiam extensam vocet Corpus, quasi in mera extensione ipsius essentia consisteret, de eo jam à nobis actum est in *Specimine nostro. cap. iv.* Præterea, motum ad solum corpus referre videtur Cartesius, cum tamen extra omne sit dubium etiam Spiritus finitos esse mobiles, & de loco moveri in locum, de cælo in terram, &c. Denique, quamvis commotiones quædam sive affectus & animi pathemata, putà iræ, tristitiæ, gaudii, &c. partim ad corpus, partim ad mentem referri queant, appetitum tamen sive famem & sitim ad solum corpus referri optimo jure posse existimo; & similiter quoque sensus omnes passivè sumptos, quatenus in externarum specierum receptione consistunt, & cujusmodi etiam in brutis reperiuntur.

QUESTIO XLIV.

Utrum in Anima dentur species innatæ.

Docent Peripatetici animam esse instar tabulæ cujusdam ræ, quæ nullas quidem in se species sive notiones ab origine habeat, iisdem tamen paulatim imbuatur atque perficiatur. Ego verò distinctione hic utendum existimo, Veritates enim aliæ sunt sua luce notæ, ut principia tum Theoretica, tum practica; aliæ verò non nisi per consequentiam & discursum constant. Species veritatum prioris generis omnes animæ innatas, sive congenitas, posterioris verò nequaquam judico. Veritates autem primas seu principia voco axiomata *ἀξιώματα* atque inde-

indemonstrabilia ; ut, *Idem non potest simul esse & non esse ; quicquid fit, fit ab alio ; Infinitum non potest pertransiri ; Totum est majus sua parte ; Deus est colendus, &c.* Hujusmodi veritates sive notiones dico menti sive animæ innatas ; Si enim innatæ non essent & ab ortu inditæ, ratione aliqua sive ex alio principio demonstrari possent, adeoque hoc ipso principia prima non essent, nec sua luce cognita, ut evidens. Cartesius hujusmodi Veritates æternas vocat, quod eo sensu admitti potest, quatenus ab æterno in mente divina fuerunt, sive quatenus æternæ veritatis similitudinem referunt. Semper enim verum est, & erit, Idem non posse simul esse & non esse, quod factum est, insecutum fieri non posse, &c. Ità autem loquitur de hac re Cartesius, §. XLIX. *Cum autem agnoscimus, fieri non posse, ut ex nihilo fiat aliquid (id est, Ens compositum ; Entia enim simplicia, omniaque non-entium genera ex nihilo fieri certissimum est.) tunc propositio hac, «Ex nihilo nihil fit, (id est, nullum Ens compositum,) non tanquam res aliqua existens, neque etiam ut rei modus consideratur, sed ut veritas quadam æterna, qua in mente nostra sedem habet, vocaturque communis notio, sive axiomata. Cujus generis sunt : Impossibile est, idem simul esse & non esse : quod factum est insecutum esse nequit : Is qui cogitat, non potest non existere, dum cogitat ; Et alia innumera, quæ quidem omnia facile recenseri non possunt, sed nec etiam ignorari cum occurrit occasio ut de iis cogitemus, & nullis præjudiciis excacamur. Ubi nihil amplius notandum occurrit, adeoque ad sequentia progredimur.*

QUESTIO XLV.

Utrum Animæ seu mentes inter se sint æquales ?

Affirmativam tenere videtur Cartesius, & quamvis communes illas notiones sive veritates innatas non æque ab omnibus percipi fateatur, non id tamen animarum inæqualitati aut cognoscendi facultatibus adscribendum putat, sed præjudiciis hominum. Sic enim ipse procedit, §. I. *Et quidem quantum ad has communes notiones, non dubium est, quin clare & distinctè percipi possint, aliqui enim communes notiones non essent dicende ; ut etiam reverà quadam ex ipsis, non aequè apud omnes illo nomine digna sunt, quia non aequè ab omnibus percipiuntur. Non tamen, ut puto, quod unius hominis cognoscendi facultas latius pateat quam alterius ; sed quia ferrè communes ista notiones adversantur præjudicatis opinionibus quorundam hominum, quic eas idcirco non facile capere possunt : etiam si nonnulli alii, qui*

præjudiciis istis sunt liberi, evidentissimè ipsas percipiant. Ego quidem haud negaverim, quin homines suis nonnunquam præjudiciis usque adeò abripiantur, ut ad veritates sibi inditas non attendant; easque quasi opprimant & , (ut Apostolus loquitur, *Rom. 1. 18*) *in adiutis* detineant. At verò etiam inæqualitatem seu diversitatem animarum quam plurimum huc facere existimo. Docet enim experientia unum hominem ad veritates mathematicas aliasve vel maximè subtiles percipiendas aptissimum esse, alium verò ineptissimum, ut eas capere nequeat, licet vel decies ipsi quam accuratissimè proponas; circa quas tamen nulla unquam præjudicia habere potuit, quia nihil unquam illarum ipsi innotuerit. Ità ut ex inæquali istac veritatis perceptione haud obscurè sententia nostra de inæqualitate animarum confirmari videatur. Hanc autem sententiam nostram pluribus demonstratam vide Philosophiæ meæ *Libro IV. sive Psychol. quest. VI.* Et reverà, cum nihil affirmare velit Cartesius, nisi quando id jam clarè distinctèque verum esse percepit, jam mihi quoque ostendi cupiam: qua tandem ratione convictus aut persuasus sit, tamquè distinctè & clarè perceperit? quod unius hominis cognoscendi facultas haud latius pateat, quam alterius? Nunquid usque adeò clarè percipere unquam potuit, quousque se omnium hominum cognoscendi facultates extendant? Cumquè agendi facultates haud alia ratione, quam ex effectis & actionibus nobis cognoscibiles sint; tamquè diversæ hominum cogitationes, cognitiones, judicia, scientiæ, aliaquè mentium effecta indies conspiciantur quam longissimè discrepantia, nonne multò probabilius suspicabimur ipsa hujusmodi actionum & effectuum principia diversa esse, adeoque facultatem unius longissimè ab alterius differre? Prætercà, cum omnes pro liberrimo suo arbitrio creaturas condiderit Deus atque determinarit, eà tamen diversitate, ut vel in minimis particulis vel numero duntaxat differentibus aliqua saltem diversitas notari queat; Nunquid omnium omnino hominum, qui jam inde ab initio in Mundo fuerunt, sunt & erunt posthac, animas prorsus inter se æquales fuisse, esse, & fore ulla ratione sit credibile? Aut, an unquam Deus se omnium hominum animas æquales semper conditurum revelavit? Cumquè diversitatem & varietatem in omnibus non tantùm specie, ut ajunt, verùm etiam numero distinctis creaturis esse voluerit; nunquid in mentibus aut animabus eam prorsus nullam esse immutabili lege voluisse putabimus? Et quis denique unquam mihi persuaserit, animam hominis, quem mentis prorsus impotem, & nullius judicii capacem adverto, corpore tamen sanum

sanum & obesum, tam perfectam natura sua & ab ortu, quam illius, quem sapientissimum experior: ubique domi, & iudicio acutissimum, corpore tamen ægrum, cacochymicum, & quibusvis pravis humoribus repletum? Ego quidem hanc Cartesii sententiam, non nisi ex præiudicio quodam natam arbitror, cum nulla hactenus vel minima rationis species pro ista sententia proferri posse mihi videatur. Quæ ergo in aliis carpit præiudicia liber philosophus, istis sese nondum prorsus esse liberum re ipsa haud semel ostendit. Atque ad eò, quod communes notiones ab omnibus non æque percipi dicit, quod *fortè* istæ præiudicatis opinionibus quorundam hominum adversentur, & nequaquam facultatum cognitarum diversitati, per *fortè* negari potest; nullumquæ habere fundamentum iam demonstratum est.

QUÆSTIO XLVI.

Quid sit Substantia?

Aristotelici communiter Substantiam definiunt Ens per se existens, & subsistans accidentibus. Hosce nonnunquam sequutus, adeoque præiudicio iterum laborans Cartesius, licet quam plurima liber Philosophus, Substantiæ vocabulo nihil aliud intelligi posse ait, quam rem, quæ ita existit, ut nulla alia re ad existendum indigeat. Hæc enim ipsius sunt verba, §. LII. *Quantum autem ad ea, quæ tanquam res vel rerum modos spectamus, opera pretium est ut singula seorsum consideremus. Per Substantiam nihil aliud intelligere possumus, quam rem quæ ita existit, ut nulla alia re indigeat, ad existendum. Et quidem Substantia, quæ nulla plane re indigeat, unicatantum potest intelligi, nempe Deus. Alias verò omnes nonnisi ope concursus Dei existere posse percipimus.* Nempe, hoc præiudicio implicatus Cartesius, quod Substantia rectè definiatur Res per se existens, haud malè colligit solum Deum esse Substantiam, & propriè sic dici posse. At verò, si diligenter omni præiudicio deposito advertamus, quid nomen Substantiæ in genere significet, utique non tantum Deo, verum etiam creaturis nomen illud attribui posse, manifestum erit. Ecquis enim Substantiæ vocabulo independentiam aut rem independentem, quæ nulla ad sui existentiam re indigeat, denotari existimet? Certè quod Aristotelici Substantiam vocant, Aristoteles *ὑποκείμενον* dixit; quæ vox propriè *Essentiam* significat, ut notum; adeoque rectius pro Substantia, *Ens* vel *Essentiam* substituissent ipsius interpretes. Unde iam per se manifestum fuisset, nihil vulgari ista Substantiæ definitione ineptius

unquam cogitari potuisse, ut quidem à nobis latius est ostensum *Philos. lib. 1. five Metaph. Exerc. vi.* Ubi quoque alteram istius definitionis partem; (qua dicitur *per se existens*) examinavimus. Cum verò Cartesius probè intellexerit, illam particulam (*per se existens*) in sensu negativo, ut quidem eam vulgò Peripatetici explicant, sursum non posse, eandem hoc loco positivè explicandam docet, ut *per se existere* sit, ità existere, ut nulla alia re ad existendum opus sit, sive, quod idem est, independentè existere; quo sensu solum Deum esse Ens certissimum est. Verùm enim verò, cum Entis vocabulum generalius sit, & independentia ipsius attributum, quod non solum Ens in genere, sed talè specificè designat, quod Ens independentens vocare solemus; utique patet independentiam formaliter & præcisè Entis vocabulo non denotari, nisi quo sensu aliquandò vocabula generica *ὅν* & *τὸ* huic aut illi specificè attribui solent, & sic Deum solum Ens eminentiori modo dici libenter fatemur; Unde & ipsum Jehovah appellari alibi notatum est. Quod si verò communem & simplicem Entis aut Substantiæ significationem spectemus, utique non nisi id, quod essentiam habet aut existit, significari apertum est? Neque unquam alio sensu istoc vocabulum apud Autores reperiri constat, siquidem *Ens* dicitur, quod *esse* habet, & *esse* non tantùm dicatur Creator, sed etiam Creatura, quæ suum à Creatore *esse* accepit; Unde & Creator *esse* independenter, Creatura verò *dependentè esse* dicitur.

QUÆSTIO XLVII.

An Entis Nomen Deo & Creaturis univocè conveniat?

Substantiæ vocabulum haud adèò huic negotio conveniens esse ex præcedentibus satis superque constare arbitror. Quamvis enim de vocabulis disputari non debeat, sitamen iis veritati ullum fiat præjudicium, etiam ab iis abstinendum videtur. Imprimis autem *Substantia* vocabulum Deo attribui nolim. Et reverà, cum Substantiæ vox origine sua significare videatur situm sub alio, vel, ut communiter Peripatetici explicant, quod accidentibus substat, illisque quasi subiaceat, (unde quoque definiri à multis solet, *Ens per se subsistens, & subsistens accidentibus.*) quo fundamento quæve ratione Deo attribui velint Peripateticæ Philosophiæ patroni haud video. Nos ergò nomine Entis substituto, de eo quæstionem proponimus, *Utrum Ens Deo & creaturis univocè conveniat?* Hæc autem, ut intelligatur quæstio, notandum est *univocè* prædicatum sub-

subjectis suis convenire, quando non tantum nomen prædicati, verum etiam res & natura istoc prædicato significata subjectis convenit, veluti cum *Animal* prædicatur de Leone, Equo, Lupo, &c. *Æquivocè* verò prædicatum subjectis convenire dicitur, quando prædicatum secundum nomen duntaxat, non verò secundum rem ipsam aut quidditatem subjectis convenit, veluti cum *Homo* prædicatur de homine vivo & picto, Cancer de animali vivo, morbo, ac sidere, &c.

Et hinc jam quoque constare arbitror, *Ens* de Deo & creaturis non prædicari *æquivocè*, seu quoad nomen tantum, sed *univocè*, id est, quoad rem seu naturam Entis nomine significatam; Nam etiam Creaturæ veram habent essentiam. Et hinc est, quod conceptus Entis, in quantum præscindit à Deo & Creaturis, unus sit in ordine ad Deum & Creaturas. Sicuti enim cum dico; *Deus est Ens*, sensus est, Deum non esse Ens fictum aut pictum sed verum, seu habere veram essentiam; ità etiam cum dico, *Creatura est Ens*, sensus est, Creaturam habere essentiam veram; Ità ut non nomine tantum, verum etiam re nomine significata, ut Deus, ità & Creatura Ens appelletur. Unde & manifestum est, haud rectè Cartesium ex independentia sive ex eo, quod Deus nulla alia re ad sui existentiam indigeat, colligere, quod nomen Substantiæ, sive (ut ego loqui malo) Entis non conveniat Deo & Creaturis *univocè*. Sic enim loquitur, §. LII. *Atque idèd nomen Substantiæ non convenit Deo & illis (creaturis) univocè, ut dici solet in Scholis, hoc est, nulla ejus nominis significatio potest distinctè intelligi, quæ Deo & creaturis sit communis.* Ens enim quatenus prædicatur de Deo & Creaturis in genere & præcisè sumptum, nec dependens est, nec independens, sed ab utroque præscindit. Dependens & independentia Enti in specie & tali convenit, nimirum illa creaturis, hæc Deo. Deinde; dependentia unius ab alio univocationem non tollit. Actio creaturæ dependet ab actione Dei, & tamen utriusque actio *univocè* talis appellatur. Filius dependet à patre, & tamen uterque *univocè* homo & Ens dicitur. Inferior Similiter Magistratus à superiori dependet, uterque tamen *univocè* dicitur Magistratus, regere, &c. Denique & hoc à Cartesio explicari velim, quando Substantiæ sive Entis nomen Deo & creaturis non *univocè* convenire docet, utri Deo, an verò creaturæ non *univocè* conveniat? Neque enim negare audebit Deum *univocè* Ens dici, quia veram habet essentiam. Ecquis verò tandem creaturas *univocè* Entia aut Substantias dici non posse cogitet? Quamvis igitur Deus sit Ens independens, excellentiori quoque modo sit appelletur, *univocè* tamen, verè & propriè Entis nomen Ipsi & creaturis attribui ex dictis manifestum est.

Q U Æ.

QUÆSTIO XLVIII.

Unde Ens cognoscatur?

De hoc negotio ita differit Cartesius, §. LII. *Possunt autem Substantia corporea, & mens sive Substantia cogitans, creata, sub hoc communi conceptu intelligi; quod sint res, quæ solo Dei concursu egent ad existendum. Verumtamen non potest Substantia primum animadverti ex hoc solo, quod sit res existens, quia hoc solum per se nos non afficit: sed facile ipsam agnoscimus ex quolibet ejus attributo, per communem illam notionem, quod nihili nulla sint attributa, nullæve proprietates, aut qualitates. Ex hoc enim, quod aliquid attributum adesse percipiamus, concludimus aliquam rem existentem, sive Substantiam cui illud tribui possit, necessarium etiam adesse. Nonnulla & hic notanda veniunt. Quod quælibet creatura, sive immaterialis sive materialis, ad existendum continua Dei conservatione indigeat, absque omni dubio est. Quod verò eam conservationem Concursum Dei appellet Cartesius, non ita philosophicum est; siquidem non philosophi tantum, quod sciam omnes, verum, & Theologi concursus nomine actionem Dei intelligunt, quæcum actionibus creaturæ cooperatur, easve ad agendum movet, ut in Theologia nostra naturali dictum, *Philos. Lib. II. Exerc. XXI.* Deinde, nec hoc adeò perspicuum, quod addit Cartesius, non posse Substantiam, id est, Ens primum animadverti ex hoc solo, quod sit res existens, sed ex quolibet ejus attributo, quia nihili nulla sunt attributa, &c. Nam, si Ens per se cognoscibile sit, quid impedit, quò minus ut sic à mente nostra percipiatur? Cumque attributum sit aliquid subjecto superadditum, ab eoque saltem ratione distinctum, si ipsum immediate à mente cognoscibile sit, quare non etiam subjectum ipsum? Et, si attributum afficere nos queat, quomodo non & ipsa res, cui attributum illud convenit? Si ramen de perfecta & adæquata rei cognitione instituatur quæstio, utique non unius tantum, sed omnium attributorum, qualitarum, & proprietatum ad eam cognitionem requiri facile concedo; at verò hujusmodi cognitionem intellectus creati sphaeram longissime superare existimo, eoque proinde perfectius rem cognosci, quo plures proprietates & qualitates de ipsa percipiuntur, manifestum est. Denique, quod communem notionem dicit Cartesius, *Nihili nulla esse attributa*, siquidem per *Nihil* intelligit id omne, quod Ens non est) absolutè negatur; quia multa sunt non-entium genera, accidentia, actiones, relationes, privationes, modi,*

modi, entia apparentia, &c. quibus tamen varia attribui possunt. Ut enim peccatum sive *αἰσχυρία* privatio sit & non-ens, varia tamen habet attributa, veluti cum dicitur magnum, parvum, leve, mortale, remissibile, causa mortis, &c. Ecquis verò hinc peccatum colligat esse substantiam sive rem subsistentem? Similiter esse patrem, regem, dominum Hollandum, &c. puræ sunt relationes sive denominationes extrinsecæ, & nequaquam res existentes: sive, ut Cartesius loquitur substantiæ: nunquid propterea nulla regis, patris, vel domini, dicemus esse attributa, nullas proprietates, aut qualitates? Quia tamen omne aliquid vel Ens vel Entis esse dicitur, utique nullum hactenus non-ens sive attributum cogitari posse videtur, quod non ad Ens aliquod, aliquam saltem relationem habeat, adeoque illud esse in rerum natura connotet. At verò & hic notandum, longè aliud esse cognoscere rem, aliud cognoscere rem aliquam existere; utut ergò detur, ex quolibet attributo existentiam rei colligi posse, nondum tamen ex eo ipsius rei cognitio concludi posset.

QUÆSTIO XLIX.

An cujusque Entis unum sit præcipuum attributum, quod ipsius naturam seu essentiam constituat?

Pergit Cartesius, §. LIII. Et quidem, inquit, ex quolibet attributo substantia cognoscitur, sed una tantum est cujusque substantia præcipua proprietas, qua ipsius naturam essentiamque constituit, & ad quam omnes alia referuntur. Quomodò ex quolibet attributo Substantia, id est, Ens cognoscatur, jam visum est; Nimirum: non quoad essentiam illius, sed quoad existentiam, quia omne attributum ad subjectum aliquod, cui attribuitur, relationem habet. Deinde, proprietates rei cum ipsius natura aut essentia confundit Cartesius; quamvis enim proprietates in re à subjectis suis differre nolim, ratione tamen inter se distingui posse certum est; ità ut alius sit essentia conceptus, alius verò proprietatis. Si enim ne rationis quidem distinctio intercederet, non amplius proprietas rei; sed res ipsa dicenda foret; Et propositio, qua de subjecto enunciatur proprietas, esset identica, quia idem prædicaretur de seipso. Quod propterea cujusque substantia sive Entis, unam præcipuam esse proprietatem docet Cartesius, quæ ipsius essentiam constituat, & ad quam omnes alia referantur, dicitur quidem, sed absque ratione. Ecquis enim omnes omnino alicujus Entis proprietates certò enumeret,

ret, ut, quznam inter eas primatum obtineat, explicando sit? In iha-
barbaro vim inesse purgandi, in magnetete ferrum attrahendi, in sole il-
luminandi, calefaciendi, &c. quis verò eas præcipuas esse definiat?
Neque enim plures iis inesse haud posse, ulla ratione sit verosimile. In-
esse quidem eas novimus; tot verò duntaxat, & non plures aut meliores,
quæque proinde nobilior sit, aut ignobilior, ignoramus.

QUÆSTIO L.

*An in extensione Corporis, in cogitatione verò Animæ essen-
tia consistat?*

* Affirmativam tradit Cartesius verbis proximè sequentibus: *Nempè,*
inquit, *extensio in longum, latum & profundum, Substantia corporea na-
turam constituit; & cogitatio constituit naturam Substantia cogitantis. Nam
anne aliud quod corpori tribui potest, extensionem præsupponit, estque tan-
tùm modus quidam rei extensæ; ut & omnia, quæ in mente reperimus, sunt
tantùm diversi modi cogitandi.* In extensione corporis essentiam nequa-
quam consistere, satis superque à me demonstratum arbitror in speci-
mine nostro *Examinis Philosophia Cartesii, cap. 1v.* Sed, nec illa con-
sequencia procedit: Omne aliud, quod corpori tribui potest, extensi-
onem præsupponit; ergo extensio constituit naturam corporis, Quic-
quid enim ab aliquo præsupponitur, non continuò illius constituit es-
sentiam. Effectus suæ causæ existentiam præsupponit, & lumen solis,
neque tamen effecti naturam in causa, aut luminis in Sole constitues.
Præterea, nec illud veritati satis consentaneum est, omne corporis at-
tributum, esse *modum* duntaxat rei extensæ. Ecquis enim qualitates
sensibiles, ut vocant, colores, sonos, saporos, odores, tangores, quæ
corpori attribuuntur, *modos* appellet? Virtutes quoque internæ, quæ
sensibus haud patent, & ratione duntaxat perceptibiles sunt, ut virtus
ferri attractiva in magnetete, necandi in veneno, &c. *modi* non sunt.
Quod hæc cera jam quadratam, jam rotundam, oblongam, triangula-
rem, &c. habeat figuram; ad *modos* refero; qualitates verò sive pro-
prietates ipsi insitæ ad *modos* referri non possunt.

De Cogitatione, quod deinceps docet Cartesius, eam Substantiæ
cogitantis naturam constituere, non minus absurdum, ne quid gravius
dicam, mihi videtur. Nam, ut omittam, hac ratione & Deum, & An-
gelos cogitationes fore, quod ἀνίσταται, sequeretur Animam rationa-
lem sive mentem immortalem hominis actionem esse duntaxat, & ne-
quaquam.

quaquam Ens existens. Cogitatio enim cogitantis actio est, non verò natura aut essentia ejus rei, quæ cogitat; quemadmodum generatio actio generantis est, calefactio solis, non verò essentia ejus aut natura. Falsum denique & illud, omnia quæ in mente reperimus, esse tantum diversos cogitandi modos; quia certum est diversas in mente esse rerum ideas, conceptus, actiones item seu operationes; ut intelligere, judicare, discurrere, dubitare, meditari, velle, ~~monere~~, odisse, &c. licet interim singulas istas actiones etiam speciales modos habere posse lubens concedam, ut patet ex iis quæ supra ad *Quæst. xiv.* dicta sunt.

Q U Æ S T I O L I.

An Idea Entis tum corporei tum incorporei, sive creati, sive increati Dei, clara & distincta esse possit?

Cum Idea Entis corporei nihil aliud sit quam conceptus corporis sive Entis materialis, Entis verò incorporei nihil aliud quam conceptus Entis immaterialis sive spiritus cogitandi vim habentis; illudque iterum sit vel increatum, infinitum ac independens, vel creatum, finitum ac dependens, utique tales in nobis esse ideas satis superque constat ex iis quæ supra à nobis disputata sunt. Unde quoque patere arbitror hujusmodi ideas satis claras atque distinctas esse posse, quatenus nempe id clarum distinctumque vocamus, de quo nulla dubitandi ratio superest; quemadmodum & clarè distincteque me hunc, quem manibus teneo, librum videre percipio, quia utrum videam nulla dubitandi ratio occurrat. Et hoc sensu admittimus & illa, quæ Cartesius habet, §. I. IV. *Atque ita facile possumus duas claras & distinctas habere notiones sive ideas, unam substantia cogitantis creatæ, aliam Substantia corporeæ; si nempe attributa omnia cogitationis (Entis cogitandi vim habentis) ab attributis extensionis (id est, Entis materialis sive corporis) accuratè distinguamus. Ut etiam habere possumus ideam claram & distinctam Substantia increatæ atque independentis, id est, Dei; modo ne illam adequatè omnia quæ in Deo sunt exhibere supponamus, nec quicquam etiam in ea esse fingamus, sed ea tantum advertamus, quæ reverà in ipsa continentur; quæque evidentè percipimus ad naturam Entis summè perfecti pertinere. Nec certè quisquam talem ideam Dei nobis inesse negare potest, nisi qui nullam planè Dei notitiam in humanis mentibus esse arbitretur. Ubi quoque rectè à Cartesio notatum video Ideam Dei non adequatè nobis exhibere, quæcunque in Deo sunt. Cum enim Deus sit infinitus & undique absolutè perfectus, utique perfectam*

I 2

ejus

eius atque adæquatam ideam intellectui finito inesse haud posse manifestum est. Neque tamen est, quod ex eo quis arguat, veram Dei ideam in nobis dari non posse, quia finitum infinitum repræsentare nequit. Nam si vera Dei idea non sit, quæ finita est, nulla cognitio Dei, quæ in mente creata reperitur, vera erit, siquidem & illa finita est. Et sic tandem, & Deum verbo suo de se cuncta frustra revelasse, statuendum erit; quia quicquid concipitur sive ex natura sive ex Scriptura, nil nisi finitum esse potest, si conceptus finitus infinitum repræsentare non valeat; omnisque proinde nostra de Deo cognitio, sive naturalis, sive supernaturalis, non vera sed falsa erit, quia finita est. Quomodo ergò Apostolus *τὴν ἀίωνα καὶ τὴν θείαν* nempe *æternam ipsius tum potentiam, tum divinitatem ex rebus conditis intelligi* asseruit *Rom. 1. 20.*? Dico igitur, Ideam Dei in nobis, ratione sui esse & quidditatis, finitam & limitatam esse, est enim in mente, & extra eam non progreditur; sed inde non sequitur, objectum illius esse finitum aut limitatum, aut ut sic à mente nostra concipi, Sicut enim ex conceptu, quem in mente mea habeo de Sole, non rectè inferas, Solem conceptum haud majorem esse, quam illud esse, quod habet in mente mea: Similiter ex conceptu, quem habeo de Deo, non rectè infertur Deum à me conceptum finitum esse, licet illud esse objectivum, quod habet in mente mea, finitum sit. Ex magnitudine imaginis seu ideæ non rectè magnitudo sui exemplaris definitur. Quin imò species in exiguo speculo apparens maximum mihi potest repræsentare corpus, cum tamen species in parvo speculi spatio existat. Quidni ergò Mens nostra, licet admodum limitata sit & finita, posset mihi repræsentare Ens maximæ & infinitæ perfectionis? Si enim species corporea in vilissimo quovis speculo seu vitro, vel etiam oculo existens, mihi possit repræsentare corpus nobilissimum; Quid mirum, si idea spiritualis in mente mea existens mihi repræsentet Ens perfectissimum nempe Deum? Neque enim requiritur ut id, quod repræsentat, sit æqualis perfectiones cum eo, quod repræsentatur.

Ut autem hæc omnia adhuc clariùs percipiantur, notandum est Ens absolutè & præcisè conceptum non repræsentare finitum aut infinitum, quia mens ab utroque abstrahit, & eatenus commune quid Deo & creaturis repræsentat, ut evidens. Postea verò mens descendendo concipit Entitatem Dei, & in eo tot advertit esse perfectiones, ut plures esse nequeant, quas tamen ipsa omnes enumerare aut percipere non potest; Entitatem verò creaturæ concipit esse limitatam, adeoque certis aliquot

quot perfectionibus definitam & quasi circumscriptam. Hinc jam Ens generalissimè sumptum subdividit in *Infinisum*, & *finisum*, *absolutè perfectum* & *imperfectum*, &c. Atque ità mens nostra in se format Dei Ideam, quatenus nempe communissimo isti entitatis conceptui adjicit infinitatem seu omnimodam perfectionem, dicendo : Deus est Ens omni-perfectum, infinitum, illimitatum, independens, &c.

Constat ergò ex hoc discursu veram & claram in mente humana dari Ideam, quæ nobis ens infinitum sive Deum repræsentet, idque negari non posse, nisi hominem natura sua atheum faciamus; quod tamen non obstat, quò minùs ista aliquandò in nobis Dei idea admodùm obscurari queat, sicut & Apostolus *sub alioquin* gentibus innatam in *adversus* ab iisdem detineri luculenter demonstrat Rom. 1. 18.

QUÆSTIO LII.

De Duratione, ordine, & numero.

De hisce sic progreditur Cartesius §. I. V. *Duratio, ordo & numerus*, à nobis etiam distinctissimè intelligentur, si nullum iis substantia conceptum assignamus, sed putemus, durationem rei cujusque esse tantum, sub quo concipimus rem istam, quatenus esse perseverat. Et similiter, nec ordinem, nec numerum esse quicquam diversum à rebus ordinatis, & numeratis, sed esse tantum modos sub quibus illas consideramus. Nempe durationem, ordinem, & numerum modos duntaxat esse vult Cartesius, non verò substantias aut res ipsas, quibus attribuuntur. Ego quidem hæc omnia, licet realiter quidem à suis subjectis nequaquam distingui putem, modos tamen non esse dixerim. Quo enim jure, quæ hoc ipsum ab ipso ratione fiat, non audio. Num ergò æternitatem Modum Dei esse dicemus, quia illius duratio sic appellatur? An Tempus modus rerum quæ oriuntur & intereunt. Nonne rectius multò durationem dicemus esse ipsam rei existentiam permanentem, seu potius permanentiam rei in existendo? Hæc autem in creaturis tanquam conservationis divinæ terminus optima ratione concipi potest; Sicut enim creando Deus creaturis *et* existere actu contribuit, ità conservando eandem in *et* existere permanere facit. Ordinem & numerum non quidem res esse à rebus numeratis aut ordinatis diversas concedo; at num propterea modi tantum sunt? Cartesio certè nihil aliud in rerum natura esse aut percipi posse videtur, quam res seu Entia & modos rerum, cum tamen etiam negationes, & privationes, & relationes, & entia apparentia, alia-

que plura de rebus considerari queant, ut ex Metaphysica mea patet. Dico igitur, Ordinem esse actionem ordinantis, seu dispositionem quandam partium ab ordinante institutam. Sicut enim calor se habet ad causam calefacientem, putà ignem aut Solem, ità ordo ad ordinantem, Estque id ipsum quod ab ordinante in rebus producitur, quod & Situs partium, earumve mutua inter sese relatio ratione loci, seu aspectus appellari potest. Numerus nihil aliud, quam unitatum pluralitas seu multitudo ac congeries esse videtur; Cum ergò unitas in re ab eo, quod unum dicitur, non differat, utique multitudinem in re ab rebus numeratis haud differre evidens evadit, adeoque Modi rationem nequaquam obtiner.

Q U Æ S T I O L I I I.

Quid sint modi, qualitates, attributa, prædicata, affectiones?

Equidem mirari licet, quod Cartesius, qui præ cæteris accuratè philosophari velle visus est, novumquè prorsus Philosophandi modum introduxit, curam vocabulorum sive terminorum tam parùm habuerit. Ut enim quamplurima, quæ hujus non sunt loci, omittam, ecce nunc Modos, qualitates, attributa, pro iisdem serè habet. Sic enim loquitur §. LVI. *Et quidem per modos hic planè idem intelligimus, quod alibi per attributa, vel qualitates. Sed cum consideramus substantiam ab illis affici, vel variari, vocamus modos; cum ab illa variatione talem posse denominari, vocamus qualitates; ac denique, cum generalius spectamus tantùm ea substantia inesse, vocamus attributa.* Ideoque in Deo non propriè modos aut qualitates, sed attributa tantùm esse dicimus, quia nulla in eo variatio est intelligenda. Et etiam in rebus creatis, ea quæ nunquam in iis diverso modo se habent, ut existentia & duratio, in re existente & durante, non qualitates, aut modi, sed attributa dici debent. Ego, licet hæc vocabula à vulgò promiscuè sæpè usurpari probè sciam, Philosophi tamen esse reor hæc omnia paulò accuratius distinguere; cum certum sit, ex promiscua vocabulorum acceptione maximam in rebus ipsis, seu potius conceptibus de iis, confusionem proficisci. Ut ergò accuratos de singulis conceptus formare discamus, hac ratione vocabula istæc distingui posse arbitramur. Et quidem primò *Qualitatis* vocabulum latissimè patet, ut à me notatum est in *Metaph. Exerc. xiiii.* Cum enim *Qualitas* formale sit seu abstractum *Qualis*, utique qualitatem dici posse apparet

paret id omne: à quo subjectum quale vel tale appelleretur. Et hoc sensu etiam, qualitates quo minus Deo attribui queant; non video. Neque enim putandum qualitates omnes esse accidentia, quorum Deus, utpote Ens simplicissimum, Expers est; cum ne quidem in creaturis qualitates semper à subjectis suis distingui, aut accidentia esse alibi à me probatum sit. *Accidens* mihi dicitur, quod subjecto ita accidit, ut ipsi inhæreat, illudque penetret, quodque ab eo salva illius essentia abesse possit, ut calor in aqua, ferro, &c. *Modus* verò, quod subjectum duntaxat quasi modificat, illudque hoc vel illo modo se habere facit, veluti cum homo dicitur stare, vel sedere, jacere, &c. Hujusmodi autem Modi non in Entibus solum, verum etiam in accidentibus, actionibus, aliisque id genus reperiuntur, veluti cum diversi caloris numerantur gradus; cum quis bene vel male, hoc vel illo modo loqui, ambulare, docere, &c. dicitur. *Prædicatum* quoque latissime patet, diciturque simpliciter illud omne, quod de aliquo prædicatur, sic cum Petrus dicitur Homo, Homo dicitur Prædicatum Petri. *Attributum* tale prædicatum esse videtur, quod non ipsam essentiam subjecti significat, sed aliquid ipsi superadditum, & ratione saltem ab essentia distinctum; quo enim jure attributum rei quispiam appellet rem ipsam, aut quod ipsius essentiam constituit? Ac proinde, licet Homo sit prædicatum Petri, illius tamen attributum dici non potest. *Affectio* denique mihi dicitur id, quo aliquo modo afficitur aut variatur subjectum, adeoque ab Accidente vix aut parum differre videtur. Atque hæc de horum terminorum significatione jam sufficiant, quos, cum à Cartesio confundi viderem, paulò accuratius hoc loco explicare operæ pretium duxi.

Sed & hoc notandum, Cartesium hac periodo docere durationem in rebus creatis non Qualitatem aut Modum dici debere, cum tamen proximè præcedenti durationem rei cujusque modum duntaxat esse asseruisset. Adde & haud rectè existentiam attributum hic ab ipso vocari, cum attributum semper aliquid rei existenti superadditum significet, ut jam modò dictum est.

Q U Æ S T I O L I V.

Quid sit Tempus?

De Tempore satis superque à nobis actum in Physica, *Phil. Lib. VII. Exerc. XIV.* Et in idea Physicæ; *Disp. IV.* Sed jam ipsum de eo differentem Cartesium audiamus, *Alia*, inquit *S. LVII. sunt in rebus ipsis,*
quædam

quarum attributa vel modi esse dicuntur; alia verò in nostra tantùm cogitatione. Ità cum tempus à duratione generaliter sumpta distinguimus, discimusque esse numerum motus, est tantùm modus cogitandi. Neque enim profectò intelligimus in motu aliam durationem quam in rebus non-motis: ut patet ex eo, quòd si duo corpora, tardè, aliud celeriter, per horam moveatur, non plus temporis in uno quam in alio numeremus, etsi multò plus sit motus. Sed ut rerum omnium durationem metiamur, comparamus illam cum duratione motuum illorum maximorum, & maximè aquabilium, à quibus sunt anni & dies; hancque durationem tempus vocamus. Quòd proinde nihil, præter modum cogitandi, durationi generaliter sumpta superaddit. De Duratione jam quoque suprà actum est, eamque à durante non differre dictum, nisi quòd existentia ejusdem extensionem quandam sive brevem sive longam superaddat. Tempus quoque materialiter sumptum nihil aliud esse cum Cartesio asserimus; at verò formaliter spectatum, & sumptum pro communi omnium durationum particularium mensura, esse mentis opus. Quòd enim ex motu solis per Zodiacum numeremus annos, eosque in duodecim menses, hosce iterum in dies triginta, vel triginta & unus, dies denique in viginti quatuor horas distribuamus, id prorsus ab libero mentis arbitrio dependet, ut consideranti clarum est.

QUESTIO LV.

Quid & quot sint Universalia.

Quia hoc loco Cartesio de universalibus agere visum fuit, nos ipsius prementes vestigia etiam de illorum natura, productione & número sententiam nostram paucis exponemus. Cartesius postquàm §. LVIIT. universalia omnia, quæ vocant. modos cogitandi duntaxat esse dixisset, sic porro de iis disserit, §. LIX. *Fiuntque hæc universalia ex eo tantùm, quòd unà & eadem ideâ utamur ad omnia individua, quæ inter se similia sunt, cogitanda: Ut etiam unum & idem nomen omnibus rebus per ideam istam representatis imponimus, quòd nomen est universale. Ità cum videmus duos lapides, nec ad ipsorum naturam, sed ad hoc tantùm quòd duo sunt, attendimus, formamus ideam ejus numeri, quem vocamus binarium, cumque postea duas aves, aut duas arbores videmus, nec etiam earum naturam, sed tantùm quòd dua sint consideramus, repetimus eandem ideam quam prius, quæ ideâ est universalis; ut & hunc numerum eodem universalis nomine binarium appellamus. Eodemque modo, cum spectamus figuram*
tribus

tribus lineis comprehensam, quandam ejus ideam formamus; quam vocamus ideam trianguli; & eadem postea ut universali utimur, ad omnes alias figuras tribus lineis comprehensas animo nostro exhibendas: Cumque advertimus, ex triangulis alios esse habentes unum angulum rectum, alios non habentes, formamus ideam universalem trianguli rectanguli, quæ, relata ad præcedentem ut magis generalem, species vocatur; Et illa anguli rectitudo, est differentia universalis, quæ omnia triangula rectangula ab aliis distinguuntur; & quod in iis basis potentia æqualis sit potentiis laterum, est proprietas iis omnibus & solis conveniens: Ac denique, si supponamus, aliquos ejusmodi triangulos moveri, alios non moveri, hoc erit in iis accidens universale. Atque hoc pacto quinque universalia vulgò numerantur, Genus, species, differentia, proprium & Accidens. Universalia in rerum natura nulla esse extra Philosophorum mentem satis manifestum fore existimo ex iis, quæ de hoc negotio à me scripta sunt in Metaphysica. Exercit. xxv. Adeoque hæcenus Cartesio assentior, quod ea in mente esse asserat. Modostamen cogitandi non dixerim, cum potius sint formæ quædam seu idææ ab individuantibus proprietatibus abstractæ, quatenus aliquid omnibus commune repræsentant; Quod cum satis dilucidè in sequentibus à Cartesio explicetur, nihil nobis hic adiendum existimo.

Quod verò quinque hic vulgò numerari Universalia dicit Cartesius, Genus, speciem, differentiam, proprium, & Accidens, verum quidem est, sed tamen ita se rem habere non est verum. Si enim differentia, proprietas, vel accidens consideretur ut universale quid, jam generis aut speciei rationem habebit, non differentiæ, proprii, aut accidentis. Cum enim rectitudo anguli prædicatur de rectitudine multorum triangulorum rectangulorum, rectitudo genus est vel species, sub se omnes rectangulorum rectitudines continens, easve repræsentans. Similiter, cum risibilitas, quæ vulgò hominis statuitur proprietas, prædicatur de risibilitate Petri, Pauli, &c. Species est, non minus quam cum scientia prædicatur de hac aut illa scientia in particulari: Ità ut non quinque, sed duo tantum Universalia propriè sic dicta concipi posse videantur.

Q U Æ S T I O L V I.

De variis distinctionum generibus.

Numerus, inquit Cartesius §. LX. in ipsis rebus oritur ab earum distinctione: quæ distinctio triplex est, realis, modalis, & rationis. Realis propriè tantum est inter duas vel plures substantias: Et hæc percipimus à se mutuo re-

K

aliter

aliter esse distinctas, ex hoc solo, quod unam absque altera clare & distinctè intelligere possimus, &c. Gravissimę de distinctionibus rerum inter Philosophos sunt controversiæ, eademque usque adedò intricatę & obvolutę, ut, quo te veritas aut pedem referas, vix cognoscas. Haud ergo præter operę pretium me facturum existimo, si & hic meam super hac sententiam paucis exposuero. Notandum igitur, Quæstionem de distinctione rerum non procedere de ejusmodi rebus seu entibus, quę jam actu divisa sunt, aut separata existunt: Ecquis enim quærat, utrum Sol & Luna distinguantur, aut distincta entia sint? Similiter quęstio non est, de rebus in diversis subjectis aut locis collocatis, vel etiam diversis temporibus existentiam habentibus; Veluti an distinguantur accidentia, modi, qualitates &c. Petri ab accidentibus, modis, & qualitatibus Pauli; utrum distinguatur corpus ab illius specie aut imagine in speculo apparente: Quis enim dubitet? Omnis ergò de hoc negotio difficultas esse videtur de distinctione eorum, quę, licet conjuncta sint, diversis tamen à mente nostra conceptibus percipiuntur. Veluti, utrum & quomodò distinguantur anima & corpus, facultates animę, intellectus & voluntas, tum inter se, tum ab ipsa anima, immensitas & onnipotentia in Deo, corpus & illius proprietates, totum & partes, subjectum & accidens, relatio, modus, actio, &c. tum denique accidentia ipsa, modi, relationes, actiones &c. inter se, quę eodem subjecto attribuantur.

De hisce ergò notandum est, horum quędam esse, quę ab invicem separabilia sunt, ità ut etiam separata existere queant, ut anima rationalis & corpus; Quę tam verò ità esse conjuncta, ut quidem non inter se separari queant, & separatim simul existere, sed ità tamen ut uno remanente alterum evanescat & pereat, ut subjectum, & illius accidens, modus, actio, &c. Quędam denique tam arctè esse conjuncta, ut nequaquam separari queant, unumve absque altero in rerum natura inveniri, ut anima & intellectus; Item, intellectus & voluntas, onnipotentia & immensitas in Deo, Spiritus & immortalitas, subjectum & illius proprietates, totum & illius partes, &c. Quę tamen singula diversis à mente nostra conceptibus apprehendi possunt. Quę enim in re inseparabilia prorsus sunt, ità ut ne mente quidem ulla distinctionis ratio excogitari queat, distincta non esse, sed identica manifestum est.

Et hinc jam apparere existimo, tria imprimis esse distinctionum genera, Majorem, mediam, & minimam. Distinctione majori distinguuntur ea, quę inter se separabilia sunt, ut anima & corpus humanum. Et hac ratione etiam distinguuntur accidentia; Item, actiones, mo-
di;

di; & id genus alia, quæ eidem subiecto quidem attribuuntur, eorum tamen unum absque altero esse potest; ut, fides & scientia in eadem mente. Distinctione media distingui videntur ea, quorum unum altero evanescente existit tamen, ut subiectum & illius modus, actio, accidens, &c. ut, aqua & calor ipsi inhærens, Sol & illius calefactio &c. Et huc etiam retulerim distinctionem illam, quam alibi dixi per modum includentis & inclusi, veluti quando totum distinguitur à suis partibus, Individuum à specie, species à suo genere, &c. Distinctione minima distinguuntur ea, quæ inter sese separari nequaquam possunt, neque unum ulla ratione esse absque alio, cujusmodi sunt attributa Dei, anime & illius facultates, subiectum & proprietas, &c. Quæ distinctione maximâ distinguuntur, vulgò *realiter* distincta dicuntur, quæ minima *ratione* vel etiam *formaliter*, quod diversis vel etiam distinctis conceptibus, qui sunt quasi formæ quædam menti inhærentes, percipiuntur. Mediam distinctionem quidam *Modalem* vocant, ut hic Cartesius; Nos *Aliquam* appellare possumus. Distinctio maxima in re ipsa est ante omnem mentis operationem; minima non nisi in mente reperitur & post illius operationem; Media quoque absque mentis operatione in rebus invenitur, quia tamen mutua separabilitas in iis cogitari nequit, *aliquatid* duntaxat nobis dicenda videtur. De verbis enim quæstio esse non debet, ubi de re constat, modò veritati nullum inde accedit præjudicium.

Atque hæcenus breviter me examinasse videor ea, quæ philosophiæ suæ primo de Philosophiæ principiis libro Cartesius edisserit. Quæ enim in sequentibus tradit de cogitatione & extensione, quas vel ut substantiam tum cogitantem, tum corpoream concipi posse vult, vel ut modos duntaxat cogitandi diversos; De aliis item cogitandi modis, ut vocat, intellectione, imaginatione, recordatione, volitione, &c. satis superque supra discussa sunt. Quæ insuper habet de sensibus, affectu, & appetitu, voluptate ac dolore, nec non de colore, sapore, odore, longioris sunt explicationis. Cumque de iis hoc loco ne ipse quidem Cartesius accuratè agere voluerit, quia nondum ipsi, ullum corpus existere probatum videtur, ut hisce examinandis longius immoraremur, operæ pretium non putavi. De modis denique cognoscendi, verum à falso discernendi, causisque errorum ac præjudiciis, quæ subiungit, cum ex antedictis aperta sint, nihil addere visum fuit; adeoque & harum mearum ad hunc Philosophiæ Cartesii librum primum exercitationum hic esto.

E X E R C I T A T I O P H I L O S O P H I C A,

Qua refutantur argumenta Aristotelis, Procli, item & Averrois, aliorumque, quibus æternitatem Mundi probare conati sunt.



Quamvis nullus unquam tam gravis potuerit cogitari error, quin suos, à quibus sit propugnatus, invenerit patronos, pro nullo tamen majori cum diligentia atque labore, quam pro gravissimo illo de æternitate Mundi, dimicatum fuisse existimo. Cum autem hic error ipsum Sanctissimum Dei amanuensem Moſen petat, ejusque quam de Creatione conſcripſit Historiam in dubium vocet, adeoque ſacrarum Literarum auctoritatem directè deſtruat, mirari licet, cum tanto periculoſiſſima hæc opinio à ſuis ſtudio defendatur, tam paucos inter Orthodoxos reperiri, qui in explicandis reſellendisque eorum rationibus & argumentis ſatis perplexis operam ponant: Hoc ergò & nobis agendum eſſe putavimus, ne vel hic S. Literarum auctoritas vel minimum labefactetur, ejusve veritas controvertatur, & gloria Dei ex nova Mundi creatione tantò clarius eluceſcat. Argumenta, quibus varii Mundi æternitatem demonſtrare conati ſunt, referuntur inter alios à Benedicſto Pererio numero Lvi. Nempe xii. Aristotelis, xx. Procli, xii. Averrois, & denique xii. Aliorum quorundam Peripateticorum, ut videre eſt in ipſius Phyſicæ, Lib. xv. cap. 2. 3. 4. &c. Ubi & ad ea ſuo modo, & juxta principia Philoſophiæ ſuæ peripateticæ reſpondet. Quia verò noſtræ Philoſophiæ fundamenta quam maxime à Peripateticorum placitis diſſident, utique etiam nonnunquam aliter ad diſſicultates iſtas ex noſtris principiis reſpondendum eſſe apparet. Reſponſionibus ergò Pererii ſuis Peripateticis relictis, nos ſolummodò ex ipſo adverſariorum argumenta proponemus, & ad ſingula breviter atque perſpicuè, quantum fieri poteſt, reſpondere conabimur.

Et quidem primo loco reſpondebimus ad argumenta Aristotelis; hujus autem primum deſumptum ex Lib. 1. Phyſ. ſic habet: *Materia prima eſt ingenerabilis & incorruptibilis, alioquin enim, cum neceſſarium ſit aliquod ſub-*

subjectum omni generationi præexistere, & omni corruptioni superesse, aut daretur alia materia prior, quem prima: aut eadem, quæ prima est, antequam generaretur existeret, & post interitum superstes esset: Oportet ergo materiam primam æternam esse. Non potest autem sine forma materia unquam existere, quare creatio formarum sempiterna est. Ex quo fit, ut motum & Mundum sempiternum esse necesse sit. Resp. Materia prima, quæcunque intelligatur ab Aristotele, utut potentia naturali aut virtute Physica produci nequeat, infinita tamen virtute Dei eam producibilem esse, & actu creatione productam asserimus. Etiamnum nullum Ens compositum aut corpus in Mundo generari nisi ex materia præexistente, libenter concedimus; siquidem ejusmodi generatio nihil aliud est quam variarum particularum jam existentium apta & conveniens ex naturæ ordine compositio; similiter & nullum compositum nisi in suas, ex quibus compositum est, particulas resolvi posse manifestum est; Unde & eandem post compositi corruptionem esse superstites haud est mirum. At verò longè aliter res habet in creatione, quia per illam omnium rerum materiam primam ex nihilo infinita Dei virtute conditam tenemus, sicut & eadem ipsam in nihilum redigi posse verissimum est. Quamvis igitur materiam primam ingenerabilem & incorruptibilem demus ratione virtutis creatæ, eandem tamen creabilem & annihilabilem statuimus ratione virtutis increatæ, id est, Dei.

Secundum argumentum sumptum ex Lib. viii. Phys. est tale: *Ipsum mobile prius est motu, cujus est subjectum. Quare, si aliquando motus capit esse, subjectum illius primi motus, quod ipso motu prius esse diximus, aut generatum fuit, aut sempiternum; sed cum generatio sine motu fieri nequeat, alius motus prior præcessisset primum motum: sin autem mobile sempiternum fuit, motu tamen carens, credendum profecto est, aliquod impedimentum fuisse, vel in ipso mobili, vel in movente, propter quod in tota illa æternitate motus esse non potuerit, illo autem sublato, deinde motus esse cæperit: at talis impediti remotio sine motu fieri non potuit: quare autem primum motum fuisset motus, quod est absurdum. Nunquam igitur motus capit esse. Resp. Mobile omne prius esse motu concedi potest de prioritate naturæ, ut loquuntur, de prioritate verò temporis negatur; sicuti enim Sol nunquam fuit sine lumine, ità quoque concipi corpus potest mobile, quod cum primo sui esse moveri cæperit. Dico igitur, cum Mundo etiam motum incepisse, Mundumque non generatum cum motu ex præjacente aut præexistente materia, sed ex nihilo à Deo ex liberrimo suo arbitrio in principio absque motu productum. Ut ergò Mobile, ità & cum eo motus aliquando*

esse capit, absque motu prævio. Mobile enim illud primum in instanti absque motu conditum. Falsum igitur, quod in argumento sumitur, *subiectum primi motus* sive primum mobile fuisse aut generatum, sc. cum motu, aut sempiternum, cum nec generatum sit motu phylico, nec sempiternum, sed in instanti absque motu creatum, ut dictum.

Argumentum tertium ex eodem libro est tale: *Tempus sempiternum est, nam si capit esse, verum erit dicere, aliquando tempus non fuisse, & non esse temporis prius fuisse, quam esse illius; At prius & aliquando sunt differentia ipsius temporis, ergo ante generationem temporis fuisse Tempus. Quod si Tempus sempiternum esset, necessarium est motum item oportere æternum esse. Ut enim in 4. Phyf. ostensum fuit, tempus vel est motus, vel non est sine motu.* Resp. Si Tempus sumatur pro duratione rei physicæ, vel etiam Solis, aut primi mobilis, falsum est illud esse æternum, proindeque verè dici potest aliquando non fuisse tempus, & non-esse temporis prius fuisse, quam esse illius; sicut & verè dici potest, aliquando non fore tempus. Notandum igitur particulas illas *prius*, & *aliquando*, in quo tempus non fuisse dicitur, non significare differentiam, aut habere rationem, temporis, (sic enim tempus ante tempus fuisse dicendum foret, quod est contradictorium) sed esse particulas quasi infinitæ durationis divinæ sive æternitatis, ut sensus sit, Deum fuisse priusquam vel antequam esset tempus, & in aliquo momento æternitatis (quæ principii & finis experta est, & tanquam ab æterno in æternum extensa duratio concipitur) tempus seu rerum physicarum durationem incepisse.

Quartum argumentum ex eodem lib. §. xxi. *Absque ipso Nunc nullum tempus esse potest: Omne autem Nunc, cum sit præsens, est intermedium, nempe finis præteriti, & principium futuri: Nullum igitur tempus aut esse aut cogitari potest, ante quod aliud tempus non fuerit, & post quod aliud tempus futurum non sit: ob quam etiam causam motum, sine quo tempus esse nequit, principio & fine carere necesse est.* Resp. Falsum est omne *Nunc* esse intermedium inter tempus præteritum & futurum, adeoque esse finem præteriti & principium futuri; sicut enim Lineæ non tantum dantur puncta intermedia, & particule, quæ utrinque alias sibi particulas habent connexas, quæ Lineam efficiunt; verum etiam primum punctum seu prima particula, quæ ejusdem principium appellatur; Perinde quoque temporis datur primum *Nunc*, sive prima durationis physicæ quasi particula, quæ & principium temporis dici solet. Quemadmodum etiam unumquodque particulare Ens vel corpus proprii sui temporis, & primum & ultimum suo esse *Nunc* habet. Si verò de *Nunc* æternitatis quæstio sit, scietur

temur eam ut finis, ita & principii expertem esse; at verò eam absque rerum physicarum motu aut existentia esse non potuisse, probandum erat, non gratis sumendum. Et quid si ponamus omnia nunc corpora, Cœlum, Solem, aut quodcunque immobile à quo tempus nostrum mensurari solet, quiescere, (quod saltem nemo impossibile dixerit,) nunquid propterea tempus non esset, aut rerum conditarum duratio cessaret? Constat ergò durationem posse esse absque motu, & consequ. falsum esse, quod Aristoteles docet, durationem aut tempus sine motu esse non posse. Quamvis interim fateamur, nobis tempora nostra, annos, menses, dies & horas ex motu Solis sive vero sive apparente mensurare in usu esse; quod tamen liberi arbitrii opus esse alibi à nobis ostensum est.

Quintum argumentum ex eodem lib. §. xv. *Nihil inordinatum est eorum, quæ secundum naturam fiunt. Natura enim causa est ordinis in omnibus; Ordo autem omnis in quadam proportionem consistit: infinito autem quasi tempore Deus quiescere, postea verò aliquando Mundum fecisse, hujus autem nullam esse differentiam, quare nunc potius, quam prius, neque rursus aliquem ordinem habere, non amplius natura est opus: Nam quod secundum naturam fit, simpliciter ac semper ita fit, ut ignem naturaliter ferri sursum: aut si aliquando non ita fit, subest naturalis causa, & probabilis ratio potest reddi, cur non ita fiat, ut in monstris evenit. Non igitur Deus ab aliquo initio Mundum condidit. Resp. Præsupponit hoc argumentum Deum agere ex necessitate naturæ, quod est falsissimum; Est enim Deus ut perfectissimum, ita & liberrimum agens, quem proinde ex liberrimo suo arbitrio Mundum hunc ex nihilo condidisse constanter asserimus. Quare autem in illo, quo condidit, æternitatis suæ momento, & non in alio, ante vel post, condiderit, ipse novit. Eorum certè, quæ à libero Dei beneplacito dependent, rationes rimari nostri non est. Ecquis explicando erit, quare Deus Mundum hac determinata magnitudine, figura, modo, hæc iterum vel illas creaturas tali figura, forma, quantitate, aliâque id genus quamplurima condiderit? Vix Dei infiniti nobis homunculis impervestigabiles sunt, & in ejusmodi in sola voluntate Dei acquiescendum. Quod proinde hoc vel illud secundum naturam esse dicatur, fiatque hoc vel illo ordine, habeatque hanc vel illam proportionem, Soli Deo attribuendum, qui cum naturæ author sit, eandem pro arbitrio ordinavit & instituit.*

Sextum argumentum ex eodem lib. §. lxi. & lib. ii. de generatione §. lvi. *Idem manens idem, semper est natum facere idem; Cum igitur Deus semper idem sit, & immutabilis ac semper eodem modo permanens,*
vel

vel semper Mundum fecit & faciet, vel nunquam fecit, nec unquam faciet, aliquando enim non facere, & aliquando facere, varietatem quandam arguit in opifice inesse. Resp. Idem manens idem, semper idem facere licet concedi possit de causa naturali ex necessitate operanti, falsum tamen est de causa libera seu operanti ex libertate arbitrii, cujusmodi causam Deum esse jam modò dictum est. Et reverà, si hoc argumentum procederet, jam non tantum idem semper à Deo fieri debere sequeretur, verum ne unquam quidem quod diversi ab ipso produci posse, cum semper idem immutabiliter permaneat. Deinde & hoc falsum est, aliquando non facere & aliquando facere varietatem quandam in opifice arguere, quia semper Deus agit juxta æternum suum decretum, quod cum immutabile sit, ipse quoque immutabilis maneat necesse est. Sed neque ratione causæ necessariò agentis perpetuò illud dictum (*Idem manens idem semper facit idem*) verum est; Sol enim neque semper, neque eosdem semper effectus in terra producit, quamvis ipse idem semper permaneat, siquidem hujusmodi effectuum diversitas aliundè provenire potest. Denique & hoc notandum, effecta, quæ extra essentiam causæ suæ producuntur, nullam in ipsa mutationem realem efficere posse; Cum ergò Mundus sit extra Deum, utique ejusdem creatione nullam in ipso mutationem argui posse manifestum evadit. Neque refert, quod ex non Creatore factus sit Creator, quia hoc ipsum relationem duntaxat, vel denominationem externam in Deo significat. Relationes autem hujusmodi aut denominationes externas nullam in subjecto mutationem realem arguere ex Metaphysica constat.

Septimum argumentum ex eodem lib. §. lxxvi. *Motus circularis non habet actum terminos, à quorum altero dicatur incipere, ad alterum verò terminari, sed semper est in principio, medio & fine, ex quo fit, ut motum circulare in principio & fine carere necesse sit.* Resp. Motum circulem in principio & fine durationis carere dicitur quidem, sed non probatur; Experientia & ratio contrarium docent. Quoties enim globi, aliaque corpora circulariter moventur, ubi tamen principium & finem esse constat. Cometas nonnunquam in Cælo oriri experientia similiter docet, quos tamen & circulariter moveri incipere & desinere videmus. Nihil ergò hoc argumento concludi posse manifestum est.

Octavum argumentum ex lib. i. de Cælo §. xx. *Cælum est ingenerabile & incorruptibile, jam quicquid gignitur, ex contrario & subiecto gigni oportet, contrariorum autem corporum contrarii sunt motus, porro motus circulari nullus alius motus contrarius esse potest, quo fit ut Cælum contrario careat.*

reut,

rest, ac proinde ortus & interitus expers sit. Non igitur Mundus esse capit. Resp. Cælum, licet virtute ac potentia naturali generabile non sit, hinc tamen nequaquam evincitur idem virtute Dei infinita creati non potuisse, quod affirmamus. Quod ergo dicitur, quicquid gignitur, ex subjecto & contrario gigni oportere, præterquam quod falsum sit, ad rem non facit; siquidem totum Universum nec ex contrariis, nec ex similibus rebus præ-existentibus, sed ex nihilo, id est, nulla præexistente materia, constitutum esse videmus.

Novum argumentum ex eodem libro §. XXI. Omnes gentes faciunt Cælum locum, sedem, atque domicilium Deorum, quod si locus congruens esse dicitur, quæ in ipso sunt, oportet Cælum sempiternum esse, quemadmodum æterni sunt. Præterea, ex omni temporum memoria, quod quidem monumentis proditum sit, nulla unquam aut in universo ipso Cælo, aut in aliqua parte ejus facta mutatio dicitur, quæ ipsum corruptioni subiectum esse significet. Quin etiam, suum nomen Cæli ab antiquis impositum hoc, quod diximus non ostendere indicat, Æthera enim nominare voluerunt, quod ipsi æterni atque irreposito ambitu circumagi viderent. Resp. Cæli nomen Locum & Domicilium Dei rectè dici posse concedimus, quatenus scilicet in eo gloriam suam atque maiestatem ipse beatus manifestat. At verò ex eo ipsum Cælum sempiternum esse nequaquam sequitur, quia nec ab æterno creaturæ non sunt, nec quævis eius gloria Dei ostenderet hanc sempiternitatem. In se autem semper & æternum Deus gloriosus est & ex se, licet vel cælum non esset, in quo gloriam suam manifestaret. Quod præterea nulla unquam in cælo, aut aliqua ejus parte, mutatio facta dicitur, veritati & experientie repugnat, siquidem jam pridem varias in cælo mutationes spectas esse a Deo observatum fuit; Et quævis observatum non fuit, non tamen ex eo nullas in eo esse aut fuisse legeretur, cum propriè in mensam cælestium corporum à nobis distinctarum mutationes in his observari noverant; Quemadmodum nec è Cælo præsticienti mutationes in terra apparent. Et quid si omnino Cælum incorruptibile esset, nihil ex eo inde contra nos posset contineri, ut patet; quia etiam in ære per aliquam a Deo creatam partem, & in his creatis vel animarum humarum productio ostendit. Non enim deinde Ætheri cælo impositam esse, ut quibusdam videtur, quod æternum sit, nullius est ponderis, siquidem argumenta ab eternitate decepta plerumque infirma sunt, & nomina sæpe imposita ab imperitis, quos erroneus obnoxius esse certum est; Quamvis interim, & æternitatem scilicet a parte post cælo concedi, nihil habet absurdum.

Decimum argumentum ex *Metaph. lib. xi. §. xxx.* *Opifex Mundi ejusmodi est, ut substantia ejus sit actus omni carens potentia; At si non semper operaretur, sed aliquando quidem ageret, aliquando autem ab actione vacaret, interdum esset opifex potentia, interdum actu, quare non esset omnimodò carens potentia. Ab eterno videtur Mundum condidit.* Resp. Quando Philosophi Deum actum potum vocant, non omnem prorsus ab eo potentiam exclusam volunt, sed passivam duntaxat, ut loquuntur. Activa enim potentia ut est perfectio, quam maxime Deus convenit, eaque infinita, unde & omnipotens merito appellatur. Falsum ergo est Deum omni carere potentia, cum potentia, perfectiva sc. in summo gradu ipsi esse & adhiberi non conveniat. Neque tamen inde inferri potest, Deum semper operari aut potentiam suam de facto exercere, cum non tantum potius sit Deus, verum & in operando liberrimus, qui potentiam suam exercere, adeoque & actu operari potest, quando vult. Præterea notandum est, si hoc argumentum valeret, eodem etiam omnium, quæ in tempore à Deo producuntur, creaturarum æternitatem demonstrari, quia, si non, quam eas produceret Deus, potentiam eas producendi habuit, adeoque & eam ratione interdum Opifex potentia, interdum actu dici potest. Sicuti ergo, ex productione hujus vel illius creaturæ in tempore, concluditur Deum esse mutatum, perinde neque ex productione Universalis in tempore ulla vel species mutationis in ipso argui potest. Et ratio illa non tenet, quia ex productione rerum nil nisi exteriora quædam dumtaxat productori accesserunt. Licet ergo Deus ab æterno fuerit omnipotens, adeoque nunquam potentia sibi expers, Mundum tamen in tempore deum pro sapientissimi suo beneplacito, *Idem*, quæ in se ipsius condidit, & cum condidit, duratio ipsius, adeoque & creaturæ duratio incepit.

Undecimum argumentum ex eodem lib. §. xxxviii. *Optima dispositio intelligentiarum est movere omnes, & quælibet res, quæ enim suam beatitudinem, & perfectionem aliis rebus communicant, quod est maxime proprium boni, & perfecti; hac etiam ratione evadunt causa efficiens omnium rerum in genere cause efficientis & finis. Quare, & Mundus movetur æternus, Intelligentia ab æternitate otiosa & imperfecta non sit.* Resp. Deum omnem excelsis, quales Peripatetici sumunt, illos per movere, & quædam ab Intelligentiis, prorsus aut incertum, aut falsum sit; adeoque argumentum hoc est pura petitio principii. Deinde, & hæc falsum. Intelligentiæ, quas vocant, esse æternas, cum & Angelos, & reliquas omnes creaturas, durationis suæ initium habuisse & a Deo creatas, &

ratio-

ratione, & S. Literis manifestum sit. Si vero Intelligentiarum nomine etiam Deus comprehendatur, utique ipsum ante constitutum Mundum otiosum haudquam aut imperfectum fuisse asserimus, quia, seipsum inobitamque suam & omniperfectam essentiam contemplando, otiosus esse nequeat, nilaque ipsi ab rebus à se conditis perfectio accedere possit.

Duodecimum argumentum ex l.b.viii. Phys. §.xlvi. & l.vi. Deus & natura semper faciunt ex possibilibus, quod melius est; Melius autem est mundum esse, ac semper esse, quam non semper esse. Est autem hoc possibile, qui enim de novo factus est, potuit ante fieri, & ab æterno fieri, non fore potentia devariatur suscipiens magis & minus. Porro, si ut melius est, quam non esse, ita melius potest idcirco est semper esse, quam non semper esse: Mundum igitur semper fuisse & semper fore melius est, quam non semper fuisse. Ergo Deus ab æterno Mundum fuit. Resp. Melius esse aliquid dicitur vel ratione Creatoris, vel ratione creaturæ. Si ergo bonum aut melius quippiam esse dicatur ratione Dei Creatoris, dico illud simpliciter bonum aut melius dicendum esse, quod ex sapientissimo ipsius iudicio & beneplacito tale est, adeoque nego bonum aut melius dici posse, si Mundus vel ante, vel post vel aliter conditus fuisset, quam nunc à Deo conditus est. Deinde, impossibile est Mundum ab æterno existere, quia ad productionem creaturæ requiritur, ut nihil ipsius esse antecedit, quod æternitati repugnat. Neque ex productione temporali ulla potentia Dei variatio aut mutatio colligi potest; quemadmodum neque ex aliarum creaturarum in tempore productione ulla vel mutationis umbra evincitur, ut etiam supra notatum est. Et, siue Deus potentiam suam exerat; siue non, æqualiter tamen potens, id est, omnipotens manet, in se ab æterno in æternum immutabiliter. Quinimo ne in creaturis quidem ex operibus actus productione, quispiam arguerit operantis potentiam propterea variari, magisve aut minus suscipi. Et si vel nunquam Mundum produxisset Deus, nihilominus infinita ipsius fuisset potentia; nulli enim ante productionem fuisset inobita, autquam Mundum potest et creare. Preterea, si melius quippiam esse dicatur ratione ipsius creaturæ, si ex eo, quia melius est esse, quam non esse, sequeretur Mundum esse æternum, utique & omnium rerum æternitas eodem argumento evinci posset, quod tamen absurdum & aperte falsum; quia similiter de singulis dici posset, melius est esse, quam non esse, & semper esse, quam non semper esse. Quinimo, quia perfectissimum esse melius est, quam imperfectum esse, sequeretur Mundum à Deo conditum non tantum æternum, sed & per-

fectissimum esse, quod similiter falsum est. Bonitas creaturæ, adeoque & Mundi non absoluta est, aut infinita, sed limitata ex arbitrio Dei; adeoque non sequitur, hoc vel illud bonum aut melius est, ergò Mundo, vel rebus creatis convenit; siquidem major creaturæ non debetur bonitas, quam ipsi à Creatore est concessa. Denique & hoc notandum, ad bonitatem Creaturæ non pertinere, ut hoc vel illo tempore sit, sicuti neque hæc vel illa creatura nunc existens, propterea esset vel fuisset melior aut perfectior, si ante centum vel plures annos exstitisset; ità quoque non sequitur, quod melior Mundus fuisset, licet ante, vel in priori τῷ πρῶτῳ, æternitatis, vel etiam post à Deo fuisset creatus. Et hæc ad Aristotelis argumenta dicta sufficiant.

Sequuntur Argumenta Procli, cujus cum de æternitate Mundi scripta interierint, eadem deprompta, ex eo opere, quod de hoc negotio contra Proclum scripsit Philoponus, proponemus. Sunt autem ea numero xx. Quorum primum est tale: *Si Mundus ortum habet, cur non ante factus fuit, quam nos asserimus esse conditum? Præsertim cum Deo tribuamus infinitam facultatem, & asseramus Mundum multò ante potuisse condi.* Resp. Ad hoc argumentum jam suprâ responsum vide ad quintum Aristotelis; Cum enim Deus sit agens liberrimum, utique quod Mundus in eo, quo conditus est, æternitatis τῷ πρῶτῳ id est, in principio temporis conditus sit, & non ante aut post; item, quod habeat hanc quantitatem & figuram determinatam non majorem aut minorem, has partes, hunc ordinem, situm aliaque; hæc, inquã omnia ex mero ipsius beneplacito dependent. Possetque eadem non tantum de singulis creaturis proponi quæ ællo, verum etiam quocumque demum æternitatis in momento conditus Mundus fuisset. In hoc ergò beneplacito Dei nobis est acquiescendum, & quavis illius ratio intellectu nostro finito sit imperlcrutabilis, Deo tamen sapientissimo eam non defuisse haud est dubium.

Secundum argumentum Procli: *De natura boni est, se ipsum cum aliis communicare, suamque bonitatem aliis rebus, quantum fieri potest, impertiri, & id maxime summo bono, qui Deus est. At si Mundus non sit ab æterno, per æternum, ut ità dicam, tempus, Deus inbilegit; & suam bonitatem non communicavit. Quare, aut potuit ab æterno Mundum creare, aut non: si potuit, aut voluit etiam, quare fecit, quid enim ei obflare potuit? Si noluit, ergò non est summè bonus, & invidia tangitur, id quod impium est cogitare, nedum loqui, aut sentire. Sin autem voluit, sed non potuit, ergò est finitavi, & circumscripta facultate præditus, & inæquabilis, & non simplicissimus, quando in eo non est eadem ac par voluntas & virtus atque potentia.* Resp. Quando bonum

num, adeoque & Deum, qui summè bonus est, & summum bonum, sui communicativum esse dicimus, sensus non est, quod propriam suam bonitatem rebus creatis communicet, (hoc enim impossibile est, essentque creaturæ infinitæ & omnipersæ,) sed, quod ex bonitatis suæ fonte bonitatem aliquam pro arbitrio suo determinatam atque limitatam creaturis singulis communicet, nempe eo tempore, modo, gradu, quibus ipsi visum fuit. Concedo igitur, quod Deus ab æterno extra se bonitatem creaturis non communicaverit. At inde non sequitur ipsum ab æterno nihil egisse, siquidem, ut jam suprâ ad Argumentum Aristotelis undecimum responsum est, otiosus esse non potuit, qui ab æterno in infinitæ atque pulcherrimæ suæ essentia contemplatione & amore fuit occupatus. Quæstio autem illa, (aut potuit ab æterno Mundum creare, aut non) ambigua est. Si enim sensus sit, utrum Deus ab æterno habuerit potentiam creandi, responsio est affirmativa, quia potentia Dei infinita est & æterna. Si verò sensus sit, utrum Deus potuerit ab æterno creare Mundum æternum, seu, qui ab æterno existeret, responsio est negativa, itâ ut æternitas non denegetur potentia creandi, sed Mundo creando; quia in quocunque æternitatis suæ momento Deus Mundum creasset, semper in principio sui esse conditus fuisset, adeoque nunquam potuisset esse æternus. Potuit ergo Deus ab æterno, id est, ab æterno in ipso fuit potentia creandi, seu virtus creatrix, imò & voluntas creandi Mundum, nempe qui esset & inciperet in tempore, adeoque qui æternus non esset, nec esse potuerit, quia, cum conderetur, necessario suæ durationis initium habere debuit.

Argumentum Procli I II. *Aliqui effectus sunt simul cum suis causis efficientibus, neque priores, neque posteriores ipsis: Ex. gr. corpora opaca, quæ sunt in lumine, sunt simul cum ea umbra, cujus causa sunt: Sol etiam efficit lumen, cum quo tamen simul est, neque antecedens ipsum, neque subsequens. Ergo Mundus, etsi, à Deo sit conditus, nihilominus potest tamen esse coæternus ei. Neque pugnant hæc inter se, ut effectus sit tempore simul cum sua causa efficiente. Resp. Aliquos effectus esse simul cum suis causis, neque priores, neque posteriores ipsis, concedo de causis, ut vocant, emanativis; Nego autem de causis activis, & quidem iis imprimis quæ agunt ex libero mentis arbitrio; adeoque exempla de umbra vel speciebus corporum opacorum, aut lumine Solis vel corporis cujuscumque luminosi, ad rem non faciunt; cum corpus sit causa emanativa umbræ, & Sol luminis in corpore opaco producti: Deus enim est causa activa & agens liberrimum, cujusmodi causæ necessario semper effectus suis priores sunt; Qui enim*

operatur ex libero arbitrio, priusquam operatur, deliberet necesse est. Deinde peccat hoc argumentum ignoracione Elenchi; Neque enim concludit Mundum esse ab æterno conditum, sed potuisse condi, quod, quamvis ex dictis falsum esse pateat, jam tamen non disputatur.

Argumentum Procli iv. *Est æterna idea Mundi, ad quam Deus respiciens, Mundum fabricatus est; Idea autem essentia in eo consistit, quod est, exemplar esse alterius, quod est imago ejus. Exemplar autem & imago, cum sint ex numero eorum, qua cum alio conferuntur, simul sunt, neque unum sine altero constare potest. Ex his necessariò consequens est, quandoquidem idea & exemplar Mundi æternum est, Mundus iidem, qui est imago ejus, sit æternus. Alias necessarium est, aut exemplar non esse æternum, si imago ejus non sit, aut esse exemplar sine imagine, aut Mundi exemplar nullum esse, quorum omnium nihil est, quod cum veritate ac recta ratione non pugnet. Resp. In perfectissima & infinita essentia divina ab æterno omnium rerum fuisse ideas, adcoque & Universi, omniumque illius partium, certissimum puto. Et, quemadmodum architectus juxta ideam phantasie sue impressam domum extruit, ita quoque Universi Architectum Deum Mundum, omniaque in eo, & juxta ideam suam singula, condidisse concedo. Verum enim verò sicuti domus non existit simul cum illius in mente artificis idea quippe qui eam pro suo arbitrio extruit, quando vult; ita quoque hæc rectè, ex æterna in mente Dei idea, æterna Mundi existentia aut creatio colligitur, cum Deus non minus liberè Mundum, quam Architectus domum, consecerit. Præterea, cum non Universi tantum, verum & singularum creaturarum idea ab æterno in mente divina fuerint, unique si æternitas Universi, simul & singularum creaturarum inde æternitas pari sequela evinceretur, quod tamen absurdum & falsum esse nimis est manifestum.*

Argumentum Procli v. *Causa efficiens aut semper est actu, aut aliquando est potestate tantum, & siquidem actu semper sit, effectus etiam semper erit, causa enim si actu fuerit, effectus actu erit, & si illa potentia, hic quoque potentia. Præterea, id quod est potentia, reducitur ad actum, ab eo quod est actu, ut calidum potentia, à calido actu: similiter opifex potentia evadet opifex actu, ab eo qui jam est actu opifex. Opifex igitur mundi, vel semper fuit actu efficiens Mundum, & sic Mundum item semper fuisse necesse est: Vel aliquando fuit in potentia efficiens, ergo ab alio efficiente qui actu fuit, reductus est ad actum; sed quæro de hoc, an semper reducebat illum ad actum, & sic ille semper actu fuisset opifex, id quod repugnat positioni: vel non semper reducebat, sed poterat tantum reducere, ergo erat aliud à quo ex tali potentia ad talem actum tra-*

betetur, & similis quaestio de hoc fiet, & de alio item atque alio, aut igitur erit progressus in infinitum in efficientibus, quod manifestè falsum, atque adedò impossibile est, aut necessario fatendum erit, Opificem Mundo semper actu efficientem fuisse, & proinde Mundum semper extitisse. Quare Mundus æternus est. Resp. Responsio ad hoc argumentum sufficienter patet ex dictis, Deus enim, cum æternus sit, semper & ab æterno actu potens extiterit necesse est. Si verò Causam actu appelles, quandò actu operatur, dico Deum actu causam, id est, creatorem factum esse in principio temporis, quando sc. Mundum creavit, idque à se & ex propria sua voluntate; id est, condidit Mundum, quandò voluit condere, adedòque alia, quæ ipsum ad actum reducere, causa ipsi opus non fuit, cum ipse sit prima & suprema omnium extra se creaturarum causa & Opifex. Similiter Pictor, qui potentiam habet vel artem pingendi, vel architectus; qui arte & potentia ædificandi præditus est, non indiget alio, cujus ope aut motu ad actum pingendi aut ædificandi reducatur, quia, quando ipsi pingere aut ædificare lubet, potest, ut norum. Falsum ergò est, quod argumento concluditur, Opificem Mundi semper actu efficientem fuisse, Mundumque semper extitisse, aut æternum esse, quia in tempore demum Mundum creare Deus voluit, ut dictum.

Argumentum Procli vi. Deus author est Mundi omnino immutabilis; Ergò vel ab æterno Mundum fecit, vel nunquam fecit. Nam si quando non fuit factus mundus & aliquando fuit factus, ergò Deus ex non faciente ad facientem mutatus est, quare Deus mutatus est. Et cum omnis mutatio sit imperfecta quadam actione tempore indigens, & ad perfectionem aliquam acquirendam tendens: tempore inquam indigens, utpote sine quo nullus motus perfici queat, erit Deus imperfectus aliquo indigens. Quamobrem, qui aternitatem Mundi negant, etsi cupiunt esse pii erga Deum, sunt tamen (ut ex iis, quæ jam diximus perspicuum est) erga ipsum valde impii. Possumus igitur breviter concludere totam rationem ad hunc modum: Si Deus prius non faciebat Mundum, & postea fecit, ergò mutatur, si mutatur, ergò movetur: quoniam omnis mutatio, vel est motus, vel non fit sine motu: si movetur, ergo est imperfectus. Quod enim de albaturo non est perfectè album: Si etiam movetur, indiget tempore, quoniam motus necessario fit in tempore. Quæ, si absurda sunt, & omnia tamen pendunt ex illo, quod Deus ex non faciendo ad faciendum migraverit, certè illud falsum erit, quare ab æterno Deus Mundum fecit. Resp. Solutio hujus argumenti patet ex iis, quæ supra ad sextum & duodecimum argumentum Aristotelis dicta sunt; siquidem ex creatione aut productione Mundi nulla in Creatore mutatio vel mutabilitas evinci potest, cum inde nova dun-

duntaxat denominatione externa in ipso oritur, quæ internam mutationem nequaquam arguit. Et reverà si productio operis externi aliquam in Deo mutationem argueret, jam non solum Deum creando Mundum mutatum esse sequitur; verum & similis mutatio ex singulis illius operibus, quæ in tempore ab ipso peraguntur, concludi posset. Quin imò si vel Mundum ab æterno conditum concederemus, ipsum quoque ab æterno mutatum esse sequeretur. Cum ergò ipse Proclus Deum immutabilem omninò fateatur, utique vel Mundum ne ab æterno quidem à Deo conditum ab ipso statuendum erit, vel ex temporali illius creatione ipsum mutatum haud quaquam esse deducere potest. Si enim creatio in tempore, mutationem in tempore, arguat, pari ratione creatio æterna mutationem æternam demonstrabit.

Argumentum Procli VI I. Si Mundus conditus est, & peribit, necesse est tempus, quod unà cum Mundo necessario cohaeret, ortum quoque interitumque habere: quare aliquandò non fuit tempus, & aliquando non erit tempus. Sed (aliquando) certum quoddam tempus significat, ergò fuit tempus, & erit aliquod tempus, quando nullum tempus erit: quæ cum sint inter se pugnantia, necessarium est Mundum ab æterno fuisse. Resp. Hoc argumentum convenit cum tertio Aristotelis, ad quod suprà responsum est. Si enim tempus sumatur pro duratione Mundi, certum est ut Mundi, ita & temporis fuisse initium. Cum ergò tempus aliquandò non fuisse dicimus, nihil aliud volumus, quam tempus nostrum habuisse suum initium, ante quod non erat. Adeoque particula *Aliquandò* non necessariò temporis differentiam aut tempus significat, (sic enim sensus foret in aliquo tempore non fuisse tempus, quod absurdum) sed æternitatis quasi particulam sive τὸ πρὶν (vocabula enim hic nobis defunt) cui nec tempus nec Mundus coexisterint. Æternitas enim à nobis tanquam infinita seu ab æterno in æternum extensa duratio, quæ principio careat & fine, concipitur; tempus verò est duratio habens principium & finem, adeoque duratio temporis durationi æternitatis æqualis esse nequit, quia æternitas eam in infinitum antecedit & sequitur.

Argumentum Procli VII I. Mundus dissolvi non potest, ergò neque unquam factus est. Patet consequentia, nam si quod generatum est, aliquando interiret, ergò ex opposito consequentis, quod interire nequit, ut est apud Platonem in Phædro, nunquam generatum fuit. Antecedens probatur. Nam Mundus à solo Deo, qui fecit ipsum, dissolvi potest: is enim rationem solvendi nodum tenet, qui fecit nodum: atqui Deus nunquam dissolvit, nam quod bene & cum ratione colligatum & copulatum est, velle dissolvere, improbi est: vel, ut Mundus

non suis bene compactus à Deo, quare in eo faciendò bonus artifex non exstitit: vel si bene factus est, improbi erit ipsum velle dissolvere. Quare cum nefas sit opinari Deum vel in faciendò Mundo non optimum fuisse artificem vel in eo dissolvendo improbum evadere, planum est Mundum dissolvi non posse. Resp. Sicuti ex libero Dei arbitrio Mundus est conditus & compositus, ità quoque ejusdem arbitrio ipsum dissolvi posse certum est. An verò de facto unquam Mundus dissolvendus sit vel interiturus, alia questio est. Nos rationem hactenus nullam pro affirmativa videmus, adeoque probabilior nobis eorum videtur sententia, qui Mundum nunquam interiturum existimant. Quòd tamen non obstat, quòd minus ut creatio, ità & ejusdem partiumque ejus actualis conservatio, liberrimo ipsius arbitrio & bonitati attribuat. Haud igitur male aut improbè ageret Deus, si hanc Universi Machinam dissolveret, quia eam conservare semper nulla lege tenetur. Præterea, cum ipsemet fateatur Proclus, à solo Deo, qui fecit Mundum, ipsum dissolvi posse, quid hoc sibi velit argumento, equidem non video; Neque enim nos virtute aut potentia naturali dissolvi posse ipsum asserimus, ut patet. Si enim à Deo dissolvi potest Mundus, ut Proclus fateatur, utique ab ipso in tempore potuit componi. Non ergò hinc æternitatem ejus demonstrari posse planum est.

Argumentum Procli ix. *Universi anima orta caret & interitu; Ergo Mundus quoque ortu & interitu vacare debet. Consequentia patet, quia non potest animal interire, aut non esse, cum anima ejus semper adsit. Antecedens probatur, quoniam anima Mundi à se ipsa movetur, Quare Plato in Phædo ait, animam nunquam natam aut caducam esse. Resp. Animam dari Universi falsum est; Et si omninò eam dari concederetur, nulla tamen foret conclusio, quia eadem cum Universi initium suum accepisset. Quemadmodum etiam animas hominum, licet sint immortales, non tamen ante corporum formationem à Deo creari alibi probatum est*

Argumentum Procli x. *Mundus non potest interire, ergò nunquam fuit ortus. Prob. consequ. Nam si quod ingenuitum est, non potest interire; ergò quod potest interire, non est ingenuitum. & quod genitum potest interire. Nam quod non fuit, & potuit esse, cum est, poterit etiam non esse. Præterea, quidquid sit, ex contrario fit, in quod rursus interire potest. Quod si ex privatione interdum fit commigratio in habitum, ut è tenebris in lucem, & ex quiete ad motum, multò magis ex habitu poterit fieri commigratio in privationem. Quare si Mundus ex inordinato aliquandò generatus fuit ordinatus, quæ est commigratio ex privatione in habitum, multò magis nunc ex ordinato poterit fieri inordinatus quæ est commigratio ex habitu in privationem. Quod si hoc absurdum est, ab-*

jurdam item erit, facere Mundam aliquando ortum fuisse. Antecedens autem probatur: Quicquid interit ab aliquo extrinsecus occurrente interit, & in aliquid alienum à se: Cum igitur extra Universum nihil sit, nec quicquam ab eo alienum existat, sed (ut est apud Platonem) omnia complexu suo continent, totum ex totis, perfectum ex perfectis constet; Mundus igitur interire non potest, quare neque unquam ortus est. Resp. Licet Mundum virtute naturali dissolvi non posse, neque unquam à Deo dissolutum iri, concedamus, consequentia tamen falsa est, ut satis superque patet ex iis, quæ suprà ad Argumentum octavum à nobis dicta sunt. Cæterum varia hoc argumento partim incerta; partim falsa dicuntur, quæ cum ad præsens negotium nihil faciant, non est quod iis refutandis immoremur.

Argumentum Procli x i. Quicquid interit, id suo ipsius vitio interire solet: At Mundus nullius vitii capax est, ergo non potest interire. Major patet, nam quod interit, neque bono suo interit, neque eo, quod neque bonum neque malum sit, sed medium, quod enim est hujusmodi, id neque ledere, neque juvare potest. Unde fit, ut neque perimere neque servare valeat. Minor apud Platonem perspicua est, ipse enim ait Mundum beatum esse Deum, sicut & Deos omnes: & propterea Deorum genus universum, cum vitii non sit capax, nullam sentire posse immutationem. Non igitur unquam interibit Universum, cum in eo nihil sit vitii. Quod si interire nequit, nunquam ortum est, alioquin ex nihilo factum esset, nullam autem rem ex nihilo fieri posse certum est. Resp. Etsi nihil intrinsecus, nisi suo ipsius vitio corrumpi physicè concedamus, haud tamen ex eo inferre liceret, id ipsum ne quidem extrinsecus seu virtute supernaturali Dei corrumpi aut annihilari posse. Deinde quamvis Mundum nunquam prorsus corruptum iri libenter credamus, ut suprà dictum est, inde tamen ipsum ne à Deo quidem dissolvi posse rectè deduxeris. Quod autem ad minoris probationem citatur ex Platone, quod Mundum Deum esse dixit, ad rem non facit; siquidem, non quod Plato dixerit, sed quod ratio suadeat, in Philosophia admittimus. Equis autem sanæ mentis Mundum Deum esse existimet? Falsum ergo & illud, quod ex eo deducitur in argumento, Mundum nunquam ortum esse; quemadmodum & illud, quod in fine additur, nullam rem ex nihilo fieri posse, cum omnino ex nihilo à Deo facta esse, & ratio & fides doceant. Quinimò, quæcumque fiunt, quatenus fiunt, ex nihilo fieri alibi à nobis probatum est; siquidem id quod est, omnino fieri non potest, adeoque quodcumque fit, ex eo, quod non est, fieri necesse est.

Argumentum Procli x i i. Universi elementa, vel manent in suis locis naturalibus, quod ipsis est secundum naturam: vel circulo moventur, & neque prin-

principium, neque finem habent movendi. Si igitur Universi elementa in suis sunt locis, neque ullum in alienum locum totum contendit, necesse est Universum expers esse mutationis: cum omnia, eaque tota id obtineant, quod ipsis est secundum naturam, tum quia in eodem manent, tum quia moventur.

Resp. Quam nobis de Elementis tradunt doctrinam Peripatetici partim incertam partim falsam esse alibi à nobis ostensum est. Et, quæ vulgò sic vocantur, siue maneant in suis quæque locis naturalibus, siue circulariter moveantur, siue sursum, siue deorsum, ad rem non facit. Quicunque enim iis motus convenit naturalis, à naturæ Authore ipsis est inditus, adeoque principium habuit, quemadmodum & ipsa elementa, ubicunque tandem inveniantur. Deinde hoc argumentum peccat ignorance Elenchi, licet enim omnino Universum mutationis expers esset, eo sc. sensu, ut nunquam totaliter sit corrumpendum; non tamen sequitur ipsum esse æternum aut ab æterno conditum, quod erat demonstrandum.

Argumentum Procli xiii. *Materia prima est procreationis & incertus expers, alioquin alterius materia indigeret. Illud autem cujus gratia materia est, est ipsi procreatio, & materia refertur ad formam, relativa autem simul sunt: relinquitur igitur, ut si materia æterna est, procreatio quoque, cujus gratia illa est, æterna sit, & sint formæ in ipsa ex æternitate.* Resp. Materia prima, ut vocant, quamvis ratione virtutis naturalis ingenerabilis sit, eam tamen creabilem non esse, aut æternam negamus; siquidem eam ex nihilo potentiâ Dei conditam esse in temporis principio asserimus. Vide responsionem ad primum Argumentum Aristotelis.

Argumentum Procli xiv. *Quicquid gignitur materia eget & efficiente: Quod si id non semper est, id fit aut propter efficiens, quod non semper idoneum est ad efficiendum, aut propter materiam, quæ non est semper habilis, aut certe propter utrumque: Quare si mundus aliquando non fuit, id accidit ei, vel propter materiam, vel propter ipsius Mundi effectorem. At Deus Mundi Opifex, semper ad efficiendum Mundum, est satis idoneus: cum ipse idem semper permaneat, nec ullo modo immutetur, nam si nunc est idoneus, & ex æternitate fuit; Et si ex æternitate non fuit, nec nunc quidem est idoneus. Materia verò similiter semper fuit habilis ad procreationem Mundi, cum sit incommutabilis & semper eadem permanens. Cum igitur, quod Mundus aliquando non fuerit, nec materia, nec efficiens, adscribi possit, pro falso habendum est. Resp. quamvis virtute naturali nullum compositum ex nihilo, sed ex suis partibus siue principiis præexistentibus generetur; virtute tamen divina omnia in principio ex nihilo facta esse jam sæpius repetitum est. Dico igitur*

materiam primam, ex qua postea omnia corpora naturalia generanda essent, in principio ex nihilo esse factam. Et revera, cum spiritus & animæ nominum sive Mentēs immortales etiamnum ex nihilo creentur à Deo, quæ ratio, ob quam non idem de materia primâ cogitemus? Si enim ejus immateriale ex nihilo fieri possit, quare non materiale? Quod autem Mundum aliquando non fuisse statuamus, non materiæ aut efficienti ascribimus, sed ipsi Mundo, cui æternitas repugnat, cum impossibile sit, creaturam ex nihilo productam Opifici suo esse coætarnam, & nihil necessariò id esse creaturæ antecedit.

Argumentum Procli xv. *Partes mundi, nempe Cælum & quatuor elementa, sunt æternæ: Ergo etiam Mundus, neque enim totum ignobilis est suis partibus, cum sint id cuius gratia partes sunt, & non è contrario. Cælum autem Platoni sempiternum esse placuit, quod vel motus ejus, qui sit in orbem aperte declarat: Nam ortus & interitus inest in iis quæ habent contrarium. Præterea, unum uni tantum propriè est contrarium, ut à Platone explicatum est in Protagora: Cum igitur Cælum contrario careat, (nam si cælo aliquid contrarium esset, motus quoque ejus alius motus contrarius inveniretur, at quis inesse potest? Cum enim tres sint motus simplices, circularis, & rectus, qui duplex est, unus qui sursum sit, alter qui deorsum: quis erit horum circulari contrarius? Non is qui sursum sit, nam opponitur ei qui sit deorsum, nec is qui sit deorsum, adversatur enim ei qui sit sursum, & jam positum erat unum uni tantum contrarium esse) relinquitur neque motui cælesti, neque ipsi cælo quidpiam esse contrarium. Quare corpus erit diversum ab iis, quæ oriuntur habent & interitum, ut sunt quatuor elementa, & quæ ex ipsis fiunt. Porro, ipsa elementa, licet secundum partes suas gignantur, & intereant, nihilominus tamen semper suum statum naturalem retinent in suis locis remanentia. Mixta verò, non partes Mundi, sed potius effecta dici debent, ad quæ procreanda, dii, ut est apud Platonem, ex integritate elementorum partes mutantur, quas iterum restituant illis: Quod dictum est propter resolutionem mixti in elementa, ex quibus constatum erat. Ex his igitur, & vere & convenienter Platonicis decretis, atque principiis, demonstratum est, Mundum sempiternum esse. Resp. Totum hoc Universum, Mundum, Cælum, ejusque motum, qualiscunque ipsi attribuat, & elementa, quæcumque tandem & illa fuerint, principium ut essendi ita & durationis suæ à Deo accepisse, jam sæpius dictum est. Neque refert, quid ex decretis sive principiis Platonicis concludi posse videatur, siquidem non auctoritatibus gentilium, sed solis rationibus hic agendum.*

Argumentum Procli xvi. *Materia sempiterna est, & per se habilis ad suscipiendas formas, vel igitur formæ in ea extiterunt, & semper erunt, & sic Mun-*

Mundus principio & fine carebit: vel non semper fuerunt, aut erunt, quod est absurdum: Quomodo enim materia ex aeternitate formis caruit, ad quas suscipiendas semper fuit habilis? Sed forte dices, materiam ab aeterno habuisse formas vagas, imperfectas, & inordinatas, postea vero productas fuisse formas perfectas. Verum id dici nequit, Cum enim materia per se, ac semper habilis sit ad suscipiendas formas perfectas, nulla potest reddi, causa, cur non ab aeterno illas habuerit. Deinde, quid opus fuit prius habere formas imperfectas, ut deinde perfectas habere posset? Quod autem Plato materiam prius immoderate ac inordinatè motam fuisse dicit, id non ita accipiendum est, ut prius fuerit inordinata, deinde ordinata, sed cogitare debemus, cum illis verbis exprimere voluisse, qualisnam materia ex se & suapte natura esset, nisi ab Opifice Mundi distincta, & exornata fuisset. Resp. Idem patet responso ex dictis quia materiam, vel quicquid rerum extra Deum fingatur, æternam esse acie esse posse constanter negamus. Cæterum de vanitate somnarum, quales vel Peripatetici vel Platonici a materia susceptibles esse vel suscipi somniant, alibi à nobis actum est.

Argumentum Procli xvii. Exemplar Mundi Plato dicit esse æternum sempiternum, & numericis omnibus absolutum: Cum igitur Deus Mundum fecerit hinc exemplo simillimum, quemadmodum facit Mundum unum & absolutum, sic etiam sempiternum fecisse credendum est. Imago enim, ut perfecta sit, debet omnino similis esse exemplari. Si igitur Mundus ortum & interitum habet, nulla ex parte similis erit exemplari: Sin autem, vel careat interitu habens ortum, vel careat ortu habens interitum, non utraque ex parte, sed ex altera tantum, exemplari similis erit. Resp. Hoc argumentum haud differt à quarto, ad quod supra responsum. Neque profectò imaginis natura requirit, ut eandem cum suo exemplari habeat durationem, aut etiam omnimodam & absolutam similitudinem; Sic enim nulla res creata exemplari suo sive idem similis esset. Idea enim divina sive exemplar, ad quod Deus Mundum condidisse perhibetur, non tantum æternum est, verum & incorruptibile, & immateriale, & simplicissimum atque indivisibile, quæ omnia in creaturis nusquam reperias. Ad naturam ergò imaginis aliqua duntaxat cum suo exemplari similitudo sufficit, id est, ut talis sit, qualem eam Deus esse voluit, atque ab æterno decrevit.

Argumentum Procli xviii. Si in Deo duæ sunt Voluntates, una, ut non sit aliquid inordinatum, quod Plato indicat illis verbis (cum enim constituit Deus nihil mali admiscere, ex inordinato ipsum adduxit in ordinem. Altera, ut Universum benè colligatum conservetur, quam innuit Plato illa oratione (nam cum voluntatem & consilium meum nacti sis, quod majus est vini ulumi ad per-

petuitatem vestram, quam illa quibus estis tum, cum gignebamini, colligat &c.)
 necesse igitur est has voluntates aut semper esse in Deo, aut interdum utramque,
 unam prius, alteram posterius: At interdum esse, interdum autem non esse, non
 convenit ei, qui semper est, & immutabilis semper perseverat: Et prius, ac po-
 sterius in eis tantum insunt, quæ tempori subiecta sunt: Quod si utraque volun-
 tas, semper quod vult effici, semper igitur, & inordinatum oblietatur
 propter perpetuam voluntatem, ut ipsum non sit, & ordinatum conservatur
 propter voluntatem ut ipsum sit perpetuum, cum utraque voluntas sit semper.
 Quare si sit utrumque semper, non prius erit inordinatum quam ordinatum, nec
 ordinatum, quam inordinatum. Quod si id, quod ordinatum est, principio & sine
 caret, Mundus autem nihil aliud est quam ordo, & id quod adductum est in ordi-
 nem: Mundus igitur ortus & interitus experserit. Resp. Voluntas Dei tantum
 unica est, non duplex, eaque Mundum ordinatum condere ab æterno
 decrevit; at verò inde non sequitur Mundum ordinatum aut conditum
 æternum esse. Volitio quidem creandi æterna est, res verò volita aut
 creata, nec est æterna, nec æternitatis capax; sed per actualem in tem-
 pore creationem demum esse incepit. Quemadmodum etiam omnium
 eorum, quæ indies oriuntur & intereunt, volitio Dei æterna est, unde ta-
 men nemo eadem æternum esse concluderit, ut per se evidens.

Argumentum Procli xix. Quicquid natum est, aliquando interibit; om-
 ne quod caret ortu, caret etiam interitu: Quæ duo pronuntiata non modo sunt
 Aristotelis in primo de Cælo, verum etiam Platouis, qui horum alterum in li-
 bris de Rep. alterum in Phædrio pronuntiat: Verum, id omne quod natum est,
 manet interitum, inquit Socrates, Musarum personam referens; & quod gene-
 ratum non est, interitum carere est necesse. Ex quibus pronuntialis alia duo de-
 ducuntur. Unum est, quicquid interire potest, id generatum esse; nam si non esset
 generatum, caretet interitu, per secundum pronuntiatum. Alium est, quis-
 quid non potest interire, id non esse generatum: Nam si generatum esset, ut in
 primo dictum est pronuntiato, aliquando interires; Cum igitur Mundus inter-
 ire nequeat, bonus enim suis Opifex ipsius, improbi autem esse videtur, quod
 bene compactum, fuit velle dissolvere, & immortalium, inquit Plato, ipse est
 Opifex: Quod autem immortale est, hoc non cognosce casum, seu interitum, ut
 in Phædone dicitur, haud enim temerè quidquam aliud esset expertus interitus, si
 quid immortale esset, non esset huiusmodi. Cum igitur Mundus interitu careat
 carebit etiam ortu, per secundum pronuntiatum. Resp. Nihil hoc argumen-
 to contineri, ad quod non supra ad Octavum responsum sit. Quanquam
 enim Mundus natura sua totus interire nequeat, sicut & Angeli aut Spi-
 ritus immortales, mentesque humanæ natura sua incorruptibiles sunt

conditi, id ipsum tamen eodem ab æterno conditos fuisse nequaquam arguit. Falsum ergo est illud enuntiatum absolute, quicquid non potest interire, id non est productum. Nam si id verum esset, utique Mundum ne quidem ab æterno productum esse sequeretur, quod tamen ipse Proclus affirmat; quippe qui Mundum ab æterno à Deo factum doceat, quamvis nonnunquam eundem ortu & interitu carere, ut in hoc argumento & alibi sæpius, asserere videatur. Quod si ergo illud enuntiatum procederet, quicquid non potest interire, id non est genitum seu productum; utique, concesso Mundum in æternum interire non posse, ut vult Proclus, consequenter & illi dicendum erit, Mundum quoque ne quidem ab æterno esse conditum, adeoque esse Ens independens, quod tamen ipsius sententiæ repugnat, & aperte falsum est.

Argum. Procli xx. & ultimum: Plato in Politico ait, res divinisimas semper in eodem statu permanere, similiter affectus & prorsus immutabiles. Cum igitur Opifex Mundi sit quidpiam divinisimum omnium semper idem, & similiter affectus erit. Quare alienum est ab ipso, interdum facere, & interdum non facere, sed convenit illi, vel semper facere, vel nunquam facere. At nunquam facere, in eum qui est Opifex omnium rerum cadere nequaquam potest: relinquatur igitur, ut Deus semper Mundum faciat, ac proinde Mundus sempiternus sit. Præterea, Deus (ut in Timæo legitur) Mundum condidit divini exemplaris perfectissimam imaginem; cum igitur exemplar omnino sempiternum sit, necesse est Mundum, siquidem est imago ipsius, ambisariam sempiternam esse. Ad hæc, Plato Mundum Deum vocat, Deorum autem genus & mutationis & vitii expertus est; quare Mundus ortu & interitu carebit. Resp. Similiter nihil hoc argumento adferri, quod non abundè in superioribus refutatum est. Deum Ense esse perfectissimum, ipsumque semper & immutabiliter eundem manere, absque ulla vel mutationis umbra libenter concedimus; at verò exinde sequi negamus, ipsum aut unquam aut semper debere actu extra se operari aut Mundum producere. Nam inde quoque sequeretur, Deum etiamnum creare Mundum, & nunquam Mundum creatum dici posse. Præterea, si externa operatio aliquam in Deo mutationē argueret, utique cum singulis ferè momentis aliquid novi à Deo produceretur, singulis quoque momentis Deum mutatum ire conficeretur. Ad id porro, quod de sempiternitate Mundi colligitur ex sempiternitate divini exemplaris, jam quoque suprà dictum est, consequentiam esse nullam, quia natura imaginis non requirit æqualem cum suo exemplari durationem, sed aliquam cum eo duntaxat similitudinem. Quod denique additur, Mundum Deum à Platone appellari, ad rem non facit, quia, non quid Plato

Plato dixerit, sed quod rationi consentaneum est, pro veritate amplectendum. Quamvis nec hoc ullo modo sit verisimile, Platonem usque aded à veritate aberrasse, aut desipuissse, ut Mundum Deum esse putaverit; ità ut vel improprie vel ex fabulosa Poëtarum quorundam consuetudine sic loquutum ipsum fuisset credendum sit. Et reverà, cum, ut in argumento dicitur, ipse Plato in Timæo, Deum Mundum condidisse divini exemplaris perfectissimam imaginem, statuatur; Et alibi, omnes res ab uno Deo conditas, & suapte natura mortales ac dissolubiles esse, ipsiusque Dei munere res caelestes immortalitatem adipisci, censeatur, qui potuit ullam earum rerum Deum esse arbitrari? Atque hæc quidem ad argumenta Procli, quibus iisdem abundè satisfactum esse existimamus.

Sequuntur argumenta, quæ pro æternitate Mundi Averroës, alique Peripatetici excogitarunt, quæ, ne aliquid quod ad præsentem controversiam facere videtur consultò omisissse videamur, breviter nunc expendemus.

Primum Averrois argumentum, ex Phys. lib. 1. de cælo, de promptum, sic habet: *Qui de novo Mundum generant, debent necessariò vacuum admittere*; Nam ubi nunc est Mundus, aliquando nullum fuit corpus, mirum ante generationem Mundi, poterat tamen esse, quandoquidem potest à Mundus generatus fuisse, ergò illud erat vacuum; Namque vacuum non est aliud, quam receptaculum corporis, vacans tamen omni corpore. Resp. Si per Vacuum intelligatur illud spatium seu Ubi, in quo nunc Mundus existit, utique concedo totum argumentum. Neque tamen præsumendum est, spatium hoc esse aliquid positivum extra Deum, aut Ens reale; siquidem nihil aliud est, quam quasi particula quædam immanentis essentia divinx. Licet enim essentia Dei sit indivisibilis, non tamen, ut puncto inclusa aut spatio finito determinata, sed ut ubique diffusa atque indeterminata in infinitum concipitur; Unde & verè atque positive imensus appellatur, ità ut extra Universi limites sese essentia Dei in infinitum extendat. Sicuti ergò duratio Mundi temporalis minimè duntaxat durationis divine live eternitatis quasi particule coexistit, perinde quoque ejusdem spatium minimam duntaxat immanentia divinx quasi particulam occupat.

Secundum Argumentum Averrois, ex lib. 1. de Cælo: *Qui ponunt Mundum de novo generatum esse, non possunt demonstrare, esse Deum, & æternitatem ejus*: sicut, qui ponunt ipsum æternum esse, & coguntur dicere ante generationem Mundi fuisse aliquod corpus. Et ratio est, quoniam, quod de novo fit, non potest immediate fieri à Deo, tunc, quoniam de novo fit, quod autem tale est, ab eo quod semper eodem se habet modo, proxime effici non potest: tum quo-

quoniam quod generatur, debet prius à alio alterari, Deus autem, & quoniam idem ac immutabilis est, & quia est incorporeus, non potest immediate aliquid novi facere, vel aliquid alterare; illud igitur à quo Mundus proximè factus est, debuit esse corporeum, ut & alterare posset subjectum, ex quo Mundus generari debeat, & ut varietate ac novitate sui motus, aliquid novi producere posset, quod antea non erat. Resp. Quia Mundum ex nihilo conditum à Deo docemus, optimè ex eo divinitas, æternaque ejus tum potentia tum sapientia demonstratur, ut docet Apostolus Rom. 1. 20. Quod autem Deus, quia semper idem & immutabilis est, atque incorporeus, dicitur non posse immediate aliquid novi facere, vel aliquid alterare, non probatur: Cum enim Deus sit omnipotens, quæcumque contradictionem non implicant, qualis est existentia Mundi ejusque partium, ab ipso creari posse certissimum est. Deinde, si hoc argumentum alicujus esset ponderis, ne ab æterno quidem Mundum à Deo condi potuisse sequeretur, quia ab æterno incorporeus fuit, & consequenter nunquam potuisset, nec etiam num posset mutationem aut alterationem aliquam in Mundo corporeo efficere. Immutabilitati quoque Dei operationem ad extra nequaquam adversari in præcedentibus satis superque ostensum est.

Argumentum tertium Averrois: Si quicquid sit, ex subjecto & opposito determinato sit, idque & ex vi demonstrationis & ex evidentia sensuum certum est, contrarium autem hujus, nec ratione, nec testimonio sensuum ostendi potest: planè impossibile erit ex nihilo aliquid fieri: in tali enim productione, nec subjectum, nec oppositum ullum determinatum esse potest. His adde, quod omnis actio necessario conjuncta est cum motu, subjectum autem est inseparabile à motu, cum ponatur in definitione ejus. Quare, qui ajunt primum agens posse ex nihilo aliquid facere, non prædicant excellentiam ejus, sed potius pugnantia inter se loquuntur, quomodo enim vel circa nihilum versari, vel in nihilo recipi illa actio potest? cum hæc sint relativa, quorum ea est natura, ut unum sine altero intelligi, nedum esse nequeat. Resp. Ex nihilo nihil fieri, vulgo quidem dici solet; at qua ratione, aut quo illud dictum fundamento nitatur, hæcenus me legisse aut audivisse non memini. Contrarium jam sæpius à nobis ostensum est. Quinimò, accuratè & strictè loquendo, quæcumque fiunt, quatenus fiunt, ex nihilo fieri, demonstravimus dictum tamen illud pro communi axiomate receptum videtur ex eo, quod omnia corpora naturalia sive composita, ex suis partibus atque principiis jam præ-existentibus constare atque componi adverterent, ità ut fieri pro componi in isto dicto explicandum sit. Ad illud autem, quod dicitur, actionem non posse versari circa nihilum, aut in nihilo recipi, notandum est, haud

mimum esse actionem versari circa subjectum aliquid patiens, ut loquuntur, quotiescunque actione ista non-ens aliquid, puta accidens, producit; accidens enim absque subjecto, cui inhæreat, esse non potest. At verò longè aliter se res habet in præsentī negotio, siquidem creatione non Accidens, sed Ens ipsum productum est, hoc autem cum subjecto inhærare nequeat, utique, Tò nihil illius esse præcesserit, necessarium est.

Argumentum quartum Averrois: *Qui faciunt Mundum de novo, coguntur fieri aliquam mutationem factam esse in Deo; aut enim Deus eodem prorsus modo se habuit erga molitionem Mundi ab æterno, ut tunc, cum fecit Mundum, & sic necessarium est, ut vel ab æterno Mundum fecerit, vel ut nunquam fecerit: aut diverso modo se habuit Deus, tunc cum fecit, quam sese habuerat ab æterno, hac autem diversitas, cum non potuerit oriri ex ipso Mundo, utpote qui nihil planè esset, necessario profecta est ex ipso opifice Deo.* Resp. Operis externi productione nullam in Deo mutationem realem argui posse, jam sæpius dictum. Sicut enim deus ab æterno se Mundum conditurum decrevit, ità & eundem in tempore condidit. Condendo tamen novam ad Mundum relationem accepit, & Creator dictus est, quæ cum nova duntaxat sit denominatio extrinseca, nullam in subjecto denominato mutationem ponit, ut alibi à nobis demonstratum est.

Argumentum quintum Averrois: *Ut se habet voluntas nova ad actionem novam, sic voluntas antiqua ad actionem antiquam: Ergo commutata proportionem, sic se habebit voluntas nova ad actionem antiquam, sicut voluntas antiqua ad actionem novam, & contra: Ergo siquid est impossibile à voluntate nova prodire actionem antiquam, sic est impossibile à voluntate antiqua prodire actionem novam.* Resp. Propriè, formaliter & præcisè loquendo Deus non volendo aut decernendo, sed agendo opus externum producit. Decretum Dei æternum est, quo se in tempore hoc vel illud opus effecturum statuit, idem verò tempore statuto potentia sua exequitur. Decreto res possibilis è statu possibilitatis in statum futuritionis traducitur, & fit futura; potentia verò actu operante res è statu futuritionis traducitur in statum actualitatis, & fit actu præsens seu existens. Volitio igitur operandi necessario ipsam actualem operationem antecedit. Quamvis itaque volitio consequens non possit esse causa actionis antecedentis, potest tamen volitio antecedens, adeoque & æterna, optimè dici causa actionis consequentis, quæ fit in tempore.

Argumentum sextum Averrois: *Si voluntas æterna dicitur producere suum effectum de novo, & non ab æterno, hoc sine dubio contingit, vel ob aliquod*

quod impedimentum, vel ob defectum alicujus rei necessaria ad illum effectum producendum: necesse est igitur ante generationem Mundi, vel impedimentum illud removeri, vel illam rem necessariam adesse: quorum neutrum potest fieri sine motu. Saltem negari non potest, quin qui differt facere quæ vult, expectet præsentiam illius temporis, & velit præterire totum illum tractum durationis, quæ præcedit illud tunc, in quo vult effectum producere; non possunt igitur effugere quin admittant ante generationem Mundi aliquam durationem temporis existisse. Resp. Quod Deus in illo, & non alio æternitatis suæ momento, Mundum produxerit, liberrimo ipsius arbitrio seu beneplacito adscribendum esse, jam sæpius repetitum est; ac proinde impedimentum aliquod removeri, quod nunquam fuit, aut alicujus rei necessaria præsentia ad condendum, non opus fuit. Et præterea, si hoc argumentum aliquam vim haberet, sequeretur Deum omnia simul fecisse ab æterno, neque in tempore quidpiam de novo ab ipso fieri posse, quod tamen manifestè falsum est. Æternam quoque durationem Dei, quæ principio careat, Mundi existentiam antecessisse lubenter admittimus; sicuti etiam nos ante conditum Mundum ad salutem in Christo electos esse fides docet, Eph. 1. 4.

Argumentum septimum Averrois: *Aut tempus factum est cum Mundo, aut fuit ante generationem Mundi, sed cum nec tempus sine motu, nec motus sine mobili, nec mobile ullum extra Mundum esse possit, quomodo potuit esse tempus ante generationem Mundi? Sin autem tempus factum est, cum omne quod fit, vel in tempore, vel instanti fieri necesse sit, cumque ibi tempus esse oporteat, ubi mens nostra distinguit prius & posterius, fiet proscindit, ut ante generationem temporis ipsum tempus fuerit.* Resp. Ut hæc difficultas, quæ de tempore moveri sæpius in hoc negotio solet, plenè tollatur, notandum est, Tempus nostrum commune nihil aliud esse, quam durationem motus solaris sive veri sive apparentis, quatenus nempe pro communi omnium particularium durationum mensura habetur. Hinc enim est, quod secundum hunc motum, ejusque quasi particulas, annos, menses, dies, horas, &c. numerare soleamus. Advertendum igitur, durationem banc Solis, ejusque motus dupliciter considerari posse, absolute & in se, vel relative ad res ipsi coexistentes, seu quatenus mensura est omnium durationum particularium. Motus Solis priorimodo consideratus Tempus formaliter non appellatur, sed posteriori modo tantum; adeoque revera Tempus formaliter sumptum mentis aut liberi arbitrii opus est. Ità enim inter homines convenit, ut motum Solis pro mensura generali omnium durationum haberent. Si enim homines voluissent ex alio motu, putà Lu-

næ, Jovis, Veneris, vel alterius astri numerare annos, menses, quid prohibuisset? Temporis ergo denominatio atque distributio mentis opus est. Et hinc jam facili negotio intelligitur, quid de productione Temporis dicendum sit. Si enim Tempus materialiter sumatur pro duratione aut existentia rei ipsa, utique simul cum ipsa Tempus productum esse certum est: Si verò propriè, præcise, & formaliter sumatur pro relatione aut denominatione extrinseca, utique non nisi à mente ejusque actione, aut libera hominum institutione causari potuisse, manifestum evadit. Ad argumentum igitur dico, Tempus nostrum commune materialiter sumptum cum Sole, vel corpore illo luminoso, quod diem inter & noctem in principio distinguebat, ejusque motu factum esse: formaliter verò sumptum à libera hominum institutione esse profectum. Non igitur Tempus fuit ante generationem Mundi. Ad illud autem, quod quaeritur, utrum Tempus factum sit in instanti, an verò in tempore, Resp. ejus principium cum ipso primi motus principio capisse, ita ut ante generationem temporis tempus non fuerit, sive materialiter sive formaliter consideretur. Ut autem hæc, quæ præter vulgarem Philosophiam de Tempore disseruimus, clarius percipiantur, imaginetur sibi aliquis ut existens in Cælo, vel Sole, ubi certè nec Solis, neque alterius corporis cælestis, neque terræ motum advertere posset. Jam verò quaero de tali homine, utrum hoc nostrum tempus ipsi notum esse posset, & utrum annorum nostrorum, mensium, dierum atque noctium, &c. ipsi in mentem veniret? Negativa certè mihi verissima est; cum enim ille nec Solis motum, ulliusve alterius corporis vel astri advertere posset, nec noctes diesque inter distinguere, utique saltem tempus nostrum ibi in considerationem venire non posse, evidens evadit. Ex quo jam discursu constare arbitror, tempus nostrum in re non esse Ens aliquod distinctum aut à Deo creatum, quod in Universo alicubi existat, aut essentiam habeat, sed esse relativum quid ad res in terra existentes, siquidem homines motum Solis, sive verum sive apparentem, observantes juxta eam durationis suæ aliarumque rerum partes numerare solent.

Argumentum octavum Averrois: *Nullum agens differt agere bonum quod vult & intendit; nisi vel ob aliquod impedimentum, vel propter aliquod majus bonum: Cum ergo ante generationem Mundi nihil planè esset, vel quod resisteret divina potentia, eamque retardaret, vel quod melius esset Mundo, nulla causa assignari potest, propter quam Deus non ab æterno Mundum fecerit. Incredibile item est Deum elegisse privationem Mundi, quasi tempore infinito: nunquam enim privatio, aut est prior habitu, aut diuturnior eo, nisi per accidens.*

eidens. Resp. Jam sæpius responsum, Deum ex libetrimo suo & sapientissimo beneplacito Mundum condidisse eo tempore, modo, forma, figura, situ, ordine, quibus ipsi visum fuit, neque alia à nobis horum omnium ratio assignari potest, aut queri debet.

Argumentum nonum Averrois: *Causa & causatum sunt relativa: sicut ergo accidit Mundo de novo esse causatum, sic accideret Deo de novo esse causam Mundi; cum ergo ab æterno non fuerit causa, postea verò de novo esse caperetur causa Mundi, idque non extrinsecus eveniret, (nihil enim erat extra Deum ante generationem Mundi) necesse est confiteri, id accidisse ob aliquam mutationem factam in ipso Deo. Si igitur Deus ab æterno omnes conditiones habuit, quæ requiruntur ad efficiendum Mundum, quid causa reddi potest, cur maluerit ab æterno non esse Mundum, quam esse? quisenim non, inquam, sapientissimus & optimus, cujusmodi est Deus, sed qualicunque artifex, cum posset facere aliquod opus optimum, maluit dici & esse opifex ejus potentia, quam actus, cum tamen actus sit perfectior potentia? Resp. Similiter & hoc sæpius dictum, ex nova Mundi creatione nihil novi Creatori accessisse. quam externam denominationem, quæ nullam in ipso mutationem arguit. Sicut enim ex eo, quod Deus in extremo seu fine Mundi omnes universaliter & singulos homines sit judicaturus, non sequitur ipsam tunc imitatum iri, perinde quoque ex eo, quod in principio Mundum creaverit, ipsum in principio imitatum esse deduci non potest. Nam, ut à creatione Creator, ita à judicio extremo judex universi appellatur. Idem quoque de singulis Dei operibus argumentum, ut aliquoties notatum, institui posset. Quod denique in fine dicitur, actum esse perfectiorem potentia, verum ut sit de potentia passiva, quæ per actum perficitur, eique opponitur, falsum tamen est de potentia activa, quæ ipsamet actus est & summa in Deo perfectio; adeoque nec Deus agendo perficitur. Et si nunquam extra se operatus fuisset, haud tamen imperfectior dici potuisset; quia semper ab æterno sibi sufficiens, & infinitè potens perfectèque in se beatus existit.*

Argumentum decimum Averrois: *Qui ajunt Mundum de novo creatum esse à Deo, consent ante hunc Mundum alium potuisse creari, & ante illum alium; ex quo fit, ut dilatio primi Mundi longior esset quam secundi, & secundi quam tertii; & tertius antiquior esset quam secundus, & hic quam primus: dico autem primum hunc nostrum Mundum, qui factus est. Et inter tertium, & secundum, & inter hunc primum, intercederet aliqua duratio, qua culti non esset æterna, deberet esse temporalis: Quare tempus esset sine Mundo. Confirmatur hoc, quoniam ubi intellectus noster invenit prius & posterius, longius &*

brevis secundum durationem, ibidem tempus esse oportet. Resp. Negari non posse, quin ante hunc Mundum, alium creare potuerit Deus, quia ab æterno fuit omnipotens; quem si fecisset, etiam ipsum suum tempus atque durationem habiturum fuisse certum est: adeoque & fuisset tempus ante hoc nostrum tempus, sicuti fuisset Mundus ante hunc nostrum Mundum. Et, quid hic absurdi sit non video; sicut enim in hoc Universo unumquodque Eus particulare suum habet tempus proprium, quo durat, & unum tempus suum ante aliud; Ecquid absurdi, si Deo ita visum fuisset, post unum Mundum iterum condere alterum, & post illum iterum novum? Quemadmodum, si tempore diluvii Mundum annihilasset, novumque hunc postea condidisset; Nonne tunc ille Mundus hunc nostrum, adeoque & illius tempus antecessisset, sicuti & jam reverà antecessit? Quod autem tempus, quale nunc nos habemus, sive materialiter sive formaliter sumptum, sine Mundo hoc nostro non esse possit, constat ex dictis.

Argumentum undecimum Averrois: *Quod est non generatum, necesse est esse incorruptibile: cum igitur ante generationem mundi possibile fuerit Mundum generari, alioqui non fuisset generatus, & talis possibilitas sit æterna à parte ante, erit quoque æterna in posterum; quare nunquam cessare poterit: non cessante autem possibilitate, impossibile est actu Mundum esse; cum enim primum Mundus actu esset, corrumpetur illa possibilitas: at posuimus illam sempiternam: possibilitas enim alicujus rei definit, cum primum illa res actu incipit esse.* Resp. Possibilitas, à qua Mundus ab æterno possibilis dicitur, non est aliquid reale in subiecto extra Deum existens, sed vel ipsa potentia Dei, qua Mundum ex nihilo producere potuit, vel pura & pura negatio contradictionis aut repugnantiae, ut aliquando in tempore producat, vel existat Mundus. Hæc autem possibilitas non mutatur, aut esse definit, quin imò per existentiam Mundi quam maxime comprobatur; quicquid enim actu existit, ut existat haud repugnat, & nullam habet contradictionem. Si enim non posset existere, ne existeret quidem; sicuti enim ex eo, quod actu jam loquor aut scribo, rectè colligitur in me esse loquendi & scribendi potentiam; ita quoque ex eo, quod Mundus existat, rectè colligitur, quod habeat existendi potentiam, sive, quod idem est, quod existentia ipsius naturæ haud repugnet, quodque proinde Deus illum producere possit.

Argumentum duodecimum Averrois: *Ante generationem mundi possibile fuit Mundum generari: omnis autem possibilitas fundatur in aliquo subiecto, quod dicitur esse possibile: omni enim agenti respondet patiens, cum sint rela-*

relativa; quare sicut possibilitas activa non potest esse nisi in aliquo agente, sic nec possibilitas passiva potest esse nisi in aliquo patiente: & sic necesse est concedere, ante generationem Mundi aliquod subiectum fuisse. Confirmatur hoc, quoniam Physicus ex iis, quæ sunt nota sibi, judicare debet de iis, quæ sunt ignota; cum igitur in cujuslibet rei generatione, videamus non unum oppositum recipere alterum, vel transmutari in alterum, sed aliud, quod est subiectum utrique: præter rationem est, & contra disciplinam physicam, dicere in generatione Mundi, non præfuisse aliquod subiectum, sed ipsum non Ens transmutatum esse in ipsum Ens. Resp. Responsio patet ex dictis: Possibilitas enim activa in solo Deo est, & ab infinita ipsius potentia haud differt; possibilitas verò passiva nihil est aliud quam pura pura negatio contradictionis aut repugnantiae ad existendum, quæ, cum accidens non sit, subiectum patiens, cui inest, non requirit. Et, cum dicimus, Deum ex nihilo Mundum condidisse, sensus non est, Non-ens aut tamen nihil transmutatum esse in Ens, (quomodo enim Nihil mutari posset?) sed, tamen Nihil mundi illius existentiam præcessisse, & ante Mundum conditum præter Deum fuisse merum Non-ens, & Nihil. Atque hæc similiter ad argumenta Averrois sufficiant.

Exponuntur deinceps à Pererio alia duodecim argumenta pro Mundi æternitate, quæ proinde & præcedentibus subjicere libuit, tum, ne quicquam, quod veritati adversari & officere posse putaretur, nos quasi dissimulantes consilio taciti præteritis videremur: tum, quod, discussis omnium difficultatum tenebris, tantò illustrior atque jucundior omnibus veritatis esset aspectus.

Primum autem argumentum est tale: Quod de novo creatur, aut antequam potuit fieri, aut non; si non potuit fieri, non poterit igitur creari; si potuit esse, ubinam illa potentia erat? In nihilo non potest esse, nec in subiecto, quia creatio non præsupponit subiectum aliquod. Et confirmatur, quoniam creatio non est ipsa res quæ creatur, neque est Deus qui creat, sed est actio quadam proficiens à Creatore, & quæ terminatur ad rem creatam, hanc autem actionem in aliquo subiecto recipi oportet; at hoc repugnat creationi, quæ dicitur esse productio ex nihilo. Resp. Jam plus sæpius dictum est, potentiam, illam facendi seu possibilitatem passivam in re nihil aliud esse, quam non repugnantiam, aut negationem contradictionis, quæ, cum accidens non sit, subiecto, cui inheret, non opus habet. Actio quoque haud satis accuratè dicitur esse vel recipi in subiecto, quia actionis esse, non est inesse vel inherere, quod accidentium est, sed est id, quo aliquid fit aut producitur, ut in Metaphysica, à nobis ostensum est. Estque ex Non-entium genere, quæ

quæ propriè nec essentiam, nec existentiam habent, cujusmodi quamplurima dari alibi docuimus.

Argumentum II. Si Mundus creatus est ex nihilo, cum ipsum Nihil sit quoddam indefinitum & indeterminatum; præterea ipse Deus sit indifferens ad producendum quodlibet, non potest assignari ulla verisimilis ratio, cur à Deo potius hoc susdeterminatum factum fuerit, quam aliud, & tunc, quam alias: verbi gratia, si producit cælum ex nihilo cum Deus indifferens sit ad producendum Cælum & quodvis aliud; similiter & ipsum nihil, non sit magis determinatum ad productionem Cæli, quam alterius Entis, cur potius nunc producat Cælum, quam aliud quodlibet Ens? Vel à quo determinatur talis productio ex nihilo ad ipsum Cælum, potius quam ad aliud Ens? Resp. Omnia jam dicta sunt; quod enim Deus hunc Mundum, has partes, hunc solem, hanc Lunam, hæc sydera; aliaque cuncta tali ordine, situ, magnitudine, figura &c. condiderit, id omne soli sapientissimo ipsius beneplacito adscribendum esse jam sæpius notatum est. Possetque eadem questio de singulis moveri creaturis; Ex. Gr. Quare Solem, Lunam, hominem, equum, elephentem, muscā, arborem, plantam &c. ad hanc quantitatem atque figuram determinaverit, & non majorem aut minorem; quare hoc loco, tempore, ordine, &c. Quibus profecto omnibus aliud responderi non potest, quam, quia sic Deo placuit, qui aliter potuit, si voluisset.

Argumentum III. Si cælum, verbi gratia, de novo productum est, quaro antequam produceretur, vel poterat produci & non produci, vel ex necessitate productum est: si prius dicas, sequitur ut cælum sit corruptibile; nam quod ante sui productionem poterat esse, & non esse, postquam productum est, adhuc poterit esse & non esse: Sin autem posterius dixeris, cum talis necessitas non possit esse, nisi ex parte agentis, extra ipsum enim nihil prorsus erat ante generationem Mundi, oportebit Deum ex necessitate Mundum produxisse: quod si ex necessitate produxit, cur non ante, seu ab æterno produxit? Nisi forte aliquod fuit impedimentum, quod retardavit ipsum. Resp. Nihil novi dicitur; Cum enim jam aliquoties repetitum sit, ex libertate sua & beneplacito Mundum condidisse Deum, consequens est, quod antequam productum esset Cælum, potuerit & produci & non produci; quodque proinde ex necessitate naturæ nequaquam productum sit. Quod verò inde inferitur Cælum fore corruptibile, falsum est cum enim Deus pro arbitrio suo omnipotentem partes Mundi produxerit, utique easdem & corruptibiles & incorruptibiles condere potuit. Habent namque creaturæ esse tale, quale ipsis Creatori dare placuit. Interim & hoc concedi potest, quod sem-

semper in creaturis sit potentia non essendi, id est, quod possint non esse, aut quod non repugnet ipsis id non existere; siquidem absoluta esset ei vel existendi necessitas soli Creatori convenit. Et, cum omnipotens sit, omnibus esse, quod dedit, iterum auferre, si vellet, posset.

Argumentum IV. *Aut Deus potuit facere Mundum ab æterno, aut non: si potuit, cum Deus & natura ex possibilibus faciat quod melius est, melius autem sit Mundum esse, quam non esse, procul dubio si potuisset illum facere, ab æterno fecisset: si non potuit facere ab æterno, ergo oportuit ut æterna quadam duratio præcederet molitionem Mundi; & videtur & absurdum & incredibile, quod Deus per totam æternitatem expectare debuerit, donec potuerit Mundum facere; Nam, si Deus non potest Mundum facere ab æterno, faciat igitur tunc cum primum potest facere, & cum illud (tunc) præcesserit æternitas, aut ante illud (tunc) poterat facere Mundum, aut non; si non potuit, hoc est incredibile, cum tunc potuerit, & non ante: si potuit, ergo potuit facere Mundum antequam potuit. Resp. Ad hoc quoque argumentum responsio patet ex præcedentibus. Nempe potentia Dei quidem est æterna, adeoque semper in Deo fuit condendi potestas, at verò potentia condendi æternum Mundum, non est aut unquam fuit in Deo, sicut nec potentia condendi alterum Deum. Potuit etiam Deus condere Mundum, in priori, ut ita loquar, æternitatis suæ momento quam condidit, quia liberè condidit, & etiam huc usque à creatione potuisset cessare, si voluisset, semper autem, quodcumque Mundum conderet, necesse fuit ut suum existendi principium Mundus acciperet; adeoque nunquam potuit Mundus esse ab æterno, quia æternitas principii expers est. At, dicit adversarius, *faciat Deus Mundum tunc, cum primum potest facere*; Verum nunquam est aut fuit illud *tunc*, quo primum potuit facere, quia semper ab æterno potuit facere, cujus primum Nunc, aut principium non est. Nullum igitur in æternitate *Nunc*, aut *tunc* cogitari potest, quo primum Deus potuisse incepit. Potentiam ergo condendi æternam in Deo agnoscimus, at verò effectum illius potentia æternam esse posse, aut æternitatis capax esse constanter negamus, quia hoc creaturæ ex nihilo producendæ repugnat. Potuit quidem Deus Mundum creare antequam condidit, ut dictum, & in quolibet æternitatis suæ momento retrò cogitando; (sc. nostro concipiendi modo, quia propriè loquendo in Deo ejusve æternitate prius aut posterius non datur, cum sit indivisibilis duratio, & successione expers) At verò in quocumque momento æternitatis, quomodoconque concipias, Mundus fuisset creatus, nunquam tamen fuisset æternus, propter rationem sæpius dictam. Simili rem*

declaro: Deus potest facere corpus finitum quodlibet majus & majus, nullaque adeo magna cogitari potest quantitas, quin major à Deo fieri possit nunquam tamen Deus poterit efficere quantitatem absolute infinitam. Eodem prorsus modo, duratio mundi antecedens potuit esse major & major, Ex. Gr. potuit extendi ad millies millia annorum & ultra, verò quomodocunque vel cogitando illa duratio retrò extendatur numerusque annorum augeatur, nunquam tamen efficeris ut duratio sit æterna, quia æternitas creaturis repugnat, & infinitus numerus est impossibilis.

Argumentum V. Si Mundus, cujus alia partes sunt corruptibiles, alia incorruptibiles, de novo factus est, omnes partes ejus inceperunt esse: quod autem incipit esse, desinit etiam esse; non igitur erunt aliqua partes Mundi incorruptibiles. Ex contrario autem videntur omnes debere esse incorruptibiles: Nam quod non est factum ex subjecto & contrario, id non est corruptibile; sed tales sunt omnes partes Mundi, utpote quæ à Deo productæ sunt per creationem; ergo omnes oporteret esse incorruptibiles. Resp. Concedimus Mundum, omnesque partes illius esse suum incepisse, id est, principium habuisse essendi seu existendi; falsum autem est; illud quod incipit esse, necessario etiam esse desinere: siquidem Deus pro sua omnipotentia, ut omnibus rebus esse suum dedit, ita singularum quoque esse determinavit pro suo arbitrio, vel ad corruptibilitatem, vel ad incorruptibilitatem. Quod ergo sublunaria corpora pleraque corruptibilia sint & particulis sæpe contrariis permixta, cælestia verò (ex communi sententia admodum incerta) incorruptibilia, ut & spiritus, animæque rationales, id sapientissimo ipsius arbitrio attribuendum.

Argumentum VI. Motus mensuratur tempore; si ergo incipit esse, vel incipit in instanti, vel in tempore; fuit igitur tempus ante motum, at tempus non est sine motu. Adde, quod tempus sit passio & numerus motus, sicut non datur prima pars, vel primum mutatum esse ipsius motus, ita non dabitur prima pars vel primum instans temporis, quare tempus erit infinitum. Quod si dicas tempus & motum concreatum esse cum ipso Mundo, hoc non potest dici; Nam quæ creantur, eadem productione terminantur, & efficiuntur; at Mundus vel calum caput esse per primum sui esse, cum sit res permanens, & substantia completa per creationem producta: motus autem non potuit sic incipere, cum sit ens successivum: non enim potest dari vel prima pars vel primum mutatum esse motus; ergo terminata creatione Cæli, nondum erat motus: Resp. Nos, quicquid alii de tempore & motu philosophentur, simpliciter dicimus tempus constare & componi ex momentis seu minimis particulis, & similiter etiam

etiâ motû; sicuti enim corpora & lineas ex atomis & punctis finitis componi in Physica docemus, analogicè idem de tempore & motu sentiendum putamus. Quibus positis ad dubium propositum responsio est facilis, nimirum, ut motum, ità & tempus incepisse in primo sui momento, id est, eo ipso momento, quo vel Sol vel Lux prinigenia esse suum accepit, & moveri cæpit. Cæterum de Tempore nostram sententiam paucis explicatam vide suprà in responsione ad argumentum undecimum Averrois. Falsum igitur est, non dari primam motus partem, nec primum temporis sistans; sicuti enim præsens momentum live à *vno* principium est temporis futuri, ità quoque primum præsens fuit principium temporis universi jam inde à primo exordio Mundi.

Argumentum VII. *Præstantius est non posse non facere bonum, quam posse non facere bonum, sicuti melius est facere bonum, quam non facere bonum; & melius est non posse facere malum, quam posse facere: sed con munitate se aliis est bonum & divinum quidpiam, inò videtur esse proprium summi boni, & inseparabile ab ipso; cum igitur hac communicatio in volitione Mundi cessasset, non potuit Deus non facere Mundum; quare vel ab æterno fecit, vel aliquod impedimentum fuit, propter quod non ab æterno fecerit; atqui nullum impedimentum fingi potest, quod Deum retardare posuerit; Ergo Deus fecit Mundum ab æterno.* Resp. Necessariò quidem bonum est, quod Deus facit, & quando facit, quia natura sua bonus malitiæ author esse nequit; at verò exinde non sequitur, quod Deus necessariò operetur extra se. Est enim agens liberrimum, qui operatur ex libero suo arbitrio, quando vult: Et reverà, si Deus operaretur ex necessitate naturæ, non tantum sequeretur ipsum extra se ab æterno operari, verum etiam ipsum operari omnia extra se simul, quæcumque posset; cum agens ex necessitate naturæ agat, ut liquuntur, secundum ultimum potentie sue: Sicut ignis, ex necessitate naturæ suæ urens, non tantum semper urit, verum etiam tantum, quantum potest. Deus autem, cum operetur liberè, producit quidem extra se, quod bonum est, sed non necessariò semper producit: quemadmodum & quando aliquid revelat verbo, semper quidem illud verum est, quia natura sua Deus verax est, & ἀψευδής; at tamen inde non sequitur, quod semper & ab æterno illud revelet, ut notum. Denique, & hoc addi posset. Deum quidem ab æterno non posse non facere bonum, scilicet in se, seipsum contemplando & amando, non verò extra se; quia actiones Dei ad intra ut loquuntur, sunt necessariae, ad extra verò libera.

Argumentum VIII. *Deus semper ac necessariò facit, quod melius est: si enim ex duobus oppositis non semper eligeret ac faceret quod melius est, sed in-*

terdum quod deterius est, profectò nec esset summè sapiens, nec summè bonus: vel ergò simpliciter melius est Mundum esse, quam non esse, vel è contrario, non esse; quod si melius est Mundum non esse, quam esse nunquam ergò Mundus potuit vel debuit fieri à Deo; si autem melius est Mundum esse, quam non esse, ergò Deus necessariò (non quidem necessitate coactionis, sed necessitate opposita contingentia) fecit Mundum; sicuti ergo non est contingens Mundum fieri vel non fieri; ità non erit contingens Mundum de novo fieri, vel ab æterno fieri. Oportet igitur alterutrum horum esse necessarium; sed non fuit necessarium de novo fieri, ergò fuit necessarium ab æterno fieri. Resp. Deum aliquid extra se facere necessariò constanter negamus; exceptà tamen illa necessitate, quæ fuit ex præscientia divina, & liberrimo illius decreto, quæ infallibilitatis consequentiæ & hypothetica dici solet, & libertati non repugnat. Quodcumque ergò facit Deus, quando facit, semper melius ac optimum esse libenter credimus, licet interim nos semper bonitatem illius haud rectè queamus assequi, quia haud perpetuò percipimus finem, quem Deus suis operibus intendit. Cum ergò in hoc æternitatis suæ momento exillere Mundum voluerit Deus, & non in alio, sive priori sive posteriori, id quoque melius esse asserimus, quam si in priori vel posteriori extitisset, nempe, quia sic Deo placuit; Quod si tamen in alio eum extare voluisset, utique & hoc tunc fuisset melius propter eandem rationem. Plura de hoc argumento vide in responsione ad argumentum Aristotelis XII. Cæterum, Deum non contingenter Mundum condidisse nos asserimus, sed ex libero suo arbitrio, idque juxta æternum suum decretum; Unde & hoc sensu quædam hoc loco necessitas admitti potest, sc. quæ fuit tum ex præscientia, tum ex decreto Dei, ut suprà dictum. Et hoc sensu dicimus, Deum necessariò Mundum condidisse eo tempore & momento; quo condidit, quia se tunc conditurum decreverat; adeoque concludendum est necessarium fuisse, ut Mundus in tempore de novo fieret, quia Deus ab æterno ab se in tempore Mundum conditum iri decreverat.

Argumentum IX. *Si deus necessariò facit quod melius est: & bonum, quod est diuturnius, èd melius: Cum igitur mundum esse bonum sit, melius utique fuerit ipsum æternum facere, quam novum. Quare sic à Deo factus est.* Resp. Ad hoc argumentum jam quoque suprà responsum est, sc. ad XII. Aristotelis, ità ut nihil hic addi sit necesse.

Argumentum X. *Si melius est mundum esse, quam non esse, & Deus necessariò facit quod melius est, quomodo non est absurdum dicere mundum de novo factum esse? Sic enim Deus præposuisset privationem mundi generationi ejus,*
id

id est, fecisset non esse mundi æternum, esse autem ejus novum. Resp. Neque hoc argumentum quicquam habet, ad quod non satis superque responsum est. Quando enim dicimus Deum facere quod melius est, seu majus bonum, non judicandum illud bonum ex judicio nostro, sed ex judicio Dei; ita ut sensus sit, Deum semper operari id, quod ipse optimum judicat. Jam verò, cum Deus in hoc & non alio æternitatis suæ momento Mundum creare voluerit, credendum utique ipsum optimum judicasse suæ gloriæ & potentia illustrandæ, ut eo & non alio æternitatis suæ momento conderetur.

Argumentum XI. *Si mundus de novo factus est, quæro: in tota illa æternitate, quæ præcessit generationem Mundi, vel Deus erat imperfectus & otiosus, quia nihil faciebat; vel æquè perfectus, ac modo est; & tunc, vel erat necessarium, utile, & decens mundum esse, vel non, si igitur in illa æternitate fuit, vel necessarium, vel utile, vel decens, ut mundus esset; oportebat mundum à Deo, qui summè bonus est, in illa æternitate factum esse: si autem tunc non erat necessarium, aut conveniens, aut decens, vel fuit hoc tunc cum conditus est, vel nihil horum fuit; si fuit, quærenda est ratio diversitatis hujus, cur fuerit tunc, & non prius, vel ab æternitate: si nihil horum fuit, ergo frustra mundus factus est: quod enim neque necessarium est fieri, neque utile; neque decens, frustra fit.* Resp. Deum ab æterno infinitum & summè perfectum fuisse certissimum est, adeoque condendo Mundum majorem perfectionem aut beatitudinem non est adeptus. Otiosus quoque ab æterno esse non potuit, siquidem semper sibi sufficiens, summeque beatus in sui ipsius se contemplatione atque amore oblectavit, ut aliquoties monuimus. Utile autem, decens atque conveniens fuit, ut Mundus derhum in tempore crearetur, quo conditus est, quia sic judicavit sapientissimus Deus. Necessarium autem non fuit, ut conderetur, nisi ex divinæ voluntatis hypothesi & in sensu, ut ajunt, composito, quia liberè condidit Deus, & poterat non condere, si voluisset.

Argumentum XII. *Cum Deus sit summè bonus, & velit omnia sibi esse quam simillima, præsertim ea quæ immediatè procedunt ab ipso; sicuti alias perfectiones communicavit creaturis, credendum est etiam communicasse æternitatem, quæ est una ex perfectionibus divinis: & quemadmodum fecit Intelligentias in aliis omnibus rebus ipsi similes, ita etiam fecisse in æternitate. Adde, quod magis apparet excellentia Dei, & infinita virtus ejus, si credatur & prædicetur, non modo author esse rerum caducarum & mortalium; sed etiam Opifex esse immortalium & sempiternarum; ut non solum possit creatura tribuere æternitatem à parte post, (ut dicunt Scholastici) sed etiam à parte ante.* Resp.

Si Deus, quia summè bonus, vellet omnia sibi esse quam simillima, omnia quoque inter se quam simillima & æqualia esse sequeretur, quod apertè falsum est. Voluit ergo Deus creaturas suas singulas tales esse, quales condidit, iisdemque proinde perfectionibus præditas, quibus jam eas præditas esse videmus. Proprias autem suas perfectiones, cum sint infinitæ, nec communicavit creaturis, nec voluit communicare, nec potuit, quia sic Deos fecisset, & creaturas Creatores, quod implicat. Unde quoque neque æternitatem creaturis communicatam esse, aut communicari potuisse consequitur. Angeli, quos Intelligentias vocant, licet cæteris omnibus creaturis perfectione & dignitate antecellant, Dii tamen propriè loquendo non sunt, neque perfectionibus divinis donati, adeoque nec æterni; & quamvis immortales sint atque incorruptibiles, in tempore tamen sunt conditi, & principium durationis suæ à Deo acceperunt. Denique, excellentia & summa Dei potentia satis ex operibus conditis apparent, inter quæ etiam res multæ incorruptibiles reperiuntur. At verò creaturas statuere æternas à parte ante, ut loquuntur, apertam contradictionem involvere censemus, quia esse creaturæ postular, ut illius non esse antecedit, & principium habeat existendi, quod æternitati repugnat, quæ principii expers est. Neque haud parum hoc facit ad excellentiam Dei, quod nulla possit esse creatura, quæ ipsi sit cœterna, aut sive in essentia, sive in vita, sive in perfectione, sive in duratione, cœqualis.

Atque hæc quidem dicta sint contra Aristotelem, Proclum, Averroem, aliosque qui æternitatem Mundi præfractè tueri volunt, eamque contra ipsius nature & S. Scripturæ Lumen mordicus ratiunculis suis evincere conantur. Quia verò etiam inter Christianos & Scholasticos Doctores, quos profectò minimè decebat, haud pauci inveniuntur, qui licet necessarium non esse, ut Mundus sit ab æterno, fateantur; æternitatem tamen illius possibilem esse existimant, ita ut novitas essendi ad essentiam Creaturæ nequaquam pertineat; Operæ quidem pretium videtur, ut etiam hæc controversia Paulò accuratius hoc loco tractetur. Verum, quia jam abundè satis de hac opinione à nobis Disputatum est in speciali disputatione de Creatione Mundi, Quæst. 10. habita in illustri Schola auriaca, 29. Aug. 1663. Cumque ex præcedentibus satis superque æternitatæ Creaturæ repugnare demonstratum sit, exercitationi huic nostræ finem imponere visum fuit; Deumque æternum atque immortalem humiliter rogamus, ut gratia sua in Christo Jesu tandem aliquando mortalitate hac piè transactâ, ad beatas Cœli sedes evolantes, felicissima ejus æternitate, æternoque gudio, omnibus compleri bonis, perfruamur.

L E C T O R I S.

*Amice Lector, Author à prelo absens errata omnia corrigere non potuit; quodam
hic annotare visum fuit, reliqua minuscula, ut & distinctionum notas, puncta &
commata ipsa facile adverteas, & pro aequitate tua corriges, Vale.*

Numerus prior paginam, posterior lineam notat.

*Pag. 11. 36. lege alterum. 111. 7. alteturum. 17. naturalia. 18. generentur. 28. falsis.
19. 23. deceptus. 37. rerum. vi. 2. percipiat. 3. se extendit. vii. 6. necessitari eam.
36. quæ. vii. 7. Stultus. ix. 36. planè. xi. 27. rei. 37. tandem. xii. 2. materia. 13.
obscuriora. 18. necessarii sunt. xiv. 6. cristallinum. 18. fallatur. xv. 26. etiam si quis.
xv. 1. 10. cogitantes. xviii. 3. ejusdem. xix. 19. post (absque) adde (existentia pos-
set, siquidem creaturæ hand repugnat esse absque. xxi. 19. eo. xxiii. 4. habent. 25.
ἐγκαινισμῳ xxxi. 26. hinc. xli. 31. attribuendæ. lxi. 2. infallibiliter. lxi.
28. cum assentimur. 29. quam non percipimus. lxxviii. 31. perfectionis. lxx. 11. dif-
ferre. lxxv. 21. accedat. lxxviii. 39. sui esse. lxxx. 9. quid. Reliquas paginas propter
festinationem Typographi non perlegi.*

2
EXAMINIS PHILOSOPHIÆ
R E N A T I
DES-CARTES
S P E C I M E N,

S I V E

*Brevis & perspicua Principiorum
Philosophiæ Cartesianæ
Refutatio,*

A U C T O R E

J O H A N N E S C H U L E R O,

Lib. Art. Mag. Philosophiæ Doctore
& Professore.



AMSTELÆDAMI,
Apud PETRUM LE GRAND,
c1616 LXVI.

SENECA EPIST. XXXIII.

Turpe est seni, aut prospicienti senectutem ex commentario sapere. Hoc Zeno dixit. Tu quid? Hoc Cleanthes. Tu quid? Quousque sub alio moveris? Et impera & dic, quod memoria tradatur: aliquid & de tuo profer. Omnes itaque istos nunquam auctores, semper interpretes, sub aliena umbra latentes, nihil puto habere generosi, nunquam ausos aliquando facere, quod diu didicerant. Memoriam in alienis exercuerunt. Aliud est, meminisse: aliud, scire. Meminisse est rem commissam memoria custodire. At contra scire, est & sua facere quaque, nec ab exemplari pendere, & toties ad Magistrum respicere. &c.

Ibid.

Nunquam autem invenitur, si contenti fuerimus inventis. Praterèa, qui alium sequitur, nihil invenit, imò nec quarit. Quid ergo? Non ibo per priorum vestigia? Ego verò utar via veteri: sed si propiorem planiorèmq; invenero, hanc muniam. Qui ante nos ista moverunt, non Domini nostri sed Duces sunt. Patet omnibus veritas, nondum est occupata: multum ex ea etiam futuris relictum est.


Alibi: In re maxima & involatissima, in qua cum etiam multum actum erit, omnis tamen etas, quod agat, inveniet.

Item: Agamus bonum Patrem familias. Faciamus ampliora, que accipimus. Major ista hereditas à me ad posteros transeat. Multum restat operis, multumque restabit: nec ulli nato post mille secula pracludetur occasio aliquid adhuc adjiciendi.

P R Æ F A T I O

A D

L E C T O R E M.

uantoperè semper libertatis philosophicæ amans fuerim, Lector benevole, testantur quæcunque de rebus philosophicis à me hæctenus meditata lucem aspexerunt. Quin imò eousque hanc libertatem amplector, ut non tantùm alienarum, verùm nec mearum opinionum mancipia quæram. Et quam aliis vendico, eandem & mihi vel circa mea ipsius libertatem constanter servare decretum est. Detestor & detestabor semper id hominum genus, qui dictata sua oracula credunt, sêque extra omnem erandi aleam miseri Philosophastri constitutos rentur. Est quoddam Philosophorum genus, qui se totos Aristoteli tradiderunt, ab eoque ejusque effatis vel minimum deflectere piaculum ducunt. Sordes hi Peripatus pro deliciis habent, & veritate ipsos radiis suis vel invitos collustrante nonnunquam neglecta, ingenii tamen fasces Aristoteli submittendos judicant. Hi sanè valedicto naturæ libro in solo Aristotele Philosophiam habitare existimant, ejusque proinde placitis veritatem conclusam putantes naturæ sacraria ne à limine quidem ingredi sustinent. Ecquis autem à tali-

* 2

bus

P R Æ F A T I O

bus veritatem exspectet, dum non veritati, sed Aristoteli litare se ostendant. Neque ego genuinos istos Aristotelis discipulos credam; siquidem ipsemet, quamvis Platonem quidem & Socratem amicos habuerit, Veritatem tamen iis semper sese prætulisse professus sit. Quam parum antiquorum is autoritates curaverit falsum scripta illius luculenter demonstrant. Quoties in iis videmus ipsum veterum censorem acerrimum? Ab eorum recedere Philosophia, fundamenta eorum convellere, sensa expungere, despiceret, irridere ipsi solenne. Ne Platoni quidem Præceptoris suo, cujus viginti annos auditor fuisse fertur, obstrepere & contradicere ipsi religioni fuit. Libertatis ergo ipse amantissimus cum fuerit, & *προσώτης* acerrimus, ecquis hominum mancipia genuinos ipsius discipulos dixerit? Aristoteles, non quod aliis, sed quod sibi verum videbatur, liberè effatus est; nostri verò Peripatetici, alio longè genio ducti, ut Aristotelem intelligant, non verò ipsam naturam rerum, id unice duntaxat pensi habere videntur. Hi ergo dum *σέφει* haberi volunt, *δύλοι* mundi facti sunt, & ineptos sese ostendunt Philosophastros. Nobilioris itaque notæ Philosophi turpissimum hoc servitutis jugum jam dudum excutere conati sunt. Ipse Theophrastus haud degener Aristotelis discipulus; ejusdemque vestigia premens, & in *περαπύτῳ* successor, minimè sibi vetitum putavit diversum à Præceptore sentire, adeoque quo jure in alios Aristoteles, hic in Aristotelem usus est. Si quid Præceptor falsum, aut

P R Æ F A T I O

aut rerum naturæ contrarium docuisset, correxit: si quid prætermissum, supplevit. Etenim verissimè putavit, solis naturæ legibus, non Præceptoris opinionibus, mentis suæ contemplationes obstringi. Hunc prædecessorem, Aristotelis ac Theophrasti in philosophando libertatem, amplexatus atque sequutus est tertius in schola Peripatetica, Strato Lampiscenus, qui, quod tam strenuè in natura contemplanda operam suam locaret, Physici nomen est adeptus. Et quamvis horum tramitem sequioris ævi pauci admodum sint ingressi, usque adeò ut tandem veritas ceu altera Astræa terras reliquissè visa fuerit, nova tamen tandem postliminiò nostro sæculo lux affulsit, quâ genuina ista philosophandi libertas densissimis istis tenebris huc illuc radios suos spargere cœpit.

Huic autem rei inter cæteros, quos nominare nihil refert, imprimis operam navavit Vir nobilissimus Renatus des-Cartes, acutissimi ingenii Philosophus, qui tantisper moderari ac cohibere nos mentis assensum ab iis in rebus Philosophicis voluit, de quorum veritate non certò constat; & mentem nostram ab omnibus præjudiciis omninò liberandam esse, turpissimùmque servitutis jugum esse deponendum diligenter exhortatus est; quò ità tandem postliminiò inæstimabilem illam philosophandi libertatem restauraret. Verùm, quid factum? Institutum hoc Cartesii multis mirum in modum placuit, imprimis quia vulgarem illam Philosophiam, jam in Scholis ferè receptam, non solùm ineptissimis quæstionibus scatere

P R Æ F A T I O

videbant, verum etiam quod omnia ibi perplexis admodum distinctionibus & sophisticis argutandi modis, quibus omnia quotlibeticè pro & contrà facile quoad speciem saltem defendi posse videbantur, involuta jacebant: Ipse verò omnia magis intelligibiliter modo mathematico, & mechanicè explicare aggressus est. Unde quoque varii liberioris genii Philosophi jam dudum intolerabile illud servitutis Aristotelicæ jugum perosi, ejusque nausea duci cœnsuevit nova hac Cartesii docendi methodo pellecti sunt, ut universo Aristotele relicto toti Cartesiani facti sint. Nempe, ignobili Peripateticorum jugo abdicato, Cartesii assumpserunt, illudque haud minùs propudiosum sibi ferendum æquum arbitrati sunt; Atque ità è fossa, quod ajunt, in foveam inciderunt. Verum enim verò quandò usque adeò aliorum hi servi esse volunt, & alienarum opinionum mancipia, ut ne latum quidem unguem ab eo ejusve placitis sibi recedendum esse putent; quare tandem Aristotelem deseruerunt? Nonne, quia homo fuit, & errare potuit, & erravit sæpissimè? At verò & Cartesius homo fuit, neque proinde & errare ab eo alienum. Ne ergò cæcorum instar naso nos duci pateremur, aut unius jugo excusso alterius implicemur imprudentes, unde tandem nos expedire nequeamus, id nunc aggredior, ut & Cartesium hominem fuisse ostendam; adeoque non minùs quàm Aristotelem aliosque erroribus obnoxium.

P R Æ F A T I O

noxium. Fuerit profectò Aristoteles vir omni laude major & autoritate potens, fuerit & Cartesius libertatis in Philosophando acerrimus vindex & assertor, nunquam tamen id confeceris, ut extra errandi sphæram constitutus sit. Sequamur ergò nos non ut Dominos, sed ut Duces & Aristotelem & Cartesium, omnesque alios, quotquot sunt veritatis verè studiosi, sed usque ad aras. Ut enim Aristoteles veritatem omnibus amicis præferendam, ità & nos cum Cartesio veritatem unicam in Philosophiæ folio omnibus postabitis collocandam censemus. Cùm itaque gravissimos in ipso Philosophiæ Cartesii limine offenderem errores, eosdem pro officio nostro Philosophiæ studiosis in Athenæo nostro Auriaco proponere visum fuit. Sicut enim ex falsis quibusdam suppositionibus tam enormes in Veterum Philosophia errores exorti sunt, ità quoque haud minùs verendum, ut ex falsis quibusdam Cartesii principiis, si pro veris habeantur, non minùs graves, quibus tenerrima multorum ingenia imbuantur, errores proveniant. Etenim si prima rerum naturalium principia ignorentur, toto naturalium rerum inquisitionis processu hallucineris necesse est. Et qui error parvus initio putatur fortè, in fine maximus evadit, cum semel quod falsum est admissio, necessaria deducaris consequutione in labyrinthos plexusque errorum, unde pedem sequelæ necessitate ductum referre amplius non licet, etsi vel ratio contra-

tra-

P R Æ F A T I O

trarium suadet, vel experientia demonstrat. Inter errores Cartesij haud minimus nobis videtur vel ipsius corporis conceptus, dum eo nihil aliud significari passim contendit, quàm simpliciter & in genere extensum quid, ità ut quicquid ullo modo à nobis ut extensum concipitur, illicò sit corpus. Ex hac unica vel falsa hypothefi mirum, quot statim errores tanquam fonte scaturiant. Cùm enim ipsi extensum esse nihil aliud sit, quàm non contineri puncto aliquo indivisibili, & extra illud diffusum esse; hinc mox deductum, nullam qualitatem sensibilem, quam patibilem vocant alii, nullum colorem, saporem, odorem, aut aliquid tale ad ipsius essentiam pertinere, & consequenter sine iis esse posse; ità ut tandem corpus in nihilum evanescat. Deinde, quia nec locus aut spatium punctum est, mox quoque idem cum corpore esse haud vanà consequentià judicatum fuit; adeoque nec vacuum dari posse, ne quidem per absolutam Dei potentiam, cùm contradictionem involvere putetur aliquid extensum concipere, quod corpus aut materia non sit. Hinc porrò Atomos non dari conclusum aut particulas indivisibiles, & Mundum esse infinitum seu indefinitum, cùm extra illius terminos, quicumque concipiantur, nihil aliud quàm extensum quid concipi queat; hoc verò esse corpus, ejusque conceptu includi; Quin imò ne, plures quidem à Deo Mundos condi posse, aut aliam materiam, &c. Hi nobis in ipso Philosophiæ limine errores

P R Æ F A T I O

rores usque adeò graves visi sunt , ut iis quamprimùm, ne latius malum serpat , & nobis pro viribus prospiciendum esse judicaverim. Equidem benè fecit Cartesius , laudòque hominis acutissimi cætera institutum , quod in scholis trivialibus vulgò receptam Philosophiam , quibus variis ineptissimisque distinctiunculis , à Scholasticis ineam introductis , innumerisque erroribus oppressa , miserèque dilaniata , & quasi sepulta jacebat veritas, tandem reformare quasi ab ovo aggressus sit ; quodque pro jure libertatis Philosophicæ, occultis quibusdam Peripateticorum , atque inexplicabilibus principiis rejectis , alia* quædam magis clara atque perspicua substituerit. At malè faciunt Cartesiani, quod usque adeò se suo ipsi astrinxerint Præceptorum , ut vel quævis ipsius dicta oracula putent , & jam veritatem omninò puram ab ipso in Philosophiæ Remp. quasi è cælo postliminiò reductam esse sibi suaviter imaginentur , & securi sint , in eo duntaxat solliciti , ut Cartesium rectè intelligant. Quid ergò tandem faciendum nobis fuit ? Amici nobis sunt Socrates , Plato , Democritus , Empedocles , omnesque veteres Philosophi ; Amicus & Aristoteles , ne ringantur Peripatetici ; Amicus nobis esto & Cartesius præ multis, Amici omnes quam plurimùm Cartesiani, quamvis sectæ nomen odi , sed , ut dictum , usque ad aras. Veritatem enim sectamur , eamque non servili quadam subjectione in angustò alicujus hominis

* *

cere-

P R Æ F A T I O

cerebro, sed in amplissimo Naturæ libro nobis à Deo propositam, adeoque & ibidem sedulo & pura mente indagandam arbitramur. Alioquin, si posterioribus hisce Philosophis ita addicti essemus, ut sicut cum illis, ita adversus eos sentire non liceat, in idem laberemur vitium, quod jam carpimus in aliis, qui dum se alterius authoritati manciparunt, viam sibi ad solidioris Philosophiæ penetralia præcludere. Hac ergo ratione pro libertate nostra Philosophantes ut Aristotelis, ita & Cartesii intolerabile jugum intrepido animo rejicientes, hoc nostro examine id solum spectavimus, ut veritas ubique facta ac tecta conservetur, utque quantum fieri potuit, illibata atque pura prodiret. Neque proinde est, quod excandescat nobis quispiam plus æquo fortè addictus Cartesio; Si enim in ipso quædam meritò notamus errata, est quod nobis gratias agat, quod ipsum errantem revocemus; si immeritò, inde saltem & hoc lucri percipiet, ut rationibus nostris diligenter perpensis magis in veritate confirmetur. Sicut enim contraria juxta se posita magis elucescunt, & virtus sine adversario marcescit; ita & veritas inter disputantium argumenta modestè proposita luculentiores sui radios in animis sui studiosorum exhibet. Nulla ergo uspiam offensionis justæ apparet ratio. Insuper, si quispiam validis rationibus & modestè hæc nostra refutaverit, tùm demùm meam inscitiam agnoscens, me ipsi majorem in

P R Æ F A T I O

in modum devinctum fatebor, qui nebulas mihi mente excusserit, & veritatem manifestam reddiderit. Neque enim unquam veritatis perceptione mihi quicquam gratius aut jucundius esse potest. Et quantumvis recentioris ævi Philosophi, ulterius, quod lubens, ut verissimum fateor, quam Veteres in veritatis indagatione processerint; plurimum tamen ut isti, ità & hi itineris posteris reliquerunt, & nos relinquemus. Cuius itaque non modò licitum & apertum, verùm & pium ac sanctum, in veritatis examine, quæ sentit, aperire. Estque utilis & fructuosa omnis controversia, quam doctos inter cordatosque viros veri studium excitat. Si quid melius aut rectius, quam præcedentes inveni, alii recipiant; sicubi à scopo aberravi, judicent; & quam ipsemet de aliis, tam liberè de me alii sentiant ac dissentiant. Neque enim tam iniquus unquam sim iudex, ut quam in aliorum scripta mihi potestatem vendico, eandem in mea aliis adimam. Hoc solum peto, ut liberè mihi recedere liceat à Cartesio, ubi ipsius dicta veritati haud satis consentanea fuisse percepero, quemadmodum & contra me eadem amplexurum sanctè recipio, quotiescunque veritatem iis contineri intellexero. Si quoque nonnullis per fas & nefas Cartesium defendere visum fuerit, quos nullis unquam rationum machinis dimoveas, nullis errorum monstris deterreas, nostræque hæc irridere potius quam refutare, quod

P R Æ F A T I O

quod stultorum est, instituat, fruantur isti suo iudicio & moribus. Nos, qui & derisorum atque blateronum cavilla deridere valemus, solidas duntaxat ingenuè Philosophantium rationes expectamus & æstimamus.



Viro

Viro Clarissimo
D.D. JOHANNI SCHULERO,
L. A. M. Philosophiæ Doctori ac Professori Publico,
Collegæ venerando,

Examen Philosophiæ De-Cartianæ,

Pro libertate Philosophandi singulis concessa, pereruditè concinnanti.

Quicquid Aristoteles, magnique egere Platonēs,
Id pretio, & laudis perstat honore suo:
Quicquid Aristoteles cæca ratione subactus,
Nunc se, nunc alios credere sponte velit;
Non ita conveniens color est, neque luctibus illis
Gaudebit, veri quem rapit altus amor:
Hic pretium virtutis abest, arsque arte negatur,
Non micat, haud verâ quod ratione micat:
Qui modo fidereos genio conscenderet axes,
Cui sua De-Cartus fata stupenda dabat;
Deficit hic virtute sua, quasi curtus oberrans,
Nec sibi nunc veri regula Cartus erit.
Quis mihi Epimenidem, Periandrum obtrudat, & ausus
Dicat Anaxagoræ, Permentdemque vehat?
Quis Sextum, Ammonium, Amelium, doctamque Chilonem?
Quilibet à sola se ratione beet,
Cedite Aristoteli dubium si obtruditis; illi
Credite, si veri gloria facta probet.
Cedite De-Carto falsum si obtruditis; illi
Credite, si veri nomina pandat ovans.
Credite (sic justum est) magno ratione Schulero,
Nec reliquis facti gloria facta minor.
Vicerit invictâ qui se ratione tuetur,
Is cadat à victâ qui ratione cadit.

FRANCISCUS PLANTE,
Pastor ac Professor Bredæ.

D. JOHANNI SCHULERO,
L. A. M. Summo Philosopho, & Theo-
logo eximio, &c.

HÆc est Schuleri *Numen* meditantis imago,
Quo minimum summo distet ab *Ente* nihil.
Cedite Cartesii, chartisque valete Sophistæ;
Numque *renascentem* Suecia terra dabit?

Scribebam Breda

augustinus

W. QUIRINUS RUITENBURG.

IN EUNDEM.

HUMANUM est errare; nec omnia possumus omnes,
Et rectum non est, quod ratione caret.
Eclipsin Sol ipse subit; quodcunque creatum est,
Deficit in multis; perficit omne Dies.
Candida posteritas errores corrigit omnes,
Et semper melius, quod fuit ante, videt.
Fulget *Aristoteles*, fulget *Cartesius*, ævi
Et decus, & magnum lumen uterque sui;
Principiis stat quisque suis; diversa loquuntur;
Scriptis hic doctis quod negat, alter ait.
Tu, qui vel cæcus juras in verba Magistri,
Et finis incautus te bovis instar agi,
Adspice, quas habuit labyrinthos Græca vetustas,
Et quibus in scopulis Gallia blanda perit;
Schulerus tibi monstrat iter, poscitque sequaces
Non alios, quam quos mox ratione trahet.
Surgat *Aristoteles*, surgat *Cartesius*; ambo
Debebunt veri subdere colla jugo.
Ingenium mirare Viri, mirare laborem,
Qui medium Felix inter utrumque tenet.

J. van BERGEN. JCUS.

I N D E X C A P I T U L U M,

Quæ hoc Examine continentur.

CAPUT	Pag.
I. <i>DE existentia corporis non esse dubitandum ostenditur.</i>	1
II. <i>Unde cognoscatur Corporis nostri existentia, ejusque cum mente nostra unio.</i>	3
III. <i>Quid sensuum perceptiones doceant.</i>	5
IV. <i>De natura, seu essentia corporis in genere.</i>	8
V. <i>De Rarefactione, & Condensatione.</i>	12
VI. <i>Inquiritur, utrum Quantitas corporea reipsa à corpore distinguatur.</i>	15
<i>Appendix ad CAPUT VI. Qua discutiuntur ea, quæ D. Clau- bergius de essentia seu natura Corporis in communi differit.</i>	
	20
VII. <i>An Spatium sive Locus in re à materia non differat.</i>	24
VIII. <i>Natura sive Quidditas Loci explicatur.</i>	29
IX. <i>De Differentia inter Spatium & Locum, ejusque distinctione in internum & externum.</i>	32
X. <i>Ostenditur non repugnare dari Vacuum.</i>	36
XI. <i>Rarefactionem non rectè à Cartesio confirmari ostenditur, & qualis admitti possit.</i>	42
XII. <i>Atomorum existentia demonstratur.</i>	44
XIII. <i>Mundum non esse indefinitè extensum contra Cartesium probatur.</i>	48
XIV. <i>An eadem sit Cæli, ac Terræ totiusque Mundi materia.</i>	50
XV. <i>Utrum præter motum Localem nullus alius detur in rerum natura.</i>	54
XVI. <i>Definitio Cartesii paulò pressius examinatur.</i>	56
XVII. <i>An omnis motus fiat per circulum.</i>	63
XVIII. <i>De Causa prima motus.</i>	67
	XIX.

INDEX CAPITUM.

XIX.	<i>Utrum nunc tantundem sit motus in rerum natura, ac fuit in principio.</i>	70
XX.	<i>An, quod movetur, semper naturâ suâ moveri pergat.</i>	73
XXI.	<i>An omnis motus ex se tendat per lineas rectas.</i>	76
XXII.	<i>Ostenditur motum fieri in instanti.</i>	81
XXIII.	<i>Inquiritur quare Lapis, è funda projectus, moveatur per lineam rectam.</i>	82
XXIV.	<i>Quomodo motus mobili communicetur.</i>	84
XXV.	<i>Vis agendi & resistendi corporum in quo consistat.</i>	88
XXVI.	<i>Motus celeritas & tarditas quid sit disquiritur & explicatur.</i>	91
XXVII.	<i>Durities & fluiditas corporis, quid sint explicatur.</i>	93
XXVIII.	<i>Uterius ostenditur fluiditatem non consistere in motu particularum.</i>	96
XXIX.	<i>De externa corporum naturalium figura.</i>	99

ERRATA.

Numerus prior paginam, posterior lineam significat.

4. 2. lege, ipsam. *ibid.* 3. conjunctam. *ibid.* 11. ambulet. *ibid.* 18. licet lege, libet. 10. 37. lege, Latori. 21. 19. *l.* quod etiam. *ibid.* 23. pro est *l.* &c. 25. 34. quia, adde, secundum Cartesium. 34. 6. Longitudinem, adde, Latitudinem. 40. 28. *l.* dicitur. *ib. l.* tunc n. 44. 4. *l.* pendet. 54. 33 & 34. *l.* disjunctæ. 55. 23. *l.* compositi. 56. 1. *l.* localis. *ibid.* 19. figura. *l.* natura. 60. 15. *l.* subsistebat. 61. 15. *l.* ut supra. 64. 26. *l.* constant. 67. 23. *l.* queant. 75. 8. non, adde, sit. 84. 7. *l.* tradatur. 86. 29. nequeant. *l.* queant. 87. 26. *l.* uniuscujusque. 88. 5. *l.* suspicarer.

EX-

EXAMINIS PHILOSOPHIÆ
 RENATI DES-CARTES
 SPECIMEN,
 SIVE

*Brevis & perspicua Principiorum Philosophiæ Carte-
 siana Refutatio.*

CAPUT I.

De Existentia corporis non esse dubitandum ostenditur.



Ostquam Renatus Cartesius, acutissimi ingenii Philosophus, primâ Principiorum Philosophiæ parte Metaphysica quædam de cognitione humanâ principia tradidisset, causasque errorum aliquot haud malè aperuisset; Et imprimis ad seriò Philosophandum omnia mentis præjudicia deponenda esset exhortatus, nihilque admittendum quod non clarè distinctèque à nobis esset perceptum, tandem ad partem suæ Philosophiæ secundam accedit. Cùm autem hac imprimis parte de rerum materialium principiis differat, eam duntaxat, impræsentiarum paulò diligentius examinare visum fuit. Quod dum facimus, viam jam nobis ab ipso Cartesio præmonstratam ingressuri, ipsiusque vestigiis insistentes omnibus præjudiciis abdicatis, nihil admitturi sumus, quod non post attentam meditationem tanquam veritati maximè consentaneum à nobis fuerit apprehensum.

Et quidem primò sic exorditur: *Esti nemo non sibi satis persuadeat, res materiales existere, quia tamen hoc à nobis paulò ante in dubium revocatum est, & inter primæ nostræ ætatis præjudicia numeratum, nunc opus est, ut rationes investigemus, per quas id certò cognoscatur. Nempe quicquid sentimus, procul dubio nobis advenit à re aliqua, quæ à mente nostra diversa est. Neque enim est in nostra potestate efficere, ut unum potius quam aliud sentiamus; sed hoc à re illa, quæ sensus nostros afficit, planè pendet.* Nempe ex sensus testimonio materialium rerum existentiam concludit Cartesius. At verò, quis nisi amens in dubium revocaverit unquam, utrum sit vel existat id, quod sensu externo percipit, sive sentit? Et quis præjudicium

vocet, putare res materiales aut corpora existere in rerum natura? Dubitari fortè posset, utrum id, quod sensu percipitur, aut sentitur, tale sit, quale externo sensui apparet; utrum verò sit simpliciter, ab eo, cui modò sanum est cerebrum, dubitari omninò non potest. Cum ergò ad rectè Philosophandum imprimis Mens seu ratio requiratur sana in corpore sano, & iudicium incorruptum, utique illi, qui de rerum sensu perceptarum existentia aut esse seriò dubitet, ad Philosophandum ut se accingat, haud author sim: siquidem ipsum vel mente vel cerebro sano destitutum esse censeam. Imprimis ergò de corpore naturali Philosophantem illius existentiam præsupponere, absque ulteriori demonstratione, necesse est. Equis enim benè sanus naturam ejus investiget, de cujus existentia nondum certus est?

Sed quoniam usque adeò dubitationibus indulget Cartesius, unde tandem certus est, id quod sentimus, nobis advenire ab re aliqua à mente nostra diversa? Nonne experimento constat homines, pede vel brachio privatos, in iisdem tamen membris dolorem sentire se esse conquestos? Quis ergò nobis persuaserit, id quod nos sentire judicamus, nos verè sentire, cum aliquandò sentire se putent homines, licet malè affecti, ea quæ non sunt? Deinde, quid si Angelum aliquem aut Dæmonem fingamus, qui homines plagis afficiat, aut vim corporibus inferat, quod de Jobo & Paulo sacris literis manifestum est? Præterea, & de eo institui dubitatio posset, utrum non sit aliquandò in potestate nostra efficere, ut unum potius quam aliud sentiamus, illudque prorsus dependere ab re illa, quæ sensus nostros afficit? Ecce enim dum vitrum hoc rubrum aut viride ob oculos pono, omnia mihi rubra aut viridia videntur corpora. Et cum corporum apparentia sæpissimè ex diverso illorum aspectu atque situ, quæ in nostra potestate sunt, dependeat; equis unum potius, quam aliud sentire planè à rebus ipsis dependere sibi absque omni prorsus scrupulo persuadeat? Quæ de Materia porrò tradit, quod eam percipiamus esse rem extensam in longum, latum & profundum, &c. postea videbimus.

Sed neque hoc adeò evidens est, quod subjicit: *Si Deus immediate per se-ipsam istius materia extensa ideam menti nostræ exhiberet, vel tantum se efficeres, ut exhiberetur à re aliqua, in qua nihil esset extensionis, nec figura, nec motus; nulla ratio potest excogitari, cur non deceptor esset putandus?* Itane tandem nos terrestres vermiculi tremendæ Majestatis Deum absolutum omnium Dominum, atque Creatorem deceptorem faciemus, si rem alio nobis modo proponat, ac quidem ratiunculâ nostrâ ipsum proponere debere existimamus? Mirum ni quodque denunciaret Cartesius, ne
Deus

Deus se-ipsum, cum sit Ens omnis prorsus materiæ expert, sub corporea aliqua specie aut idea extensa mortalium oculis manifestet, ne Deceptor habeatur. Neque enim video, quò minus ipsi rem immaterialem sub idea materiali, quam materialem sub immateriali idea menti nostræ exhibere fas sit. Et quoties Deus sive immediatè per se, sive mediatè per Angelos ideam rei corporeæ & extensæ Prophetis suis in somnio, visione, vel ecstasi exhibuit? Quoties se-ipsum sub specie aliqua visibili & extensa Prophetis, virisque *omnesque* revelavit? Non ergò hoc aded evidens est, ut putat Cartesius, ideam rei extensæ non exhiberi posse ab aliqua re, in qua nihil sit extensionis, nec figuræ, nec motus. Et non absque blasphemia dicitur, Deum, si hoc fecerit, deceptorem fore aut putandum esse. Insuper, omni præjudicio sublato, unde quæso constat, deceptorem esse, qui rem non extensam aut immaterialem, ut extensam, aut sub idea rei extensæ homini proponit? Quod quidem imprimis quæri posset, si eo sine hoc ipsum fieri constet, ut per sensibilia ad insensibilia mens humana erigatur. Et si omninò hoc jam verum esse putemus, ubi aut quo argumento hoc à Cartesio probatum est? Nihil enim nisi clarè & distinctè perceptum se amplexurum antea fuit professus. Viderint jam Cartesiani, quomodò ex hisce concludendum pateat *rem quandam extensam in longum, latum & profundum, omnesque illas proprietates, quas rei extensæ convenire clarè percipimus, habentem existere*. Nos etiam absque iis corporum seu rerum materialium existentiam, propter ea quæ suprà dicta sunt, constare, neque tanto hîc nobis apparatu opus esse arbitramur; ne rei sua luce claræ & perspicuæ dubitationum nostrarum nebulis tenebras offundamus. Deum quoque omnis Luminis Patrem & fontem hoc mentibus nostris lumen, vimque intelligendi indidisse, qua hanc veritatem absque ulteriori demonstratione agnoscamus, libenter fatemur.

CAPUT II.

Unde cognoscatur Corporis nostri existentia, ejusque cum mente nostra unio.

Pergit Cartesius, §. II. *Eadem, inquit, ratione menti nostra corpus quoddam magis artè, quam reliqua alia corpora conjunctum esse, concludi potest; ex eo quod perspicuè advertimus, dolores, aliosque sensus nobis ex improvviso advenire; quos mens est conscia non à se sola proficisci, nec ad se posse pertinere ex eo solo quod sit res cogitans, sed tantum ex eo, quod alteri cuidam rei extensæ ac mobili adjuncta sit, qua res humanum*

corpus appellatur. Mentis nostræ existentiam hoc loco præsupponentes, ejusque à corpore distinctionem, similiter & ipsum, dum hîc vivimus, corpori humano junctum esse novimus. Quod ipsum usque adeo verum est, ut plurimi, vix aut parùm de Mente solliciti, se nihil aliud quam corpus habere organicum existiment; ità ut non tam de corporis, quam quidem de Animæ aut mentis existentia in ipsis demonstranda, laborandum videatur. Ipsum proinde, qui corporis sui existentiam neget, aut in dubium seriò traxerit, sanè unquam Philosophaturum non putem. Neque enim ulla hîc vel negationis vel dubitationis ratio excogitari potest. Quis enim benè sanus, cum loquitur, ambulat, videt, audit, &c. utrum loquatur, ambulat, videat, audiat, &c. dubitaverit unquam? Somniantes quidem sibi loqui, ambulare, videre, audire, videntur; at verò quis somniantes rectè Philosophari aut Philosophiæ capaces judicet? Certè nisi & somniantes Philosophos admittamus, eorum, quæ sani & vigilantes sensu percipimus, existentia, ut sensibilibus, ità & corporis nostri, quod circum gerimus, omninò absque ulteriori demonstratione supponenda nobis videtur.

Sed, si & hîc ludendo dubitare velimus, quærere nunc licet, qua ratione sensus corporis ostendat arctam istam mentem inter & corpus unionem? Angelos aliquando corpora assumpsisse, inque iis hominibus apparuisse S. Literis notissimum est. Ad sentiendum itaque procul omni dubio sensuum organa adhibuere, oculis viderunt, auribus audiverunt, pedibus ambularunt, Lingua locuti sunt. Ecquis autem exinde tam arctam Angelos inter & corpora assumpta unionem fuisse concludat, qualem inter mentes & corpora humana esse novimus? Quod si ex dolore corporis istam unionem, quam hypostaticam vocant, concludi posse dixeris, nondum tamen sic omnem prorsus scrupulum abstuleris. Nam primò, non in corpore, sed in mente propriè dolorem esse suspicari possemus, quia corpus mentis expers dolorem non sentit. Cùm ergò corpus baculo percussus dolorem sentiat, licet vestibus indutum & coopertum sit; quare non & anima corpore quasi veste induta, vel cooperta dolorem per corpus sentire posset? Sicut ergò nemo ex eo, quod dolorem per vestem sentiat corpus, eam corpori essentialiter aut hypostaticè unitam esse colligat, ità neque ex dolore corpore percepto satis evidenter, illud animæ sive menti essentialiter unitum esse, concludi posse videtur. Sed & hoc scire velim, qua ratione demonstret Cartesius mentem non posse percipere dolorem in alieno corpore, cum quo essentialiter unita non est, modò ipsum penetret, inque eodem cum illo loco constituitur. Denique

que, si dolor ejusve sensus unicum argumentum sit, ex quo de conjunctione corporis mens nostra certa sit, utique dubitare licet de ejusmodi membris, quibus dolorem non percipimus. Vel, si partes nonnullæ in corpore reperiantur, quæ dolorem non sentiunt, utique nulla ratio amplius eviderit, quò minùs totum corpus absque doloris sensu esse queat, & tamen menti nostræ unitum. Quomodò ergò ex dolore menti nostræ corpus unitum esse usque adeò clarè & distinctè advertimus? Nisi fortè tam diu assensum istum cohibendum esse putemus, donec prius dolorem aliquem in corpore mens nostra perceperit. Hæc ergò in gratiam dubitationis Cartesianæ dicta sunt. Nos mentem nostram suprà explicuimus.

C A P U T. III.

Quid sensuum perceptiones doceant.

Cùm multa de actione mentis sive Spiritus in corpus considerata veniant, eaque alterius disciplinæ esse videantur, rectè istius rei explicationem hujus loci non esse dixit Cartesius. Sed quid ergò hujus loci esse vult? *Satis erit, inquit, si advertamus, sensuum perceptiones non referri, nisi ad istam corporis humani cum mente conjunctionem, & nobis quidam ordinariè exhibere, quid ad illam externa corpora prodesse possint, aut nocere; non autem, nisi interdum & ex accidenti, nos docere, qualia in se ipsis existant.* At verò non quæritur, ad quid sensuum perceptiones referri soleant, sed quid reverà doceant. Et quoties, qui ne semel quidem de mente, ejusve cum corpore conjunctione, cogitant, perceptiones tamen suas ad sensus externos referre solent? Sed neque hoc adeò certum est, sensuum perceptiones nobis ordinariè exhibere, quid ad illam externa corpora prodesse possint, aut nocere. Ecquid enim omnium corporum quæ sensu à nobis percipiuntur, colores, odores, aut sàpores nobis prosint aut noceant? Quod autem Cartesius verbo hoc loco innuere videtur, sensuum perceptiones nobis non exhibere, qualia corpora in se existant, nisi interdum ex accidenti, majoris est momenti & difficultatis, adeoque paulò accuratiùs hîc expendendum est.

Primò itaque notandum est, duorum imprimis generum in rebus qualitates considerari posse. Prioris generis voco, quæ sensu aliquo externo percipiuntur, ut: colores, odores, sàpores &c. quæ propterea *qualitates sensibiles* dicuntur, aliis *patibiles*, quod passionem in sensu efficiant. Posterioris generis sunt, quæ non sensu externo, sed ratione & ex effectis re-

bus inesse colliguntur, ut: virtus calefactiva in Sole, Vino; attractiva in Magnete, Succino; Purgativa in Rhabarbaro, Agarico; nutritiva in in cibo, pane; quas propterea *intelligibiles qualitates* appellare possumus, quod intellectu & ratione ex effectis rebus inesse eas deprehendamus.

Hiscæ positis, dico sensu externo nullas alias à nobis posse percipi qualitates, quam sensibiles. Intelligibiles enim sola mente ac ratione percipiuntur, & sensus nequaquam afficere possunt. Cum verò, quicquid recipitur ad modum recipientis recipiatur, temperamentaque admodum sint diversa; utique haud-mirum, quod una eademque qualitas, ratione diversorum recipientium, diversimodè quoque recipiatur. Et hinc est, quod mellis sapor uni gratus sit, alteri ingratus, isti dulcis, huic amarus appareat. Neque etiam credibile est vinum eodem modo homines ei deditos afficere, & abstemios; aut aquam adeò frigidam esse piscibus, ut quidem nos eam esse iudicamus; Vel denique ignem usque adeò calidum esse ratione eorum animalculorum, quæ, teste Galeno, in mediis flammis gignuntur & vivunt, ut nos illum sensu percipimus. Unde constat, qualitates huiusmodi non nisi relativè rebus attribui posse, & ratione eorum subjectorum, à quibus recipiuntur. Neque enim aquam frigidam dicimus ratione ferri aut lapidis, sed ratione subjecti frigus sentientis; & ità de cæteris. Similiter & de qualitatibus intelligibilibus Philosophandum arbitror. Pani enim & cibo nutriendi vim adscribimus ratione animalium, non absolutè, neque enim Lapidés pane nutriuntur aut herbæ, sed animalia, ut constat: Magneti vim attrahendi attribui-mus non absolutè, sed ratione ferri tantum, neque enim alia ab ipso corpora attrahi hæcenus compertum est: Igni vis comburendi attribuitur ratione combustibilium corporum, neque enim metalla aut lapides ab ipso comburuntur: Soli denique calefactiva virtus adscribitur ratione terræ, neque enim Cælum ab ipso calefieri; aut astra credibile est.

Ex quibus jam satis evidenter constare arbitror, ex sensuum perceptione nihil aliud colligi posse, quam qualiter aut quomodò se res corporeæ habeant *ad sensus humanos*, eoque communiter afficere soleant. Dico, *ad sensus humanos*, quia neque hoc certum esse videtur, quod eodem modo iis bruta afficiantur, quam homines propter temperamenti diversitatem. Vino delectantur homines plerique, multisque potionum & ciborum generibus, ut & odoribus variis, quibus tamen bruta, aves & pisces eodem modo affici non est credibile. Et si omnino animalia quædam propter sensuum vel organorum similitudinem similes quoque vel

quam

quam proximè qualitates in iis percipere concederemus, inanimata tamen nequaquam iis affici manifestum est. Addidi *communiter*, quia & hic exceptio adhibenda videtur, cum haud pauci quoque reperiantur homines, quos longè alio modo ab iisdem objectis affici constat. Jam enim suprà de vino notatum est, quod alio modo gulofos, alio abstemios afficiat; si utique hi eundem in ipso saporem adverterent, nunquid eos abstemios fuisse putemus? Sunt, qui caseo delectantur, gratissimumque in eo saporem percipiunt, alios tamen ipsum odisse & maxime averfari novimus. Alii rosarum aut liliorum odore recreantur, alii verò eum ferre non possunt. Quid? quod idem vinum, idem cibus nunc gratum præbeat saporem, putà famelico & sano; nunc verò ingratum, putà saturato & ægro. Omitto jam, eandem rem procul constitutam videri parvam, rotundam, compactam; propè autem magnam, quadratam, solutam; & intra aquam majorem & propiorem, quam in aëre; atque ità de cæteris.

Concludimus ergò, ut suprà, Sensus nihil aliud nos edocere posse, quam quomodò sese res sensibiles ratione nostri habeant. Quia itaque sæpissimè nos propter hanc sensus apparentiam hallucinari contingit, ut falsum pro vero amplectamur; equidem haud malè nos facturos existimemus, si, sensuum præjudiciis abdicatis, ad ea duntaxat attendamus, quæ ratio vera esse judicaverit. Non ergò idcirco aliquid esse verum judicabimus, quia ita sensibus apparet; sed quia ratione sensum circa objectum suum nequaquam errare percepimus. Exemplo rem illustro: Visu in cælo percipimus Solem, lunam, stellas, &c. Secundum hanc perceptionem sensus Stellæ corpora sunt minima ratione quantitatis, Luna & Sol æqualis ferè magnitudinis esse videntur. At verò, quia, jam longa ratione edocti, novimus hæc corpora admodum à nobis esse remota, neque in æquali distantia constituta, hinc ex visu externo vel sensuali apparentia de vera eorum magnitudine certò judicari non posse intelligimus. Judicium ergò tantisper cohibendum, donec omnibus expensis rationibus, id quod ex iis certò sequitur clarè & distinctè percipiamus. At verò nihilne hic sensus facit? Imò, plurimum. Visu enim illa corpora in rerum natura existere, esse Luminosa, variare suum scutum inter se, tum ratione nostri, percipimus. Sensus ergò à Philosophis non omninò rejiciendos, sed iis rectè utendum, & absque ratione haud confidendum esse constat.

CAPUT. IV.

De natura, seu essentia corporis in genere.

HAc ergò Methodo progredientes jam ad ipsius Corporis in genere spectati naturam cognoscendam ejusque genuinum conceptum formandum, cum Cartesio nos accingamus. Sed ipsum differentem audiamus: *Quod agentes, inquit, percipiemus naturam materie siue corporis in universum spectati, non consistere in eo quod sit res dura, vel ponderosa, vel colorata, vel alio aliquo modo sensus afficiens; sed tantum in eo, quod sit res extensa in longum, latum, & profundum. Nam quantum ad duritiem, nihil aliud de illa sensus nobis indicat, quam partes durorum corporum resistere motui manuum nostrarum, cum in illas incurrunt. Si enim quotiescunque manus nostra versus aliquam partem moventur, corpora omnia ibi existentia recederent eadem celeritate, qua illa accedunt, nullam unquam duritiem sentiremus. Nec ullo modo potest intelligi, corpora que sic recederent idcirco naturam corporis esse amissura, nec proinde ipsa in duritie consistit. Eademque ratione ostendi potest, & pondus, & calorem, & alias omnes ejusmodi qualitates, que in materia corporea sentiuntur, ex ea tolli posse, ipsa integra remanente: Unde sequitur, à nulla ex illis ejus naturam dependere. Ad verum Corporis conceptum formandum, fateor non esse attendendum, quid in hoc vel illo corpore sentiamus; sed quid omni corpori sit commune, & tamen ità proprium, ut per illud ab omni non corpore essentialiter distinguatur; unde & definitio Logicis appellari solet, quæ constet genere & differentiâ.*

Sed primò dubitari hîc posset, utrum tale quid à mente humana exco- gitando inveniri queat; siquidem ad veram & essentialem alicujus rei differentiam rectè cognoscendam requiritur, ut primò omnes alias res perfectè cognoscamus, qualis cognitio nemini quidem mortalium hæcenus fuit concessa. Docet hoc ipsum luculenter Gassendus *Paradox. Lib. II. Exerc. v. §. iv. Ut igitur, inquit, alicujus rei differentiam perfectè noscamus, debemus perfectè nosse omnes alias res. Si aliquas enim ignoremus, aut minus benè cognoscamus, quomodo sciemus an, & per quid res proposita differat ab illis? Nonne fortassis ea, que nos latebunt ad convenientiam potius, quam ad differentiam facient? Dicere certè non possumus hanc esse hujus rei differentiam ab illa, nisi in illa cognoscamus aliquid non esse, quod reperitur in hac. Quomodo verò cognoscimus non aliquid in illa, nisi omnes ipsius recessus etiam intimos evolverimus? Ad quem tamen Gassendi discurs-*

discursum responderi posset, cum quidem procedere contra perfectam & adæquatam naturæ alicujus individui aut specificæ scientiam, quam, vel propter rationem dictam, soli Deo propriam arbitramur; non verò adversus conceptum aliquem genericum, aut generalem aliquam rei definitionem, de qua hîc quæstio est. Licet enim perfectè & adæquatè non cognoscam, quid sit hoc aut illud Ens in specie vel individuo, hoc tamen non obstat, quo minùs cognoscam illud in genere, nempe esse Ens quoddam materiale, à Deo creatum, &c.

Ut ergò genericum hujusmodi Corporis conceptum formemus, rectè docet Cartesius, illud non consistere in eo quod sit res dura, vel ponderosa, vel colorata; Cùm enim dentur corpora mollia, durities illius essentiam explicare non potest; & cùm dentur dura, mollities illius essentiam constituere nequit; Et propter eandem rationem nec levitas, nec gravitas, nec albedo, nec nigredo, nec ulla determinata qualitas essentiam corporis constituit. At verò notandum hîc est, licet essentia corporis in genere spectati non consistat in qualitate hac vel illa determinatè, haud tamen ex eo colligi posse in nulla consistere, aut nullam prorsus ad eam requiri. Nam & eadem ratione quis arguere posset, nullam quantitatem ad corpus requiri quia sine hac aut illa determinatè corpus existere potest. Sicut igitur hæc cera, licet possit esse sine hac vel illa figura, triangulari, quadrata, rotunda, &c. necessariò tamen semper aliquam habet; ità etiam corpus, licet possit esse absque hac vel illa qualitate determinata, nunquam tamen prorsus sine omni esse potest, quia semper manet res sensibilis; atqui id ipsum, per quod sentitur, *Qualitas* dicitur.

Patet ergò falsum esse, quod Cartesius dicit, *Nihil eorum, quod sensum aliquo modo afficiat*, ad corporis naturam sive essentiam pertinere. Licet enim non semper requiratur ad naturam corporis, ut omnes sensus afficiat, semper tamen aliquem ab eo affici debere certum est. Si enim sensum non afficeret, aut eo percipi posset, sensibile non esset, adeò que nec illius existentia nobis cognoscibilis. Quemadmodum & suprà ex sensuali perceptione ab ipso Cartesio rerum materialium existentiam demonstrari audivimus. Et reverà, cùm omne Ens sit vel immateriale, vel materiale; Et verò immateriale sensu non percipiatur, sed intellectu tantum, quæ facultas immaterialis est: utique sensu, quæ facultas materialis est, vel nihil, vel Ens materiale seu corpus percipi, necessarium est. Sed nonne hîc sibi contradicit Cartesius, cùm, omni sensibili qualitate à corpore remota, in eo tantum ejus naturam consistere
B
dicit,

dicat, *quod sit res extensa in longum, latum, & profundum*? Nunquid enim res extensa, & trina dimensione prædita, sensum non afficit? Vel unde, quæso, rem quampiam longam, aut latam, aut profundam putabimus, si vel visu vel tactu eam talem esse haud percipiamus?

Sed jam, utrum in trina hac dimensione Corporis essentia consistat, videamus. Et quidem primò quæri posset, utrum ad naturam materiæ five corporis sufficiat esse rem extensam in longum tantum, absque latitudine & profunditate? Si sic, jam dabitur corpus absque latitudine & profunditate; adeoque & nulla amplius erit ratio ob quam & corpus absque longitudine esse non possit. Si ergò ad corporis naturam requiri dixeris non tantum longitudinem, verum etiam latitudinem & profunditatem; iterum quæro: quid ergò sit res extensa in longitudinem simpliciter, quam lineam appellant Mathematici? An Ens immateriale, an materiale? Et cum immateriale respondere nequeas, utique materiale dicas necesse est; adeoque falsò trinam illam dimensionem ad naturam corporis requiri perhibetur.

Deinde, si corporis essentia in triplici hac dimensione consistat, quæro utrum tres illæ dimensiones sint partes divisibiles corporis, & ab invicem separabiles, nec ne? Si divisibiles dicas, neque enim id negari potest, utique una pars erit extensa in latitudinem, altera in longitudinem, tertia in profunditatem. De singulis partibus (præterquam quod latitudo sine longitudine, nec profunditas sine utraque cogitari nequeat) quæstio jam dicta rediret. Si singulas partes iterum in tres similes partes dividi posse dicas, quæro an in infinitum similes divisiones institui & repeti queant? Si sic, dabuntur jam actu in singulis divisis particulis infinitæ partes, & infinita corpora, quorum singula erunt extensa in longum, latum & profundum. Cumque & illa infinita corpora singula habeant similem trinam dimensionem, eadem quæstio iterum & iterum repeti posset; adeoque concedendus tandem erit numerus non semel tantum, sed infinities infinitus. Quantò ergò rectius & veriùs, divisionibus crebrò repetitis tandem necessariò ad ultimam perveniri, adeoque & ad minimas particulas five atomos, de quibus postea, asseritur? Concessis verò Atomis ultrò corrui ille conceptus materiæ de trina dimensione, qualem certè in iis haud reperias.

Denique, in extensione Corporis præcisè & generatim sumpti essentiam non consistere ex eo constat, quod etiam spatio, loco, & tempori; imò & spiritibus quodammodò, saltem in latiori significatu, attribui possit, (neque enim spiritus, Angelos, & Animas rationales, in puncto indivi-

indivisibili existere faciliè quisquam admiserit.) De loco autem & spatio res certa est. Ex. gr. Sumatur globus solidus & cavus aëre, aquâ sive alio quocunque corpore repletus, manifestum est cavitatem ipsam sive illud spatium globi internum in se extensum esse, licet nullum in eo corpus esse cogitemus. Et quidni Deus, manente globo, aërem vel aquam in ipso vel ex ipso tollere queat, si quispiam naturali virtute id fieri posse neget? Manet igitur idem spatium ab uno globi latere ad aliud extensum, licet non sit in illo corpus. Extensio ergò absque corpore concipi potest, adedque nec in illa natura corporis sita est. Præterea, cùm corpus spatium impleat, & locus sit æqualis locato, utique non minorem in spatio seu loco, ac in corpore seu locato extensionem esse manifestum est. Tandem sic arguo: Si hoc spatium vel hic locus potest esse absque hoc vel illo corpore, ergò etiam potest esse absque omni corpore, neque enim ab uno magis dependet, quam ab alio. Atqui verum prius, quia hoc corpus hunc locum potest relinquere, & occupare alium: Ergò. &c.

Si porro quæras, quomodò materialis sive corporea hæc extensio, sive corporèitas differat à natura seu ente immateriali; Respondeo, impenetrabilitate, qua fit, ut corpus unum alterius secum in eodem spatio existentiam impediat. Duos vel plures spiritus in eodem spatio esse nihil repugnat; possunt quoque iidem cum corpore esse coëxtensivè in eodem loco; quemadmodum Deum immensum, & ubique intimè præsentem esse, adedque & omnium corporum spatia replere & sana ratio, & fides docent. *Jer. xxi. 1. 24.* Anima quoque rationalis, ex vulgari sententia, toti corpori humano coëxtensa putatur, quin & dæmones multos eidem corpori inesse haud impossibile judicatur. At verò, ut duo corpora simul in eodem sint loco impossibile arbitramur; neque hætenus proprietates magis essentialis, quàm ab omni alia extensione differat corpus seu materia corporea excogitari potuit.

Rejectâ itaque definitione Cartesii, aliam ei Corporis substituamus oportet. Nostro ergò judicio simpliciter & optimè *Corpus* definiri posset *Ens materiale*. Genus illius ponitur *Ens*, non *Substantia*, propter rationes alibi à me assignatas, *Metaph. Exerc. vi.* Ens enim duplex est immateriale & materiale; illud Spiritus est, hoc verò Corpus. Differentia verò, ut ajunt, determinativa, *materiale*; hoc enim ab omni non-corpore & Spiritu essentialiter distinguitur. *Materialitas* verò sensibilitatem & impenetrabilitatem includit. *Sensibilitas* facit, ut corpus sensu aliquo percipi queat; *Impenetrabilitas* verò coëxistentiam alterius corporis in eodem loco tollit.

Hac autem definitione veram Corporis in genere naturam, ejusve verum ac genuinum conceptum explicari ex eo constat; quia omnia alia Corporis attributa, quæcunque cogitari possunt, ab aliquo possunt abesse. Quod autem ab hoc aut illo corpore potest abesse, communem illius seu genericum & essentialem conceptum exprimere nequit. Quemadmodum enim materia non potest pertinere ad communem Entis conceptum, quia datur Ens materiæ expers; ita quoque ad communem corporis conceptum non pertinet, quod ab aliquo abesse posse intelligimus. Et hinc percipitur nec hanc vel illam determinatam quantitatem sive figuram, putà triangularem, vel quadratam, vel rotundam, nec extensionem, nec divisibilitatem, nec determinatum colorem, albedinem aut nigredinem, nec calorem aut frigus, nec duritiem aut molliitiam, nec gravitatem aut levitatem, idve genus alia corporis conceptum aut essentiam ingredi posse; quia reperiuntur corpora, in quibus illa non inveniuntur, nec tamen propterea corpora esse desinunt. Cum itaque Ens materiale, quod sensu aliquo perceptibile est, atque ratione alterius corporis impenetrabile, nullam determinatam qualitatem dicat, sitque quasi commune omnium qualitatum receptaculum, utique naturam seu essentiam Corporis in genere sic optimè explicari manifestum evadit.

CAPUT. V.

De Rarefactione & Condensatione.

Pergit Cartesius, duasque sibi objectiones proponi posse docet, quas proinde in sequentibus solvere conatur. Sic autem ipse procedit, §. v. *Due verò, inquit, adhuc cause supersunt, ob quas potest dubitari, an vera natura corporis in sola extensione consistat. Una est, quod multi existiment, pleraque corpora sic posse rarefieri ac condensari, ut rarefacta plus habeant extensionis quam condensata; Sintque etiam nonnulli adeò subtiles, ut substantiam corporis ab ejusdem quantitate, atque ipsam quantitatem ab extensione distinguant. Altera est, quod ubi nihil aliud esse intelligimus, quam extensionem in longum, latum, & profundum, non soleamus dicere ibi esse corpus, sed tantum spatium, & quidem spatium inane; quod ferè omnes sibi persuadent esse purum nihil. At verò & alia, & plura contra Cartesii sententiam argumenta adferri posse jam in præcedentibus ostensum est. Ilorum quoque unum hoc posterius esse ibidem visum, adeoque in sequentibus ipsius Cartesii ad illud responso erit examinanda. In priori argumento duo explicatu dignissima notanda veniunt; Unum de*

de Rarefactione & Condensatione, alterum de Distinctione Quantitatis à corpore.

De Rarefactione & Condensatione sic differit Cartesius, §. VI. *Sed quantum ad rarefactionem & condensationem, quicumque ad cogitationes suas attendet, ac nihil volet admittere nisi quod clare percipiat, non putabit in ipsis aliud quidquam contingere, quam figura mutationem; ita scilicet, ut rara corpora illa sint, inter quorum partes multa intervalla existunt, corporibus aliis repleta, & per hoc tantum densiora reddantur, quod ipsorum partes invicem accedentes, intervalla ista imminuant, vel planè tollant: quod ultimum si aliquando contingat, tunc corpus tam densum evadit, ut repugnet ipsum densius reddi posse. Atqui non idèò minus tunc extensum est, quam cum partes habens a se mutuo distitas majus spatium amplectitur: quia quicquid extensionis in poris, sive intervallis, à partibus ejus relictis continetur, nullo modo ipsi tribui debet, sed aliis quibusvis corporibus, à quibus intervalla ista replentur. Ut cum videmus spongiam, aquà vel alio liquore turgentem; non putamus, ipsam secundum singulas suas partes magis extensam, quam cum compressa est & sicca; sed tantummodò poros habere magis patentes, ac idèò per majus spatium esse diffusam. Lubens sanè hanc de rarefactione & condensatione Cartesii explicationem amplector. Nempe consentit hìc Cartesius cum antiquis Philosophis, qui in sola particularum remotione aut separatione rarefactionem sitam esse docebant; condensationem verò in earundem particularum appropinquatione, ut quidem à me explicatum est in *Phys. Exerc. xxxv*. Ubi etiam nec rarefactione novam quantitatem acquiri, nec condensatione deperdi ostensum est, *quest. 111*. adeoque & talem rarefactionem aut condensationem, quæ fiat mutatione aut receptione novæ qualitatis & quantitatis, qualem docuit Aristoteles, nullam admitti posse. Cùmque totum hoc negotium spongiæ aquam vel alium liquorem poris suis recipientis exemplo commodè & satis intelligibiliter explicari possit, rectè dixit Cartesius, §. VII. Se non videre, quid moverit nonnullos, ut mallent dicere, rarefactionem fieri per augmentationem quantitatis, quam ipsam hoc spongiæ exemplo explicare. Nam, ut porrò ait, *etsi cùm aër aut aqua rarefiant, non videamus ullos ipsorum poros, qui ampliores reddantur, nec ullum novum corpus, quod ad illos replendos accedat; non est tamen rationi tam consentaneum, aliquid non intelligibile effingere, ad eorum rarefactionem verbotenus explicandam, quam ex hoc quod rarefiant, concludere, in ipsis esse poros, sive intervalla, quæ ampliora redduntur, & novum aliquod corpus accedere, quod ipsa implet;**

et si hoc novum corpus sensu non percipiamus. In quibus nihil notandum occurrit, satisque benè omnia procedunt, nisi quod & aëri rarefactionem tribuere videatur Cartesius, de quo tamen maxima potest esse dubitatio. Cùm enim ex dictis constet, rarefactionem fieri, quandò inter corporis alicujus intervalla sive poros particulæ alterius corporis alicujus tenuioris interjiciuntur; Et verò aër sit corpus tenuissimum, quatenus in rerum natura nullum excogitari potest, utique, qua ratione aër propriè rarefieri queat, non video.

Quia tamen, nostro judicio, aër est corpus maximè rarum, utique ipsum spongiæ instar comprimi posse, ut minus spatii, & iterum absque alterius corporis ingressu extendi, ut plus spatii occupet, haud præter rationem statui existimo. Si quoque hanc compressionem condensationem, & extensionem rarefactionem quis nuncupare voluerit, haud multum refragabor. Sententia hæc nostra probatur experientiâ, quæ docet eundem aërem calefactum majorem, frigefactum verò minorem locum occupare, ut evidenter constat lagenis vitreis, vel etiam Medicorum cucurbitulis, quæ igne extincto, illicò aquam, vel carnem, vel Sanguinem attrahunt. Nempe, quia aër frigore coarctatur, & minori spatio frigefactus indiget, adeoque, ne detur vacuum, aliud corpus contra suam naturam ascendere cogitur.

Quod porrò ait Cartesius, *Nullam rationem nos cogere ad credendum, corpora omnia que existunt debere sensus nostros afficere*, non adeò certum est. Cùm enim in Philosophia absque ratione nihil affirmari debeat, neque corpus, quod sensus non afficiat, admittendum videtur. Nam si corpora sensu à nobis non percipiantur, nulla amplius via ad eorum cognitionem acquirendam superesse videtur. Quamvis enim aër, sive vapor, aliavè id genus corpora tenuissima visum aliquandò non afficiant, non tamen propterea putandum est, ea sensu nequaquam esse perceptibilia; cùm & tactu, gustu, vel odore ejusmodi corpora percipi experientia ostendat. Aëris autem vel vaporum ingressu aut egressu omnem corporis rarefactionem & condensationem satis intelligibiliter explicari posse, ex antedictis patet.

Verissimè quoque à Cartesio docetur, *Planè repugnare, aliquid nova quantitate, vel nova extensione augeri, quin simul etiam nova substantia extensa, hoc est, novum corpus ei accedat; Neque ullum additamentum extensionis vel quantitatis, sine additamento substantiæ, quæ sit quanta & extensa, posse intelligi.* Nempe hujus Cartesii assertionis fundamentum est, realis quantitatis sive extensionis, & corporis sive materiæ extensæ identiti-

identitas; ità ut extensio five quantitas corporea, & materia extensa five corpus in re non differant. Sed de hoc jam ulteriùs agendum est.

CAPUT. VI.

Inquiritur, utrum Quantitas corporea reipsa à corpore distinguatur.

SI Extensio seu Quantitas realiter à corpore esset distincta, utique & materiam five corpus absque ea concipi posse sequeretur; ac proinde in extensione essentia aut natura materiæ non consisteret. Hoc autem cum planè Cartesii sententiam evertat, negat hoc loco Quantitatem in re à corpore aut materia extensa differre, nec aliam hîc distinctionem excogitari posse ait, quam rationis & ex parte conceptus nostri. Sed verba ipsa audiamus: *Quippe, inquit, quantitas à Substantia extensa in re non differt, sed tantum ex parte nostri conceptus, ut & numerus à re numerata. Ità scilicet ut totam naturam substantia corporea, quæ est in spatio decem pedum, possimus considerare, quamvis ad istam mensuram decem pedum non attendamus; quia planè eadem intelligitur in qualibet istius parte ac in toto. Et vice versa, potest intelligi numerus denarius, ut etiam quantitas continua decem pedum, etsi ad istam determinatam substantiam non attendamus: Quia planè idem est conceptus numeri denarii, sive ad hanc mensuram decem pedum, sive ad quidlibet aliud referatur; Et quantitas continua decem pedum, etsi non possit intelligi sine aliqua substantia extensa, cujus sit quantitas, potest tamen sine hac determinata. In re autem fieri non potest, ut vel minimum quid ex ista quantitate aut extensione tollatur, quin tantundem etiam de Substantia detrahatur; nec vice versa, ut tantillum de Substantia detrahatur, quin tantundem de quantitate ac extensione tollatur.* Toto hoc discursu nihil aliud vult Cartesius, quam Quantitatem seu extensionem ratione quidem distingui posse à materia & corpore, in re tamen nequaquam. Ratio est, quia mens nostra quantitatem quidem five longitudinem alicujus corporis, non conceptà tamen illius naturæ aut essentiæ, considerare potest. Nempe possum quidem ego mente mea considerare vel percipere longitudinem viæ five distantiam hujus civitatis ab alia, licet non considerem aut percipiam naturam corporum eorum, terræ, herbarum, plantarumque, aliorumve, quæ sunt in intermedio. Quemadmodum etiam Geometra considerat quidem magnitudinem ejus, quem dimetitur, agri, absque consideratione naturæ illius, utrum fertilis sit aut sterilis, argillaceus aut sabulosus. Ità & Mathematici cogitationes suas prorsus à materia abstrahunt, solasque

solaſque magnitudines, lineas, angulos, & figuras triangulares, quadratas, circulares, &c. conſiderant, ut notum. Prætereà, quia corpus, licet abſolutè ſine quantitate eſſe nequeat, poteſt tamen eſſe ſine hac aut illa determinata. Licet enim hæc cera omnis prorſus quantitatis expers eſſe nequeat, poteſt tamen eſſe ſine hac, putà triangulari figura, quia & quadrata poteſt eſſe, vel rotunda. Denique, quia natura alicujus corporis imprimis homogenei poteſt conſiderari in minima particula, licet non attendamus ad univerſam illius molem aut quantitatem, ſiquidem omnes particule ejusdem naturæ eſſe ſupponuntur. Ex hiſce ergò quantitatem ratione quidem à materia aut corpore diſtingui haud malè colligit Cartefius. Quia verò in re nulla particula à corpore aut materia poteſt auferri abſque quantitatis diminutione, nec quantitas vel minima auferri quin ſimul aliqua de corpore particula auferatur; utique in re materiam & illius quantitatem nequaquam diſferre veriſſimè concludit.

Ut autem totum hoc negotium rectius percipiatur, omniſque in poſterum ambigendi ratio auferatur, notandum eſt; primò, diſtinctionem eſſe inter quantitatem & extensionem, quamvis hæc vocabula paſſim promiſcuè uſurpari ſoleant. Extenſio enim ſpeciale videtur attributum eorum duntaxat corporum, quorum particule propter viſcoſitatem in longum & latum duci poſſunt, ut: *Metalla, aurum, argentum, æs, ſtannum, plumbum*, &c. Item, *Pix, cera*, &c. Neque enim extendi dicimus corpora tum liquida, ut: *aqua, vinum*, &c. tum dura, ut: *Lapides*. Haud ergò ſatis accuratè extenſio & quantitas pro iisdem habita fuère, cum extenſio non omnibus indifferenter, ſed quibuſdam tantùm corporibus attribui queat, habeatque relationem ad extendentem, ſicut actio ad agentem, ut conſtat ex dictis. Sic & manum eandem nunc extenſam, nunc contractam vocamus. Item, brachium extenſum & contractum; Similiter homo dicitur extendere digitos, cervicem, caput, pedes, &c. Extenſio ergò contractioni eſt oppoſita, adeoque ubi non eſt contractio, ibi nec extenſio propriè locum habere videtur; unde nec arenulas, pulviſculos, particulas minimas, aut atomos rectè extenſas dici apparet, licet interim Quantitas ipsis indiviſibilis verè attribui poſſit. Eſt igitur Extenſio corporea nihil aliud, quam modus corporis, quo ſecundum longitudinem & latitudinem pròductum intelligitur.

Deinde, de Quantitate notandum eſt, eam non niſi relativè rebus attribui, idque multiplici ratione; primò, ratione multitudinis, ſeu numeri, veluti cum Eccleſiam magnam, exercitum magnum apellamus, quod multis conſtet hominibus. Secundò, ratione ponderis, gravita-


tis

tis aut levitatis, veluti cùm magnum dicimus esse pondus auri, argenti, plumbi, &c. Tertiò, ratione perfectionis vel imperfectionis, virtutis ac vitii, veluti cùm quempiam dicimus magnum fide, virtute, fortitudine bellica, &c. Magnum peccatorem, furem, &c. Similiter & Deum magnum vocamus potentia, sapientia, veritate, &c. Quartò, ratione durationis & temporis, veluti cùm dicimus aliquem vixisse longo tempore, &c. Quintò, ratione loci aut spatii, veluti cum dicimus magnum regnum, magnam provinciam, magnam civitatem, magnam domum, &c. Sextò, ratione molis & corporèitatis, quâ res constat, veluti cùm Sol dicitur major terra, &c. duæ posteriores significationes imprimis hoc loco considerandæ veniunt.

Et quidem prior illa Significatio, quâ ratione loci aut externæ superficiei corpus aliquod magnum dicimus, maximè vulgaris esse videtur. Corpus enim ligneum aut porosum bipedale majus dicere solemus corpore pedali auro & maximè compacto, licet plus materiæ in hoc quam illo contineatur. Similiter & vasa ea majora vocamus, quorum ambitus majora seu ampliora intra se spatia comprehendunt, non attendendo utrum corporibus internè repleta sint, nec ne. Neque aliter circulos, globos, sphaeras, aliasque figuras mathematicas triangulares, quadratas, multilateras majores appellamus, nisi quarum perimetri sive extremitates longissimè à se mutuo distant, licet interim nullum in se corpus aut materiam contineant. Neque enim propterea globum hunc terrestrem minorem diceremus, si vel in medio vacuus esset, vel si interiores illius partes annihilarentur. Similiter & de magnitudine Solis, lunæ, omniumque Planetarum & Siderum philosophari solemus. Nemo enim considerat, utrum corpora illa cœlestia internè vacua sint, an plena. Externas solummodò superficies & circumferentias spectant, & inde de eorum magnitudine determinare solent Astronomi. Et secundum hanc explicationem dicere possemus eandem materiam sub diversâ quantitate apparere posse, adeòque identitatem materiæ non necessariò arguere identitatem quantitatis; quemadmodum exigua massa vitrea à vitriario inflata majorem quantitatem sive magnitudinem accipit.

At verò Philosophi, de hac materia agentes, Quantitatis nomine communiter non tantum intelligunt externam illam corporum superficiem, verum etiam internam corporis molem, & quicquid corporèitatis intra externas illas superficies continetur. Et hoc sensu impossibile est quantitatem à corpore realiter distingui. Ratio est perspicua, quia singulæ minimæ particulæ determinatam suam habent quantitatem, quæ

sive hoc modo, ordine, situ, sive alio disponantur, semper tamen omnes simul sumptæ eandem quantitatem aut magnitudinem conficiunt. Quemadmodum enim decem lapides quadrati & æquales, sive uno sive alio modo, ordine vel situ disponantur, sive etiam separati ab invicem existant, singuli tamen eundem semper locum, idemque spatium occupant, quæ spatiola omnia simul sumpta, æquale semper spatium conficiunt; ità etiam corpuscula minima, vel quæcunque tandem illa fuerint, sive hoc, sive illo modo aut loco disponantur, omnia simul sumpta eandem semper magnitudinem sive quantitatem producent, ut constat ex figuris subjectis, ubi novem corpuscula quadrata æquale semper spatium implere videmus, licet tribus diversis modis sint disposita.



Fingi itaque nequit, ut vel minimum corpusculum hisce addatur, sive dematur, nisi & quantitas totius vel augeatur vel minuatur, ut sua luce est evidens.

Tertiò denique notandum est, Magnitudinis & Parvitatibus vocabula, quocunque tandem modo sumantur, semper esse relativa, adedque nunquam corpori attribui nisi relativè ad aliud; Quod enim ratione minoris magnum dicitur, id ipsum ratione majoris parvum erit; quemadmodum etiam numerus 100. Si comparetur cum 10. vel 20. magnus, si verò cum 1000. vel 10000. parvus appellatur. Sed & hic iterum diversarum rerum relationes esse possunt; Idem enim homo, quatenus cum gigante, pygmæo, infante, equo, formica, aliisve comparatur magnus vel parvus esse potest. Similiter & stellas parvas dicimus ratione apparentiæ aut speciei, quam habent in oculis nostris, & si cum Sole & Luna ratione ejusdem apparentiæ conferantur; eandem verò magnas dicemus etiam ratione Lunæ, si ad veram earum molem attendamus. In specie autem corpora animata, aliisque quæ determinatam suam à natura habent quantitatem, magna vel parva dicere solemus comparatione facta ad ordinariam molem, ad quam determinata esse judicantur. Sic Gigas, vel alius quilibet ordinariam hominis staturam excedens, magnus dicitur homo; Pygmæus verò vel alius quivis minori mole præditus, parvus, & ità de cæteris. Sic & Equum sub quantitate Canis vel Ovis subsistentem parvum, canem verò vel ovem sub quantitate Equi præ magnitudi-

ne

ne monstrosus dicemus. Eundem hominem, quem in puerili ætate magnum diceremus, si sub eadem adultior factus appareat, parvum & homunculum appellabimus. Tota hæc doctrina ab ipso Aristotele proponitur, *Categ. Lib. cap. vi.* ut mirum sit eam à Peripateticis non diligentius fuisse observatam. Verba illius sic sonant ex interpretatione Pacii. §. 20. *Nihil per se magnum dicitur vel parvum, sed eo, quod ad alterum refertur. Ut mons parvus dicitur, Milium magnum: quoniam iis que sunt ejusdem generis, hoc est majus, ille minor. Ergò ad alterum fit relatio: quia si per se parvum aut magnum diceretur, nunquam mons parvus diceretur, & milium magnum. Rursus in vico multos homines esse dicimus: Athenis paucos, cum multò plures illis sint. Et in ad. bus multos, in theatro paucos, cum multò plures illis sint. Præterea, bicubitum & tricubitum, & id genus alia significant quantum: magnum autem vel parvum non significant quantum, sed potius ad aliquid: Quia in relatione ad alterum spectatur magnum & parvum. Quocirca perspicuum est, hæc esse in eorum numero, que sunt ad aliquid.*

Cùm igitur Quantitatis, Magnitudinis & Parvitatibus vocabula relativa sint, & corporibus non nisi in ordine ad alia attribuantur, (unde & idem diversa ratione magnum & parvum dici potest) Cùmque Extensio non omnibus corporibus in genere, sed quibusdam duntaxat, putà extensibilibus conveniat, & quasi aliunde adveniat; utique manifestum videtur id, quod suprà de conceptu & natura Corporis in genere disseruimus, nempe eam non consistere in nuda extensione aut quantitate. Ut ergò nulla in posterum dubitandi causa supersit, hisce vocabulis, quibus jam omninò ipsi nimium assueti sumus, abstinere præstabit; & corpus naturâ suâ nec quantum dicemus, nec extensum, nec magnum, nec parvum; sed Ens materiale tantum, seu corporeum, quod sola impene- trabilitate ab Ente immateriali distinctum est, ut Suprà dictum: Ens autem materiale extensum dicemus, ubi in latitudinem sive longitudinem fuerit productum; Magnum verò vel parvum, postquam Mentis nostræ operatione cum aliis erit comparatum. Unde intelligitur, nec magnum nec parvum corpus dici posse, si tantum unicum esset in rerum natura, siquidem cum nullo alio comparari à mente posset. Interim & hoc firmum manet, tum Quantitatem, tum Extensionem, quibuscunque tandem corporibus, & quocunque modo attribuat, non esse rem quandam ab ipso corpore diversam; quia extensio duntaxat modus est corporis extensi, & magnitudo vel parvitas relatio mentis tantum, ut patet ex dictis.

APPENDIX AD CAPUT VI.

Quâ discutuntur ea, quæ Clauberghius de essentia seu natura corporis in communi disserit.

INter ceteros Cartesianæ Philosophiæ Patronos haud ultimus esse videtur Johannes Clauberghius S. S. Theol. & Phil. in Acad. Duisburg. Doct. & Professor; qui Exercitationum suarum Libro, Exerc. XLVII. juxta Cartesii doctrinam, Essentiam corporis in extensione sitam esse docet, eamque argumentis quibusdam confirmare conatur. Erit ergo operæ pretium eundem hîc Doctissimum virum ad partes vocare, ejusque super hac quæstione explicationem examini nostro subjicere. Sic autem ille scribit. §. 1. *Essentia*, inquit, *seu natura alicujus rei vocatur id, quod tali rei omni, soli, semper convenit, ita ut nihil eo prius in eadem percipere possimus. Quod postremum addo propter Proprium (quarto modo dictum) quod essentiam necessario sequitur, & quod proinde omni, soli, & semper competit, sed ita ut eo prius quid possit in re concipi, nempe ipsa rei essentia seu natura, quam proprietates sequitur (sic enim cogitare & loqui solemus.)* Quia ita nos cogitare & loqui solere dicit Clauberghius, non propterea rem ita se reverà habere putandum est. Si enim secundum ipsam rei veritatem rem consideremus, quod *Proprium* dicunt vulgò, ipsa rei essentia est, neque ab ipsa in re distinctum, ut alibi à nobis demonstratur; adeoque propriè & accuratè loquendo essentiam non sequitur. Ità tamen nos loqui posse concedo, quatenus mens nostra unum ex alio firma consecutione deducit, quemadmodum & ex infinita Dei Essentia omnes ferè ipsius, ut vocant, proprietates colliguntur, quæ in re ab illius essentia non differunt.

Pergit Clauberghius, §. 2. *Queritur hîc*, inquit, *quanam sit essentia rei corporalis in genere & in communi, sive, quæ sit natura corporis, non quatenus hoc aut illud, tale aut tale est, sed quatenus corpus est. Et respondetur, hoc nihil aliud esse, quàm extensionem in longum, latum & profundum, unde corpus benè definitur, res extensa.* Sed hîc mihi explicari velim, utrum corpus tale, quale hîc sibi definiendum sumpsit Clauberghius, uspiam detur in rerum natura? Si non detur, frustra illius investigatur definitio. Si ergò dari dixeris; respondeo, omne corpus in rerum natura existens esse hoc vel illud singulare, adeoque tale vel tale. Si dicas, non essentiam hîc definiri perfectè, qualis est in rerum natura, sed qualis à nobis conceptu quodam communi concipitur, seu, id quod omnibus

bus corporibus abstractè sumptis inesse intelligitur; ità ut hac definitione explicetur duntaxat aliquid genericum, quod sit omnibus corporibus commune: Ad id jam satis supérque à nobis in præcedentibus responsum est, neque eadem hîc repetere est necesse. Et notandum haud satis accuratè illud dici corpus in genere, aut in communi, cùm potius dicendum videatur, aliquid omnibus corporibus commune. Hoc autem nihil aliud esse diximus, quam Ens materiale.

Sed audiamus rationem Claubergii, §. 3. *Nam, inquit, talis extensio primò quidem convenit omni corpori, h. e. non tantùm cœlesti, sed etiam terrestri, aëri, igni, aqua, &c. Et quamvis parvum admodum sit corpusculum, habet tamen aliquam extensionem, quatenus ex. gr. dextra & sinistra pars in eo potest distingui. Et quamvis capilli nostri multò plus habeant longitudinis, habent tamen etiam aliquid latitudinis, unde alii aliis crassiores sunt.* Sed primò hîc quidem scire velim, unde tandem in hanc devenêrit cognitionem Claubergius, omne vel minimum corpusculum in cœlo, terra, aëre, & aquis esse extensum? Nunquid omnes illorum vel intimos recessus evolvit Claubergius, ut nullum omninò iis corpusculum, quod non extensum sit, contineri tam confidenter enunciet? Vel denique, unde certus est etiam ea, quæ nec vidit unquam, nec videre potuit, in longum latum & profundum extensa sint? Atqui Philosophi non est absque ratione loqui. Sed & contrà asserimus nos falsum esse omnia corpora & corpuscula esse extensa. Nam, primò ostendimus jam suprà extensionem propriè est strictè sumptam convenire duntaxat corporibus iis, quæ extensibilia sunt, seu extendi possunt. Ecquis enim unquam Solem in cœlo extensum dixerit, Sidera extensa? Quis formicas, aviculas, muscas, arenulas item, pulvisculos in aëre volitantes, aliâque infinita extensa asserat? Nonne risum moveas, si homines brevioris imprimis staturæ extensos viros appellaveris? Quid ineptius; quàm brachium etiam contractum extensum dicere, & manum extensam, etiamsi in pugnum contracta sit? Quis unquam mortalium ità locutus est? Quæ ergò ista Philosophia est, quæ, absque necessitate bonorum Authorum exemplo, barbaris hujusmodi, inusitatis, atque ineptis delectetur loquutionibus? Deinde, dari atomos & particulas indivisibiles, quibus nec extensio latius sumpta conveniat, infrà fusiùs demonstrandum.

Neque obstat, quod Claubergius ait, in quovis vel minimo corpusculo distingui posse partem dextram & sinistram. Minimum enim corpusculum partes non habet in se, potest tamen dextrum & sinistrum ha-

bere extra se. Ex. gr. Centrum, omnium consensu indivisibile punctum est & medium in circulo, partes ergò nullas habet, ut patet. Una tamen circumferentiæ pars ipsi dextra est, altera sinistra, una suprâ, altera infrâ. Quis verò hinc varias in Centro partes esse inferat? Similiter etiam ratione Angeli, in hoc vel illo Ubi existentis, dextrum & Sinistrum considerari possunt, & tamen partibus caret, ut notum. Quamvis nec ex partibus rem extensam esse concludi possit, ut constat ex dictis. Ac proinde capilli nostri, ut eodem Claubergii exemplo utar, licet secundum longitudinem extensi dici queant, nemo tamen eos secundum crassitiam aut latitudinem extensos dixerit.

Sed pergamus ad §. 4. Deinde, inquit, *extensio talis competit soli rei corporeæ, nulli incorporeæ seu spirituali, Nam res spiritualis sive intellectualis est res cogitans; quæ si extensa foret, divisibilis esset in partes, atque ita corruptibilis ad modum corporis.* Si extensio in latiori significatione Claubergio sit, non-existentia in puncto indivisibili, sive coexistentia cum spatio divisibili & extenso; falsum est, spiritus extensos dici non posse. Quis enim eos spatio aliquo indivisibili determinatos aut inclusos existimet? Neque tamen exinde illorum divisibilitas aut corruptibilitas ulla ratione deducitur. Nam & essentia Dei per omnia loca & spatia diffusa est, iisque verè præsens; quia immensa, nulliusque loci terminis circumscripta aut definita, juxta id quod legitur 1 Reg. viii. 27. *Cæli cælorum non capiunt te.* & Jer. xlii. 24. *Cælus & terram ego impleo, dictum Jehovah.* Et tamen indivisibilis ipse, atque incorruptibilis.

Tertio inquit Vir doctissimus §. 5. *extensio talis corpori semper competit, quia utcumque reliqua omnia tollantur & varientur, hoc (fortè, hac) manet quamdiu corpus manet: Ex. gr. glacies amittit duritiem, cum in aquam resolvitur, aqua amittit gravitatem, cum in vapores redigitur, vapores amittunt levitatem, cum in aquam revertuntur; Sed extensio neque in aqua abest, neque in glacie, neque in vapore.* Resp. Cum extensionem non omni corpori competere jam probatum sit, utique nec semper illi competere manifestum est. Deinde, corpus eandem semper extensionem retinere non ostendit Claubergius. Cum enim propriè loquendo extensio modus sit corpori extensibili adveniens, utique modo illo mutato etiam extensionem mutari necessarium est. Sic ergò statuimus, aquam in vapores abeuntem longè aliam & majorem extensionem suscipere, vel etiam tunc verè extendi, cum antea extensa non esset, quo sensu etiam in principio ætherem à Deo extensum, cælosque extensos S. literis doceri existimo. Si dicas, omnes particulas minimas collectivè sumptas eandem quantitatem, semper

semper efficere, sive in arctiori loco compactæ, sive in ampliori existant; regero, non omne quantum extensum esse; deinde, idem de singularum particularum gravitate dici posse; siquidem omnes illæ particulæ, si iterum compingantur, eandem gravitatem obtinerent, quæ antea obtinebant. Hæc, quam jam manibus tenco, cera figuram habet rotundam, tu rotundam extensionem vocas; Ego eam deduco in longum, & jam verè à me extensam dico, estque eò magis extensa, quò longiùs deducta. Sed utramque jam figuram extensionem appellemus, nunquid tamen eandem dices? Alia certè rotunda figura est, alia longa extensio. Intellegimus ergò non eandem semper eidem corpori competere extensionem, adeòque aliud esse corpus ejusque essentiam, aliud ejusdem extensionem.

Constat ergò, quàm infirma sit ista Claubergi consequentia, quam ex præcedentibus elicit his verbis, §. 6. *Unde sequitur essentiam corporis in communi non consistere in duritie, nec in gravitate seu pondere, nec in levitate vel talibus, quæ tolli possunt; sed semper in extensione quæ semper adest.* Siquidem jam extensionem nec omnibus, nec solis, nec semper, corporibus competere demonstratum est.

Sed neque hoc verum est, quod sequitur §. 7. *Quartò extensione tali nihil prius in re corporea potest concipi, nam etsi omne corpus etiam sit divisibile in partes, hoc tamen non est primum quod ei inest seu quod in ea intelligitur, nam idèd quid est divisibile, quia extensum est, non contrà, quia divisibile, idèd extensum.* Divisibilitas nostro judicio, non simplicibus, sed compositis duntaxat corporibus convenit, adeòque & hoc libenter damus non esse primum, quod in quolibet corpore concipitur; cùm & absque divisibilitate corpuscula esse & concipi queant. Extensionem verò esse rationem divisibilitatis, licet ad rem non faciat, absolutè falsum est, ut patet ex dictis. Ideò autem corpus divisibile statuimus, quia est compositum & partes habet. Et hinc percipitur, Spiritus, licet spatio alicui divisibili præsentis sint, haud tamen propterea divisibiles esse. Deinde, si vel omninò concedatur idèd corpus esse divisibile, quia extensum est, non tamen ex eo sequeretur extensionem primum id esse, quod in re corporea concipitur, quia modus est corpori composito superadditus, adeòque aliquid essentia posterior, saltem in conceptu nostro.

Reliqua, quæ addit Vir clarissimus, ad rem non faciunt, ut patet, quia iis duntaxat probare intendit extensionem prius concipi quam divisibilitatem, quod contra nos non facit, ut ex præcedentibus constat. Notari tamen & hîc quædam possunt, ut quod dicit §. 8. *Divisibile esse negativum;* cùm tamen *divisibile* significet potentiam passivam, ut loquuntur,

quuntur, ad divisionem partium. *Divisum* quidem negationem unionis dicere videtur, non verò *divisibile*, quod unionem ponit partium. Deinde, quod dicit §. 9. *Divisionem ad corruptionem ducere, & omnia in unitate conservari*, & denique, quod extensio sit *id, per quod corpus conservetur*. Nam primum quod attinet, quænam, quæso, fingi corruptio potest in cera hac, si eam in partes dividam, aut calore liquetfaciam? Certè cum aromata mortario tunduntur, & in minimas particulas resolvuntur, nemo ea aut corrumpi aut vires suas amittere somniat. Ad secundum, ænigma hoc est, & parùm Philosophicè dictum, *omnia in unitate conservantur*. Si sensus sit, res indivisas servari, divisas verò corrumpi, utut de animatis concedi queat, de inanimatis tamen falsum esse jam patet ex dictis. Et cum totum multas semper partes contineat, quare non idem multitudine partium conservari eodem jure dici posset? Certè tunc demum optimè hominem conservari judicamus, dum omnes ipsi partes, omniaque membra integra conservare licet. Ad tertium, si in extensione essentia corporis consistat, utique si per extensionem conservari corpus dixeris, essentiam per se ipsam conservari dicas oportet. Deinde, cum causa semper distinguatur à suo effectû, si per extensionem corpus conservari asseras, nonne in proclivi erit colligere extensionem esse re ab essentia corporis distinctam? Denique, quid ad conservationem extensio faciat, prorsus quæ mea est incitia, non intelligo.

Quod denique non faciat Claubergius cum iis, qui quantitatem definiunt, *quâ res quanta est dividua in ejusdem secum rationis partes, quarum alia est extra aliam*, benè habet. Neque enim & nos cum iis facimus, qui & res minimas & nequaquam extensas individuasque quantas appellare non dubitamus; Quin & Deo, spiritibus, aliisque multis quantitatem aliquam attribui posse abundè à nobis est ostensum.

CAPUT VII.

An Spatium sive Locus in re à materia non differat?

ATque ità jam satis supérque me examinasse videor ea, quæ de quantitate ejusque à Corpore distinctione Cartesius differuit; sequitur jam altera ratio, quam contra suam sententiam, materiam in sola extensione sitam esse, objici posse probè advertit. Quia verò & nos suprà eodem argumento usi sumus, haud erit inutile illud hîc resumere; tùm verò ipsius Cartesii responsionem examini nostro subjiciemus. Argumentum ipsum desumptum fuit ex eo, quia extensio sive Quantitas etiam Spatio

tio & loco attribuitur. Jam verò, cùm Spatium sive Locus materia non sit; sequitur ergò omnem extensionem aut quantitatem non esse materiam, aut materiæ essentiam sive naturam in extensione non consistere. Jam verò quid ad hæc Cartesius: *Non, inquit §.x. in re differunt spatium sive locus internus, & substantia corporea in eo contenta, sed tantum in modo, quo à nobis concipi solent.* At verò quis non percipiat continens & contentum magis differre, quàm ratione aut conceptu nostro. Quamvis enim corpus nullum fingi queat, quod non alicubi in spatio aliquo existat, spatium tamen absque corpore eo contento concipi potest. Quin imò, cùm spatium fuerit antequam corpus in eo existeret, utique spatium nequaquam à corpore dependere intelligitur. Et reverà nisi Cartesius jam præjudicio suo, quo corpus nihil aliud quam extensum quid esse finxit, præoccupatus fuisset, neque hæc ab ipso asserta fuisse putem. Ecquis enim clarè distinctèque percipiat spatium idem esse quod corpus, quod in ipso constitutum est? Corpus in varias formas atque figuras mutari potest, diversisque successivè in locis existere, Spatium verò immutabile semper idem est, neque de loco in locum moveri potest. Spatium diversa quoque corpora successivè potest recipere, quin imò in eodem spatio corpus & spiritus simul esse possunt, adeoque indifferenter se habet spatium ad spiritus & corpora diversa; aliud ergò spatium est, aliud corpus, quod in eo continetur.

Neque proinde veritati consentaneum est, quod sequitur: *Reverà enim extensio in longum, latum & profundum, quæ spatium constituit, eadem planè est cum illa, quæ constituit corpus.* Nam, (ut jam omittam extensionem propriè loco aut spatio haud accuratè attribui, quia corporibus duntaxat extensibilibus convenit, ut in præcedentibus notatum,) falsum est extensionem seu quantitatem spatii eandem prorsus esse cum illa, quæ constituit corpus. Ratione magnitudinis similes quidem aut æquales dici possunt, adeoque eadem quidem utriusque extensio dici potest specificè & quoad similitudinem aut æqualitatem, non verò eadem identitate numerica, ut patet. Præterea, si extensio sive quantitas (promistue enim hæc vocabula ex usu vulgari hîc sumuntur) loci non differat ab extensione sive quantitate corporis, utique sequeretur corpus nunquam loco suo motum iri, quia semper eandem extensionem sive quantitatem obtinet, ut patet ex dictis.

Pergit Cartesius: *Sed, inquit, in hoc differentia est, quod ipsam in corpore ut singularem consideremus, & putemus semper mutari quoties mutatur corpus; in spatio verò unitatem tantum genericam ipsi attribnamus,*

D

adeo

Corpus in genere spectatum ut sic non datur in rerum natura, estque purum Ens rationis, sicut & omnia Universalia, ut vocant. Omne corpus existens in rerum natura, cujus natura à Philosophis investigatur, est hoc vel illud singulare. Adeoque nequaquam putandum est, id quod in genere de corpore ejusve natura concipitur, ut tale etiam extra mentem existere. Est quidem id, quod concipitur in omni corpore, & idcirco omnibus commune, sed non tantum. Unumquodque ergo corpus existens, licet sine hac vel illa proprietate esse possit, non potest tamen esse absque omni, scilicet sine ea, quæ ipsi essentialis est, & ad quam jam omnino à natura determinatum. Ità ex. gr. licet corpus hoc vel illud possit esse sine virtute attractiva ferri, non rectè tamen inde concluderis etiam Magnetem sine ea esse posse, quia hæc virtus Magneti essentialis est. Similiter & corpus, quod naturâ suâ est calidum, (ut: Sol, ignis; &c.) absque calore esse nequit; quod naturâ suâ est grave, (ut: plumbum, aurum, &c.) sine gravitate esse non potest; & ità de cæteris. Et hinc patet, quàm ineptè Cartesius ex generali illa corporis idea; quam mente nostra formamus, colligat nihil aliud ad naturam aut essentialitatem corporum extra mentem requiri, quasi idea corporis ejusmodi in mente etiam extra mentem existere posset. Ostendat mihi vel acutissimus mortalium corpus aliquod in rerum natura, quod nec durum sit, nec molle, vel fluidum, nec coloratum, nec pellucidum, nec grave, nec leve, nec calidum, nec frigidum. Ostendi posse fateor corpus, quod non sit aliquid horum determinatè, putà vel frigidum, vel calidum, vel grave, vel leve, &c. at verò quod nihil horum sit, constanter nego. Deinde, omnibus illis qualitibus à corpore remotis, manet tamen in illa idea corporèitas sive materialitas, secundum quam corpus ab alio corpore est impenetrabile, & sensu perceptibile; Hæc autem non advertimus in idea spatii aut loci, adeoque etiam hac ratione conceptus spatii & corporis longissimè differunt. Equidem dubitarim, utrùm satis ferio à Cartesio asseratur, nihil planè se advertere in idea corporis, quàm in idea spatii, non modò corporibus repleti, sed etiam vacui. Nunquid ergo spatium corpore plenum, & vacuum idem sunt? Satin' sanum dixeris, qui sic sentiat?

Quamvis autem inter caput plenum & vacuum diversitatem non advertat Cartesius realem, in modo tamen concipiendi diversitatem aliquam agnoscit, sic enim progreditur §. XII. *Est autem differentia in modo concipiendi, nam sublato lapide ex spatio vel loco in quo est, putamus etiam ejus extensionem esse sublatam, nupote quam ut singularem & ab ipso inse-*

parabilem spectamus: sed interim extensionem loci, in quo erat lapis, remanere arbitramur, eandemque esse, quamvis jam ille locus lapidis a ligno, vel aqua, vel aëre, vel alio quovis corpore occupetur, vel etiam vacuum esse credatur. Quia ibi consideratur extensio in genere, censeiturque eadem esse lapidis, ligni, aque, aëris, aliorumque corporum, vel etiam ipsius vacui, si quod detur, modo tantum sit ejusdem magnitudinis & figura, servetque eundem situm inter corpora externa, quæ spacium illud determinant. Quod nos hic putare dicit Cartesius, est verillimum. Quotiescunque enim corpus aliquod, putà lapis vel lignum, loco suo dimovetur, ejus quoque quantitatem, quæ secundum ipsum Cartesium ab eo non differt, removeri necessum est. Cùmque interim loci quantitas sive capacitas maneat, quâ alia corpora, aquam, vinum, aërem, &c. successive recipiat, utique non tantum in modo concipiendi, sed in re ipsa spatium sive locum à re locata longissimè differre intelligitur.

Sed, ait Cartesius, §. XIII. nomina loci aut spatii, non significant quicquam diversum à corpore, quod dicitur esse in loco; sed tantum ejus magnitudinem, figuram, & situm inter alia corpora designant. Et quidem ut ille situs determinetur, respicere debemus ad alia aliqua corpora, quæ ut immobilia spectemus: Ac prout ad diversa respicimus, dicere possumus, eandem rem eodem tempore locum mutare, ac non mutare. Nomina loci aut spatii non significare quicquam diversum à corpore; quod est in loco, est ipsissimum id quod quæritur, quod probandum erat Cartesio, adeoque turpis hic committitur paralogismus. Præterè, quis sanus credat locum & rem locatam, vel locum & esse in loco, idem significare? Quis item illud, locum nihil aliud significare, quàm corporis magnitudinem, figuram, & situm inter alia corpora? Hæc certè omnia probanda erant, non gratis sumenda. Philosophi non est dictare, sed dicta sua rationibus demonstrare, quod scientiam parit. De Magnitudine supra actum est. Figura modus corporis est, ejusque determinationem seu delineationem externæ superficiæ significat, adeoque æqualis cum spatio concipitur, in quo existit. Locus ergò ipsam figuram non significat, corpus autem figurâ præditum spatium sibi æquale implet, quod Locus appellatur. Situs existentiam corporis denotat, ejusque modum & ordinem quandam ratione partium, veluti cùm dicimus aliquem stare, sedere, &c. adeoque nihil horum loco significari manifestum est.

CAPUT. VIII.

Natura sive Quidditas Loci explicatur.

UT autem totum hoc negotium clariùs intelligatur, omnisque porro ambiguitas, quæ & hic ex diverso loquendi modo quàm maximè oritur, tollatur, notandum est Locum sumi posse vel absolutè, vel relativè. Locus absolutè sumptus nihil aliud significat, quàm spatium illud sive ubi, in quo corpus existit; quod si absit Vacuum appellatur.

Hoc autem ut intelligatur, cogitandum est spatium illud amplissimum, in quo universus nunc mundus existit, esse illius Locum; esseque infiniti spatii quasi particulam aliquam satis tamen amplam, ità ut in ea omnia corpora naturalia, Sol, Luna, Astra quælibet, Tellus, singula partem aliquam impleant; Quemadmodum item Telluris spatium variis corporibus terrestribus, quorum singula quoque illius particulam occupant, repletum est. De hoc autem Universi spatio notandum, quod, licet in ipso, & per ipsum corpora moveri dicamus, ipsum tamen immobile sit, adeoque & omnes illius quasi partes aut particulas ut immobiles esse considerandas. Quod ut intelligas concipe globum aliquem super axes, & intra terminos suos determinatos moventem, ubi globus quidem, omnesque ejus partes moveri videntur; at spatium ipsum ut immobile semper, ut & illud quod extra globum est, concipitur. Hisce diligenter perpenſis faciliè patebit, quomodò singula corpora Mundi suum quæque locum obtineant, & quæ loco suo moveri vel non moveri dici queant. Quodcunque enim corpus in eadem istius spatii definita particula permanet, in loco suo absolutè immobiliter quiescit, quod verò ex ea deturbatur, movetur, & locum suum absolutè mutat.

Quia verò illud spatium invisibile est, nullisque terminis limitatum aut circumscriptum, utpote infinitum; utique si totum hoc Universum à Deo conditum continuò moveri ponamus, non tamen istum motum advertere possemus. Quemadmodum, si quis cubiculo undique clauso vel etiam navigio inclusus, cubiculo illo vel navigio uniformiter & æqualibilibi moto, non tamen se moveri loco sentiret. Cujus rei hæc est ratio, quod nos de motu locali ex sensu, & imprimis ex visus variatione determinare soleamus. Cum ergò talis variatio in isto casu nulla esset, siquidem omnes circumpositæ particule in eodem viderentur situ, utique nec motum aut loci mutationem ulla ratione perceptum iri manifestum est. Ex qua ratione insuper & hoc colligitur, ne motum quidem aut loci muta-

tionem perceptum iri in hoc Universo, si totum simul omnesque ejus particulæ circulariter moverentur, quia ne tum quidem aliqua visus variatio contingeret quemadmodum navi inclusus, etiamsi cum navi in gyrum duceretur, istum tamen motum advertere nequit. Sed de motu infra pluribus agendum.

Locus relativè sumptus significat idem quidem illud spatium, seu ejusdem spatii quasi particulam cum respectu quodam aut habitudine ad determinatum aliquod corpus, ejusve determinatam particulam, cui quasi affixum aut annexum est. Adeoque quicquid supra eandem terræ, sive corporis cujuscunque particulam manet, (sive moveatur illa terræ sive corporis particula, nihil refert) in eodem loco manere censetur. Sic civitates, turres, ædificia, domus, aliæque id genus immobilia dicuntur, quod semper ab iisdem terræ particulis sustineantur, iisque immobiliter quasi affixa sint. Similiter & eodem loco permanere dicimus omnia illa, quæ aliis corporibus, aut corporum particulis affixa sunt, non attendentes utrum corpora illa moveantur, nec ne. Ex. gr. Membrum hoc in corpore meo, cerebrum, auris, nasus, os, dentes, &c. Item, hæc macula, vibex, hic varus, dolor, hoc vulnus, &c. in eodem loco permanere dicuntur, licet interim totum meum corpus continuò de loco in locum moveatur; quia locus omnium istorum est spatiolum quoddam determinatis corporis particulis affixum. Eadem ratione has literas chartæ huic impressas immobiles appello, licet interim ipsa hæc charta de loco in locum transportetur; & ita de cæteris. Oculos tamen, linguam, caput, brachia, manus, pedesque moveri dicimus, quia, licet iisdem quidem particulis membra ista affixa maneant, (qua ratione & in suo loco manere dici possunt) eundem tamen partium suarum situm, ordinem, aut habitudinem non semper observant.

Hiscæ probè intellectis, facilè percipitur idem corpus diversâ ratione posse dici & moveri, & non moveri, seu manere in suo loco, quatenus nempe locus vel absolutè sumitur, vel relativè. Si enim Locus absolutè sumatur pro spatio immobili absque nulla corporis relatione, necessariò ad motum totius sequitur & motio singularum partium, etiamsi in locis suis relativè consideratis singulæ partes immobiliter persistant. Cum igitur, utrum totum hoc universum moveatur à nobis certò sciri nequeat, quia & ipsi in universo existentes simul cum eo moveremur, ad motum verò advertendum spectatoris sive oculi, & puncti è quo visio fit, immobilitas requiritur, ut infra de Motu notandum; utique motus hic pro nullo à nobis habetur. Quare & Locum communiter sumere sole-

mus

mus relativè pro spatio aliquo corpori alicui sive particulæ illius quasi affixo sive adjuncto. Ac proinde sive ponamus moveri totum universum sive non, corpora tamen singula in suis locis manere dicimus, quæ iisdem spatiis seu particulis universi affixa sive contigua manent. Neque videtur continuò necesse, ad determinationem loci, quod Cartesius existimat, §. XIII. *ut corpora ad quæ respicimus, tanquam immobilia spectemus.* Sive enim mobilia sint ista corpora, sive immobilia, nihil refert, ut patet ex dictis; Et si immobilia putemus corpora, quæ mobilia sunt & actu moventur, jam falsum erit mentis iudicium. Si igitur navi quispiam provehatur de loco in locum, navem quidem moveri aut locum mutare dicemus, non verò hominem eâ provectum, modò in eadem navis parte immotus persistat. Ecquis enim moveri dixerit eum, qui quietus in navi securè dormit, & æquabiliter absque ullo sensu provchitur? similiter nemo quoque globum sclopo vel bombardæ inclusum moveri iudicabit, quamvis interim sclopus vel bombardæ in alium locum transportetur. Et ridiculus foret, quisquis nasum, aures, aliasve partes corporis loco moveri assereret, quotiescunque hominem sese localiter moventem vel ambulantem videmus.

Et hinc etiam intelligitur, Stellas, quas Fixas vocant, quod determinatis suis in cælo spatiis infixas putent Ptolomæi sectatores, ut & Planetas, quos similiter orbibus suis affixos docent, non moveri suis locis, etiamsi omninò cum Ptolomæo Cælum moveri affirmaremus. Nempe, quia tùm Fixæ, tùm Planetæ semper tamen in eadem sui cæli parte immobiles permanerent. Sicuti ergò, progrediente navi per fluvium, haud rectè tamen inde singulos clavos asseribus aut tabulis infixos moveri concludas; eodem prorsus modo, licet totum cælum, cælestesque orbes, quos solidos & duros habent, moveri dicamus, non tamen exinde stellas aut Planetas singulos loco moveri evinceretur. Quemadmodùm, si Terram vel globum terrestrem moveri supponamus, non tamen ex eo Regiones, Provincias, oppida, turres, ædificia, arbores, plantas, &c. locis suis moveri, argui posset; siquidem omnia ista iisdem tamen ac determinatis suis terræ partibus affixa continuò manent.

Fatemur tamen & Locum aliquandò vocari spatium, quod à libero mentis nostræ arbitrio determinatur, veluti cùm dicimus aliquem manere in hoc vel illo regno, oppido, templo, domo, carcere, conclavi, aliove quovis spatio ipsi assignato, intrà cuius limites sese continet. Cùmque hæc determinatio sit libera mentis actio, uniusque, eam pro lubitu ampliari vel contrahi posse, evidens est. Sic ampliando, Terram dicimus

mus esse locum mortalibus concessum, Cælum esse locum beatorum, &c. contrahendo carcerem furi aut homicidæ pro loco assignat Judex. Addi denique potest & Locum aliquandò sumi pro spatio, in quo corpus esse videtur seu putatur tantum, qui locus apparens dici posset, veluti cum hoc vel illud Astrum, Planetam, Cometam &c. dicimus esse in illo signo, Dodecatemorio, Asterismo cœli, quandò sub illo visui nostro apparet, seu, cum inter oculum nostrum ac tale signum intercipitur. At verò hæcæ significationes non esse hujus loci, neque Physicas satis manifestum est, quamvis tamen posteriori Astronomi, sensu tamen jam explicato, vulgò utantur.

Et hinc jam abundè constare existimo, quàm parùm accuratè Cartesius omnem locum à determinatione mentis nostræ dependere asserat. Ut ut enim, propter communes loquendi formulas, hoc ipsum aliquandò concedi possit, non tamen hoc ipsum verum esse in sensu Philosophico satis superque ex dictis apparet. Neque enim Philosophorum est spectare, quomodocunque res aliqua à libero nostro arbitrio determinetur, sed quomodò se habeat in rerum natura, ut patet. Deinde, cum antè Cartesius Locum sive Spatium nihil aliud esse voluerit, quàm ipsam materiam, nec in re quicquam à corpore diversum nominibus loci aut spatii significari, §. XIII. Utique, si locus à determinatione mentis nostræ dependeat, etiam materiam ab ipsa dependere colligitur, eritque tandem nihil aliud materia, quàm Ens rationis, id est, purum intellectus Cartesiani figmentum.

Constat ergò ex dictis, longè aliud esse corpus aut Ens corporeum, aliud verò spatium sive locum, in quo illud existit; cumque in eo non minùs extensio reperiatur quàm in corpore, haud rectè essentiam aut naturam corporis à Cartesio in sola extensione esse positam; neque proinde hanc, quam sibi ipse objecit difficultatem, rectè solutam aut sublata esse, manifestum evadit.

CAPUT IX.

*De Differentia inter Spatium & Locum, ejusque distinctione
in internum & externum.*

Quam porrò differentiam notat Cartesius Locum inter & Spatium, ea sanè perquam tenuis est. *Differunt autem*, inquit §. XIII. *nomen loci & spatii, quia Locus magis expressè designat situm, quàm magnitudinem aut figuram; & è contra, magis ad hæc attendimus, cum loqui-*

mur

mur de spatio. Dicimus enim frequenter, unam rem in locum alterius succedere, quamvis non sit accurate ejusdem magnitudinis, nec figura; Sed tunc negamus, illam idem spatium occupare; ac semper cum ille situs mutatur, dicimus, locum mutari, quamvis eadem magnitudo ac figura permaneat; cumque dicimus, rem esse in hoc loco, nihil aliud intelligimus, quam illam obtinere hunc situm inter alias res; & cum addimus, ipsam implere hoc spatium, vel hunc locum, intelligimus præterea, ipsam esse hujus determinatæ magnitudinis ac figura. Utique Locum non designare situm corporis, aut spatium ejusdem magnitudinem aut figuram supra ostensum est. Et cum unam rem in locum alterius succedere dicimus, non certè situm illius significamus, nec magnitudinem aut figuram consideramus; sed unum eundemque locum, idémve spatium diversa successivè corpora in se recipere duntaxat indicamus. Unde & supra locum, spatiumve & materiam seu corpus plus quàm mentis conceptu aut ratione differre conclusimus. Neque profectò, quæ mea hebetudo est, quænam utriusque in hoc negotio differentia sit, animadvertere potui. Idem enim sunt, succedere in locum alterius, & succedere in spatium alterius; ut & illa, occupare locum, & occupare spatium alterius; nisi quod locus in istis Phrasibus sæpiùs honores aut statum & conditionem alicujus denotare videatur. Neque etiam intelligo, quod ait, semper locum mutari, cum mutatur situs, quamvis eadem figura permaneat. Cum enim situs ordinem quendam partium inter se denotet, quomodo, manente corporis figura, situs mutari queat non video. Quid sit porrò, esse in loco aliquo, jam quoque abundè ex dictis manifestum est; adeoque simplici rei in loco existentia situs formaliter non designatur, nec Loci notio eum indicat, nec ab eo dependet. Cum denique Locus & res locata æqualia sint, sicut continens & contentum, utique haud mirum, si habitæ exacta Loci aut Spatii determinatione, simul etiã habeatur magnitudo atque figura corporis eo contenti. Hæc autem minoris sunt momenti, neque quid hinc sibi conclusum velit Cartesius prorsus intelligo. Si quis tamen præcisè aliquam velit Locum inter & Spatium dari differentiam, dici posset spatii nomen paulò videri generalius, & etiam vacuo attribui, Locum verò solis corporibus; adeoque semper significare spatium in quo corpus est. Spatium itaque est, vel corpore impletum vel destitutum; si impletum sit, Locus dicitur; si destitutum, Vacuum appellatur, de quo infra.

Deinceps quod sequitur non usque adeò veritati consentaneum est. Atque ita, inquit, §. xv. spatium quidem semper sumimus pro extensione

in longum, latum & profundum. Ut enim omittam, quæ de extensionis vocabulo suprà notata sunt, illud non nisi corporibus quibusdam, putà extensibilibus propriè attribui posse; hoc solummodò nunc notare visum fuit, quo fundamento asserat Cartesius Spatium semper sumi pro extensione in longum, latum & profundum; hoc enim idem est, ac si dicas Spatium semper significare longitudinem, & profunditatem. Ecquis verò tria hæc unico spatii vocabulo significari docuit? Et quid impedit, quò minùs & distantia inter nos & stellas, aliæve corpora spatium appelletur, absque ullius sive latitudinis, sive profunditatis consideratione. Quemadmodùm & Cicero *Lib. 11. de Nat. Deor.* dixit: *stella spatii immutabilibus ab ortu ad occasum commeant.* Similiter & Spatium temporis accommodari solet, ubi quoque nihil aliud quàm longitudinem aut diurnitatem significat absque ulla latitudinis aut profunditatis sensu, ut notum.

Progredditur Cartesius, & distinctionem quandam Loci satistritam proponit. *Locum autem, dicit, aliquando consideramus, ut res, que in loco est, internum, & aliquando ut ipsi externum. Et quidem internum idem planè est quod spatium; externus autem sumi potest pro superficie, que proximè ambit locatum.* Distinctio illa inter locum internum & externum, ut ille spatium, hic verò proximam ambientis corporis superficiem denotet, quamvis admitteretur, quid tamen eà sibi velit Cartesius aut expediat, non video. Quà, quæso, hinc consequentiâ confecerit, Locum sive externum sive internum nihil in re aliud esse quàm corpus, quod ipsi probandum incumbit? De Spatio jam satis actum, nihilque minùs eo, quàm materiam aut corpus significari luce clariùs demonstratum est. Superficiem quoque ambientis corporis non esse corpus contentum aut ambitum per se constat.

Sed & divisionem ipsam prorsus ineptam esse facili negotio ostendi potest, quia nempe solum Spatium corporis esse Locum ex antedictis est manifestum. Superficiem verò ambientis corporis non esse Locum vel ex eo patet; Primò quia, cùm illa superficies ab ambiente corpore non differat, cum illo à corpore locato separari potest, atque adeò tunc corpus esset sine loco, & *inani* sive nusquam, quod est impossibile. Deinde, quia superficies illa cum corpore suo mobilis est, corpore tamen locato immoto in eodem loco manente. Utut enim aer turrim ambiens perpetuò moveatur à vento, aut mutetur, turris tamen in eodem loco constanter permanet. Superficies ergò corporis ambientis nequaquam corporis locus esse potest.

Vanum

Vanum ergò est illud notandum Cartesii, cùm ait: *Per superficiem non hic intelligi ullam corporis ambientis partem, sed solum terminum, qui medium est inter ipsum corpus ambiens, & id quod ambitur, quique nihil aliud est quam modus.* Cùm probè advertat Cartesius superficiem corporis ambientis propriè locum non posse dici, alienam ipsi significationem attribuit, nimirum terminum medium eà significari vult inter corpus ambiens & ambitum, quem modum appellat. At verò ecquis medium aliquod percipiat inter corpus ambiens & ambitum, cùm se mutuò tãgant? Nam ubi aut in quo corpore medium illud erit, in ambiente, an verò in eo quod ambitur? Et si modus, quæro, cujus corporis? Non ambientis, quia sic ab ambiente corpore non differret; adeoque illo remoto, etiam hic modus sive superficies moveretur. Si ergò modum ambitu corporis dixeris, quomodo superficies ambientis vocatur?

Ipsè Cartesius huic notando parùm confisus aliud commentus est, nempe per illam corporis ambientis superficiem intelligi ait *superficiem in communi, quæ non sit pars unius corporis magis quam alterius, sed eadem semper esse censeatur, cùm retinet eandem semper magnitudinem & figuram.* Sed quænam aut ubi est superficies hæc in communi, quæ non sit pars unius corporis magis quam alterius? Et si non magis unius sit, quam alterius corporis superficies, quo jure ambientis dicitur? Quomodo item Locus externus, aut qualis hic à spatio differentia excogitari potest? Deinde, quomodo hæc cum antecedentibus cohærent, ubi corpus ipsum à spatio aut loco in re non differre dixit Cartesius? Quis vel acutissimus mortalium hæc mysteria tam clarè & evidenter percipiat? Certè si per totum annum meditatus fueris, nunquam superficiem corporis ambientis cogitaveris, quæ, corpore ambiente sublato, non auferatur.

Neque hoc Cartesio latuit, sic enim progreditur: *Esse enim omne corpus ambiens cum sua superficie mutetur; non ideo res quam ambit, locum mutare existimatur, si eundem interim situm servet inter illa externa, quæ tanquam immobilia spectantur. Ut si navim in unam partem à fluminis lapsu, & in contrariam à vento, tam equaliter impelli supponamus, ut situm suum inter ripas non mutet, facile aliquis credet, ipsam manere in eodem loco, quamvis omnis superficies ambiens mutetur.* Verissima hæc sunt, quæ hic dicit Cartesius, verùm quæ ipsius sententiam de superficie directè evertunt. Si enim Locus esset superficies corporis ambientis, utique superficie illa mutata, locum ipsum mutari necessum est. Cùm ergò Locus, fatente ipso Cartesio, propterea non mutetur, utique il-

lam superficiem locum non esse evidenter sequitur. Exemplum quoque navis propter contrarios impulsus hinc inde in eodem loco permanentis, quamvis interea omnis illius ambiens superficies infernè aquæ, & superne aëris mutetur, idipsum clarissimè ostendit. Neque, qua ratione aliter ejusmodi navis in eodem loco manere dici possit, video, nisi vel absolute, quatenus idem Universi spatium retinet; vel etiam relative, quatenus eandem semper ad inferiorem fluminis fundum, vel ex obliquo ad eandem ripæ seu litoris partem, habitudinem obtinet, ità ut eidem particulæ terræ, quasi perpendiculariter vel ex obliquo affixa censeatur. Simili prorsus ratione in eodem loco dicuntur manere corpora pensilia, quæ de lacunaribus aut tabulatis suspenduntur. Licet enim perpetuò aëris circumfluentis superficie mutantur, in eodem tamen loco esse & quiescere ea asserimus, quod immota easdem semper terræ particulas, eodem prorsus modo ac si iis affixa essent, perpendiculariter respiciant.

CAPUT X.

Ostenditur non repugnare dari Vacuum.

EX iis quæ jam de loco abundè disseruimus, simul quid Vacuum sit intelligitur. Quia verò prius, quid Vacui nomine intelligatur, explicandum est, antequàm de ejus possibilitate disputari queat; Utique priori loco notanda veniunt, quæ, §. XVII. à Cartesio differuntur; Deinceps verò progrediemur ad §. XVI. ubi, an vacuum dari repugnet, examinandum erit. De nomine sive significatione vacui sic incipit Cartesius §. XVII. *Et quidem ex vulgi usu per nomen Vacui non solemus significare locum vel spatium in quo nulla planè sit res, sed tantummodo locum in quo nulla sit ex iis rebus, quas in eo esse debere cogitamus. Sic quia urna facta est ad aquas continendas, vacua dicitur, cum aëre tantum est plena; Sic nihil est in piscina, licet aquis abundet, si in ea desint pisces; sic inane est navigium, quod comparatum erat ad vehendas merces, si solis arenis, quibus frangat impetus venti, sit onustum; sic denique inane est spatium, in quo nihil est sensibile, quamvis materia creata & per se subsistente plenum sit; quia non solemus considerare, nisi eas res quæ a sensibus attinguntur. Atqui si postea, non attendentes quid per nomina vacui & nihili sit intelligendum, in spatio quod vacuum esse diximus, non modò nihil sensibile, sed omninò nullam rem contineri existimemus; in eundem errorem incidemus, ac si ex eo quod usitatum sit dicere, urnam in qua nihil est nisi aër, vacuum esse, ideo judicaretur, aërem in ea contentum non esse rem subsistentem.*

Vacuum

Vacuum ex usu vulgi non excludere simpliciter & absolutè omne corpus verum est, & rectè à Cartesio observatum; Exempla quoque eo adducta satis sunt perspicua. Quod verò hîc interjectum videtur de materia, quæ non sit sensibilis, suprâ quoque ad §. VII. notatum fuit; adeoque, quod hîc addatur, nihil amplius requiri videtur. Quatenus ergò Vacuum sumitur pro spatio, in quo non est corpus aliquod, cui recipiendo destinatum putatur, quin tale detur in rerum natura nullus dubitat. Possêtque, meo iudicio, distinctionis gratiâ vocari Vacuum relativum, quia respicitur aliquod corpus, quod illi inesse vel debet, vel debere putatur.

Vacuum autem absolutè sumptum significat spatium, in quo absolutè nullum est corpus. Estque hæc significatio magis Philosophica & hujus loci. Et de hujusmodi Vacuo quæstio hoc loco examinanda venit, scilicet utrùm tale nullum esse rerum natura possit; seu, utrùm tale vacuum dari repugnet? Prænotandum autem hoc loco, Vacuum quidem excludere omne corpus, non tamen omne Ens, putâ immateriale. Præsupponimus enim jam omninò hîc ex Metaphysica, vel etiam ex Theologia, Deum esse infinitum atque immensum, adeoque nullum excogitari posse spatium, in quo non essentialiter existat. Quæstio ergò proposita procedit tantùm de spatio, in quo nullum est corpus, utrùm tale sit possibile, seu absque repugnantia esse possit? Equidem fateor negativam communiter ferè à Philosophorum vulgo, eorum imprimis, qui non ultrâ Aristotelem sapiunt, teneri; idque propter communem illum naturæ conatum, quem ad vacuum impediendum ipsam adhibere advertimus. Aquam enim metu vacui ascendere, aërem verò descendere videmus. Meo tamen iudicio affirmativa veritati magis est consentanea. Licet enim omninò, secundùm ordinarium naturæ cursum, nullum in inferiori hoc Mundo vacuum existere posse putem, propter rationem jam dictam; nullam tamen me hætenus rationem vidisse fateor, quare, præter aut contrâ naturalem sive ordinarium naturæ cursum, Vacuum nullum absolutè sive à creatura, sive à Deo creatore induci non possit. Præterea, cùm Mundus hic ab æterno non fuerit, utique spatium illud, in quo jam mundus existit, antequam existeret, corporis expers fuisse necesse est. Quemadmodùm etiam, cùm Mundus hic creatus finitus, limitatus atque circumscriptus sit, extrâ aut suprâ fines Mundi præter Deum nihil esse colligitur.

Sed, ne extrâ aut suprâ naturæ limites transcendere velle videamur, quamvis generali quodam naturæ conatu propter fugam vacui gravia, nempe

nempe aquam, ascendere, & levia descendere videamus; docet tamen experientia non tamen eam naturæ vim aut conatum infinitum esse, sed certo spatio determinatum. Compertum enim aiunt viri doctissimi, aquam in tubis & antliis supra 18. cubitos attolli non posse. Alii quoque ut vacuum de facto induci posse ostendant, construxerunt tubum vitreum quatuor vel trium duntaxat pedum, ex una parte planè & hermetice clausum, ex altera patentem. Hic autem, ea qua patet parte, repletur Mercurio sive hydrargyro totus; tùm orificium patens immergitur alteri Mercurio, qui vasculo continetur, quo fit ut nihil nec uno nec altero extremo subingredi possit, cùm unum plenè clausum sit, alterum crassissimo gravissimoque corpori immersum. Quid sit? Descendit nihilominus Mercurius in subiectum vasculum, & effluit non totus, sed ex parte, donec nempe ad altitudinem duorum duntaxat pedum & quadrantis pervenerit, ibi quasi suspensus hæret, partemque tubi superiorem reliquam, quantacumque ea fuerit, se vacuum relinquens.

Novo hoc certè exemplo & spectaculo variorum se exercuere ingenia. Nonnulli quidvis potiùs, quàm vacuum admittere volentes, dixere spatium, quod supra hydrargyrum in tubo vacuum apparet, reverà vacuum non esse, sed repleti vel spiritu hydrargyri, vel etiam aëre seu æthere tenuissimo, cujus subtilissimæ particellæ per vitri poros permeant ad replendum spatium à Mercurio desertum. Hoc autem ex eo ulteriùs confirmant, quod contentum in parte tubi à Mercurio deserta, calefactum expandat se ac rarefcat Mercurium magis deprimendo, quodque luminis radios admittat, ut patet.

Verùm enimverò ad utrumque hoc doctissimè respondet Vir nobilissimus Vossius, in tractatu suo de natura & proprietate Lucis, cap. ix. Et quidem ad primum illud, de spiritu hydrargyri, quo vacuum illud repleti dicunt, respondet: *Hoc si esset, jam pro ratione & copia egressentis ex hydrargyro Spiritus, dilataretur & comprimeretur spatium inane quod minimè fit.* Semper eandem servare altitudinem in tubis istis videmus Mercurium, & distantiam in linea perpendiculari à terra, idque pro ratione loci, in quo existit; ità ut pro altitudine loci magis vel minus semper descendat, ut idem Author docet, cap. xi. Ad alterum veò illud de æthere vel aëre subtilissimo similiter respondet, vitrum poros non habere, cùm fidelissimè eo custodiantur subtilissimi spiritus arte cinifonum extracti. Et si omninò ejusmodi pori admittantur, per quos aër vel æther ille spatium ab hydrargyro relictum ingrediatur, tunc hydrargyrum non posse suspensum hære illà, quâ dictum est, mensurà,

menfurâ, quia nempe deflueret ad æquale libramētum cum hydrargyro in vasculo extra tubum contento. Quemadmodum enim tubo non benè à parte superiori obturato, & aquâ repleto, omnis continuò aqua deflueret propter ingressum aëris; ità non est dubium, quin si aër, vel æther, vel aliud quodcunque corpus tenuissimum intrare posset, Mercurius summa cum gravitate continuò descenderet, neque in altitudine determinata tam constanter subsistere posset.

Insuper, quod calefacto tubo Mercurius deprimatur, & aliquantùm descendat, contrà verò applicitâ materiâ frigidâ expandat se, & aliquantùm ascendat, ad id idem respondet Vir nobilissimus hoc fieri à calore foris affluente, quo, non contentum vacuo, sed ipsæ hydrargyri partes tenuiores dissolvuntur, quæ dissolutæ & separatæ non totum pervadunt vacuum, sed, quia pondus habeat, infra subsistunt, arctissimæque cohærent hydrargyro, cujus superficiem eatenus disponunt & deprimunt, donec idem sit pondus hydrargyri cum incumbente vapore seu effluvio suo, atque antea erat solius hydrargyri. Fortè & hoc addi posset, hydrargyrum naturâ suâ esse valde frigidum, adeoque & calori inimicum: Vitro ergo calefacto descendere propter caloris fugam. Illud denique, quod de radiorum admissione additur, solutio patet ex iis, quæ de Natura luminis Philosophati sumus, Philosophiæ nostræ, *Lib. vii. Phys. Exerc. xxxi.* Lumen enim intrâ vitrum nullum admittimus, cum illud nuspiam nisi in corpore opaco visibile sit. Per vacuum autem corpus illuminari posse, nequaquam nobis absurdum videtur, ut nostra de Lumine explicatione constat.

Hactenus satis fusè & dilucidè sententiam nostram de Vacuo, ejusque possibilitate explicuimus; audiamus jam quomodò Cartesius in contrarium disputet, §. xvi. *Vacuum*, inquit, *Philosophico more sumptum, hoc est, in quo nulla planè sit substantia, dari non posse, manifestum est, ex eo quod extensio spatii vel loci interni non differat ab extensione corporis. Nam cum ex hoc solo, quod corpus sit extensum in longum, latum, & profundum, rectè concludamus, illud esse substantiam; quia omninò repugnat, ut nihil sit aliqua extensio: idem etiam de spatio, quod vacuum supponitur, est concludendum; quod nempe cum in eo sit extensio, necessario etiam in ipso sit substantia.* Quàm hæc omnia futilia sint, & inepta patet ex antedictis. Nempe universum jam Cartesii fundamentum subversum est. Putat ille nullam extensionem vel potius quantitatem posse excogitari absque materia; cumque spatium quoque absque extensione esse non possit, concludit vacuum, quod sit spatium omnis corporis expers, dari non posse.

Argu-

Argumenta nostra contrà hanc sententiam suprà allata sunt varia, eademque sufficienter confirmata, adeòque ulteriori hujus veritatis demonstratione hîc non est opus.

Quia tamen Cartesius, gravissimo ipsemet præjudicio occupatus & occæcatus, existimat hanc nostram sententiam ex præjudicio quodam inveterato esse ortam, etiam reliqua examinanda veniunt. Sic autem loquitur §. XVIII. *Lapsique sumus ferè omnes à prima aetate in hunc errorem, propterea quod non advertentes, nullam esse inter vas & corpus in eo contentum necessariam conjunctionem; non putavimus, quicquam ob stare, quò minùs saltem Deusefficiat, ut corpus, quod vas aliquod replet, inde auferatur, & nullum aliud in ejus locum succedat.* Errorem vocat Vir doctus id, quod jam ratione & experimentis verum esse demonstratum est, scilicet vacuum in rerum natura non esse impossibile. Nulla certè vas inter & corpus eo contentum necessaria fingi potest connexio. Et si unum corpus necessariam cum eo non habeat connexionem, quare aliud? Et quæ ratio majoris necessitatis connexionis cum uno, quàm cum alio? Quid denique obstat, aut quæ repugnantia, quò minùs saltem Deus efficiat, ut corpus, quod vas aliquod replet, inde auferatur, & nullum aliud in ejus locum succedere permittat?

Pergit Cartesius: *Jam autem, inquit, ut errorem illum emendemus, considerare oportet, nullam quidem esse connexionem inter vas & hoc vel illud corpus particulare, quod in eo continetur, sed esse maximam & omnino necessariam inter vasis figuram concavam & extensionem in genere sumptam, quæ in ea cavitate debet contineri: Adeò ut non magis repugnet nos concipere montem sine valle, quàm intelligere istam cavitatem absque extensione in ea contenta, vel hanc extensionem absque Substantia quæ sit extensa: quia ut sæpe dictum est, nihili nulla potest esse extensio.* Sed hîc iterum est sœdus ille paralogismus, qui dicitur Petitio principii, *καὶ τὸ ἀρχὴν ἀποβάνει.* Quæstio est, utrùm corporis essentia in nuda extensione consistat, ità ut corpus nihil aliud sit quàm extensum quid? Affirmat Cartesius. Hanc tamen sibi ipse dubitandi rationem superesse dixit, quod etiam in spatio inani extensio concipiatur, quod tamen non est corpus. Quam difficultatem ut tollat, Spatium illud in re à corpore non differre asseruit. Jam verò, cùm & hîc sibi ipse reponi posse advertat, omne corpus saltem à Deo ex spatio illo tolli posse, nullàmque spatium inter & corpus necessariam esse connexionem, sumit non posse extensionem esse aut concipi sine corpore. At verò non gratis sumendum erat Cartesio nullam prorsus extensionem absque corpore cogitari posse. Nos jam multis

multis argumentis hujus sententiæ falsitatem demonstravimus. Similiter & tenebris, & umbræ, & rebus apparentibus, speciebus sive apparentiis in aquis, speculis, aliisque corporibus politis extensio attribui solet; Nemo tamen ea corpora dixerit. Præterea, cum ipse Cartesius fateatur nullam esse connexionem inter vas & hoc vel illud corpus particulare, explicari mihi velim, cum quali ergò corpore extensio connexionem habeat? Hactenus certè cogitando assequi non possum, quænam sit illa extensio in genere cavitate aliqua contenta, quæ non sit hæc vel illa? Vel an datur fortè corpus aliquod genericum in rerum natura uspiam, quod hoc vel illo particulari deficiente illius locum suppleat? Et quis percipiat corpus aliquo spatio sive cavitate contentum esse extensionem in genere, & non in specie, seu potius in individuo hanc vel illam, hujus vel illius corporis definitè? Neque etiam repugnat nos concipere vallem inter duos montes, adeoque & distantiam sive longitudinem inter illos absque corpore aliquo intermedio. Ecquis enim corporum inter se distantiam dum considerat, de materia seu corpore intermedio cogitat? Vastissimum Expansi spatium concipio, siderumque distantiam immensam, utrùm verò omnia illa spatia corporibus repleta sint non ausim affirmare. Similiter ergò & cavitas inter vasis latera, adeoque & extensio absque corpore cogitari potest.

Denique Cartesius probè advertens negari non posse, quin Deus omne corpus ex aliquo vase auferre possit, omnèque aliud ab eo impedire; ipsemet sibi, quid tùm fieret, quæstionem proponit? *Ac proinde, inquit, si queratur quod fiet, si Deus auferat omne corpus quod in aliquo vase continetur, & nullum aliud in ablati locum venire permittat? Respondendum est vasis latera sibi invicem hoc ipso fore contigua. Cum enim inter duo corpora nihil interjacet, necesse est ut se mutuò tangant.* At quis vel acutissimus mortalium hæc capiat? Quomodò enim vasis latera se mutuò tangent, si vas sphericum fuerit, aut quadratum, aut rotundum? Vel quomodò aliud deinceps corpus posset recipere, si latera contigua sint? Vel, denique quare non posset Deus vas illud, ejusve latera retinere in eodem statu, eadèmq; figura, & tamen omne ex eo corpus remove-re? Respondet Cartesius: *Quia manifestè repugnat, ut distent, sive ut inter ipsa sit distantia, & tamen ut ista distantia sit nihil; quia omnis distantia est modus extensionis, & idè sine substantia extensa esse non potest.* Videtur Cartesius opinari omne non-Ens reale esse nihil, adeoque nondum agnoscere varia illa non-entium genera, de quibus in Metaphysica nostra fusè actum est, Exerc. III. & seqq. Et huc etiam referimus modos,

negationes, privationes, &c. Quæ, licet Entia non sint, non tamen propterea omnino nihil esse putandum est. Si ergo de distantia quærat, quid sit? responderi, meo iudicio, posset, eam esse vel negationem vel privationem. Nempe negatio contiguitatis vel propinquitatis est distantia; quæ igitur corpora non sunt contigua vel attigua, inter se vel à se distant. Et quis tam ineptus sit, ut, cum dico distantiam à A. & B. esse unius milliarii, corpus aliquod adeò extensum denotari existimet? Stellas, Planetas aliquod milliaria à Terra distare docent Astronomi, quis exinde corpora usque adeò extensa intermedia demonstraret? Non quidem aërem intermedium esse nego, at ex distantia id ipsum demonstrari posse non percipio. Et, si Deum aërem intermedium tollere vel destruere fingamus, quod sanè possibile esse nemo negaverit (omitto jam, quod multi Mundum hunc universum in iudicio extremo penitus annihilatum iri credant,) nunquid tunc omnia Astra Terræ forent contigua, eamve tangerent, quia nullum intermedium corpus? Atqui hoc impossibile esse vel ex eo apparet, quia globi ejusmodi permagni, quales Astrorum dicuntur, simul globo terrestri, attigui esse non possunt, ut consideranti manifestum est.

CAPUT XI.

*Rarefactionem non rectè à Cartesio confirmari ostenditur,
& qualis admitti possit.*

Postquam ergo me jam Luce clarius ostendisse arbitror corporis naturam non consistere in nuda aliqua vel generica extensione, eamque etiam spatio seu loco & vacuo, aliisque attribui posse, faciliè cognoscimus primum hoc Cartesianæ Philosophiæ fundamentum prorsus sublatum esse, & falsum, adeoque haud rectè ex eo confirmari quæ antea de Rarefactione aut Condensatione dicta sunt. Neque enim quæ vera sunt, falsis hujusmodi ut demonstrantur principiis, opus habent. Et quamvis Rarefactionem Aristotelicam, quæ in ejusdem numero materiæ aut particulæ mutatione, & quantitatis acquisitione consistit, rejiciamus, idem tamen corpus pororum dilatatione aut expansione majorem quantitatem aut magnitudinem acquirere posse, ex iis quæ suprà dicta sunt, est manifestum, & exemplum spongiæ ostendit. Licet igitur natura materiæ corporeæ non consistat in extensione, & vacuum saltem in subluari hoc mundo naturaliter nullum esse concedamus; adeoque & omne spatium corpore aliquo repletum esse, quo deturbato aliud naturaliter succedet.

succedat, libenter fateamur: Aërem tamen rarum, porisque variis, quibus vapores halitusque recipiat instar corbis ferè ex viminibus, vel reticuli funiculis contexti, refertum esse arbitramur, ità ut spatium solo aëre repletum minus materiæ contineat, quàm cùm vaporibus sive halitibus, vel etiam alia solidiori materia repletus existit. Experientia namque docet cubiculum, vel etiam vas quodlibet, undique clausum & obturatum aëre repletum etiam fumos & vapores superingredi posse; quod certè fieri non posset, nisi aërem ejusmodi poris frequentem esse statuamus, siquidem eodem in loco duo corpora esse nequeunt. Crassiora quoque & spongiosa corpora terrestria etiam aquæ ingressu in eorum poros rarefieri posse similiter experientia vel solius spongiæ demonstrat.

Falsum igitur est, quod Cartesius porrò nos cognoscere affirmat; *Fieri non posse, ut aliqua ejus (corporis) pars plus spatii occupet una vice, quàm alia, sicque aliter rarefiat, quàm modo ante explicato.* Quamvis enim hoc ipsum concedamus de minimis particulis sive atomis, quas Cartesius non admittit, de quibus mox agendum, de aliis tamen majoribus & compositis partibus falsum est, ut constat ex dictis. Et quid notius, quàm exiguam massæ vitreæ particulam in varias formas vitriariorum operâ extendi, quæ certè majus tunc spatium occupant, quamvis internè tamen plus aëris eas continere fatear. Spongiam quoque aëre vel vaporibus distentam majus spatium implere videmus, & quamvis non alio, quàm modo jam explicato, rarefactio fiat, non tamen propterea idem corpus majus spatium occupare, magisque extensum esse desinit. Similiter & exiguam auri particulam in bractæas tenuissimas, longissimas tamen & latissimas protendere norunt bractearii & aurifices; Ecquis autem laminas illas seu bractæas non magis extensas dixerit, quàm exigua illa auri particula, dum sub exigua illa & contracta forma apparebat?

Ex dictis quoque falsum esse apparet, quod deinceps Cartesius ait, *Fieri non posse, ut plus sit materia, sive substantia corporea in vase, cùm plumbo vel auro vel alio quantumvis gravi ac duro corpore plenum est, quàm cùm aërem tantum continet, vacuumque existimatur.* Certè vas aliquod plumbo vel auro repletum fenum intra se non admittit, quem tamen poculum vel vas aëre refertum admittere experimur; adeoque hæc Cartesi dicta experientiæ manifestè repugnant; unde & eadem clarè distinctèque percipi nequaquam posse manifestum est. Ego quidem sic judico, quo corpus aliquod constiterit materiâ magis solidâ atque compactâ, atomisque minutioribus, eo quoque illius plus eodem spatio de-

terminato vel vase contentum iri. Et hinc intelligi puto, quare unum corpus magis quàm aliud extendi queat, vel dilatari.

Unde & hoc denique falsum esse apparet, quod sequitur: *Quia parsium materia quantitas non pendet ab earum gravitate, aut duritie, sed à sola extensione, quæ semper in eodem vase est æqualis.* Nam quid hoc est: *Materia quantitas pendet ab extensione?* Quantitas enim & extensio idem sunt Cartesio. An ergo idem pendeat à se-ipso? Quantò accuratius in nostra sententia dici posset, Quantitatem ejusve extensionem, quæ modus quidam quantitatis est ab artifice dependere, quatenus corpora extensibilia variis modis extendere Solet. Quod autem materia in eodem vase semper æqualis maneat, ad rem parum facit, modò extrà vas majorem quantitatem accipere, magisve extendi possit, ut patet. Utut ergò Rarefactionis à Cartesio explicatæ modus à nobis admittatur, quàm frigidis tamen & infirmis ab ipso confirmetur argumentis jam visum est.

CAPUT XII.

Atomorum existentia demonstratur.

Quia gravissimam hoc loco, nec non utilissimam simul multorumque doctissimorum lucubrationibus nobilitatam de Atomis materiam attingit Cartesius, quas vera & genuina omnium corporum naturalium principia seu elementa esse statuimus, à quarum cognitione universa proinde Physica dependet; nostram priùs de Atomis sententiam, quam in Physica nostra latius explicuimus, atque ab omnibus adversariorum impugnationibus vindicavimus, paucis proponere, atque demonstrare operæ pretium esse videtur. Deinceps verò, nunquid solidi adversus eam à Cartesio hic proferatur, diligenter sumus examinaturi.

Primum autem nostrum pro Atomorum existentia argumentum desumitur ex eo, quod infinitus numerus, adeoque & infinitæ particule in corpore composito non dantur. Divisionibus ergò crebrò repetitis tandem necessario perveniendum est ad divisionem ultimam; & consequenter tales particulas, quæ ulterius dividi non possunt. Quia, si ulterius dividi possent, ultima nondum divisio fuisset peracta. Prætèrè, sic arguor: Prima vel ultima cuspidis alicujus particula vel est divisibilis vel non; Si posterius, habeo intentum, nimirum dari particulas indivisibiles seu Atomos. Si divisibilem dicas, quærò in quot partes? Et, si multas hîc partes esse dicas, quomodò potest esse prima vel ultima, de quibus quæstio erat instituta? Idem argumentum, de singulis, secunda,

secunda, tertia, quarta, media, aliisque fieri posset. Denique, Corpus aliquod sive planum sive sphaericum tangatur à pyramide, quæro an in particula divisibili, an verò indivisibili? Et cum in divisibili tangi dicere non possis, quia tùm pyramis vera non esset, utique in indivisibili tactionem fieri dicas necesse est: Dantur ergo in illo corpore particulae indivisibiles sive Atomæ, quod erat demonstrandum. Cum ergò quælibet corporis compositi sive continui pars à puncto seu indivisibili cuspidè tangi queat, utique nil nisi indivisibiles ejusmodi particulas in ipso existere manifestum est. Quodlibet ergò corpus compositum ex ejusmodi particulis conflatum esse consequitur.

Demonstratâ itaque nostrâ de Atomis doctrinâ, quâ nihil unquam verius in Philosophiâ naturali excogitari potest, & cujus ignorantia tam fœdi ac multiplices in ea errores prognati non tantùm, verùm & ad profundiorém rerum naturalium notitiam via præclusa est; siquidem cum nunquam scripturam aliquam aut librum probè lecturum manifestum est, qui literas primâque legendi elementa ignorat: Jam quid contrâ eam adferat Cartesius noster videamus. Sic autem ille procedit §. xx. *Cognoscimus, inquit, etiam, fieri non posse ut aliqua atomi, sive materia partes ex natura sua indivisibiles existant.* Error errorem trahit, & unus alterum sequitur. Nimirum omne corporeum aut materiale extensum quid esse supponit Cartesius, & omne extensum materiam sive corpus; adeoque in rerum natura concipi aut cogitari nihil posse, quod extensum non sit. Quia verò omne extensum divisibile, hinc jam nullum indivisibile esse aut dari posse concludit. At verò nos jam invictis argumentis probavimus Atomos non tantùm possibiles esse, verùm & easdem reverà existere in rerum natura; &, quod amplius est, cuncta corpora naturalia ex iis esse conflata. Cum enim omne compositum ex partibus compositum sit, utique partes ut sic omnes indivisibiles esse consequitur; id enim quod divisibile est, necessariò in partes divisibile est; quod verò in partes divisibile est, ut sic non partis, sed totius rationem obtinet, & compositum est. Partes ergò quâ tales indivisibiles sunt. Præterea, cum compositum partes suas actu contineat, (nisi enim actu eas contineret, in eas dividi non posset, nec divisibile esset) utique illæ partes numero sunt finitæ vel infinitæ. Si finitæ, ergò divisionibus factis & repetitis tandem necessariò ad ultimam, adeoque ad indivisibiles particulas est deveniendum, ut & suprâ dictum est. Si partes numero infinitas esse dixeris, ergò illud compositum nec accessione partium augeri, nec ablatione diminui poterit; quia augeri & minui infinito

repugnat. Denique, cùm compositum ante sui compositionem compositum non fuerit, quia per compositionem compositum evaluit; utique compositum ante sui compositionem res simplices, adedque & indivisibiles particulas fuisse, ex quarum conjunctione compositum exurgit, manifestum est.

Sed audiamus rationem ob quam fieri non posse existimat Cartesius, ut partes naturâ suâ indivisibiles existant. *Cum enim*, inquit, *si quæ sint, necessario debeant esse extensa, quantumvis parva fingantur, possumus adhuc unamquamque ex ipsis in duas aut plures minores cogitatione dividere, ac proinde agnoscere esse divisibiles.* Jam antea notavimus extensionis vocabulum haud satis accuratè attribui rebus aut corporibus non extensibilibus. Sed jam, ne de voce disputemus, concedamus & hoc Cartesio, Sit extensio quantitas quædam in longum latumque producta, sive, ut aiunt, trina dimensione prædita; quid tum inde? Atomose esse extensas? Nihil minùs. Utique si extensio quantitatem significet trina dimensione præditam, præterquam quod tunc nec linea nec superficies quantitates essent, nego absolutè Atomos extensas esse; hoc enim jam probandum est, non verò gratis sumendum. Quantitatis vocabulum fortè iis applicari posset, quæ tamen sit indivisibilis; extensionis aut magnitudinis nequaquam. Nam & quæ parva sunt ac minima quantitatem suam habere possunt, non tamen extensionem aut magnitudinem. Falsum quoque & illud, *Nos posse Atomos vel unamquamque ex iis in duas aut plures minores particulas cogitatione dividere.* Atomos enim particulas minimas statuimus, quas proinde ne cogitatione quidem nos minores facere valemus, quandoquidem, hoc ipso minimæ non essent, ut per se patet. Sicuti ergò rem compositam cogitatione nostra non possumus reddere simplicem, ita neque rem simplicem aut indivisibilem cogitatione possumus facere compositam aut divisibilem. Estque aperta contraditio rem quampiam ut minimam concipere, & tamen eam divisibilem statuere, quia hoc ipso quod minima, etiam indivisibilis. Et si cogitatione putarem dividi posse atomum sive particulam indivisibilem, hoc ipso cogitatio mea aut iudicium veritati repugnaret, siquidem dividi posse iudicaret, quod indivisibile est. Hactenus ergò verum est illud quod Cartesius dicit, *Nihil nos posse cogitatione dividere, quin hoc ipso cognoscamus esse divisibile; atque ideo, si iudicaretur id ipsum esse indivisibile, iudicium nostrum à cognitione dissentiret.* Nempe cogitatione dividere ipsi hîc est, cogitare rem aliquam actu & realiter dividi posse, seu habere partes realiter distinctas & separabiles. Alioquin certum est, multa
nos

nos mente & ratione dividere aut distinguere, quæ in re distincta aut separabilia non sunt; sed hæc Metaphysicæ potius sunt considerationis.

Quod porro dicit Cartesius, *Etiamsi fingamus Deum efficere voluisse, ut aliqua materia particula in alias minores dividi non possit, non tamen illam propriè indivisibilem dicendam fore*; id, inquam, omni rationi repugnat. Nam, præterquam quod hoc loco duntaxat agatur de corporibus naturalibus à Deo conditis, non verò de iis, quæ condere possit, mirari subit, quomoddò acutissimus hic Philosophus dicere potuerit particulam aliquam non fore indivisibilem, si vel Deus eam talem efficere voluisset, ut in minores dividi non posset; Quod enim ex voluntate Dei in minores dividi nequit particulas, id certè indivisibile esse necesse est.

Sed, pergit Cartesius: *Ut effecerit (Deus) eam à nullis creaturis dividi posse, non certè sibi ipsi ejusdem dividenda facultatem potuit adimere, quia fieri non potest, ut propriam suam potentiam imminuat*. Sed nunquid potentiam Dei diminutam fore non putabimus, si ipsi facultatem negemus, quâ Atomus aut particulas absolute & naturâ suâ indivisibiles creare possit? Res certè à Deo conditæ sunt istius naturæ, cujus easdem esse voluit. Sicut igitur unus homo singularis in duos dividi absolute non potest, absque ulla potentie divinæ imminutione; ita quoque una indivisibilis particula à Deo condita absque ejusdem potentie diminutione in duas aut plures dividi absolute non potest. Neque proinde Deus indivisibilia creando sibi dividendi facultatem ademit, aut potentiam propriam imminuit, quia ad contradictoria simul facienda nulla unquam potentia fuit in Deo, nec esse potest. Sicut ergò unitati repugnat, ut in plures numeros dividatur, quia sic unitas non esset; ita quoque atomus seu indivisibilis repugnat, ut in plures atomos seu indivisibiles particulas dividatur, quia sic atomus aut indivisibilis particula non esset.

Equidem fateor, non sequi corpusculum aliquod à Deo dividi non posse, quia à creatura dividi non potest. At verò, si aliquid à Deo dividi posse statuamus, neque illud eatenus rectè indivisibile dixerimus. Divisibile enim & indivisibile vocabula relativa sunt, & potentiam respiciunt. Si ergò & hoc largiremur, partes in rerum natura dari nullas ratione Dei indivisibiles, quid tum effeceris? Modò sint indivisibiles ratione potentie creatæ, nonne & istac ratione indivisibiles appellari poterunt? Nam & ea invisibilia dicere solemus, & imperscrutabilia, quæ ratione nostri (non Dei, cui nihil invisibile aut incognitum esse potest) videri aut investigari non possunt. Posset ergò & hoc concedi, dari ejusmodi

modi in rerum natura particulas aut atomos, quæ ut minores à Deo creari potuerunt, ita & per ejusdem potentiam dividi etiamnum absolute queant. Quin tamen à Deo & istæ ad indivisibilitatem reduci possint non videtur dubitandum. Sed, quia non agimus de iis, quæ per absolutam potentiam Dei, quæ nobis imperscrutabilis, fieri possunt; verum de iis, quæ jam facta & condita sunt, corporibus naturalibus, non videtur operæ pretium, ut hisce diutius immoremur.

CAPUT XIII.

Mundum non esse indefinitè extensum contrà Cartesium probatur.

Sed & alterum, quod ex dictis suis deducit Consectarium, non minus, ne quid gravius dicam, falsum est, quo nullos Mundum extensionis suæ fines habere asserit. Ne autem vocabulis perpetuò inhærere necessum sit, extensionis vocabulum accommodabimus ad omne id, quod non est indivisibile, quodque extrà punctum seu spatium indivisibile existere intelligitur. Hoc posito jam ipsum Cartesium differenter audiamus. §. XXI. *Cognoscimus præterea, inquit, hunc Mundum sive substantia corporea universitatem, nullos extensionis suæ fines habere.* Sicuti, fundamento infirmo constituto, Universum illi superstructum ædificium vacillare necesse est; perinde &, everso unico hoc de extensionis conceptu Cartesianæ Philosophiæ fundamento, reliqua ipsius asserta, magno tamen à multis cum applausu excepta, ultrò corrucere ex hisce percipitur. Equidem, si quælibet extensio formaliter corpus constitueret, non solum Mundus infinitus foret, ut rectè Cartesius colligit; Verum etiam Deus, cum infinitè extensus sive immensus sit, & extensionis suæ terminos non habeat, corporeus esset, juxta illud. 1 Reg. VIII. 27. *Ecce cæli ipsi, & cæli cælorum non capiunt te.* Quin imò ne tunc quidem quicquam ab ipso, quod extensionem haberet, creari potuisset. At verò, quoniam jam in præcedentibus satis superque extensionis hoc Cartesianæ figmentum refutatum sit, consectarium quoque hoc nullum agnoscimus, & tanquam falsum rejicimus.

Et reverà, si Mundus, extensionis suæ fines non habeat, utique nec primæ nec ultimæ in eo essent partes; adeoque nec medium esset aut centrum Universi, vel etiam esset ubique. Adde, cum neque majorem, neque minorem à Deo tunc condi potuisset; Non majorem, quia & tunc ultrà ipsius fines perinde ut nunc, similia spatia extensa concipi potuissent. Insuper, cum idem ante Mundum conditum spatium imagi-

nari

nari possumus, quod jam extra vel ultra Mundum concipitur; utique si spatium ejusve extensio corpus esset, jam ante Mundum conditum infinita corpora aut in infinitum extensa fuissent; quæ omnia, cum non tantum sanæ rationi, verum etiam fidei apertè repugnent, non est quod ulterius persequamur.

Sed, inquit Cartesius, *ubiquinque fines illos fingamus, semper ultra ipsos aliqua spatia indefinitè extensa, non modo imaginamur, sed etiam vere imaginabilia, hoc est, realia esse percipimus; ac proinde etiam substantiam corpoream indefinitè extensam in iis contineri.* An igitur extra aut ultra mundi fines, alia datur substantia corporea infinita? Quænam, quæso, substantia hæc corporea est, quæ extra fines Mundi in spatiis imaginariis contineatur? Et si contineatur in spatiis iis, quæ ibi verè imaginamur, quomodo ipsum spatium substantiam corpoream esse asseritur? Sed & hoc ex Cartesio audire velim, unde tandem hujus mysterii notitiam sibi comparaverit, nempe extra hoc nostrum cælum, aut supra ea, quæ in visum nostrum incurrunt, sidera in infinitum usque Substantias existere corporeas, quæ spatia ista, quæ supra visum nostrum esse imaginamur, repleant. Aut quæ tandem nos asserere cogit necessitas, Deum extra suas creaturas nusquam esse, & materia corporea quasi inclusum esse, aut circumscriptum teneri?

Sed videtur nescio quid subindicare Cartesius particulâ *indefinitè*: Neque enim corpus *infinîtè*, sed *indefinitè extensum* iis contineri spatiis asserit. Quid autem hoc rei est, *indefinitè extensum*? Vel enim illud (*indefinitè extensum*) infinitum est, vel non infinitum: Si infinitum, corpus ergò reverà infinitum erit, quod impossibile, ut jam ostensum est. Si non infinitum, ergò finitum. Quorsum ergò nos novo hoc suo vocabulo ludit Cartesius? Quod enim non est infinitum & terminorum experts, finitum est, habetque extensionis suæ terminos seu fines, ultra quos spatia, quæ nobis imaginamur, corporea esse non possunt. Frustrà ergò inter *infinîtum* & *indefinitum* distinguere velle videtur Cartesius; Siquidem *indefinitum* nihil aliud hoc loco esse potest, quam id, quod definitis terminis non continetur, quodque proinde finis sit experts, atque aded verè infinitum est.

CAPUT XIV.

An eadem sit Cæli, ac Terra totiusque Mundi materia?

PRæterea & aliud ex dictis colligit Cartesius non minus absurdum, Nempe omnium rerum materiam prorsus eandem esse, neque aliam esse posse, si vel infiniti crearentur mundi. Sic enim loquitur §. XXI. *Hincque etiam colligi facile potest, non aliam esse materiam cæli quam terræ: atque omnino si mundi essent infiniti, non posse non illos omnes ex una & eadem materia constare; nec proinde plures, sed unum tantum, esse posse.* Dolet certè tam præstantem Philosophum, & Philosophicæ libertatis amantiſſimum, tam turpiter impingere. Nam quid hoc est genus consequentiæ: Si infiniti essent Mundi, omnes eadem constarent materia, Ergò unus tantum Mundus esse potest. Quis unquam Philosophum dixerit, qui sic argumentetur? Quasi verò, quæ sunt ejusdem materiæ, diversa esse nequeant. Deinde, quis unquam percipiat, haud aliam cæli quam terræ esse materiam? Num ergò materia terrestris obscura, eadem quæ Solis aut Astrorum lucida? An lux idem cum tenebris? Nunquid Deum usque ad eò impotentem arbitrabimur, ut non aliam, quam nunc in hoc mundo cernimus, materiam creare potuerit? Profectò, sicuti Deum hæc in specie corpora, hæc animalia, has arbores, plantas, hos homines nulla necessitate, sed ex liberrimo suo arbitrio condidisse credimus; ità quoque ad hanc numero materiam condendam nequaquam adstrictum fuisse novimus. Potuit ergò Deus & alium, & plures condidisse mundos, & aliam materiam, modò ità ipsi visum fuisset; siquidem, teste Apostolo, *omnia operatur ex liberrimo voluntatis sue consilio Eph. i. 11.* Neque quicquam, quod non ex liberrima ipsius voluntate fiat aut existat, excogitari potest; quò spectat & illud *Apoc. iv. 11. Per voluntatem tuam sunt & creata sunt.*

Sed quæ tandem Cartesium cogit ratio, ut absolutam hanc materiæ necessitatem, aliàmque esse non posse, ut neque alios, neque plures mundos, asserat? *Quia, inquit, perspicuè intelligimus, illam materiam, cujus natura in eo solo consistit, quod sit substantia extensa, omnia omnino spacia imaginabilia, in quibus alii isti mundi esse deberent, jam occupare.* Nempe hoc est, quod dixi, ipsum Cartesium hoc jam suo præjudicio, & vano de extensione conceptu, usque ad eò occupatum esse, ut ingravissimos tandem errores, non rationi tantum, verum etiam fidei apertè repugnantes prolapsus sit. Jam enim evidentè demonstravimus, nec
materiam

materiam in sola extensione consistere, ut jam ipsam extensam dici posse concedamus; nec eam omnia omninò spatia imaginabilia extra Mundum, quem finitum jam esse ostendimus, limitibusque suis circumscriptum, occupare. Concipe amplissimum hoc Mundi spatium, illudque, quantum volueris, extende, quid vetat, quò minus spatium concipiamus millies & mille millies hoc nostro majus, in quo totidem proinde, pro infinita sua potentia Deus, mundos creare posset. Ecquis autem jam omninò illa spatia vel quævis imaginabilia absque fine, siquidem immensus est Deus, in quibus mille & plures Mundi creari & existere possent, ab hoc mundo jam omninò occupari somniet?

Præterea, destruat jam Deus omnia, quæ nunc videmus, astra in cælo, quod ipsius potentia infinita non impossibile esse scimus; & hujus jam mundi termini constituentur in cælo nobis propinquo aut atmosphæra terrestri infra Lunam; nonne tunc Deus iisdem in spatiis, in quibus jam astra existunt, novos, & plures, & alterius naturæ mundos, aut sphæras, aut orbes creare posset? Quis dubitet? Nam quæ ejusdem materiæ creandæ necessitas fingi unquam potest? Sed dicit Cartesius: *Nullius alterius materiæ ideam in nobis reperimus.* Sed primò, posito nullam aliam vel alterius materiæ ideam in nobis reperiri, nunquid exindè nec in Deo, cujus sapientia inexhausta est atque imperscrutabilis, aliam reperiri putabimus? Quæ ratio nos docuit, Similes in Deo, & nobis vermiculis existere rerum ideas? Aut quid nos credere coget, haud aliam à Deo condi posse materiam, quam eam, cujus jam ideam mente nostra percipimus?

Neque tamen id omninò verum est, unius tantùm materiæ ideam in nobis reperiri. Utut enim communis quidam materiæ detur conceptus, sicut & Entis, id sanè non arguit identitatem aut unitatem materiæ in omnibus. Eadem enim ratione & ego evincere possem, unam tantùm eandemque essentiam aut Entitatem in omnibus reperiri, quia communis quidam datur Entis conceptus aut idea, quæ omnibus respondeat. Sicut ergò communis Entis conceptus aut Idea non arguit unitatem aut identitatem essentiarum in omnibus Entibus, quæ existunt; perinde nec unitas illa universalis, vel communis materiæ conceptus, vel idea in mente existens non arguit unitatem vel identitatem materiæ in omnibus corporibus.

Sed quid hîc multis opus est? Nonne res ipsa docet aliam esse materiam auri, aliam argenti, aliam ignis, aliam aquæ, aliam aëris, aliam Solis, aliam Lunæ. &c. Quis benè sanus hæc omnia ejusdem esse materiæ existimet?

existimet? Aurum & aurichalcum, Argentum & stannum, "figura & colore externo vix differunt, quis tamen eandem utriusque auri & aurichalci, argenti & stanni materiam dixerit? Quis non diversam alimentum, ac veneno materiam inesse judicet? Falsum ergo est & illud, quod sequitur in Cartesio, §. XXI. *Materia itaque in toto universo una & eadem existit; utpote quæ omnis per hoc unum tantum agnoscitur, quod sit extensa.* Itane verò? Num materia ex hoc uno cognoscitur, quod sit extensa? Græco hoc fortasse persuaderi poterit, ut pro auro argentum vel plumbum eligat, modo ejusdem sint extensionis, videnti certè nunquam. Ego contrà judico extensionem vix aut parùm facere ad internam rei naturam pervestigandam. Cùm enim extensum esse, secundum Cartesium, omni corpori sit commune, utique ex eo nihil amplius de materia cognosci posse apparet, quam si Leonem aut Equum cognosci dixeris ex eo, quod sit corpus animatum, aut Animal, aut etiam Ens. Ut ergo conceptus generici non explicant naturam rei, sed generalem duntaxat aliquam formalitatem naturæ inexistentem; ità neque extensio naturam aut quidditatem materiæ aut corporis naturalis explicare potest. Corpora inter se diversa sunt, diversissimæque naturæ ac materiæ, ut jam dictum; ad eorum proinde cognitionem proprietatum cognitio necessaria est, tum sensibilem, coloris, odoris, saporis, &c. tum earum imprimis, quæ ratione percipiuntur, cujusmodi sunt virtutes agendi, quæ effectis innotescunt. Si quis quærenti, quid sit aurum, argentum, plumbum, &c. respondeat esse res extensas; Nunquid ipsum naturam istorum corporum explicasse arbitrabitur? Similiter & omnium Entium in toto Universo unam eandemque naturam esse arguere quis posset, & per hoc unum tantum agnoscere, quod existat. Sicut enim tu omne extensum materiam dicis, quamvis falsò; ità ego, & quidem verius, omne existens, Ens appello. Præterea, cùm, secundum Cartesium, extensio sit ipsa materia ne quidem ratione ab ea diversa, quomodò tandem per extensionem ea cognosci poterit? Nunquid idem per se ipsum cognoscas? Denique & hoc notandum, quod à nobis jam invicè demonstratum est, nec omne extensum esse materiam, nec omnem materiam esse extensam; siquidem Atomi sive minimæ corporum particulæ extensionem nullam obtinent, quia sunt indivisibiles. Concludo igitur materiam cognosci non per extensionem, sed per proprietates tum externas, tum internas sive agendi virtutes, in quibus vera uniuscujusque corporis natura & essentia consistit.

Sed, inquit Cartesius, omnes proprietates, quas in ea clarè percipimus, ad

ad hoc unum reducuntur quod sit partibilis, & mobilis secundum partes; & proinde capax illarum omnium affectionum, quas ex ejus partium motu sequi posse percipimus. Proprietatis vocabulo nihil aliud hoc loco intelligo, quam id, quod ita alicui inesse intelligitur, ut ab eo separari aut abesse prorsus nequeat; sic facultas ratiocinandi est proprietas hominis, attractiva ferri magnetis, &c. Hoc sensu proprietatem materiæ communem esse existimo, quod sit impenetrabilis; per hanc enim ab aliis omnibus sive Entibus sive non-entibus, quæ materiam non includunt, distinguitur, omnique materiæ & corpori verè & propriè convenit. Plures Spiritus in eodem loco esse non repugnat, at verò materia talis est, ut una vel minima particula in loco alterius esse nequeat; ita ut nihil magis materiæ proprium aut essenziale mihi videatur, quam ita esse in suo loco, ut omnem aliam materiam ex eo excludat. Præterea, cum Atomorum existentia satis superque jam à nobis demonstrata sit, omnèque corpus crebris divisionibus factis tandem ad minimas particulas redigi sit necesse, utique partibilitatem sive divisibilitatem compositis quidem corporibus convenire manifestum est, non verò simplicibus & Atomis. Non ergò, partibilitas vera est materiæ proprietas generalis, ut Cartesius existimat, sc. ex falsa sua hypothesi, quod materia nihil sit aliud, quam extensum quid. Insuper, divisibilitas nihil aliud esse videtur, quam posse dividi; estque proinde passivum quid, quod cum nihil ponat in divisibili, sed potentiam potius notet in dividente, utique haud satis accuratè proprietas corporis etiam compositi statui videtur; Proprietas enim positivum quid est, adedque aliquid ponit in subiecto, cujus proprietas dicitur. Similiter neque mobilitas, quæ quidem omni corpori attribui potest, aliud quid esse videtur quam posse moveri, quod non in mobili, sed in Movente duntaxat movendi vim arguit, ut consideranti clarum.

Quamvis autem mobilitas non sit positiva materiæ aut corporis proprietas, quia tamen omni corpori, ejusque particulis convenit, verum est, quod ex ea deducit Cartesius, *materiam capacem esse illarum omnium affectionum, quas ex ejus partium motu sequi posse percipimus.* Nihil quoque unquam verius à Cartesio dictum, quam *partitionem, qua sola cogitatione fit, nihil mutare*, nempe materiam aut corpus; Est enim conceptus sive cogitatio actio mentis interna, (quam vulgò immanentem vocant) cujus terminus sive effectum proximum menti inhæret, qua proinde extra mentem nullam mutationem rebus adfert. Falsum jamen est, quod mox subjicitur: *Omnem variationem, sive omnium ejus (materiæ) formarum diversitatem, pendere à motu.* Equidem si de exter-

na duntaxat figuratione corporum, seu figurarum mutatione sermo esset, concedi hoc posset Cartesio. Fatendum quoque nullam corporum naturalium generationem absque motu peragi posse. Variationem tamen etiam ab alteratione absque motu fieri posse, veluti cum ferrum aut lapis molaris frigidus & immotus virtute Solis vel ignis calefit, certum est. Cùmque materia corporum naturalium omnium non sit eadem, ut jam ostensum est; utique ab illius diversitate corporum quoque diversitatem dependere manifestum arbitror. Quod ergò aurum, argentum, plumbum, ferrum, aqua, vinum, &c. differant, certè non motui, formæ, aut figuræ, sed materiæ adscribendum est. Et si omnia corpora æqualiter moveri ponamus, nunquid propterea nulla inter ipsa foret diversitas?

Cùmque Naturam Philosophi dicunt esse *principium motus & quietis*; tunc certè per Naturam non motum ipsum intelligunt, sed principium illud internum, quo corpora naturalia sese movere & quiescere experimur. Nempe videmus corpora naturalia variis mutationibus esse obnoxia, ex semine videmus fieri herbam, quæ crescat, atque in thyrsum, frondes, flores, semen variè discriminetur: tum debitum nacta incrementum cessat augeri, tum paulatim eam minui videas, donec sensim marcescens arefiat, ac demum intereat. Animantia similiter videre est ex semine prognata crescere, varièque mutari, donec tandem senescentia in interitum facebant; idem de reliquis esto iudicium. Internum hocce motus, statusque rerum principium Naturam vocamus, quod à Deo omnium Conditor illud corporibus ab ortu & nativitate inditum sit. Non ergò Natura ipsa motus est in corpore aut quies, sed internum illud, quo se movet corpus & quiescit tandem, principium & causa efficiens.

CAPUT XV.

Utrum præter motum localem nullus alius detur in rerum natura.

Progredivor cum Cartesio ad considerationem Motus. Estque hujus rei cognitio Philosopho inprimis necessaria, siquidem absque eo nulla corporum naturalium nova generatio aut corruptio fieri potest. Cùm enim Atomis, ex quarum compositione corpus naturale generandum est, ante generationem ab invicem sint distinctæ, necessariò motus requiritur, quo particulæ inter se distinctæ in unum locum coeant, & istac ratione unum corpus naturale compositum constituere queant.

De Motu autem sic exorditur Cartesius §. xxiv. *Motum autem, (sc. localis,*

localis, neque enim ullus alius sub cogitationem meam cadit, nec etiam ullum alium in rerum natura fingendum puto) motus, inquam, ut vulgò sumitur, nihil aliud est quam actio, qua corpus aliquod ex uno loco in alium migrat. Fateor quidem nullam corporis generationem aut corruptionem absque motu locali intelligi posse; at verò omnia per hunc motum fieri, quæ fiunt in rerum natura non æquè certum est. Nam, ut de Spirituum seu animarum productione in corpore humano nunc taceam, etiam alteratio sine motu fieri potest, & illuminatio, & obtenebratio. Quid enim impedit, quò minus ferrum immotum aut lapis absque ullo motu Soli expositus calefiat? Aut quis motus concipitur in cubiculo meo, cum Solis radiis illius illustrantur parietes, iisdemque iterum privantur?

Pariter quoque incertum est, quod putat Cartesius, alium nisi motum localem in rerum natura nullum esse. Si enim hæc res paulò subtiliùs examinetur, etiam motum absque loci mutatione excogitari posse certum est. Quod vel imprimis verum esse patebit, si locum ex sensu Cartesii ex relatione ad alia corpora determinemus. Si enim ponamus totum hoc Universum à Deo conditum simul continuò moveri, absque omni mutatione situs partium in ipso, movebitur quidem ipsum Universum ex hypothesi, & tamen ipsum propterea loco suo non motum iri manifestum est, quia ad alia corpora novam relationem non accipiet, nec alia corpora vicina aut ambientia haberet. Similiter & de partibus Universi fixis, vel etiam uniuscujusque Totius seu compositi dici posset, eas moveri quidem cum Universo & suo toto, non tamen propterea eas mutari aut moveri suis locis; quemadmodum dum ambulo, omnia quidem corporis membra externa & interna moventur mecum, haud tamen rectè ea locis suis dimoveri dixeris. Motus ergò absque mutatione Loci cogitari potest. Præterea, ponamus corpus aliquod, putà Solis, immobiliter in loco suo existens, circumvolvi tamen circa suum centrum, constat quidem Solem motum iri circa suum centrum; vel etià ipsum centrum Solis, absque tamen ulla loci mutatione, ut patet. Motum ergò corporis absque loci mutatione fingi, eoque & corpus alterari & calefieri posse, apparet. Quia tamen hoc motu solo corpus nullum generari existimo, (nisi in quantum ut aliorum motuum causa & principium considerari potest, quia etiam Sol immobilis in suo loco permanens aliorum motuum localium causa esse potest) ægè dum per motum ad generationem requisitum nullum alium intelligamus, quam qui in mutatione mobilis ratione loci consistit.

Adeoque

Adeoque non rejicienda videtur vulgaris illa motus locatis significatio, qua dicitur *actio*, qua corpus aliquod ex uno loco in alium migrat. Neque enim aliud, quod motus localis sit excogitari potest; brevius tamen definiri posset, Mutatio corporis ratione loci; vel, transitus corporis de loco in locum. Cum verò Locus sumatur vel absolute, vel relative pro determinato aliquo spatio alicui corpori quasi affixo, ut suprâ Cap. VII I. docuimus; utique patet & hoc verum esse, quod Cartesius hic notat, *eandem rem dici posse & moveri & non moveri*. Scilicet non omnis motus localis est, ut jam modò dictum. Unde & intelligitur, cum, qui sedet in navi immotus, dum ea solvit è portu, absolute quidem moveri, quatenus de spatio continuo transit in spatium, quiescere tamen seu non moveri suo loco relative, quatenus semper eidem particulæ Universi, putà Navi quasi affixus manet. Et licet sic ex usu vulgi loqui soleamus, ut ait Cartesius, non tamen eò minus verum esse definit, ut jam ex iis quæ suprâ de Loco disseruimus manifestum est.

Sed jam, quid magis ex rei veritate per Locum intelligatur à Cartesio audiamus. Sic autem ipse de hac re disserit. §. xxv. *Sed si non tam ex vulgi usu, quam ex rei veritate, consideremus, quid per motum debeat intelligi, ut aliqua ei determinata figura tribuatur; dicere possumus, esse translationem unius partis materia, sive unius corporis, ex vicinia eorum corporum, qua illud immediate contingunt, & tanquam quiescentia spectantur, in viciniam aliorum*. Sed quid hic aliud quam priori illa descriptione, asseratur, hætenus non video. Quid enim vicinia illa corporum aliud esse potest quam Locus relative sumptus? Nempe ex vicinia unius corporis, id est, spatio huic corpori affixo, transfertur corpus in viciniam alterius corporis, id est, in spatium alteri corpori affixum.

CAPUT XVI.

Definitio Cartesii paulò pressius examinatur.

Quia verò hanc suam Motus definitionem priori longè meliorem, adeoque & præferendam existimat Cartesius, agendum, quomodo eam explicet audiamus. Notat autem primò se dixisse, Motum esse translationem, non vim vel actionem, quæ transfert. Deinde se addidisse ait, translationem fieri ex vicinia corporum contiguum, in viciniam aliorum, non autem ex uno loco in alium. Et denique translationem illam fieri ex vicinia, non quorumlibet corporum contiguum, sed eorum duntaxat, quæ tanquam quiescentia spectantur. Singula ordine

dine examinemus. De primo autem sic ipse procedit: *Dico esse translationem, non vim vel actionem qua transferi; ut ostendam, illum semper esse in mobili, non in movente, quia hac duo non satis accurate solent distinguere; ac esse duntaxat ejus modum, non rem aliquam subsistentem, sicut figura est modus rei figurata, quies rei quiescentis.* Si per Motum intelligamus formaliter & præcisè id, quo mobile actu movetur, quod vel essentialiter mobili vel adventitium esse potest, fatendum utique semper motum in mobili esse. Sive enim lapis propria gravitate descendat, sive impetu ipsi à projiciente impresso ascendat, semper principium formale istius motus in lapide est, cum hoc tamen discrimine, ut illud innatum sive naturale sit lapidi, hoc verò adventitium sive accidentale, ut patet. Et hac ratione Motum quoque veriùs translationem, vel etiam transiitum sive mutationem mobilis, quam actionem dici apparet.

Deinde & hoc verum est, Motum præcisè & formaliter sumptum non esse rem quandam subsistentem; Modum tamen esse rei haud dixerim, quia etiam absque mutatione modi corpus localiter moveri potest. Quis enim Solem vel Astra, si perpetuò ipsa moveri ponamus, continuò propterea modaliter mutari existimet? Similiter nec auri, nec argenti particulam ex loci mutatione modaliter mutatam esse apparet. Non ergò Motus Modus est duntaxat, ut vult Cartesius. Figura modus est rei figuratæ: Quies verò nihil aliud quàm vel cessatio vel negatio motus esse videtur, Vel etiam permanio seu subsistentia rei in eodem loco. Nempe, cum corpus moveri desinit, aut non movetur, illud quiescere dicimus. Similiter & illud corpus quiescere arbitramur, quod immobiliter in determinato aliquo spatio, seu loco suo relativo permanet, licet illud cum universa corporum ambientium vicinia in alium locum moveatur.

Ut autem totum hoc negotium rectiùs percipiatur, notandum est, ut Locum, ità & quietem ac motum sumi posse, vel absolutè, vel relativè. Quiescere absolutè dicitur, quod immobiliter in eodem spatio, seu spatii particula permanet. Quiescere verò relativè dicitur, quod permanet in eodem spatio relativo, quod alteri corpori quasi affixum est. Similiter & moveri absolutè dicitur, quod non permanet in eodem spatio absolutè sic dicto, sed inde transfertur in aliud; moveri verò relativè, quod non permanet in eodem spatio relativo. Exemplo res fiet clarior. Homo in navi dormiens, provehatur motu æquabili cum navi ex una civitate in aliam; Homo iste dici posset & moveri & quiescere, & non quiescere & non moveri simul. Quiescere ipsum dicemus & non moveri relativè, quatenus in eodem navis loco, seu spatio eidem parti navis

H

quali

quasi affixo immobilis permanet. Non quiescere verò ipsum & moveri dicemus absolute, quatenus in & cum navi ex una spatii immobilis particula transit in aliam. Et hinc patet, Quietem non tantum dici posse Negationem vel privationem motus, quamvis ita sæpè loqui soleamus, verum etiam, ut rectè Cartesius, Modum quendam rei quiescentis, quo in eodem loco seu Ubi permanere intelligitur. Motus tamen non satis accurate Modus dici posse videtur, quia est ipsissima moventis seu virtutis motricis (quæ vel innata vel aliunde impressa esse potest) actio, quæ transit de loco in locum. Modus autem non tam intrinsecè rem afficit, sed extrinsecè duntaxat eam quasi modificat, ut sessio, statio, &c.

Ut tamen suam hanc opinionem confirmet Cartesius, notandum esse ait, §. xxvi. *nos magno in hoc præjudicio laborare, quod plus actionis ad motum requiri arbitremur, quàm ad quietem.* Equidem, quid hæc consideratio ad præsens faciat negotium, fateor me non capere; sive enim plus sive minus sive tantundem actionis requiratur ad quietem, quàm ad motum, quid inde concludas? Ego quidem sic judico, non minori potentia opus esse ad quietem inducendam in ea, quæ naturâ suâ moventur, quàm ad motum eorum, quæ naturâ suâ quiescunt. Neque enim minor potentia requiritur ad cursum Solis sistendum, si moveri ipsum ponamus, quàm ad motum ciendum, si ipsum in loco suo immobilem putemus. Interim & hoc notandum est, corpora naturâ suâ quiescentia & locis suis permanentia, ut lapides in terra, per se quiescere, & absque vi motrice ejusve actione moveri non posse, mota verò tandem iterum per se ad quietem reversura. Cùm enim impetus, quo hujusmodi corpora moventur, sit accidens, & verò accidentia, ut ex nihilo fiunt, ita & in nihilum abeant, utique & corpora naturaliter quiescentia suo loco, si moveantur, ultrò tandem ad quietem suam reversura intelligitur. Si autem quæstio moveatur de eodem mobili, Ex. gr. hoc globo, si moveatur per terram; concedo ad cursum vel motum illius sistendum tantundem requiri potentie, ac in ipso ipsius resistentie puncto impetus ipsi est reliquum. Si enim minor in corpore resistente sit potentia vel vis resistens, motus omnis non tolletur, ut patet.

At verò, nunquid hinc colligitur Motum esse modum duntaxat? Nihil minus. At, inquit Cartesius, §. xxvii. *manifestum est, hoc corpus, nempe translatum, alio modo se habere, cum transfertur, & alio cum non transfertur, sive cum quiescit: adeo ut motus & quies nihil aliud in eo sint, quàm duo diversi modi.* Verum negatur primo consequentia. Homo cæcus alio se habet modo quam visu præditus, & doctus alio se habet

habet modo quàm indoctus, quis tamen exinde cæcitatem vel vîsum, doctrinam vel ejusdem carentiam duntaxat modos esse dixerit? Deinde, nec hoc aded certum est, mobile motum semper alio se habere modo quàm immotum aut quiescens; sive enim Solem moveri putes, sive immobilem ponas in loco sibi à Deo assignato, eodem se habebit modo, neque hinc ulla modalis in ipso mutatio argui posset.


Alterum in Definitione Cartesii notandum erat, quod dixerat Motum esse *translationem ex vicinia corporum contiguorum in viciniam aliorum, non autem ex uno loco in alium*. Et quare? Quia, inquit §. XXVIII. *Loci acceptio varia est, ac pendet à nostra cogitatione*. Sed si Locum sumamus pro eo spatio, quod à libera mentis nostræ actione determinatur, ut aliquandò sumi suprâ Cap. VIII. notatum est, nonne & eodem modo de Vicinia Philosophari possumus? Nonne & illa diversimodè à mente determinari potest? Deinde, Locum magis Philosophicè sumptum non pendere à libera mentis determinatione satis constat ex dictis; siquidem Locus semper est spatium illud, in quo corpus existit, quàmvis relativè communiter spectari soleat illud spatium, quod alteri corpori quasi affixum est. Denique, quid per viciniam hanc corporum contiguorum aliud intelligi potest, quàm corpora circumstantia sive circumcingentia? At illa corpora circumstantia non sunt locus, sed spatium potiùs, quod inter illa corpora interjectum esse intelligitur, locus est. Accedit, quod omnia corpora illa circumstantia, adedque tota corporum vicinia, tolli possint, immoto tamen manente corpore in suo loco. Nam quid si omnia corpora circumstantia à Deo annihilari ponamus, nunquid propterea corpus illud in loco suo esse definet? Vicinia ergò corporum proximè contiguorum absolute Locus dici nequit; adedque nec satis accurate Motus per translationem ex vicinia corporum proximè contiguorum explicari à Cartesio videtur.

Vanum ergò & illud est, quod se denique addidisse dicit, *translationem illam fieri ex vicinia, non quorumlibet corporum contiguorum, sed eorum duntaxat, quæ tanquam quiescentia spectantur*. Nam, quid hoc est, corpora contigua spectantur tanquam quiescentia? Vel enim ista corpora verè quiescentia sunt, vel non: Si verè quiescentia sint, quid opus est, ut in definitione addatur, ea ut talia spectari? Quidve ad rei explicationem facit, quomodò ipsa à mente nostra spectentur? Mentis certè oculus nullam rei mutationem infert. Si verò illa corpora quiescentia non sint, quomodò ut talia verè spectari aut judicari possunt? Certè, qui res motas, ut immotas aspicit, fallitur; adedque nihil veri ex tali judicio ex-

spectandum est. Si tu aërem turrem hanc proximè ambientem, eive contiguum ut quiescentem spectes, Ego ut moventem specto, quid jam ex tuo istoc falso judicio conficias? Aut quomodò mihi Loci naturam claram aut perspicuam reddideris, si ex falso tuo judicio eum mihi explicare fueris aggressus?

Ecquid verò absurdius unquam cogitari potuit, quàm statuere translationem esse reciprocam, quod hîc ait Cartesius, nec posse intelligi corpus *AB*. transferri ex vicinia corporis *CD*. quin simul etiam intelligatur corpus *CD* transferri ex vicinia corporis *AB*: Ac planè eandem vim & actionem requiri ex una parte atque ex altera. Ecquis enim unquam usque adedò insanierit, ut, alterutro duorum corporum contiguorum moto, simul utrumque moveri existimet? Mirum, ni qui sic sentiat, vel ad motum pedis sui simul & universum Mundum, cui insistit, moveri arbitretur; Nam, dum ipse movetur in occidentem, pars illa terre, in qua subsistebas, movebitur versus orientem. Similiter, si quis urbes turesque præterierit, non tantùm ipsum, verùm etiam tures urbesque moveri cum ipso dicendum erit; juxta illud:

Provehimur portu; terraque urbesque recedunt.



Si quis ergò moveret corpus *AB* versus *E*, non propterea moveretur corpus *CD* versus *H*. quia eodem in spatio inter *G* & *H*. interjecto, permaneret. Falsum, ergò & illud, eandem planè vim & actionem requiri ex una parte, atque ex altera; Quia nulla vis nova aut actio in corpore *CD*, quod non movetur, cogitari aut intelligi potest, cùm tantùm *AB* moveri supponamus. Translatio ergò non est reciproca, nec ex translatione unius sequitur translatio alterius, ut patet.

Ipse itaque Cartesius hanc sententiam nimium à communi loquendi usu (at quare non potius ab ipsa rei veritate?) abhorrere probè advertens, non ad cujusvis terre partis motionem terram moveri debere docet. Cùm enim, inquit, *assuesi sumus stare in terra, eamque ut quiescentem considerare,*

derare, quamvis aliquas ejus partes aliis minoribus corporibus contiguas ab eorum vicinia transferri videamus, non tamen ipsam ideò moveri putamus. Utrum Terra in universi centro immota persistat, nec ne, jam non disputamus. Hoc tamen in sententia Copernici certum est, Nullius rei aut corporis in terra quietem absolutam aut immobilitatem nos imaginari posse; Siquidem ad motum totius, singulas quoque partes absolute moveri, necessum est. Quia verò Locus plerumque solet accipi relative, ut suprà notatum est, utique non terram, de cujus motu aut quiete non cogitatur, sed corpora vel homines in Terra moveri vulgò dicere solemus, quotiescunque certo ex aliquo Terræ spatio, in quo existebant, egrediuntur aut transferuntur. Et si vel omninò Terram ut mobilem & moveri actù consideraremus, non tamen propterea alia corpora, aut partes terræ affixas moveri aut motum iri sequeretur; quia nempe istæ partes in eodem tamen loco relative sumpto immobiles permanerent. Quemadmodum etiam suprà Cap. VIII. dictum est, ad motum totius navis omnes illius partes clavos aut asseres loco suo moveri non sequitur, cum semper in eodem navis spatio immobiliter permaneant.

Et reverà, si corporum contiguorum moto uno A B versus orientem, simul moveretur & aliud C D versus occidentem, & propter illam separationem tantundem esset motus in uno ac in altero, sequeretur propter eandem rationem corpus C D. moveri versus orientem, si



nempe tertium corpus ab H. moveretur in G. Præterea, si quoque corpus ex H. moveri ponamus versus septentrionem in F. dicendum quoque C D motum iri versus Austrum; Et si quoque aliud ab E. moveretur versus Austrum in G. corpus C D. moveretur quoque in Septentrionem; Ac proinde idem corpus immobiliter loco suo existens, eidemque terræ spatio affixum simul & quiesceret, & in omnes plagas terræ moveretur. Quæ omnia, cum


absurda sint, manifestum evadit, vicinorum corporum translationem

motum in corpore non arguere, & corpus aliquod posse esse immobile, etiamsi alia corpora contigua sibi vel vicina accipiat. Mirum ergò est, quod nos hîc velit recordari Cartesius §. xxx. *id omne, quod reale est ac positivum, in corporibus qua moventur, propter quod moveri dicuntur, reperiri etiam in aliis ipsorum contiguis, qua tamen ut quiescentia tantum spectantur.* Id enim quo corpus actu movetur est aliquid ipsi impressum sive à natura, sive à movente externo; Ecquis verò omnibus aliis corporibus contiguis & quiescentibus tale quid impressum esse dixerit? Si imprimatur aliquid corpori A B. quo moveatur versus Orientem, nunquid propterea aliquid corpori C D imprimi putabimus, quo moveatur in Occidentem? Quis sanus ita Philosophetur?

Cùmque in Universo continuò diversi contrariiue motus reperiantur, utique & omnia corpora perpetuò multis, iisdemque sibi mutuò contrariis, motibus repleta esse, & moveri consequeretur, sursum, deorsum, dextrorsum, sinistrorsum, &c. Agnoscit quoque hanc sequelam Cartesius, §. xxxi. *Etsi autem, inquit, unumquodque corpus habeat tantum unum motum sibi proprium, quoniam ab uno tantum corporibus sibi contiguis & quiescentibus recedere intelligitur, participare tamen etiam potest ex aliis innumeris, si nempe sit pars aliorum corporum alios motus habentium. Ut si ambulans in navi horologium in pera gestet, ejus horologii rotule unico tantum motu sibi proprio movebuntur, sed participabunt etiam ex alio quatenus adjuncte homini ambulanti unam cum illo materie partem component, & ex alio quatenus erunt adjuncte navigio in mari fluctuanti, & ex alio quatenus adjuncte ipsi mari, & denique alio quatenus adjuncte ipsi terre, siquidem tota terra moveatur: Omnesque hi motus reverà erunt in rotulis istis; sed quia non facile tam multi simul intelligi, nec etiam omnes agnoscì possunt, sufficiet unicuique illam qui proprius est cujusque corporis, in ipso considerare.* Fateor quidem diversos in uno eodemque corpore motus considerari posse, ut exemplo allato satis manifestum videtur? at verò nego istos motus oriri ex contiguitate corporum. Non sanè contiguitas istorum corporum causa variorum motuum censenda est, sed motus vel impetus istis corporibus impressi, qui similes aliis sibi contiguis imprimunt, quemadmodum corpus calidum calorem in corpore alio sibi contiguo producit. Sicuti ergò corpus, si ab una parte connexum sibi habeat corpus frigidum, ab alia verò parte calidum, ab uno quidem frigefieri, ab alio verò calefieri, adedque contrarias qualitates, ex quibus mixta quædam oriatur, quæ tepor dicitur, suscipere potest; ita quoque corpus mobile, si ab uno moveatur versus Orien-

tem;

tem, ab alio versus aliam partem, putà Austrum vel Septentrionem, mixtum quendam quasi motum accipiet; qui tamen pro uno ac simplici motu haberi potest. Imprimis, si unumquodque corporis punctum, quod movetur, unam tantum aliquam lineam motu suo describere cogitemus, ut rectè quoque à Cartesio notatur §. xxxi. Ex. gr. Corpus



aliquod ab A. moveatur versus Orientem B. & simul ab alia causa moveatur versus Austrum C. manifestum est, quod corpus illud suo motu describet lineam AD. Ubi notandum hujusmodi lineam describi à qualibet corporis mobilis particula. Unde, si hoc negotium paulò subtilius expendatur, cum corpus naturale variis & innumeris constet particulis seu atomis, & verò ex Atomis unius ductu oriatur Linea, utique ad motum corporis cujusque singulas quoque illius particulas seu atomos moveri certum

est; unde &, pro numero atomorum seu particularum, totidem ab eo corpore lineas describi imaginari nobis possumus. Discrimen quoque linearum, adeòque & motuum facile adverti poterit, si modò ad globum circulariter motum circa suum centrum attendamus. Manifestum enim est particulas centro propiores minores circulos descripturas, & quò remotiores, eò quoque circulos majores fore. Et si per planum moveatur à centro rectam duntaxat lineam descriptum iri, à reliquis verò spirales, gibbosas, curvas, &c.

CAPUT XVII.

An omnis Motus fiat per circulum?

Pergit Cartesius, & ex eo, quod omnia Loca corporibus plena esse notaverat, semperque easdem materiæ partes æqualibus locis coæquari, aliud Confectarium deducit §. xxxiii. sc. *Nullum corpus moveri posse nisi per circulum, ut à scilicet, ut aliud aliquod corpus ex loco quem ingreditur expellat, hocque rursus aliud, usque ad ultimum, quod in locum à primo derelictum, eodem temporis momento, quo derelictum est ingrediatur.* Fatendum sanè est, si omnia absolute spatia mundana corporibus

de aëre notatum, cum esse corpus non tantum tenuissimum, verum etiam rarissimum & porosum, ita ut in ipso omnium aliorum corporum motus facillimè terminari & finiri queant. Nempe unâ aëris particulâ motâ, non necesse est omnes propterea illius particulas motum iri, sic enim vel minimus motus in infinitum extendendus foret, sed paulatim ille motus pro natura accidentium desinit. Exemplo spongiæ hoc manifestum est. Neque enim, prioribus spongiæ particulis leviter motis vel pressis, necessum est ut reliquæ omnes sequentes in linea rectâ moveantur; quia particulæ priores, propter poros dissitæ, isto motu duntaxat vel pressione fiunt propinquiores, aëre scilicet vel aqua exiis expulso. Ubi tamen notandum est, ut particulæ spongiæ post pressionem mox ad locum suum redeunt, aëremque iterum poris suis recipit; perinde & aërem premi quidem posse ad angustius spatium, semper tamen ad pristinum suum locum aut naturalem amplitudinem redeundi conatum habere, & tunc similiter fumum, vapores, & exhalationes poris suis recipere posse. Sic cubiculum vel conclave aëre repletum fumum insuper & vapores in se recipere, iisque impleri videmus, quod absque ejusmodi in aëre poris fieri non posset. Quemadmodum vas aquâ plenum, licet quoque corpus sit fluidum, tamen propter hujusmodi pororum defectum fumum aut exhalationes non recipit. Et ne, cum ingressu hujusmodi exhalationum aut fumi in cubiculum, aërem egredi existimes, notandum est, etiam fumum posse causari in vase vel lagena vitrea optimè obthurata & clausa. Deinde, cum jam extra cubiculum omnia spatia aëre repleta sint, nullus sanè extra cubiculum locus aëri egredienti recipiendo foret, si porosus non esset, vel ad angustius spatium comprimi prorsus nequirit.

Posito motu circulari etiam per circulos inæquales, colligit deinceps Cartesius divisionem materiæ in partes infinitas; quod si minimas dixisset, rem acu tetigisset. Posito enim motu mobilis vel corporis alicujus per spatium aliquod continuò angustius protensum, utique à mobili istoc vel corpore continuò separentur particulæ minimæ, quò progredi possit, necessum est; adeoque & dari Atomos sive particulas reverà minimas consequitur. Sed ipsum Cartesium audiamus. *Fatendum, inquit §. xxxiv. est, in motu isto aliquid reperiri, quod mens quidem nostra percipit esse verum, sed tamen, quo pacto fiat, non comprehendit, nempe divisionem quarundam particularum materiae in infinitum, sive indefinitum, atque in tot partes, ut nullam cogitatione determinare possimus tam exiguam, quin intelligamus, ipsam in alias adhuc minores reipsa esse divisam.*

Equidem quod hic incomprehensibile sibi ait Cartesius, & tamen verum esse mens percipiat, neque à me comprehendere aut percipi posse lubens fateor. Equis enim capiat particulas materiæ in infinitum sive indefinitum esse divisas, sive in tot partes, tamque exiguas, quin adhuc in minores reipsa divisæ intelligantur? Nimirum, cum præjudicio hoc occupatus sit Cartesius, (sc. particulas individuas aut minimas, quas Atomos vocamus, non dari in rerum natura, aut dari posse) in labyrinthum hunc incidisse ipsum, unde se expedire nequeat, certum est. Si Atomos dari, quo nihil unquam verius in Philosophia dici potest, agnovisset, in hæc nunquam sibi inexplicabiles tricas fuisset prolapsus. Et cum nihil in Philosophia statui velit, quod non clarè & distinctè verum esse perceperimus, mirandum sanè, quod in ipso hoc suæ Philosophiæ vestibulo velit credi, quod ipsemet incomprehensibile sibi fatendum ait. Sed quis vel acutissimus percipiat aut credat partes cogitatione minimas in alias adhuc minores reipsa divisas esse? Hæc enim apertè repugnant. Quod enim cogitatione mentis ut maximè exiguum sive minimum determinatum est, eadem cogitatione ut minus aut divisibile, aut actu divisum percipi non potest. Hoc namque esset cogitare aliquid esse minimum & non minimum, ut evidens.

Quantò ergò nos clariùs, ut infinitum in rerum natura numerum non dari posse percipimus, ità & particulas corporum actu infinitas nequaquam dari posse evidentissima ratione demonstramus; quia nempe in corporum divisionibus crebrò repetitis tandem necessario ad ultimam deveniendum est, quâ positâ necessariò quoque particulas divisas minimas esse atque indivisibiles consequitur, ut suprâ Cap. XI. ostensum est. Et profectò, cum ex suis ipsius assertis sequi statuat Cartesius, nullam partem adedè esse exiguam, quin intelligamus ipsam in alias adhuc minores reipsa divisam esse; nonne in promptu est colligere, ipsum & minimarum particularum existentiam vel invitum agnovisse, cum alioquin vanum esset, quicquid jam de motu suo circulari erat Philosophatus. Monendum tamen hic est, nos ad Atomorum existentiam demonstrandam hujusmodi collectione opus non habere. Et licet in corpore atomos sive particulas indivisibiles statuamus, easdem tamen numero finitas esse asserimus, quamvis ratione nostri, propter nimiam exilitatem, innumerabiles, & propter multitudinem innumeræ, dici queant; quomodo & arena maris, & astrorum numerus, qui tamen in se definitus, innumerabilis S. literis nuncupatur.

Deinde & hoc notandum est, ut magna ità & minima corpuscula de-

ter-

terminata sua in mundo seu spatio mundi habere spatiola, in quibus existant. Nempe, ut de majoribus, ita & de minoribus & minimis tunc corporum, tunc loci sive spatii, atque temporis particulis Philosophandum esse arbitramur. Falsa ergo & illa sunt, quæ Cartesius narrat de spatio, & spatiis innumeris gradibus minoribus. Si enim essent spatia, quæ innumeris gradibus aliquo essent minora, qui tandem illud spatium posset pertransiri? Et quomodo per infinitos illos gradus posset unquam vel imaginando perveniri ad finem? Profecto, sicut numerando nemo unquam ad infinitum numerum perventurus est, ita quoque corpus movendo per spatia minima nunquam ad infinitum eorum numerum perveniret, adeoque nec spatium illud, in quo spatia infinitis gradibus minora finguntur, pertransibit.

Hicce ergo de infinitis sive particulis, sive divisionibus, sive spatiolis, sive spatii gradibus rejectis, unicum adhuc hic notandum videtur, quod Cartesius distinguit inter *infinitum* & *indefinitum*, (scilicet, ut supra §. XXI. quoque Mundum dicebat esse *indefinitè extensum*) videturque malle, quam hic fingit divisionem, appellare *indefinitam*, quàm *infinitam*. Intellexit procul dubio Vir acutissimus, divisionem infinitam esse impossibilem, & contradictionem involvere, eam proinde difficultatem ut evaderet, *indefinitam* appellare maluit. Sed hæc consideratio vana est. Ista enim, quocunque tandem nomine vocitetur, divisio indefinita divisiones continet vel numero infinitas, vel non. Si infinitas dixeris, quæro quomodo finiri queat? Numerus enim infinitus non potest pertransiri, & qui transitor, hoc ipso infinitus non est. Si ergo divisiones sint finitæ, sive si divisionum numerus finitus sit & finem habeat, quare non finitam divisionem vocat Cartesius? Concludimus igitur divisionem in indefinitum nullam esse, & non dari in rerum natura, aliàmque quàm finitam excogitari non posse. Sed de hisce, adeoque & de Principiis Cartesianæ Philosophiæ dicta sufficiant.

CAPUT XVIII.

De Causa prima Motus.

PROgreditur deinceps Cartesius ad considerationem Causæ, de qua sic loquitur, §. XXXVI. *Motus naturæ sic animadversæ, considerare oportet ejus causam, eamque duplicem: Primò scilicet universalem & primariam, quæ est causa generalis omnium motuum, qui sunt in mundo; ac deinde particularem, à qua sit, ut singula materia partes motus, quos*

prius non habuerunt, acquirant. Communis quidem hæc est Causæ distributio in Universalem & Particularem. Universalem vocant, quæ eâdem efficientiâ cum aliis causis concurrat ad plura effecta; Particularem verò, quæ suâ efficientiâ tantum unum effectum producit. Hæc tamen divisio semper mihi, ut verum fatear, suspecta fuit, & multis modis inutilis visa. Nam primò, per hanc divisionem Deus nunquam Causa particularis appellari posset, cum semper ad varios effectus producendos cum creaturis suis concurrat. Adde, non satis tutum videri, Deum alicujus effecti statuere causam universalem, & non particularem, cum particulari suo influxu quælibet effecta attingat. Neque etiam sufficiens videtur esse ratio, quare homo dicatur Causa particularis hominis à se geniti fortè ex ignorantia & præter intentionem, & non ædificii à se constructi, aut libri à se compositi ex prævio mentis consilio. Præterea, si Causa universalis dicenda sit, quæ ad plura effecta concurrat, omnes ferè Causæ universales erunt; sic Rex erit Causa universalis omnium eorum, quæ à suis ministris ex ipsius imperio peraguntur; Petrus erit Causa universalis diversarum actionum, putà volitionis, intellectus, locutionis, ambulationis, &c.

Quod si quispiam per Causam universalem intelligat, quæ unico duntaxat eodémque influxu cum causis particularibus sibi subordinatis concurrat ad plures effectus, quatenus nempe ille influxus à diversis causis subordinatis, ad varios & particulares effectus pro ratione naturæ suæ, determinatur; quemadmodum eodem statu omnes organi tubos impleri videmus, qui tamen singuli diversum sonum efficiunt: Respondeo, hoc sensu et si concedi possit in rebus creatis quasdam esse causas universales, quæ sæpissimè uno eodémque influxu ad varios effectus concurrant, ut exemplo allato constat; Nunquam tamen Deum istac ratione Causam universalem dixerim: quia influxus ejus à nulla creatura determinabilis est; ipse verò omnes causas secundas, tanquam creaturas sibi subordinatas, ad effecta sua efficaciter determinat, atque præmoveret, juxta, illud Prophetæ: *Ecquo dicente existit aliquid, si Dominus non præceperit? Thren. 111. 37.* Influxum itaque Dei indifferentem, & à creaturis determinabilem, quem nonnulli statuunt, nullum admittimus. Si tamen per influxum illum Dei generalem intelligamus vim illam conservatricem, quâ omnes creaturas efficaciter in suo esse conservat Deus, quomodo & Sol continuo influxu calorem in aëre, & secundum plerisque lumen, conservat; quo sensu Causam universalem explicare videtur Cartesius, influxus universalis admitti fortè posset. Præstaret tamen,

tamen, ad ambiguitatem vitandam, Causam universalem appellare primam & independentem, quæ absolute omnium motuum particularium fit causa; Particularem verò secundam & dependentem, quæ hujus aut illius particularis motus tantummodò causa sit. Quamvis ne sic quidem bonæ divisionis leges observentur, quarum una, quod membra dividenda semper inter se debeant esse opposita aut ab invicem distincta, hæc verò sibi invicem sint subordinata. Deus enim omnium particularium motuum & actionum causa est.

Sed ipsum Cartesium porro differentem audiamus: *Et generalem causam, inquit, quod attinet, manifestum mihi videtur illam non aliam esse, quam Deum ipsum, qui materiam simul cum motu & quiete in principio creavit, jamque per solum suum concursum ordinarium tantundem motus & quietis in eâ totâ, quantum tunc posuit, conservat.* Verissimum hoc quidem est, quod docet Cartesius, Causam primam haud aliam esse quam Deum ipsum, qui infinitâ suâ potentia Cælos & terram, omniâque quæ in iis entia existunt, adeoque omnem rerum naturalium materiam ex nihilo condidit, easdemque res conditas potenter conservat. At verò, qua ratione hoc ipsum à Cartesio hîc demonstretur, non liquet. Et quamvis omninò existentiam Dei hoc loco ex Metaphysica & Theologia naturali præsupponamus, haud tamen adeò manifestum videtur, Deum illum esse omnium rerum, motusque & quietis earum causam primam; Multò adhuc minùs manifestum est, Deum in principio cum materia omnem motum & quietem creasse; Et adhuc obscurius, tantundem motus & quietis nunc esse & conservari in materia, quantum ab initio in ea tunc posuit Deus, idque per ordinarium suum concursum. Hæc ergò singulatim examinanda sunt.

Præsuppositâ igitur Existentiâ Dei, prima quæstio est, Utrum Deus sit causa prima omnis materiæ corporeæ, nec non motus & quietis in ipsa; vel, An Deus in principio omnem materiam cum motu & quiete creaverit. Ego quidem sic existimo, ne unicam quidem vel minimam materiæ particulam sive atomum à creaturis produci posse, ac proinde non nisi creationis virtute ex nihilo potuisse condi. Probatur hæc sententia, quia atomi sunt entia simplicia, quæ non nisi ex nihilo produci possunt. Nam ens simplex ante sui productionem aut erat, aut non erat. Si erat, non fit aut producitur; quorsum enim vel quomodò produceretur id, quod jam omninò est aut existit? Si non erat, ergò antequam fieret aut produceretur erat nihil; quod enim non est, nihil est; ac proinde atomus producitur ex nihilo. Cùm ergò hinc manifestum sit,

materiam omnem, ejusque vel minimas particulas à Deo ex nihilo conditas esse, utique & infinitas ipsarum vires sive virtutes & proprietates, quæ ab ipsarum essentia in re non differunt, cum ipsis conditas esse apparet. Hinc ergò intelligimus, Deum ut materiæ primæ, omniûmq; particularum & atomorum, ità & naturalis cujuscunque particulæ motus atque quietis principii primam causam & Authorem esse.

Altera quæstio est, Utrum Deus à principio cum materia omnem actualem motum & quietem creaverit? Respondeo, meo quidem judicio, Creatio propriè loquendo non terminatur in modis rerum, aut actionibus, sed in rebus aut entibus ipsis, ità ut id, quod à Deo in principio fuit productum sit Ens actu existens; cùmque proprietates & virtutes entibus insitæ ab ipsorum essentiis in re non distinguantur, utique cum iis etiam virtutes infinitas creatas & conditas esse consequitur, ut jam probatum est. At verò aliud est virtus seu principium movendi, aliud motus ipse. Virtus movendi singulis particulis inesse potest, at inde tamen nequaquam actualis ipsarum motus colligitur. Homo ambulandi virtutem habet, non tamen semper actu ambulat. Præterea, motus actualis sæpissimè à partium compositione dependet, quemadmodum sanguis in corpore vivo per universum corpus movetur, & extra corpus, ad modum aliorum gravium, quiescit. Cùm itaque indies nova particularum fiat compositio, generatio item & corruptio, variæque particularum & atomorum creatarum permixtio, hinc quoque indies novos motus in rerum natura oriri mihi manifestum videtur. Sicut enim corpora naturalia indies intereunt & nova generantur, ità quoque motus ipsorum interire cum ipsis, novósque oriri necessum est. Quod ipsum ex ipsius quoque Cartesii sententia haud obscurè colligitur, quandoquidem nihil aliud motum esse vult quam modum corporis; intereunte ergò corpore vel subjecto, ejus quoque modum interire sequitur. Non ergò manifestum, sed falsum est, omnem motum ab initio esse conditum. Et similiter etiam de quiete judicandum est.

CAPUT XIX.

Utrum nunc tantundem sit motus in æternam naturam, ac fuit in principio?

Sequitur quæstio tertia, Utrum nunc tantundem sit motus in tota materia condita, & per ordinarium Dei concursum conservetur, quantum ab initio in ea posuerit Deus? Ex dictis patet in globo terrestri (ne de globis cœlestibus, Planetis, Astris, Cometis, &c. loquar, quorum

rum interiores motus ne à Cartesio quidem, aut quoquam mortalium, cognosci existimo) novos indies motus cieri; Et cum procul omni dubio plura nunc animata saltem corpora, homines, bruta, aves, pisces, arbores, plantæ, &c. sint in mundo, quàm quidem in principio à Deo sint condita; Ecquis dubitet, quin jam multò plus motus in terris reperitur, quàm in principio, cùm duo tantùm erant homines, & pauca admodùm animalia, aves, pisces, herbæ, &c. Cùm verò hæc sint perspicua, quis Cartesio asserta hæc sua manifesta fuisse dixerit?

Sed jam rationem Cartesii audiamus: *Nam quamvis*, inquit, *ille motus nihil aliud sit in materia mota quàm ejus modus; certam tamen & determinatam habet quantitatem, quam faciliè intelligimus eandem semper in tota rerum universitate esse posse, quamvis in singulis ejus partibus mutetur. Ità scilicet ut putemus, cum una pars materie duplo celerius movetur quàm altera, & hæc altera duplo major est quàm prior, tantundem motus esse in minore quàm in majore, ac quanto motus unius partis lentior sit, tanto motum alicujus alterius ipsi æqualis fieri celeriores.* Itane verò istac ratione ostenditur, Deum esse primam omnis materiæ, motusque in ea & quietis causam? Siccine probatur Deum omnem initio motum creasse & quietem, & tantundem nunc motus esse in rerum natura ac in principio? Motum Cartesius ad instar ipsius materiæ omnis collectivè sumptæ considerare videtur; adedque, quemadmodum tantundem nunc in toto universo materiæ reperitur, licet diversis vel pluribus in corporibus distributa sit, ac in principio; ità quoque tantundem nunc motus reperiri in universo, licet ille motus nunc in aliis fortè vel pluribus materiæ particulis distributus sit. Vel, ut alio simili declarem, quemadmodum ventus vel ær intestino aliquo, aliove corpore cavo flexili tamen, inclusus, nunc versus unam, nunc versus aliam partem moveri potest, manente tamen eadem sive venti sive æris in eo quantitate; perinde quoque Motum quasi ventum quendam aut ærem universo inclusum spectasse videtur Cartesius, qui semper ratione quantitatis idem sit in toto universo. Et quamvis nunc plus, nunc minus sit in hac vel illa mundi parte, omnes tamen partes simul non continere plus aut minus, quàm in principio à Deo sit conditus. At verò, utut hisce similitudinibus quodammodò explicari videatur, quomodo nunc tantundem motus in rerum natura esse possit ac fuit in principio, quid rùm postea? A posse enim ad esse non valet consequentia. Si tu tot nunc homines esse posse dixeris, quot ab initio olim fuere, nunquid propterea haud plures nunc esse, quàm fuerint olim conficias? Nos, ut corpora naturalia viva, homi-

nes,

nes, animalia, aves, pisces, aliâque plura temporis progressu multiplicata esse novimus, ità & motus corporum naturalium multiplicatos esse concludimus, & satis superque jam suprà demonstratum est.

Pergit Cartesius: *Intelligimus etiam*, inquit, *perfectionem esse in Deo, non solum quod in se-ipso sit immutabilis, sed etiam quod modo quam maxime constanti & immutabili operetur: adeò ut, iis mutationibus exceptis, quas evidens experientia, vel divina revelatio certas reddit, quasque sine ulla in Creatore mutatione fieri percipimus, aut credimus, nullas alias in ejus operibus supponere debeamus, ne qua inde inconstantia in ipso arguatur.* Nempe ex falsa hac sua hypothesi, quod Deus omnem materiam simul cum motu & quiete in principio creavit, quodque tantundem jam ut materiæ, ità & motus conservet, perfectionem Dei immutabilem colligit Cartesius; quasi verò ad immutabilitatem Dei conservandam operis immutabilitas necessaria esset. Sed, si vel omninò hypothesin istam concederemus Cartesio, num propterea opera Dei immutabilia dicemus, vel etiam ipsius operandi modum? Nonne generatione & corruptione continuas in rerum natura mutationes observamus? Et quoties Deum ab ordinario suo operandi modo, & providentiæ curriculo recedere advertimus? Et cùm, ipso Cartesio teste, evidens experientia varias mutationes indies fieri doceat, & scriptura confirmet, absque tamen ullo mutationis Dei argumento; utiqueneque quotidianas rerum mutationes, quæ in operibus Dei conspicuæ sunt, aliquam in Deo vel imperfectionem vel mutabilitatem arguere manifestum evadit. Adeoque non est, quod ex operum mutatione, sive tantundem motus conservet Deus in materia, sive continuò alios novosque producat, aliquam vel minimam in Deo inconstantiam metuamus. Ratio manifesta est, quia omnia ex consilio suæ voluntatis operatur Deus, teste Apostolo, & prout se in tempore operaturum æterno decreto immutabiliter constituit. Ità ut alia, eaque multò firmiora, pro immutabilitate & perfectissima Dei constantia argueamus.

Non ergò sequitur, ut Cartesius putat, *quam maxime rationi esse consentaneum, ut putemus ex hoc solo, quod Deus diversimodè moveri partes materie, cum primum illas creavit, jamque totam istam materiam conservet, eodem planè modo, eademque ratione qua prius creavit, eum etiam tantundem motus in ipsa semper conservare.* Nulla, inquam, hic sequela, quandoquidem Deus, sicut ex immutabilitate sui decreti Universi materiam creavit, diversissimæ naturæ particulas & atomos pro arbitrio suo producendo; ità etiam ex ejusdem decreti immutabilitate

bilitate; easdem materię mundanę particulas conservat, & movet.

CAPUT XX.

An, quod movetur, semper naturâ suâ moveri pergat?

EX immobilitate Dei jam porrò colligit Cartesius regulas aliquot, quas & Leges naturę vocat, quę sint causę secundarię ac particulares diverforum motuum, quos in singulis corporibus advertimus. Harum autem primam esse ait, *Unamquamque rem, quatenus est simplex & indivisa, manere quantum in se est in eodem semper statu, nec unquam mutari nisi a causis externis. Itâ si pars aliqua materie sit quadrata, facili nobis persuademus, illam perpetuo mansuram esse quadratam, nisi quid aliunde adveniat quod ejus figuram mutet; si quiescat, non credimus illam unquam incepturam moveri, nisi ab aliqua causa ad id impellatur; nec ulla major ratio est si moveatur, cur putemus, ipsam unquam sua sponte, & à nullo alio impeditam, motum illum suum esse intermissuram.* Si per se esse in eodem statu intelligatur eadem rei essentia cum suis attributis, proprietatibus atque virtutibus essentialibus, regula hæc, meo judicio, est certissima; quocirca & atomos, quas solas, inter res corporeas, simplices atque indivisibiles agnoscimus, (quia omne divisibile ex partibus esse compositum) ratione essentię aut naturę suę immutabiles asserimus. Si enim atomus, naturâ suâ mutaretur, vel aliam naturam acciperet, tunc eo momento, quo aliam naturam acciperet, suam retineret vel non; si retineret, duas jam simul naturas possideret, quod evidenter falsum, quia tunc semper diversas retinere posset, & indivisibilis naturâ non esset. Si non retineret, ergò amitteret suum esse, & consequenter periret, quod similiter est impossibile: quia atomus, ut ingenerabilis, itâ & incorruptibilis est. Et hinc sequitur, easdem non tantum ratione sui, verum etiam absolute immutabiles esse, ac proinde ne à causis quidem externis unquam mutari posse. Quod tamen non impedit quò minus ratione loci mutari, seu loco moveri queant, Neque enim mutatio loci mutationem essentię sive naturę arguit. Verum ergò est, & Atomos, naturâ suâ hac vel illâ figurâ præditas, tales quoque semper mansuras, quia nulla tam potens in rerum natura excogitari causa potest, quę naturam à Deo constitutam immutet. Adeoque illud Cartesii frustraneum videtur: *nisi quid aliunde adveniat, quod ejus figuram mutet;* siquidem nihil tale quid aliunde contra institutum Dei advenire potest, estque res notissima, naturam sui esse conservatricem, & nequaquam everforem.

K

Si

Si tamen de mutatione Loci sola quæstio sit, hanc ratione eorum, quæ quiescunt naturâ suâ, non nisi à causa externa advenire posse, non minus certum est; Sicut & ea, quæ naturâ suâ moventur, non nisi à causa aliqua externa sisti, aut in motu suo impediri possunt. Quia verò tum motus aliunde corporibus naturâ suâ quiescentibus impressus, tum quies ratione corporum naturâ suâ moventium, iis corporibus quasi repugnat, hinc ejusmodi motum & quietem pro communi accidentium natura per se evanescere existimo; quemadmodum lapidem projectum paulatim deficere, & tandem planè à motu suo violento cessare videmus, & quiescere. Ratio ergo esse videtur, cur putemus nonnunquam corpus, à causa externa motum, sua sponte motum illum suum esse intermissurum. Neque proinde conclusio illa Cartesii, qua, *id quod movetur, quantum in se est semper moveri*, affirmat, admitti potest, nisi ratione eorum motuum inanimatorum, quæ ex ipsa rei natura, & virtute innata seu essentiali proveniunt. Motum enim accidentalem seu adventitium sponte sua cessare jam notatum est.

Si quoque advertamus ad motus viventium, tum rationales & arbitrarios in hominibus, tum naturales in animatis, brutis atque plantis, eosdem quoque vel ex arbitrio, vel ultrò seu naturâ suâ cessare experimur. Sic homo ex arbitrio suo ambulans, ut quiescat, alia causa haud opus habet. Quod etiam in brutis verum est, neque enim, ut à motu suo cessent, causam externam requirunt. Motus quoque animatorum naturales, accretionis, nutritionis, &c. similiter ex se tandem cessare videmus; nempe ubi ad determinatos suæ à Conditore quantitatis terminos singula pervenerint. Sicut enim alia homini, alia elephanti, alia formicæ à Deo quantitas determinata est, ita quoque ad istam corpora quantitatem accrescere videmus, & tunc in isto statu ad tempus quasi quiescere, donec iterum decrescant, vel dissolvantur atque intereant. Ex quibus omnibus apparet, quàm etiam horum ratione infirmâ sit dicta Cartesii conclusio, quoniam multa sponte sua, multa ex natura sua quiescere à motu percipimus.

Sed, inquit Cartesius, hoc legibus natura quàm maximè adversatur; quies enim motui est contraria, nihilque ad suum contrarium; sive ad destructionem sui ipsius, ex propria natura ferri potest. Quietem non semper motui esse contrariam vel ex eo patet, quod sæpè nihil aliud sit quàm illius cessatio aut finis; unde & aliquandò rei perfectio dicenda videtur, veluti cum homo multo labore defatigatus tandem fine acquisito quiescit. Similiter determinata viventium figura & quantitas eorum quies est.

Quis

Quis verò viventia, ante illius acquisitionem, ad eam tendentia, ad suum contrarium ferri somniet, vel ad sui destructionem? Lapis in altum projectus suâ naturâ ad Terram fertur, ibidémque quiescit; nunquid propterea ipsum sui destructionem appetere dicemus? Quod si excipias, Cartesium non de mobili loqui, sed de ipso motu, cujus contrarium vult esse quietem: Respondeo, motum propriè non ferri ad quietem, sed mobile actu ad quietem tandem perducì, eámque sæpè appetere, ità ut quies non destructio motus, sed cessatio à motu, ejusque finis, seu permanentia mobilis in suo loco.

Putat tamen Cartesius quotidianâ experientiâ in iis, quæ projiciuntur, regulam suam omninò confirmari. *Neque enim*, inquit §. xxxviii. *alia ratio est, cur projecta perseverent aliquandiu in motu, postquam à manu jacente separata sunt, quam quia semel mota pergunt moveri, donec ab obviis corporibus retardentur.* Utique si hæc continuationis motus projectorum esset causa, quia semel mota pergunt moveri, donec ab obviis corporibus retardentur, sequeretur corpus vel levissimè motum in vacuo in infinitum motum iri, nec unquam ab illo motu cessaturum. Vera projecti lapidis motus causa est impetus illi à projectore impressus, continuationis verò illius impetus intensio, ità ut quo major aut minor illa fuerit, eò etiam motus continuatio sit futura vel brevior vel diuturnior. Sicuti enim calor aquæ impressus pro ratione intensificationis breviori vel longiori tempore durat, ità quoque impetum, adeòque & motum lapidis pro ratione intensificationis vel remissionis durare judicandum est. Interim impetum illum & motum ab obviis corporibus retardari quoque, atque destrui certissimum est.

Unde quoque cum Cartesio manifestum dicimus, corpora projecta *solere ab aère, aliisque quibuscumque fluidis corporibus in quibus moventur, paulatim retardari, atque adeò motum ipsorum diu durare non posse. Aërem quoque motibus aliorum corporum resistere, &c.* Hinc tamen nemo collegerit, corporibus iis remotis, aut absque retardatione ejusmodi corporum, motum semper duraturum. Aqua servida, si frigida ipsi affundatur, citius quidem pristinum recipiet frigus, nemo tamen inde, ipsam nunquam ad pristinum statum nisi frigida affusione reversuram, concluderit. Aërem quoque projectorum aliorumque corporum motibus resistere posse, non est ut probetur, neque quicquam nobis adversatur; quia resistantiâ motus sublata, perpetua tamen ejusdem continuationis non confirmatur; quemadmodum frigore externo sublato non tamen propterea perpetuitas caloris in aqua vel ferro concludi potest. Haftenus lex naturæ prima.

CAPUT XXI.


An omnis motus ex se tendat per lineas rectas.

Pergit Cartesius ad alteram naturæ legem §. xxxix. *Alteræ*, inquit, *Lex naturæ est; unamquamque partem materia seorsim spectatam non tendere unquam, ut secundum ullas lineas obliquas pergat moveri, sed tantummodo secundum rectas, etsi multe sæpi cogantur deflectere propter occursum aliarum, atque, ut paulò ante dictum est, in quolibet motu fiat quodammodo circulus ex omni materia simul mota.* Cùm totum nihil aliud quàm partes unitas contineat, utique eandem partium, quæ totius, naturam esse haud adeò absurdè statui posse videtur. Si ergò Totum hoc universum circulariter moveri cum Cartesio supponamus, utique & partes circulariter ex natura sua motum iri consequitur. Docuit hanc sententiam Galilæus Galilæi, *Dial. 1. de System. Mundi*, pag. 23. Ubi ita concludit: *Ex his concludo, solum motum circulem posse naturaliter convenire corporibus naturalibus Universum integrantibus, & in optima dispositione constitutis.* Et de recto motu porro sic ait: *Rectum autem, si plurimum largiamur, assignatum esse à natura corporibus & eorum partibus, quotiescunque extra loca sua in prava dispositione constituta esse, & proinde reductione ad statum naturalem per viam brevissimam indigere deprehenduntur.* Deinde etiam, si hæc rigidius excutiantur, negari posse ait, quod Terræ partes, totum suum repententes, moveantur per lineam rectam & non per circulem, aut aliam aliquam mixtam. Hujus autem rei demonstratio sic institui potest:

Esto A Terræ centrum, AB ejus semidiameter, circulus BEGI Terræ circumferentia, BC altitudo turris, quæ circumlata cum Terra vertice suo describit circulum CDFH: cogita cadere lapidem è vertice C, cùm autem lapis continuò turri quasi affixus maneat, & ad centrum Terræ properet, utique ipsum non nisi per arcum CELA moveri posse apparet. Existente enim turri in *a*, lapis erit in *f*; Quando verò turris est in *b*, lapis erit in *g*; & sic deinceps in punctis arcus CELA, correspondentibus punctis circuli CDFH, donec lapis quiescat ad limen turris, in E. Quod si ulteriùs ad centrum terræ descendere imaginemur, necessariò lapidem motum iri intelligitur per eandem circulem Lineam ab E in L; & ab L in A.

Et hinc tria notanda, quæ proinde hîc subjicio, consecutaria deducit Galilæus; quorum primum est, quod accuratè rem expendendo, mobile

ne accuratè mensurari posse, quanto temporis spatio mobile semidiametrum Terræ transire queat. Cum enim turris 24 horis cum Terra circumvolvatur, utique sex horarum spatio ipsam à C usque in H movendam esse colligitur; cùmque tunc mobile descendens per circum-



CEL esset in A, utique eodem temporis spatio semidiametrum Terræ absolvisset, & amplius, ut patet; quanto sc. arcus CELA, major est, quàm semidiameter CA. Posset & Quintum addi, quod etiam si turris bis terve, imò vel centies esset altior, ut in M, eodem tamen & æquali tempore mobile perveniret ad centrum. Dum enim apex turris cum terra moveretur per circum MQRS mobile descenderet per arcum MNA. Quibus & sextum subijcio, Mobile quo altius, eo quoque celerius per medium motum iri, siquidem eodem temporis spatio M, C, B, & O, ad centrum A pervenirent. Denique sequeretur lapidem ex C ter-

tia

tia sui motus ac temporis parte tantum perventurum ad E; descendisset ergo tantum per longitudinem turris CB vel DE; Altera verò sui motus tertiâ perveniret ab E in L; & ultimâ tertiâ ab L, in A centrum.

Quia verò confectaria hæc posteriora imprimis, quæ Galilæus non animadvertisse videtur, nimium mihi absurda videntur, & apertè falsa, quia sequeretur idem mobile eodem tempore spatia maximè inæqualia absolvere, mobilèque, quò centro vicinius, ut in O, eò quoque tardius motum iri; quin imò minimum circa centrum arcum ad sui transitum requirere sex horarum spatium, & id genus alia; utique & illud, unde hæc consequuntur, falsum esse existimo. Ut ut ergo motus circularis corporibus mundanis in loco suo naturali existentibus, ejusque partibus convenire queat, non tamen ea hîc ratione Philosophandum esse judico. Ego quidem motu terræ circulari concesso, cum diurno tum annuo, tam præcisè tamen aut curiosè hæcenus observatum non puto, quo in loco lapis è turri prolapsus decideret; Nam vel minima aëris motio variationem aliquam causare potest. Neque turris extat in toto orbe, cujus exteriores lineæ perpendiculariter tendunt ad centrum, quod tamen ad experientiam hanc esset necessarium. Interim, cum aër continuò cum turri moveatur orientem versus, utique & lapidem ab eo communi motu impetum sibi impressum habere certum videtur, unde, si in tam brevi distantia è turri prolapsus ad limen decidat, haud mirum esse apparet. Docet quoque experientia corpora pro diversa gravitatis ratione vel tardius vel celerius descendere; unde motus mobilium descendendum admodum inæquales esse percipitur, neque certam aut universalem motus lineam determinari posse.

Ut autem in perplexa hac controversia meum judicium paulò clarius exponam, sic quidem ego sentio, Materię aut Terræ particulas graviores, in loco quodam superiori extra suum locum naturalem consistentes, habere quidem semper conatum sibi insitum conjungendi vel uniendi cum suo toto, & existendi in loco suo naturali; adeòque easdem, sibi relictas & seorsim spectatas, semper ad eum per brevissimam, proindeque rectissimam lineam motum iri. Quod ergo non semper per rectam lineam deorsum moveantur, id imprimis corporibus occurrentibus, quæ istum motum impediunt & obliquum reddunt, attribuendum arbitror. Deinceps verò de iisdem particulis sic Philosophandum puto, nempe easdem in loco suo naturali consistentes non moveri aut per se motum iri sive directè, sive circulariter ad centrum, sed circa centrum motu cosmico Terræ. Lapidem igitur è superiori quasi terræ superficie desumptum

defumptum nunquam ad centrum perventurum, aut naturali suo motu pervenire posse judico. Ut ergò majora, ità & minora corpora, singulasque eorum particulas, ut naturam & virtutes, ità & sese movendi vires in loco sibi à Deo destinato accepisse putandum est. Quod si aliquandò extra istum locum ipsa deturbari contigerit, eò quidem ipsa motu rectilinetico, turbato tamen & irregulari progredi, ut cum toto suo conjungantur, concedo; ibidem tamen quasi quiescentia motu ordinario & cum suo Toto motum iri assero.

Et reverà, si omnes globi terrestres particulas ad centrum tendere statuamus, jam omninò nullam particulam in loco suo naturali esse sequeretur, omnesque alias ex loco suo expellere conari, quod absurdum videtur; Essetque perpetua particularum quasi pugna in Universo; cum tamen admodum sit probabile, Deum initio Mundum condidisse in statu perfecto, ità ut omnes illius particulæ in locis suis perfectissimè dispositæ fuerint. Quasdam ergò circa centrum proximè, quasdam in supremo juxta exteriorem Terræ superficiem loco, quasdam in media regione collocavit; Ubi & motum totius singulæ sequuntur, eumque sibi singulas insitum habere admodum mihi verosimile videtur. Quem admodum ergò terrestres particulæ graviores non ascendunt in aërem, ità neque infimæ regionis ascendunt in mediam, nec mediæ in supremam: Et similiter quoque nec supremæ regionis particulæ descendunt in mediam regionem, nec mediæ regionis in infimam; perinde ut neque aërem in terræ locum descendere videmus.

Patet ergò ex dictis secundam hanc Cartesii regulam admodum esse incertam, quâ unamquamque materiæ partem seorsim spectatam semper tendere ad motum rectilineum existimat. Et quamvis ratione particularum, extra locum suum naturalem consistentium, & à toto suo quasi avulsarum, lubenter istum motum concedamus, (ut constat ex dictis) ratio tamen à Cartesio data nullius est ponderis. Sic autem ipse procedit: *Causa hujus regule eadem est quæ præcedentis, nempe immutabilitas, & simplicitas operationis, per quam Deus motum in materia conservat; Neque enim illum conservat, nisi præcisè qualis est eo ipso temporis momento quo conservat, nulla habita ratione ejus qui fortè fuit paulò ante.* Misera sanè hæc ratio est. Jam suprà ex immutabilitate Dei nihil minùs quàm immutabilitatem in operibus demonstrari ostensum fuit. Et reverà, si immutabilitas operum argumentum esset immutabilitatis operantis Dei, nonne perspecta operum mutabilitate in promptu esset colligere Deum esse mutabilem? Deinde, cum corpora, fatente Cartesio, ex
occur-

occurſu aliorum ſecundum obliquas lineas moveri ſæpè cogantur; Num iſtòc tempore minùs conſtanter Deum motus eorum conſervare, quàm cum ſecundum rectas moventur, dicemus? Vel, num Deum ejuſve operationem in conſervatione recti motus ab aliorum corporum occurſu impediri arbitrabimur? Vel denique, ſi motum præciſe conſervet talem, qualis erat eo ipſo temporis momento quo conſervat, quare non ſemper rectum conſervat, cum talis in principio fuerit?

CAPUT XXII.

Oſtenditur motum fieri in inſtanti.

CARTESIUS, ut motum rectilineum ulteriùs confirmet, adducit exemplum lapidis, qui fundâ projectus non per curvâ aut circula-rem, ſed per rectam lineam progreditur. Quia verò hîc iterum ipſum hoc præjudicio occupatum video, quaſi nullus motus fieret in inſtanti, quod nondum ab ipſo probatum eſt, ipſam hanc ipſius hypotheſin paucis hoc capitulo examinare ſtatuimus. Sic autem ipſe diſſerit: *Ac quamvis nullus motus fiat in inſtanti*, &c. Equidem hanc ſerè hætenus, in Schola Philoſophorum, Peripateticorum imprimis, receptam fuiſſe ſententiam fateor, nullum motum fieri in inſtanti. At verò, qua ratione iſtæ ſententia demonſtretur, non video. Nos ergò etiam hoc præjudicio excuſſo, ſicuti lineam ex punctis ſive atomis, ità & motum continuum ex motibus inſtantaneis componi dicimus; ità ut motus inſtantaneus ſit pars, vel potiùs minima particula motus continui aut com-poſiti. Dari autem ejuſmodi motum inſtantaneum, ſic demonſtro: Ponatur linea conſtans decem punctis, fiat per eam lineam motus puncto aliquo vel corpore pyramidali; Quæro, utrum punctum illud primo motus momento partem aliquam iſtius lineæ tranſierit, nec ne? Si nihil tranſierit, motus non eſſet factus: Si ergò aliquid, vel aliquam lineæ partem tranſierit, habeo intentum; adeoque datur motus inſtantaneus.

Et hinc jam etiam abſque multo labore percipi poteſt, omnem motum præſentem tantum inſtantaneum eſſe poſſe, quandoquidem nihil temporis, quàm præſens eſſe poteſt. Sicuti igitur in tempore, præteritum non eſt, quia fuit, & futurum non eſt, quia erit; ità etiam analogicè de motu eſt judicandum. Pars enim motus præterita non eſt ampliùs, quia fuit; futura nondum eſt, quia erit: Ergò præſens tantum pars eſt motus; qui non niſi inſtantaneus eſſe poteſt, quia omnis motus, qui ſit in inſtanti, inſtantaneus eſt.

Præterea, ex hiſce aliud percipitur myſterium, nimirum omnem

L

rerum

rerum mutationem fieri in instanti, quamvis in uno momento perfectionem suam res non consequantur; adeòque totidem mutationis gradus vel partes concipiendæ sunt, quot momenta, quibus universa mutatio facta esse dicitur. Probatur autem hæc nostra sententia hoc modo: Id quod fit in præsentī, in momento proximè antecedenti vel erat, vel non erat: Si erat, ergò in præsentī non est factum, quod tamen supponitur; si non erat, ergò in præsentī momento factum est; si enim non esset in præsentī momento factum, adhuc esset in statu futuritionis, quod similiter est contra suppositum. Quicquid ergò fit vel mutatur, fit in præsentī momento, quod erat demonstrandum.

CAPUT XXIII.

Inquiritur quare lapis è funda projectus moveatur per lineam rectam.

Posito igitur Motum fieri in instanti, quod ipsum & Cartesium suspicatum fuisse existimo, jam quomodo ulterius motum suum rectilineum confirmet, audiamus; sic autem procedit: *Ac quamvis nullus, motus fiat in instanti, manifestum tamen est, omne id quod movetur, determinatum esse ad motum suum continuandum versus aliquam partem, secundum lineam rectam, non autem unquam secundum ullam lineam curvam.* Quam parùm hæc omnia veritati sint consentanea, jam in præcedentibus visum est. Neque enim aliquem duntaxat, verum & omnem in instanti fieri motum ostendimus. Præterea, corpora mundana in naturali suo loco consistentia ad circularem motum esse determinata, probatum est. Quin imò, si quis impossibilem, saltem inutilem, motum rectilineum ratione corporum mundanorum dixerit, haud præter rationem Philosophabitur. Circularem certè motum ne ipse quidem Cartesius negare potest, siquidem ipsam Terram, omnesque Planetarum globos circulariter circa Solem moveri asserit. Partes tamen à toto avulsas, atque adeò in loco præternaturali constitutas, naturâ suâ ad totum suum ferri idque per lineam brevissimam, ac proinde & rectam ulterò datus Cartesio. At verò, qua vel rationis specie ex motu ejusmodi quasi accidentali partium generalis quædam naturæ Lex stabilietur?

Vera quidem hæc sunt, quæ tradit Cartesius, scilicet lapidem fundâ per circulum rotatum, non circulariter, (nempe spectando circulum, quem funda per aërem describit) sed per lineam rectam motum iri; at veram, hujus rei rationem ignoravit, & ignorant quotquot atomos nostras non admittunt. Saltem ex sententia Cartesii explicari non posse ex eo patet, quia nullus lapidis, cum funda circumrotati, motus nisi curvus

& eas rectas esse intelligitur. Egrediat^{ur} jam lapis ex funda E A, in lineola A. Quia autem lineola A, ulterius extensa fertur in G. hinc patet quodque lapidem per eam lineam motum iri. Si verò lapis egrediat^{ur} ex funda in B, tendet versus C. si ex F, tendet versus H. & ita de cæteris. Vult Cartesius *omne corpus, quod circulariter movetur, perpetuo tendere ut recedat à centro circuli quem describit.* Sed præterquam quod nulla hujus rei ab ipso trandatur ratio, fingi quoque nequit, quare, vel ista data hypothefi, lapis A, non tendat versus D. Si enim à centro sui circuli naturaliter recedat, quare potius in G, quàm in D. nisi quia omnis circuli particula, ex quarum una lapis egreditur, sit recta; quæ proinde exinde rectam quoque necessàriò lineam describit in G, & non in D aut in K.

CAPUT XXIV.

Quomodo motus mobili communicetur.

Sequitur tertia Cartesii Lex, ut vocat, quæ agit de modo, quo motus à movente mobili communicetur. Notandum igitur, hoc loco non agi de motu naturali, seu de principio motus essentiali, sed de adventitio seu accidentali, quod principium vulgò *Impetum* vocare soleamus, quod in momento quasi & unico ictu à movente mobili imprimitur. De hoc autem Impetu sententia nostra est, eum, cùm sit accidens, de uno mobili in aliud transire non posse; quod tamen non impedit, quò minùs tanquam instrumentum moventis impetum in alio mobili sibi occurrente causare queat; sicut & corpus calidum calorem in alio causare, non verò proprium transfundere, potest.

Jam verò Cartesium audiamus. Sic autem ille §. XI. *Tertia*, inquit, *Lex natura hac est. Ubi corpus quod movetur alteri occurrit, si minorem habeat vim ad pergendum secundum lineam rectam, quàm hoc alterum ad ei resistendum, tunc deflectitur in aliam partem, & motum suum retinendo solam motus determinationem amittit; si verò habeat majorem, tunc alterum corpus secum movet, ac quantum ei dat de suo motu, tantundem perdit.* Vult ergò Cartesius primò, corpus debilius à fortiori occurrente repulsum, in aliam partem deflecti quidem, motum tamen suum retinere, & determinationem tantùm ejusdem amittere. At non distinguit Cartesius inter motum & impetum mobili impressum, qui est motus sive movendi formale principium, ut patet ex dictis. Dico igitur, corpus debilius motum à fortiori occurrente sive resistente repulsum motum suum amittere, impetum verò adhuc retinere; hunc autem ipsi inhæ-

inhærentem impetum à corpore resistente determinari ad aliam partem; quod idem est ac si dicas, corpus motum per lineam rectam à resistente versus aliam partem moveri. Ex. gratia, Projiciatur pila in hunc parietem, pila non amittit statim impetum sibi à projectore impressum, à pariete tamen determinatur ad motum versus aliam partem continuandum. Determinatio ergò motus à corpore occurrente dependet. Quid autem est motus determinatio, quàm motus determinatus aut modificatus à movente? Differunt igitur impetus & illius determinatio, ut accidens & illius modificatio. At verò, cum motus determinatio in re nihil aliud sit, quàm certus quidam & determinatus motus, sicuti figuræ determinatio nihil aliud est, quàm figura determinata, hæc vel illa; quomodo hîc motus determinatio mutari queat, absque ipsius motus mutatione, non video. Sicut enim mutatâ figurâ determinatâ necessariò ipsa figura illa mutatur, perinde mutato motu determinato & ipsum motum mutari necesse est, quia in re non differunt. Quin imò, si hoc negotium adhuc curiosius perpendamus, patebit exemplo allato, motum pilæ non tantum, dum reflectitur à pariete, mutari; sed omnem præcedentem pilæ repercussæ motum jam evanuisse, & prorsus esse ablatum, addoque alium esse motum in pila reflexa, quàm antea erat; imò singulis momentis quasi novum in ea ab impetu inhærente reproduci: Siquidem motus, qui præterit, amplius esse non potest; quemadmodum nec tempus præteritum amplius esse potest, quia fuit. Et hinc jam constat, non satis accuratè à Cartesio dici, corpus debilius à resistente deflecti in aliam partem, & tamen motum suum retinere; cum, ut temporis, ita & motus quasi particulæ, continuò evanescant & pereant: Quamvis ratione ejusdem impetus inhærentis mobile motum suum continuare vulgò dicamus.

Deinde vult Cartesius, corpus motum, si majorem habeat vim, quàm alterum cui occurrit ad ei resistendum, tunc illud secum convec-turum, quod certissimum est; Et hinc magna aquarum vi aggeres sæpè perrumpi videmus, qui minori antea resistebant. Hoc tamen hîc notandum videtur, quod addit Cartesius, corpus motum *tantundem sui motus* (id est, impetus, quem perpetuò cum motu confundit) *deperdere quantum corpori occurrenti de suo dat.* Neque enim putandum est impetum ab uno corpore migrare in aliud; hoc enim naturæ accidentium repugnat. Accidentia non transmittuntur de subjecto in subjectum, alia tamen vel similia in alio subjecto causare possunt; quemadmodum & corpus calefactum calorem suum in aliud corpus non transmittit, causare tamen similem in corpore sibi contiguo calorem potest.

Pergit Cartesius: *Ità experimur*, inquit, *dura quælibet corpora projecta, cùm in aliud durum corpus impingunt, non ideo à motu cessare, sed versus contrariam partem reflecti*; Non quælibet, sed debiliora duntaxat corpora, si in aliud durum, putà fortius, impingant, versus contrariam partem reflectentur; nempe propter rationem jam dictam, quia in resistendo fortius est, adedque impetum versus aliam partem determinat, seu actionem ejus modificat. *Contrà verò*, pergit, *cùm occurrunt corpori molli, quia facile in illud motum omnem suum transmittunt, ideo statim ad quietem reduci*; Veluti, si projiciatur pila in arenam sive lutum, non resiliat. Quæritur, quæ ratio, cùm in parietem vel terram duriorē projecta statim resiliat? Cartesius dicit, quia facile in corpus molle motum suum omnem transmittit. Sed hîc prius probandum erat, corpus molle facilius, quàm durum motum, seu potius impetum, recipere. Neque enim video molliora facilius, quàm duriora moveri posse. Certè longè altius pilam duram vel lapidem projeceris, quàm spongiam, quæ mollis est. Deinde, si hoc omninò concederetur, rediret quæstio, quare corpus molle facilius motum, quàm durum recipiat? Meo itaque judicio, corpus durum, putà hic lapis, in lutum projectus mox à motu suo cessat, quia particulas in luto offendit cedentes, non statim, ut in aëre, (sic enim ulterius progrediretur) sed lentè, ità ut eò quoque fortius, quàm aër resistat; atque ità fit, ut dum eas particulas movere, vel percurrere conatur lapis, omnem proprium motum seu impetum amittat; quamvis interim in particulis, quas attingit, etiam motum quendam seu impetum producat.

Quod porrò Cartesius ait, *omnes causas particulares mutationum, quæ corporibus accidunt, in hac tertia lege contineri*, vereor ut verum sit. Nam præterquam, quod nec Angelorum, nec mentium humanarum (quibus procul omni dubio vis maxima corpora movendi inest) motus circa corpora hisce regulis explicari nequeant, ut ipse Cartesius haud obscure fatetur; viventium quoque aut animatorum motus, aliosque sive naturales sive animales, satis intelligibiliter iis explicari posse, haud existimo.

Corpus motum debilius à fortiori occurrente in motu suo versus aliam partem determinari jam suprà concessum est; Motum tamen accurate loquendo non retineri, sed ejus formale principium sive impetum quoque notatum est. Demonstrare tamen suam sententiam conatur Cartesius his verbis, §. XLI. *Quia differentia est inter motum in se spectatum; & ipsius determinationem versus certam partem; quâ fit, ut ista determinatio possit*

possit mutari, motu integro remanente. Nullam inter hunc vel illum numero motum ejusque determinationem in re differentiam esse, sufficienter patet ex dictis, licet in genere mentis operatione motus ab illius determinatione possit abstrahi, quemadmodum & hominis in genere potest esse conceptus, licet non cogitemus hunc aut illum in individuo: quod profecto in re nullam differentiam arguit. Falsum est ergo determinationem alicujus motus posse mutari absque mutatione ipsius motus. Impetum tamen sive formale movendi principium manere posse ultro concedo, ut patet ex dictis. De causa quoque perseverantiæ istius interni motus principii, ejusque cessationis jam satis supra actum est. Nempe principium formale motus essentielle mobili naturâ suâ inesse, adeoque & perpetuum, adventitium verò & accidentale suâ naturâ perire, ostensum est. Motum quoque motui contrarium non esse, dicitur quidem à Cartesio, at nusquam probatur. Nos contrâ, siquidem per motum impetum mobili inexistentem intelligat, cum unus alium expellat, eisque quàm maximè adversetur, eos quoque contrarios esse arbitramur; adeoque, quæcunque hîc à Cartesio dictantur, prorsus incerta, obscura, & partim falsa sunt.

Demonstratio quoque alterius partis, quam instituit Cartesius, §. XLII. ex immutabilitate operationis Dei prorsus nullius est ponderis, neque quicquam facit ad rem. Quænam enim hæc est consequentia: Deus mundum eadem nunc actione conservat, qua olim creavit, ergo tantundem nunc motus est in mundo, quàm fuit in principio? Vel, ergo, quantum corpus motum alteri de suo communicat, tantundem perdit? Pergit Cartesius: Cum enim, inquit, omnia corporibus sint plena, & nihilominus uniusque corporis motus tendat in lineam rectam, perspicuum est, Deum ab initio mundum creando, non modo diversas ejus partes diversimodè movisse, sed simul etiam effecisse, ut une alias impellerent: motusque suos in illos transferrent: adeo ut jam ipsum conservando eadem actione, ac cum iisdem legibus, cum quibus creavit, motum non iisdem materie partibus semper infixum, sed ex unius in alias, prout sibi mutuo occurrunt, transcurrentem conservet. Sicque hæc ipsa creaturarum continua mutatio, immutabilitatis Dei est argumentum. Multa hîc quoque partim incerta, partim falsa infarciuntur; Nempe, omnia, sensu antè à Cartesio explicato, corporibus esse plena; Motum uniuscujusque corporis tendere in lineam rectam; Deum ab initio mundum creando effecisse, ut corpora motus suos in alia transferrent, &c. De quibus, cum jam abundè in præcedentibus à nobis actum sit, operæ pretium non esse videtur, ut quicquam amplius addamus.

Im-

Immutabilitatem Dei, summamque ipsius constantiam alio quoque argumento demonstrari notatum fuit. Et reverà, cùm ex operationum mutabilitate omnium creaturarum mutabilitas maximè conspicua sit, quomodo ex hoc fundamento immutabilitatem Dei asstruere velit Cartesius, non percipio. Ego potiùs supplicarer Immutabilitatem Creatoris vel indirectè negari, vel saltem in dubium vocari ab eo, qui non aliud ad eam demonstrandam argumentum adduxerit. Cùm enim axioma ferè apud omnes receptum sit, rem se habere in esse, ut in operari; quis non multò probabilius ex mutabilitate vel continua operis mutatione ipsius operantis mutabilitatem, quàm immutabilitatem argui existimet? Nos ergò non mutationem operis, sed immutabilitatem decreti, cui examussum omnia omnino opera Dei conveniunt, immutabilitatis & constantiæ divinæ argumentum esse asserimus; neque mutabilitas operis, quæ extra Deum est, mutationem ullam in divina essentia arguere potest; perinde ut neque ex mutatione rerum sublunarium ullam in Sole dari mutationem colligitur. Quemadmodum ergò, licet eadem causa diversorum effectuum effectrix esse possit, non tamen ex diversitate effectuum rectè unam tantùm eandemque causam esse colligas; ità quoque, licet Deus ex immutabili suo decreto diversa opera, variosque motus & continuas rerum mutationes ipè natura efficiat, haud tamen ex continua operandi mutatione immutabilitatem ipsius firmâ consequentiâ deduxeris.

CAPUT. XXV.

Vis agendi & resistendi corporum in quo consistat.

Hic porrò diligenter advertendum ait Cartesius §. XLIII. in quo consistat vis cujusque corporis ad agendum in aliud, vel ad actioni alterius resistendum; *Nempe inquit, in hoc uno, quod unaquaque res tendat, quantum in se est, ad permanendum in eodem statu in quo est.* Ubi primò notandum, confundi à Cartesio vim agendi & resistendi. Meo quidem judicio, vis agendi seu potentia corporis activa ipsi naturalis est, (quamvis & accidentalis aliunde accedere possit) adeòque ab ipsa natura sive essentia corporis in re non differt. Et ratio est, quia alioquin sequeretur naturam seu essentiam corporis alicujus in individuo ex se indeterminatam seu indifferentem esse ad omnes operationes; & consequenter natura trunci vel lapidis vulgaris æquè determinari possit ad attractivam ferri operationem ac magnetis, quod absurdum. Natura enim cujuslibet

bet agentis naturalis ex se ad unum determinata est, ac proprii tantum motus causa ac principium. Si ergo natura seu essentia ex se determinata sit, frustra ponitur potentia tanquam accidens aliquod illi superadditum, aut ab ea distinctum. Præterea, si essentia per se & immediatè ejusmodi potentias producit, ut volunt; Ergo essentia in se habet principium producendi potentiam; Ergo naturâ suâ est principium activum; Et, si potest esse principium activum ratione potentia, quare non etiam posset esse principium activum ratione operationis, aut aliorum effectuum?

At verò vis resistendi mihi nihil aliud esse videtur, quàm firmitas connexionis partium, seu firma partium connexio. Quò enim alicujus corporis particulæ facilius dividuntur ab invicem, & recedunt, ipsum quoque eò minùs alteri resistere dicitur. Unde quoque minimam esse resistantiam eorum corporum manifestum est, quorum particulæ minùs, maximam verò, quorum particulæ maximè & firmissimè conjunctæ sunt. Cùm itaque, experientia teste, aër minùs resistat, quàm aqua, & aqua minùs quàm terra, & in terra argilla minùs quàm plumbum, & plumbum minùs quàm ferrum, &c. facile percipimus Terri particulâs maximè, aëris verò omnium minimè conglutinas sive unitas esse. Ex quibus me colligere posse arbitror, nullam in atomis sejunctis aut particulis minimis ante unionem resistendi virtutem esse; Unde porro infero, resistendi virtutem non in singulis particulis aut atomis, quæ tamen agendi virtutem obtinent, sed in sola unionem aut connexionem earum querendam esse.

Et hinc quoque patet, utramque hanc virtutem non esse positam in inclinatione quadam rei ad permanendum in eodem statu, in quo est. Quàmvis enim unumquodque permaneat in statu suo naturali, ab eoque non nisi vi quadam externa demoveatur, admodum tamen *αὐτὸν ἀποκινῶν*, illa permanentia ponitur tanquam finis rei permanentis, ad quem tendat. Præterea, si vel nullam agendi in aliud virtutem esse in subjecto ponamus; nunquid propterea ipsum in suo statu non permanensurum dicemus? Etiam minima atomus immutabiliter in rerum natura existit, habetque proinde in suo statu permanendi vim, non tamen resistendi, ut constat ex dictis; Non ergo satis accuratè vis corporis tum agendi in aliud, tum alterius actioni resistendi hic à Cartesio descripta est.

Et hinc quoque nullius momenti esse constat ea quæ sequuntur; sic enim loquitur: *Hinc enim id, quod alteri conjunctum est, vim habet nonnullam, ad impediendum ne disjungatur; id quod disjunctum est, ad manendum*

dum disjunctum; id quod quiescit, ad perseverandum in sua quiete; atque ex consequenti ad resistendum iis omnibus, quæ illam possunt mutare; id quod movetur, ad perseverandum in suo motu, hoc est, in motu ejusdem celeritatis, & versus eandem partem. Nempe hæc omnia eò redeunt: Unumquodque est, & manet id quod est, conjuncta manent conjuncta, disjuncta manent disjuncta, quieta in quiete, & quæ moventur in suo motu. Sicut enim vis agendi nihil aliud est quàm potentia, ità quoque vis existendi vel permanendi nihil aliud est quàm existentia seu permanentia & duratio ipsa. Quàm ergò hæc omnia parùm veritati sint consentanea vel cæcus videret. Si enim unumquodque vim dicamus habere permanendi in suo statu, in quò est; quænam excogitari poterit ratio, quò minus omnia æternùm in isto statu perseverent, & nunquàm de eo deturbentur? Si dicas, unumquodque de suo deturbari statu non à se, sed ab alia causa externa; regeo, ergò illud non habere vim resistendi, aut impediendi sui interitum, quam tamen illi attribuere videtur Cartesius. Præterea, quæ vel levissima ratio cogitari potest, ob quam suspicemur unumquodque Ens in suo esse, motu, & quiete permanendi vim habere, & resistendi omnibus iis, quæ illum statum possint mutare? Quæ ratio persuaserit, ut huic muscæ vel vermiculo, vel arbori vim inesse judicem; quâ perpetuò in suo esse, motu & statu perseverent? Quis mihi demonstret huic corpori vim inesse ad resistendum aut impediendum, ne unquam in partes dividatur? Et quis denique credat avi inesse vim, quâ perpetuò in motu suo seu volatu persistat?

Sed jam porrò, vim hanc suam quomodo amplius declaret Cartesius, expendamus: *Visque illa, inquit, debet æstimari tum à magnitudine corporis in quo est, & superficiei, secundum quam istud corpus ab alio disjungitur; tum à celeritate motus, ac natura & contrarietate modi, quo diversa corpora sibi mutuò occurrunt.* Non distinguit iterum Cartesius inter agendi & resistendi vim. Agendi virtus cùm in re nihil aliud sit, quàm ipsa essentia aut natura rei, utique à magnitudine corporis aut superficiei, vel etiam à motu nequaquam dependere ipsam manifestum est. Similiter & parva magis aliquandò, quàm magna resistere vel exigua ferri docet particula, vel etiam thorax ferreus, qui plumbo sclopo emissio resistit, quod crassiorẽ ligni tabulam perrumperet. Si tamen de virtute motiva quæstio sit, fatendum quam plurimùm artificialem imprimis admodum adaugeri non tantùm à magnitudine corporis, verùm etiam à figura, motusque imprimis determinatione, ut cochleæ, vectes aliæque instrumenta mechanica evidenter demonstrant.

CAPUT XXVI.

Motus celeritas & tarditas quid sint disquiruntur, & explicatur.

AD Motus naturam clariùs percipiendam imprimis quoque cognitu necessarium videtur, quid celeritatis & tarditatis nominibus intelligatur, neque enim hoc omnibus obvium est. Huic autem disquisitioni occasionem præbent ea, quæ hic & numero sequenti à Cartesio de celeritate & tarditate differuntur, ubi tarditatem absque ulteriori inquisitione de quietis natura participare ait. Ad hujus autem rei intelligentiam recordandum est, quod suprà de motu instantaneo à nobis dictum est. Deinde & hoc notandum, unum corpus vel corpusculum in duobus simul locis esse non posse. Tertio & hoc supponendum, omnem atomum seu particulam indivisibilem suum quoque occupare seu implere spatium.

Hisce positis & prænotatis dico, mobile unico instanti seu momento non posse nisi spatium indivisibile pertransire, neque plus, neque minus. Si enim plus transiret, in eodem instanti esset in duobus locis simul; si minus, non moveretur, sed quiesceret. Et hinc jam, quid de celeritate aut tarditate motus judicandum sit, clarè intelligitur. Nimirum, Motus ille celerrimus erit, si singulis momentis sibi continuo succedentibus continuetur; tardior verò, si inter momenta motus interjiciantur momenta quietis. Exemplo res fiet clarior: Sit linea constans decem punctis indivisibilibus seu atomis. ^A
a. b. c. d. e. f. g. h. i. k. & moveatur per eam

mobile A, Cùm igitur mobile A, non possit simul, seu in eodem instanti esse in a. & b. utique antequam ab a. moveatur in b. momentum requiri apparet, ità ut ad minimum decem requirantur momenta, antequam A, universam lineam transire queat. Si enim paucioribus momentis posset universam transire lineam, necessariò in uno momento deberet esse in duobus punctis, quod est impossibile.

Patet igitur, Motum celerrimum per illam lineam fore, si peragetur momentis decem; Et consequenter, si impendantur momenta 20. vel 30. motum fore duplo vel triplo tardiorè. Cùm igitur singulis momentis tantum unicum indivisibile spatium absolvi possit, neque plus neque minus, ut suprà dictum est; utique, si ad lineæ istius transitum impendantur 20. momenta, 10 eorum esse momenta quietis consequitur. Unde quoque solum motum celerrimum reverà continuum esse apparet, reliquos verò omnes, licet continui appareant, Quietis interjectas habere,

eoque vel plures vel pauciores, quò motus tardior vel celerior esse dicitur.

Hiscæ jam de celeritate ac tarditate motus præmissis, jam cum Cartesio progrediamur; sic autem ille, §. XLIV. *Notandum est unum motum alteri motui æquò veloci nullo modo esse contrarium: sed propriè tantum duplicem hic inveniri contrarietatem.* Equidem quid hic sibi velit Cartesius, aut quò hæc faciant, aut quomodò cohæreant, non capio. Si enim duplex inveniatur contrarietas, quomodò unus motus alteri non est contrarius? Aut, si unus alteri nullo modo sit contrarius, quomodò duplex invenitur contrarietas? Ego quidem motus sibi mutuò contrarios dixerim, qui sese mutuò ex eodem expellunt subjecto, vel qui sibi mutuò adversantur. Sic motus sive æqualiter sive inæqualiter veloces sibi mutuò occurrentes contrarios arbitror, quemadmodum generatio & corruptio contraria appellatur. Quodlibet enim mobile alteri occurrens illud in motu suo vel impedit vel turbat, ejusque proinde motum sive impetum impressum vel diminuit vel tollit.

Sed audiamus ipsum Cartesium, ejusque duplicem contrarietatem. *Una, inquit, inter motum & quietem, vel etiam inter motus celeritatem & tarditatem, quatenus scilicet ista tarditas de quietis natura participat.* Veram motum inter & quietem contrarietatem non esse suprà demonstratum est, cùm quies haud rarò motus putà adventitii imprimis sit perfectio & finis. Celeritatem quoque interque tarditatem nullam esse contrarietatem ex eo patet, quia tarditas & celeritas non nisi gradu differunt, quatenus scilicet tarditas plures quietes habet interpositas, ut modò à nobis ostensum est. Cùm ergò quies motui contraria non sit, utique neque tarditatem celeritati contrariam esse sequitur.

Altera contrarietas, pergit Cartesius, est *inter determinationem motus versus aliquam partem, & occursum corporis in illa parte quiescentis, vel aliter moti, atque pro ratione partis, in quam corpus alteri occurrens movetur. Hac contrarietas est major vel minor.* Cùm determinatio motus nihil aliud sit quàm motus determinatus, præter quem alius in rerum natura nusquam datur; utique sequitur hisce verbis nihil aliud velle Cartesium, quàm quod jam modò dixi, omnem motum contrarium esse motui, quem vel impedit vel diminuit, vel mutat, vel planè aufert. Quæ profectò contrarietas varios habet gradus, quatenus motrix illa virtus in uno se magis exerit, quàm in alio, ut sua luce clarum est.

Adeoque & hinc determinari posse, quantum cujusque corporis motus sive impetus mutetur propter aliorum corporum occursum facile concesserim; ut docet Cartesius, §. XLV. Fatendum quoque duobus positis

positis corporibus, *illud semper quod valentius est sortiri suum effectum, diminutum tamen atque labefactum ab imbecilliori corpore, ut patet.*

CAPUT XXVII.

Durities & fluiditas corporis, quid sint, explicatur.

Subjicit deinceps regulas aliquot Cartesius, sc. à §. XLVI. ad §. LIII. quas observarent duo corpora planè æqualia, *si sibi mutuo occurrerent, eaque essent perfectè dura, & a reliquis omnibus sic divisa, ut eorum motus à nullis aliis circumjacentibus impedirentur nec juvarentur; Quia verò istarum regularum usum difficilem, vel potius nullum, esse advertit, §. LI. propterea, quod corpora duo in rerum natura, quæ sibi mutuo tantum occurrerent, nusquam inveniri possunt, cum unumquodque corpus à multis simul tangatur, idque diversimodè, prout scilicet alia dura sunt, alia fluida; idcirco illorum corporum diversitas, in quo consistat, hinc sibi quærendum esse tradit. Nos itaque regulis illis prætermisiss, quod nullius sint usus in rerum natura, sequentia tantum, magis ad naturam corporum spectantia, examini nostro subjiciemus:*

Sic ergo progreditur Cartesius, §. LIV. *Nempe sensu teste, non aliam, diversitatem inter dura & fluida, agnoscimus, quam quod fluidorum partes facile recedant ex locis suis, atque idèò manibus nostris versus illa se moventibus non resistant; contra autem durorum partes ita sibi mutuo cohaereant, ut non sine vi, quæ sufficiat ad istam illorum coherentiam superandam, sejungi possint.* Peripatetici duritiem accidens esse volunt, & speciem qualitatis. At verò multò hinc subtilius Cartesius noster de duritie Philosophatur, cui tamen per omnia absolutè assentiri non possumus. Quod ergo primò dicit, nos agnoscere, quod fluidorum partes facile recedant ex locis suis, atque manibus nostris non resistant, verissimum est; neque enim aliud sensu nostro de materia fluida cognosci potest; ita ut fluiditas nihil aliud esse videatur, quam carentia resistentiæ, aut firmæ connexionis partium. Unde & quò minùs materia aliqua resistit, particulasque minùs connexas habet, eò quoque magis fluidam eam esse sequitur. Hinc porrò, duritiem nihil aliud quam partium coherentiam aut connexionem esse, dicendum apparet. Quò ergò materiæ particulae magis & arctius coherent, eò quoque durius esse corpus colligitur.

Pergit Cartesius: *Et ulterius investigantes, inquit, qui fiat, ut quedam corpora sine ulla difficultate loca sua corporibus aliis relinquunt, alia*

non item; facile advertimus, ea quæ jam sunt in motu, non impedire, ne loca quæ sponte deserunt ab aliis occupentur; sed ea, quæ quiescunt, non sine aliqua vi ex locis suis extrudi posse: Unde licet colligero, corpora divisæ in multas exiguas particulas, motibus à se mutuo diversis agitata, esse fluida; ea verò, quorum omnes particule juxta se mutuo quiescunt, esse dura. Procedit hic satis acutè Cartesius; hoc tamen advertimus, haud rectè ex motu fluiditatem colligi, aut ex quiete duritiem. Ponamus enim Universum mundum & durissima moveri corpora, nunquid propterea ea fluida dicemus? Et si aqua quiesceret in suo loco, anne idcirco duram diceremus? Omnibus ergò ritè expensis constat fluiditatem oriri ex particularum separabilitate, vel etiam ex actuali divisione, duritiem verò ex particularum connexione aut firma cohæsiōe; ità ut quò magis connexæ fuerint particule, aut firmiùs cohæserint, eò quoque corpus aliquod durius esse judicemus. Sive igitur particule agentur sive quiescant, modò separabiles vel divisæ sint, totum fluidum dicimus; imprimis cum agitatio particularum non tantùm efficiat, ut corpora aliena facile ingrediantur, verùm etiam aliquandò eadem impendant, veluti quando agitatio fit in contrariam partem. Colligimus ergò, quò corporis alicujus particule magis & firmiùs cohærent, eò quoque durius esse; & quò minus cohærent, eò esse mollius adedque magis fluidum; Unde & aqueas particulas minùs quàm terreas, & aëreas minùs quàm aqueas cohærere consequitur: Siquidem faciliùs per aquam quàm per terram, & adhuc faciliùs per aërem motum fieri experimur.

Cum ergò in partium cohæsiōe vel divisione duritiem & fluiditatem corporis consistere dictum sit, utique inquirendum venit, quid sit illud, quod particulas cohærere facit, aut quid tollatur, cum dura liquefcunt & fluida redduntur. Cartesius solam quietem vult esse glutinum illud, quo partes connectantur. *Neque profectò, inquit, §. LV. nullum glutinum possumus excogitare, quod particulas durorum corporum firmiùs inter se conjungat, quàm ipsarum quies.* Certè, cum quies nihil aliud sit, quàm vel à motu cessatio, vel permanio potiùs in suo loco, & multa corpora etiam fluida in loco suo permaneant, & nequaquam moveantur; utique quietem glutinum non esse partium manifestum est. Quare enim quies non posset concipi in partibus divisis? Aquam vitro contentam quietam videmus, (si enim moveas, varias simul in ea moveri particulas facilè oculo percipies.) & tamen nemo duram dixerit.

Sed quomodò hoc suum glutinum confirmat Cartesius? *Quidenim, inquit,*

inquit, esse posset glutinum istud? non Substantia, quia cùm particula iste sint substantia, nulla ratio est cur per aliam substantiam potius quàm per se ipsas iungerentur: non etiam est modus ullus diversus à quiete; nullus enim alius magis adversari potest motui, per quem ista particule separantur, quàm ipsarum quies. Atqui præter substantias, & earum modos, nullum aliud genus rerum agnoscimus. Ad naturam glutini rectius investigandam, notemus corpus aliquod durum, putà lignum. Hoc projiciamus in ignem, ut comburatur. Igni autem experimur particulas ligni ab invicem separari, ità ut quædam in fumum atque vapores, quædam in flammæ, quædam in cineres resolvantur. Certè aliquas harum particularum glutinosas fuisse necessum est. Neque enim cineres licet quiescentes inter se amplius cohærent; aqueis particulis eas quoque connexas non fuisse patet, quia aquâ iis affusâ nunquam tamen tam firmiter eas cohærere videmus. Consequens ergò est, particulas sulphureas, & pingues, sive oleosas & viscosas fuisse glutinum, quo cineres isti imprimis ante ipsorum dissolutionem sibi mutuo firmiter cohærebant.

Quod ut adhuc clariùs percipias, nota à Chymicis quælibet ferè corpora resolvi in diversas naturas maximè inter se differentes; harum subtilior & volatilior, Spiritus appellatur, vel etiam Mercurius. Crassior verò oleum dicitur, & sulphur; quæ verò maximè fixa est, sal nuncupatur. Superest deinceps materia quædam terrea admodum & inutilis, quàm fæces vocant, & caput mortuum. Est denique aqueus quidam & insipidus liquor, quem phlegma dicunt. Hæc autem omnia, si iterum misceantur & jungantur, idem rursus ex iis oriri corpus reipsa demonstrant. Sic & aurum, argentum, stannum, plumbum, aliæque extracto quodam humido in calcem reducere norunt, humido autem calci adjuncto metallum ejusdem naturæ cum præcedenti conficiunt.

Ex hisce ergò clarissimè percipitur, glutinum esse particulas quasdam corpori permixtas, quibus omnes firmiter inter se connexæ sunt. Non ergò quies particularum ipsa glutinum esse potest, licet enim cineres quiescant, non tamen cohærent aut connexæ sunt, ut per se patet. Notandum autem hic est, particulas sive atomos glutinosas esse diversæ naturæ, (neque enim omnes in eodem gradu glutinosas aut viscosas esse putandum est,) & hinc quoque unius corporis particulas magis quàm alterius connexas esse videmus. Deinde & hoc notandum, corpora quædam solis glutinosis particulis constare, quibus proinde glutinis nomen propriissimè convenit; hujusmodi ergò particule, cùm se-ipsis cohære

rere queant, glutino alio, quo cohæreant, non habent opus. Denique & hoc notandum, ad cohærentiam particularum actualementer plerumque frigus aliquod requiri in particulis glutinosis, quo rigescant. Sicut enim calore particulas cohærentes dissolvi, ita frigore easdem concrefcere atque arctius cohæreere experimur. Patet hoc in Metallis, auro, argento, plumbo, aliisque, quæ calore liquefcunt, frigore verò durescunt, ut sensus ostendit. Similiter & ceram, adipem, sebum, picem, butyrum, imò & ipsam aquam frigore rigescere, calore verò liquefieri, alia citius, alia tardius videmus. Ex quibus omnibus me colligere posse arbitror, frigus primariam & formalem esse causam duritiei, saltem eorum corporum ratione, quorum particulas glutinosas ipso rigidas fieri constat. Nam & aquam farinâ permistam, ova, saccharum, sal, aliæque quædam liquida calore durescere certum est. Quædam item corpora difficilius liquefcunt, & non nisi intensissimo calore, ut metalla, aurum, argentum, ferrum, &c. Quædam verò facillimè & minimo calore, ut butyrum, adeps, cera, &c. Quædam denique nulla ratione liquefcunt, ut Ligna, lapides pretiosi, gemmæ, adamas, &c. Ex quibus omnibus manifestum arbitror, pro diversorum corporum ratione de duritiei & fluiditatis causis Philosophandum esse; adeoque nullam adeò generalem causam hæcenus assignatam esse, quæ in omnibus duritiem causet aut fluiditatem, cum hæc omnia ex diversitate atomorum, quibus corpora naturalia constant, explicari debeant.

CAPUT XXVIII.

Uterius ostenditur fluiditatem non consistere in motu particularum.

QAmvis fluidorum particulae facillè recedant ex suis locis, atque manibus nostris non resistent, ut supra à nobis concessum est; haud tamen ex eo colligendum arbitramur, ipsam fluiditatem in motu illo particularum formaliter sitam esse; adeoque & hic à Cartesio dissentire cogimur. Sed & ipsum de hoc negotio audiamus, §. LVI. *Quantum*, inquit, *ad fluida, etsi sensu non advertamus, ipsorum particulas moveri, quia sunt nimis exigue, facile tamen ex effectibus id colligitur, præcipue in aëre & aqua, ex eo quod alia multa corpora corrumpant: neque enim actio ulla corporea, qualis ista corruptio est, sine motu locali esse potest, & causæ ipsorum motus infra dicentur*: Vult ergò Cartesius, omnes fluidorum corporum particulas in continuo esse motu, etsi sensu non percipiatur. At, quæso, impleatur hoc vitrum aquâ purâ & limpida, vel vino, nonne parti-

particulas illius quaquaversum moveri & inter sese agitari oculis nostris videmus, & tandem ad quietem reduci? Si etiamnum moveri particulas, etsi non amplius motus percipiatur, dixeris, negare tamen haud poteris, quin in principio, dum eas moveri visu tuo percipiebas, magis motæ & agitatæ fuerint, quod denuò experiundo cognoscas. Si igitur in motu fluiditatem vini consistere putes, utique in principio magis quàm jam liquidum fuisse vinum sequetur, quod tamen nemo concesserit, neque ulla ratio dicat. Deinde, si totum corpus visu nostro percipiatur, quare, si omnes moveantur particule, id ipsum à sensu nostro non advertitur? *Quia, inquit Cartesius, particule nimis sunt exigua.* Verùm enimverò, quamvis atomos singulatim sumptas vix ullas visu nostro percipi posse, facillè concesserim, num propterea conjunctæ visum nostrum non afficient? quomodò ergò antea vinum primò infusum & agitur particulas moveri video, si nimis exiguae sint? Et, cum omnes simul conjunctæ appareant, certè singularum exiguitas, quò minus videantur, non efficit. Nam quid aliud, quæso, in vino vides, quàm illius particulas? Quod si unam vel alteram in vino particulam moveri fingeres, exiguitatem illarum fortè causari potuisses, quò minus visu percipiatur; at verò cum omnes moveri versus omnes partes putentur, cæcus profectò sit necesse est, qui motum illum non advertat.

Neque ratio ab effectis desumpta contrarium demonstrat. Nam licet omnino aëri aut aquæ vim corrumpendi alia corpora concedamus, eamque corruptionem non absque motu explicari posse fateamur; aquæ tamen vel aëris fluiditatem in particularum motu sitam esse nullà inde legitimà colligitur consequentiâ. Etsi enim fluida naturâ suâ non moveri statuimus, aliunde tamen ea moveri nihil repugnat. Aërem, ut & aquam vento moveri serè continuò notum est; at vento hanc aut illum fluidum reddi quis credat? Præterea, si aquæ particulas in continuo motu esse ponamus, jam nullum in eo omnino corpus quietum existerè posset; quia corpus durum in fluido existens à minima vi moveri potest. At verò contrà plurima sæpè corpora dura absque ullo motu in vase aquâ vel liquore alio repleto videmus. Nullum ergò in aquâ particulis esse motum, omnes autem quiescere argumentum est.

Denique, si particule fluidorum semper moverentur, quæro in quam partem? Occidentem versus an Orientem? Neutrum affirmare potes, quia tunc omnia corpora illis innatantia versus eandem partem necessariò moverentur, quod tamen non videmus. Si dicas, versus omnes partes moveri; id certè de omnibus particulis intelligi non potest, estque impossibile,

sibile, ut vel una particula simul versus plures & oppositas se moveat partes. Si ergo quasdam huc, quasdam illuc, atque ita omnes promiscue inter se confuso modo agitari finxeris; quero, à qua causa, cum motu naturali & innato tam contrarii & confusi motus in eodem subjecto esse nequeant? Et quæ ratio, quod una particula magis quam altera versus hanc partem determinetur, cum omnes ejusdem naturæ esse supponantur? Certè hæc omnia, cum intelligibiliter explicari non possint, nec fluiditatem in motu, nec duritiem corporum naturalium in quiete consistere fatis superque me demonstrasse existimo. Neque exempla à Cartesio allata quicquam ad rem faciunt, cumque multa iis jam supra refutata, & falsa contineantur, omniâque ex antecedentibus facili negotio percipi queant, non est quod ulterius in eorum examine immoremur.

Quia verò adhuc aliud obijci sibi posse advertit Cartesius, quod quam maximè sententiæ suæ de fluiditate & duritie corporum per motum & quietem partium explicatæ adversatur, illud hoc quoque loco sibi explicandum duxit. Sic autem ait, §. LXIII. *Unum autem adhuc est, in quo experientia regulus motus, paulo antè traditis, valde videtur adversari; nempe quod videamus, multa corpora, manibus nostris longè minora, tam firmiter sibi mutuo adherere, ut nulla earum vi sejungi possint. Si enim illorum partes nullo alio glutino sibi invicem adhereant, quàm quod singula juxta vicinas quiescant, & omne corpus quod quiescit, ab alio se majori quod movetur, possit ad motum impelli, non apparet prima fronte ratio, cur exempli gratia clavus ferrens, vel aliud quodlibet, non magnum, sed valde durum corpus, sola vi manuum nostrarum in duas partes dividi non possit. Licet enim unamquamque mediam partem istius clavi pro uno corpore numerare. Cumque ista media pars manu nostra sit minor, videtur ejus vi debere posse moveri, atque sic ab alia media parte divelli. Non certè de nihilo hocce est argumentum, quod præter multa jam supra recensita Cartesii sententiam plane evertat. Hujus autem vis ut rectius percipiatur, sumatur corpus durum, sive hæc Lamina plumbea vel ferrea, vel etiam hæc penna vel calamus, partes ejus sejungere aut distrahere nequeo. Quero igitur, quare minùs à me id fieri queat, cum alia corpora longè majora, putà hæc massa cerea, hoc lignum, facili negotio à me rumpantur? Nulla certè hic ratio reddi potest, quàm quod particulæ plumbeæ vel ferreæ firmiùs cohereant, quàm hujus ceræ vel ligni? Certè partium quies istius diversitatè ratio esse nequit, quia æque ligni aut ceræ, quàm ferri aut plumbi partes quiescere video. Præterea, limà vel alio instrumento laminam istam, & pennam scalpello in duas partes divido, partesque divi-*

fas

fas juxta se colloco, ut contiguæ sint, seque mutuò exactè tangant. Jam verò facilè eas separo. Quæ ratio? Neque enim nunc minùs quiescunt divisæ, quàm antea unitæ. Non ergò quies glutinum est, quo particulæ sibi mutuò cohærere Cartesius existimat.

At, quomodò explicat hanc difficultatem Cartesius? *Notandum est*, inquit, *manus nostras esse admodum molles, sive ad naturam corporum fluidorum, magis quàm durorum, accedentes; ideoque non totas simul agere solere in corpus ab iis movendum, sed eam tantum ipsarum partem, que corpus istud tangens, tota simul in illud incumbit.* Verùm hæc ratio frigida est, & nullius ponderis. Eadem enim manu alia corpora, tum majora vel centies graviora juxta se posita movere possum & ab invicem distrahere, hæc tamen pennam vel tenuissimum hoc filum ferreum distrahere nequeo. Et licet vel universa manus ferro esset obducta, nondum tamen clavum ferreum, imò ne hanc quidem aciculam in duas partes dividendo el distrahendo es; adeoque & reliqua nullius sunt momenti.

CAPUT XXIX.

De externa corporum naturalium figura.

Sequitur §. LXIV. Ubi, huic Philosophiæ parti finem impositurus Cartesius, sic loquitur: *Nihil hic addam de Figuris, nec quomodo earum infinita varietate, motuum quoque varietates innumere consequantur, quia satis ista per se patebunt, ubicunque usus veniet, ut de ipsis agamus.* Horum verborum occasione quædam de externa corporum naturalium figura explicanda veniunt. Notandum igitur est, res omnes viventes & animatas imprimis, earumque partes determinatos magnitudinis suæ & parvitatæ habere terminos & figurationes. Neque enim Elephas potest esse sub parvitate formicæ, nec homo sub magnitudine montis, nec oculus sub figura auris, &c.

Suprema autem hujus rei causa nulla alia esse potest, quàm Deus ipse, omnium rerum Conditor, qui pro absoluto suo beneplacito, ut esse, ita & tale esse, sub hac vel illa quantitate, & figura, omnium, quæ condidit, entium determinavit ac delineavit. Si verò de causa proxima & principio formali quæstio sit, qua fiat, ut etiamnum hujusmodi delineamenta, quantitates atque figuræ determinatæ in viventibus reperiantur, utique aliam haud posse assignari existimo, quàm vim quandam formatricem seu plasticam, quam omnium rerum omnibus divinitus impressam esse certum est. Sicuti enim impetus, pilæ à projectore impressus, aliquan-

dij in ipsa perseverat, quemque alteri pilæ sibi occurrenti communicare potest: ità etiam cogitare possumus, Deum primis rerum individuis ab ipso determinatis indidisse vim quandam plasticam, quam & suis posteris immutabili lege communicent. Præterea, sicuti in officinis vitrariorum videre est vitra cujuslibet figuræ constari secundum impressiones ipsis primò à vitriario factas; ità quoque individua diversæ figuræ atque delineationis generari videmus ex diversis seminibus, prout scilicet diversas impressiones à Conditorè in principio acceperunt. Et hinc ex semine humano homines, equino equos, canino canes, &c. generari atque formari experientia docet.

Et hinc jam quoque patet, corporum naturalium differentiam dependere non tantum ab interno singulorum temperamento, Atomorum partiumque dispositione, verum etiam ab externa eorum delineatione, atque figura, quibus determinata sunt. Et quia externa hæc delineatio atque figura imprimis nobis hominibus est conspicua atque sensibilis, hinc est ut ea corpora, quæ ejusdem vel similis ferè figuræ esse apparent, eodem nomine communi seu specifico appellare soleamus: quæque proinde ejusdem speciei esse dicuntur.

Ità ut diversitas corporum naturalium determinatorum, quæ specifica vulgò dici solet, non primariò internam naturæ diversitatem arguat, sed externam ratione quantitatis & figuræ delineationem, et si plerumque externa illa differentia figuræ etiam internam naturæ arguat. Neque enim ulla ratione fit verosimile, primos illos, *opa uatobi rae*, cum corporibus primò nomina imponerent, quicquam de singulorum internis, sive formis, sive temperamentis, sive qualitatibus, quas ne cognoscere quidem potuerunt, cogitasse. Nomina igitur ipsos diversa iis corporibus attribuisse credendum est, quæ diversa quantitate, figura, ac delineatione prædita esse videbant.

Cum verò paulatim experientia & usu innotesceret, non omnia illa corpora, quæ externè similia apparebant, etiam internè similia esse, aut ejusdem naturæ atque temperamenti, mox quoque diversa, quibus discerni possent, nomina iis imposita esse putandum est. Et quia corpora liquida, aliisque quæ determinatos à natura terminos non habent, externè seu externa delineatione aut figura discerni non possunt, ut aqua & vinum; hinc diversa iis nomina imposita esse apparet, quia diversas eorum naturas seu qualitates internas esse advertebant. Unde quoque facile percipitur non omnes corporum naturalium motus à figuræ diversitate aut varietate dependere, sed imprimis ex interna ipsorum natura atque tem-
pera-

peramento, quod, meo iudicio, nihil aliud est, quàm multarum qualitatum in corpore naturali concurrentium congeries. Quemadmodum enim ex multis variisque particulis oritur unum corpus, quod compositum dicitur, ità quoque ex multis earum particularum qualitatibus oritur una mixta seu composita qualitas, quæ Temperamentum appellatur, de quo latius in Philosophiæ nostræ Lib. VII. Exerc. XXXVII.

Atque hæc quidem ad Principia rerum naturalium, secundum Philosophiam Cartesii, notata sufficiant.

F I N I S.

I N D E X

A L P H A B E T I C U S

Rerum præcipuarum, quæ hoc Examine continentur.

A.

A ccidentia non migrant de subiecto in subiectum.	85
Aër an rarefieri queat.	14
—— comprimi & extendi potest.	ibid.
—— est corpus rarum.	43
—— poris suis summum & vapores recipit.	65
Aëris una particula mota, non est necesse omnes moveri.	ibid.
Agendi & resistendi vis differunt.	88
Agendi virtus non dependet à magnitudine.	90
Aquæ fluiditas non consistit in particularum motu.	97
Atomum naturali virtute produci nequeunt.	69
—— non nisi ex nihilo producibiles.	ibid.
—— natura sua sunt immutabiles.	73
—— sunt principia omnium corporum naturalium.	45
—— extensionem non habent, licet quanta dici queant.	46
—— ne cogitatione quidem sunt divisibiles.	ibid.
—— determinata; quibus existant, habent spatiola.	67
Atomorum existentia demonstratur.	44-65
—— à Cartesio agnita videtur.	66
—— cognitio summè necessaria.	45
—— numerus ratione nostri innumerabilis.	66
In Atomis nulla resistendi vis.	89

I N D E X.

B.

Bruta alio modo à rebus corporeis affici videntur, quàm homines. 6

C.

Calore particula glutinosa liquecunt. 96

Cartesii contradictio. 10

———— paralogismus. 28.40.50

Cavitas absque corpore cogitari potest. 41

Causa diviso in universalem & particularem examinatur. 68

Celeritatem inter & tarditatem non est contrarietas. 92

———— sed tantum distinctio graduum. ibid.

Chymici corpora in diversas naturas resolvunt. 25

Cogitatio sive conceptus est actio mentis interna. 33

Condensatio quid secundum antiquos. 12

Continens & contentum plus quam ratione differunt. 25

Contractio opponitur extensioni. 16

Corpus sensu imperceptibile nullum. 14

———— sine qualitate sensibile non est. 2

———— per se nec magnum nec parvum. 19

———— genericum non datur. 20.16

———— quare divisibile. 23

———— idem quomodo majorem quantitatem suscipere queat. 42

———— compositum partes suas actu continet. 45

Corporis existentia unde constet. 3

———— de ea dubitationes quae moveri possent. 2

———— essentia an consistat in trina dimensione. 10

———— vera definitio, genus, differentia. 11

———— ad ejus verum conceptum formandum quid requiratur. 8. 12

———— ad ejus cognitionem requiritur cognitio proprietatum. 52

Corpore in eodem varii motus considerari possunt. 62

Corpora omnia extensa non sunt. 21

———— quae minus resistent. 88

———— mundana ad circularem motum sunt determinata. 82

Corporum diversitas etiam à materia dependet. 54

Creatio in quo terminetur. 70

D.

Deus an deceptor esset, si rem alio modo proponeret ac est. 2

———— an non possit rem immaterialem, ut corpoream proponere. ibid.

abique

ALPHABETICUS.

— ubique essentialiter existit.	37
— indivisibilia creando suam potentiam non dimittit.	47
— extra suas creaturas an nusquam sit.	49
— aliam materiam creare potuit.	50
— plura potest facere, quam nos concipere.	51
— haud recte statuitur causa universalis.	68
— <u>naturalis</u> motus atque quietis causa prima.	70
— singulis pro arbitrio determinatos quantitatis suae terminos assignavit.	99
Dei voluntate omnia fiunt, & existunt.	50
Deum esse causam primam haud evidenter à Cartesio probatur.	69
Dextrum & sinistrum non arguunt extensionem.	22
Differentia corporum naturalium unde dependeat.	100
Differentia specifica animalium quid arguat.	ibid.
— vera an <u>cognosci</u> queat.	8
Distantia quid sit.	42
— absque corpore intermedio cogitari potest.	41
Divisibilitas corporis proprietas non recte statuitur.	13
— quibus competat.	23
Divisibile an quid negativum.	ibid.
— omne compositum, habetque rationem totius.	45
— cogitatione, non semper est divisibile alicui.	46
— & divisum differunt.	24
Divisio an ducat ad corruptionem.	ibid.
— infinita & definita an differant.	67
— causa in universalem & particularem, qualis.	68
Divisionis bonae membra debent esse opposita aut distincta.	69
In Divisionibus corporum tandem necessario perveniri ad ultimam.	10
Durities quid.	23
— unde oriatur.	24
E.	
Ens duplex immateriale & materiale.	11
Essentia & proprietates non distinguuntur realiter.	20
Extensile unum corpus magis quam aliud, quare.	44
Extensio quid.	16
— quibus corporibus conveniat.	ibid.
— opponitur contractioni.	ibid.
— etiam Loco & spatio convenit.	11
	non

I N D E X.

— non convenit omni corpori, nec semper.	22
— quatenus spiritibus conveniat.	ibid.
— corporea quomodo ab immateriali differat.	11
— eadem eidem non semper convenit corpori.	23
— nihil facit ad conservationem.	24
— etiam variis non-corporibus convenit.	41
— generica nulla datur.	ibid.
— qualibet non est corpus.	48
— vix aut parum facit ad cognitionem rei.	52

F.

Figura quid.	28.57
Fluiditas corporis quid.	93
— Unde oriatur.	94
Fluidæ particule non semper moventur.	96
Frigus primaria duritiei causa.	ibid.
Frigore particula glutinosa rigescunt.	ibid.

G.

Genericum corpus non datur.	20.26
Generici conceptus non explicant rem.	52
Glutinum, quo partes connectuntur, quid sit.	94
— quomodo cognoscatur.	ibid.

I.

Idea materia multiplicis in nobis datur.	51
Idea corporis, & idea spatii aut loci differunt.	27
Impenetrabilitas quid.	11
— proprietas materie.	53
Immutabilitas Dei unde consistet.	72.88
— ad ejus conservationem non requiritur Immutabilitas operum.	72
Impetus quid.	84
— non transit de uno mobili in aliud.	ibid.
— distinguitur à motu.	ibid.
Indefinitum quid.	49
— & infinitum an differant.	ibid.
Influxus Dei indifferens & à causis secundis determinabilis nullus est.	68
— generalis qualis admittendus.	ibid.

L.

ALPHABETICUS.

L.

Lapis fundà projectus quare moveatur per Lineam rectam.	82
Latera vasis quadrati vel rotundi non possunt esse contigua.	41
Linea circularis constat ex lineolis rectis.	83
Liquida quaedam calore durescant.	96
Locus & res locata diversa significant.	28
—— sumitur vel absolute vel relativè.	29
—— aliquando pro spatio ab arbitrio determinato.	31
—— aliquando pro spatio apparente.	32
—— spatium, & vacuum quomodo differant.	33
—— non est superficies corporis ambientis.	34
—— nec medium quid inter ambiens & ambitum.	35
Loci distinctio in internum & externum inepta.	34
—— mutatio essentia mutationem non arguit.	73
In Loco eodem duo corpora simul esse non possunt.	11
Lumen non nisi in corpore opaco.	39

M.

Magna corpora quæ.	17
Magnum & parvum relativa.	18, 19
Materia eadem quomodo sub diversa quantitate apparere queat.	17
—— totius Universi non est eadem.	51
—— ejus variatio absque motu fieri potest.	54
Mathematici à materia abstrahunt.	15
Mentis judicium quamdiu suspendendum.	7
Mobile motum non necessario modaliter mutatur.	52
—— unico momento transit tantum spatium indivisibile.	21
Mobilitas nihil ponit in mobili.	33
Moto uno corpore non movetur necessario aliud.	62
Motus non est modus.	57
—— an fiat per circulum.	63
—— & virtus movendi differunt.	70
—— omnis ab initio non est productus.	ibid.
—— ad omnem generationem necessarius.	54
—— datur præter localem.	55
—— Localis quid.	56
—— absque eo multa fiunt.	54
—— quomodo semper sit in mobili.	57

I N D E X

— non est res subsistens.	57
— rationalis ex arbitrio cessat.	74
— projecti lapidis, ejusque continuationis <i>causa</i> .	75
— naturalis non fit per lineam rectam.	80
— particularum Terre qualis.	79
— praesens tantum instantaneus.	81
— celerissimus quis.	91
Motus mutatio non infert semper mutationem modi.	57
— determinatio quid & unde.	85
— — absque motus mutatione mutari non potest.	87
— particula, ut temporis, evanescent.	85
— celeritas & tarditas quid.	91
Motum inter & Quietem non est contrarietas.	92
— instantaneum dari probatur.	81
Motus tardiores omnes quietes intermixtas habent.	91
— contrarii qui.	92
Moveri, & non moveri idem corpus diversa ratione potest.	30
Moveantur absolute quae, & quiescant.	39
Id quod movetur, an semper moveatur.	74, 75
Movendi virtus quomodo augeatur.	87
Mundus à Deo conditus in statu perfecto.	80
Mundi totius materia non est eadem.	51
— spatium amplissimum ut sit, majus tamen concipi potest.	ibid.
Mundum extensionis sua terminos habere ostenditur.	48
Mutatio rerum fit in instanti.	82
N.	
Natura motus & quietis principium quo sensu.	54
— sui semper est conservatrix.	73
— ipsa per se est principium activum.	89
Navis, mutata superficie ambiente, quo sensu in eodem loco manere dicatur.	36
Nomina rebus unde imposita.	100
Non-Ens reale non est nihil.	41
O.	
Objecta diversimode homines afficiunt.	7
Occupare locum & spatium alterius an differant.	33
P.	
Partes quae tales sunt indivisibiles.	45
Particulae glutinosae.	95
Per-	

ALPHABETICUS.

Permanendi <i>vis in suo statu an omnibus insit.</i>	89
Pila in arenam vel lutum projecta, quare non resiliat.	86
Potentia activa non distinguitur ab ipsa essentia rei.	89
Proprietas quid.	53
—— ab essentia non distinguitur realiter.	20
—— materia est impenetrabilitas.	53

Q.

Qualitas quid.	9
—— duplex, sensibilis & intelligibilis.	5
—— sensibilis à sensu diversimodè percipitur.	6
—— non nisi relativè rebus attribuitur.	ibid.
—— intelligibilis rebus relativè convenit.	ibid.
Quantitas, quomodo distinguatur à corpore.	15
—— & extensio quomodo distinguantur.	16
—— non nisi relativè rebus attribuitur.	ibid.
—— materia, an pendeat ab extensione.	44
Quantitatis nomine quid intelligant Philosophi.	17
—— determinatos terminos habent viventia animata.	99

Quies quid.	57, 58, 75
-------------	------------

—— non semper motui contraria.	75
—— non est glutinum partium.	94

Ad Quietem an tantundem actionis requiratur, quàm ad motum.	58
---	----

Quiescere res dicitur vel absolutè vel relativè.	57
--	----

Idem quomodo dici possit Quiescere & moveri.	ibid.
--	-------

R.

Rarefactio & condensatio quid ex Antiquorum sententia.	12
Rarefactione nova quantitas non acquiritur.	13
Corpora spongiosa quomodo Rarefiant.	43
Resistendi vis.	88

S.

Sensus quid doceant.	5, 6
—— non sunt rejiciendi.	7
Situs quid significet.	28
Spatium, Locus, & Vacuum quomodo differant.	33
—— an significet trinam dimensionem.	34
—— in infinitis particulis divisum concipi nequit.	67
—— Universi immobile.	29
—— differt à corpore.	25
—— corpore remoto manet idem.	28

INDEX ALPHABETICUS.

<i>Stellæ non moventur loco, etiamsi totum cælum moveri ponamus.</i>	31
<i>Superficies corporis ambientis non est Locus.</i>	34
T.	
<i>Tarditas motus quid.</i>	91
—— & <i>celeritas, quomodo differant.</i>	92
<i>Temperamentum quid.</i>	101
<i>Terræ motu posito, non sequeretur tamen omnia corpora Terræ moveri.</i>	61
—— <i>partes circulariter moveri colligit Galileus.</i>	76
—— <i>particula quando ad centrum properent.</i>	79
—— <i>centrum an lapis appetat.</i>	ibid.
<i>Totius ad motum non sequitur motus partium.</i>	31
V.	
<i>Vacuum quid.</i>	29
—— <i>spatium, & Locus quomodo differant.</i>	33
—— <i>relativum vel absolutum.</i>	37
—— <i>ex usu vulgi non excludit omne corpus.</i>	ibid.
—— <i>quare non posse dari Philosophi putent.</i>	ibid.
—— <i>dari posse ostenditur.</i>	38
<i>Vas inter & corpus contentum non est necessaria connexio.</i>	40
<i>Vicina corporum non est Locus.</i>	59
<i>Vini particula an moveantur.</i>	97
<i>Virtus plastica determinata quantitatis proxima causa.</i>	99
<i>Vitrum poro non habet.</i>	39
<i>Unio corporis & animæ an ex sensu & dolore certò concludatur.</i>	4
<i>Unitas communis materia conceptus quid arguat.</i>	51
<i>In Unitate an omnia conserventur.</i>	24
<i>Univerſi motus percipi nequit.</i>	30

F I N I S.

111 1453930